

萬有文庫

第一集一千種

王雲五主編

明史紀事本末

(七)

谷應泰著

商務印書館發行

萬有文庫

第一集一千種



商務印書館發行

明史紀事本末

(七)

谷應泰著



國家學基本叢書

05 1

11 100



星 3421—7

7623  
22 v. 7-12

300 312

武宗正德四年秋九月畿南盜起時劉瑾用事專恣驕橫京師之南固安永清霸州文安地方京衛屯軍  
 雜居其地人性驕悍好騎射往往邀路劫掠號響馬盜至是聚黨益熾瑾欲速除之分遣御史甯杲於真  
 定殷毅於天津薛鳳鳴於淮陽專事捕盜舊例御史出不得以家屬隨至是杲等許攜家往以滅賊為期  
 鳳鳴在歸德與守備指揮石璽會飲令人歌舞為樂邏卒奏之傳旨降鳳鳴為徐州弓手毅在天津稍收  
 斂惟杲奏立什五連坐法盜賊捕獲無虛日每械盜賊入真定用鼓吹前導金鼓之聲彌日不絕瑾以捕  
 盜功擢杲毅僉都御史仍專督捕盜

五年冬十月霸州降盜劉六劉七叛初霸州文安縣大盜張茂家有重樓複壁多為深窖同時劉六劉七  
 齊彥名李隆楊虎朱千戶等皆附之諸大璫多文安人茂通賂納交太監張忠者號北墳張與茂居鄰結  
 為兄弟因得徧賂馬永成谷大用輩常因內官家人出入禁中進豹房觀上蹴鞠益無忌憚河間參將袁  
 彪數敗賊茂竄乃求救於忠忠置酒私第招彪與茂東西坐舉酒屬彪字茂曰此彥實吾弟耳今後好相  
 看無相扼也又舉屬茂曰袁將軍與爾好今後無擾河間彪畏忠不敢誰何諸將聞風縮朒及甯杲至有  
 巡捕李主簿承杲意偽作彈琵琶優人入茂家具知曲折杲率驍勇數十人乘不備掩擒之斧折茂股載

048639

歸。餘賊相率至京。謀道罪。忠與永成爲請於上。且曰。必獻銀二萬。乃赦之。劉瑾家人梁洪亦索萬金。六七。楊虎計無所出。潛劫近境。冀以足所獻。會虎焚官署。六七知事敗。散去。六七膽大。弓矢絕倫。諸盜皆畏之。涿州州官知其能。召至協捕。有功。御史蔣瑤亦用而賞之。或勸瑤并絕禍本。二人竟颺去。杲仍圖形捕之。逮繫妻孥。盡破其家。六等窮蹙憤恚。乃相聚抗官府。劫行旅。旣。劉瑾伏誅。杲亦被劾。麾下健兒多歸之。詔下討賊。仍許自首免罪。六等遣其姊出首。自領三十四人詣州。知州郭坤以聞。貫之令捕他盜。自效。至是復叛去。往附畿內盜白英。時英已流劫至山東。

六年春正月。霸州巨盜劉六。劉七聚衆攻安肅縣。劫取繫獄盜黨齊彥名。時窮民響應。旬日間。衆至數千。劫掠畿南州縣。霸州文安生員趙風子者。名鏐。有勇力。好任俠。每大言自負。先是。劉六等攻掠文安。鏐率妻子避賊立水中。賊劫其妻。將汙之。鏐怒。奮往殺傷二賊。爲劉六。劉七所擒。說使降。許納歸家。與弟鏞。鎬聚五百人。會於河間。由是賊黨益繁。自畿南達山東。倏忽來去。勢如風雨。乃命指揮同知李瑾統京營千人往討。瑾至德州。奏言。白英約四百人。分爲二。一劫諸城。高密。安邱。沂水。一自穆陵關南。陷魚臺。直趨金鄉。賊所得皆民間馬。一晝夜數百里。馳而官軍馬少。無以追敵。請於山東。直隸。取給備戰。從之。命瑾充參將。捕盜。三月。賊入博野。饒陽。南宮。無極。東明等縣。深冀。定。祁。開等州境。大肆殺掠。攻濱州。臨朐。臨淄。昌樂。日照。蒲臺。武城。陽信。曲阜及泰安州。皆破之。時賊衆強。多出不意。突犯所在。單弱。勢不能支。李瑾東西奔命。吏部尙書楊一清建言。推用大將。及文臣有才望者。提督軍務。從之。命惠安伯張偉充總兵官。召馬中錫爲右都御史。提督軍務。統京營兵。征流賊。夏五月。兵部尙書何鑑奏。禦盜事宜。時承平日久。民不

知兵。郡縣望風奔潰。甚至開門迎款。以故南北不通。人情洶洶。鑑建議。遣將練兵。嚴號令。公負訓。募義勇。起用舊將。口玉等數人。奏行山東。直隸等處。修濬城隍。選補軍餘。錄用民間武勇。不許遺以貧賤。鄉村鎮店。結伍立寨。互相應援。河南。山西等處。設兵黃河。斷太行。以防奔突。京操官軍。俱留本處。分守郡縣。又於漕運十二把總部下。每船選精卒一人。沿河駐劄。以防運道商旅。詔悉從所議。鑑復奏。道都督黃塚。張俊。統兵分布霸州等處。六月。流盜趙鏐。劉三。邢老虎。楊虎。分掠河南。劉六。劉七。齊彥名。分掠山東。鏐等由河南。山西。自西而東。踰曲周。威縣。直抵文安。復往河間。泊頭。慶雲。由山東陽信。海豐。向西南上江。爲散地。六七等踰山東。河南。出湖廣。江西。仍由故道入長清。齊河等縣。直抵霸州。復走山東。向東南下江。爲絕地。所至縱橫。如蹈無人之境。大抵賊俱起畿內。恃馬力。倏忽馳驟。棲野不佔城郭。蹈虛不立方所。每戰驅脅從者居前。呼號衝突。官軍見形。卽縮。賊相與笑樂。恣所殺掠。稍遇勁兵。前者俱陷。目以精騎。覘勢爲進退。莫可控揣。官軍雖屢有小捷。然死亡多。黠者又受賂賂。多縱舍賊。指揮桑玉。嘗與劉六。劉七。遇文安村中。六七匿民家樓上。欲日剽。玉故緩之。有頃。齊彥名持大刀脅官軍。敗衄者數十人。至樓下。彥名曰。呼。諸敗軍皆呼。彥名曰。救至矣。無恐也。六七遂彎弓注矢。以出射。殪數人去。各地方官互相推委。時馬中錫。張偉。所領京營人馬。多不簡閱。中錫書生。欲效龔遂。化渤海事。招撫解散。張偉執袴子。怯不能戰。中錫遍檄諸路。榜示劉六等。經過所在。官司不許捕獲。與供飲食。若聽撫。待以不死。劉六等聞之。所至不殺掠。然且信且疑。中錫至德州。桑兒園。駐兵。單車從。數卒直抵賊壘。開其自新。劉六等來謁。中錫開誠撫之。劉六欲降。劉七曰。今內臣主國事。馬都堂能自踐其言乎。潛使人至京。伺諸中貴。無招降意。又以山東所劫金銀輦。

載至京。饋權倖求救，不得。遂益肆劫掠。衆至數萬。中錫故城縣人。賊至故城，戒令勿焚劫。馬都堂家由是謗騰。謂中錫玩寇殃民。兵部尚書何鑑劾中錫，偉擁兵自衛，縱賊不戰，逮下錦衣衛獄，論死。中錫竟死獄中。偉革爵閒住。八月丁巳，劉六、劉七、齊彥名、楊虎等合兵以二千騎破棗強縣，屠戮甚慘。知縣段豸死之。命伏羌伯毛銳充總兵官，太監谷大用總督軍務。兵部侍郎陸完提督軍務，大發兵討流賊。馬中錫等既無功，中官因以討賊非書生所能辦，遂以大用等帥兵討賊。何鑑奏令陸完率領主事田蘭等招募民兵，地方大擾。又奏調宣府副總兵許泰、游擊卻永、大同總兵張俊、游擊江彬、延綏副總兵馮禎入征內地，俱聽谷大用、陸完節制。逮巡撫山東都御史邊憲、真定都御史蕭翀、憲等撫馭無方，遇賊失機，兵部奏逮下獄，除名爲民。且著爲令：凡州縣官失守者，比守邊將士例。劉七等困滄州不克，進抵霸州。信安京師戒嚴，時兵部侍郎陸完提督軍務，師已出涿州。賊在固安，甚急。上召大學士李東陽、楊廷和、梁儲、兵部尚書何鑑諭曰：賊在東，師乃西出，恐緩不及事。卿等何以處之？鑑對曰：邊兵已至涿州，賊來送死，但恐望風遁去耳。上喜。初，副總兵許泰奉調，率部下入居庸關，駐涿州。馮禎入紫荆關，駐保定。上乃諭鑑即追還。陸完東出，往信安。鑑承旨畢，退至部中，已秉燭矣。遣人留都門鎖鑰。賈牌馳諭：戒以失誤者斬。時陸完方欲整兵南行，而賈牌適至，遂直趨固安。許泰卻永出霸州平口，賊易之。泰等逆擊，殺數百人。賊始懼，南奔天津。指揮賀勇遏之信安灣，賊復敗。泰等追擊於東光半壁店，擒斬二百七十人。永再破之景州。鑑橋馮禎敗賊於東明，裴子巖斬賊帥僞千戶卻永，復破賊棗強縣。合兵又破之參老集及薛家屯，擒斬千餘人。皆楊虎、趙鑑黨也。諸將進擊虎，鑑於景州朱門村一日數戰，殺賊千餘人。賊奔遁小灘河北。保定都司



田彬率指揮趙文等扼之。敗績。文被獲。尋走還。副總兵李瑾擊趙鑑於山東蒙山。亦敗。賊得我神器盔甲及蟒衣、虎鏃衣、蟒衣。沿途炫耀。過泰安縣。題詩有縱橫六合誰敢捕之句。沂州楊頭管四馬武、張通等皆歸賊。賊勢益熾。冬十月。劉六等攻濟甯不克。初。賊自滄州解圍南走。破日照、海豐、壽張、陽穀、邱甯陽、曲阜、沂水、泗水。費十城。至是。攻濟甯。焚運船千二百艘。執工部主事王寵。釋之。給事中竇明言弭盜安民。擇將事下獄。太監張永選團營驍卒聽征。擢山東樂陵知縣許達爲山東按察司僉事。備兵武定州。達、河南固始人。令樂陵期月。令行禁止。時流賊橫行河北。達修城濬隍。踰月而成。又使民家各築牆高踰屋簷。仍開牆竇如圭。僅可容一人。家令一壯丁。執刀俟於竇內。其餘人皆入隊伍。令守號令。視旗鼓進退。違者無赦。又設伏巷中。洞開城門。未幾。賊果至。旗舉伏發。賊火無所施。兵無所加。盡擒斬之。自是賊不敢近樂陵。撫按交薦其才。擢是職。十一月。趙鑑等至宿遷。初。鑑等攻破靈山衛。及日照諸縣。南攻徐州不下。至是。至宿遷。淮安知府劉祥率兵逆賊。不戰自潰。溺水死者無算。祥被執。縱還。遂渡河。殺高郵等衛官軍三百餘人。執指揮陳鵬。攻靈壁。知縣陳伯安戰敗被執。攻宿州不克。焚其西關。欲降伯安。不屈。劉三欲殺之。鑑止之。得釋。又破虹縣、永城、夏邑、虞城等縣。執虞城知縣。尋亦釋之。又破歸德府。守備萬都司率衆追至亳州。武平衛指揮石堅率兵千人。僧兵三百人。邀戰。皆敗。殺僧兵七十餘人。至白龍王廟。渡小黃河。武平衛百戶夏時掘之。河。楊虎率壯士黃甯九騎渡河。時兵不知其爲虎也。擊之。虎奪舟欲濟。官軍以土石擊覆其舟。虎溺水死。鑑等推劉三爲主。總兵白玉擊劉三於泰和縣。小南門敗績。殺官軍一千五百餘人。死亡盔甲槍刀二千。神器七十餘。攻破霍邱。殺萬人。執都指揮潘獅。釋之。殺都指揮三保。射殺河南布政

司經歷任傑。軍民死者千餘人。至鹿邑。鹿邑潰。執守城千戶。有陳翰者。自稱兵部主事。乞爲劉三子。至新蔡。致仕知府張釋。率衆遣劉三。金帛萬計。不攻去。當是時。河淮南北官吏望風遁。諸將利劫掠。戰不力。賊勢日盛。劉三妄欲舉大事。與陳翰。甯龍謀。兵無主。必亂。共推劉三爲奉天征討大元帥。趙鑑。更名懷忠。稱副元帥。小張永前軍。管四後軍。劉資左軍。馬武右軍。邢老虎中軍。並稱都督。陳翰爲侍謀。軍國元帥。長史分二十八營。應二十八宿。各樹大旗爲號。置金旗二。大書虎賁三千。直抵幽燕之地。龍飛九五。重開溷沌之天。又造鈞牌。令所至官吏修道路。橋梁。備芻糧。酒肉供軍。隆者。秋毫無犯。拒者。寸草不遺。劉六等攻徐州。掠淮西。劉七等覘知谷大用。毛銳等駐軍臨清。復擁衆走霸州。賊以十二月朔。車駕出郊宮省。牲圖犯御蹕。時兵部尚書何鑑未寢。左右無一吏卒。乃自具帖子。令廁卒遞入長安門。遂門遞入司禮監。轉奉上知。復傳示各衙門。嚴加防守。又緇城。費報通州。良鄉。涿州。各守備官。整備兵馬。兼以常制。駕出南郊。分調軍馬於南海子。蘆溝橋。羊房角三處下營。以防衝突。處分甫定。漏下五鼓矣。有頃。上命司禮監太監召鑑。至左順門。問今日駕可出否。對曰。駕當早出。以安人心。車駕遂出。迄暮方回。賊知有備。不敢犯。十二月。劉六等西奔。掠新城。雄縣。定興。安肅。易州。涞水。而南。破高陽。蠡縣。博野。容城。深澤。東鹿。覘知祁州有備。乃遷道。竟攻臨城。高邑。成安。饒陽。由真定。掠趙州。安平。直抵晉州。藁城。柏鄉。內邱。南河。衡水等處。鑑計賊非東向。臨清。必南奔。彰德。移文促陸完。督軍分道追襲。至彰德。賊方圍湯陰。聞官軍至。望風遁去。許泰。馮禎。郤永。金輔。李瑾。張俊。成釗。追戰。敗之。渡河。溺死者無算。劉七等復糾衆萬餘。圍李瑾。馮禎營。許泰與禎瑾內外夾攻。敗之。賊遁去。劉六。劉七。齊彥名。劉三。趙鑑。邢老虎等復分掠山東。河南。賊欲牽制官軍。故分

寇其勢益熾。劉三等攻陷上蔡縣。知縣霍瑄死之前鋒臨商水。知縣率吏民降。進攻西平。知縣王佐拒敵被執。罵不絕口。賊支解之。乘勝攻破舞陽。劫獄。獄有僧德靜。僞稱唐府宮人子。賊黨賈勉兒留之。至葉縣。執知縣唐天恩。并其父殺之。攻襄城。襄城人餽銀馬。不攻。攻破寶縣。僉事孫盤。賈黃榜。撫城。趙鑑復書曰。羣奸在朝。濁亂海內。誅殺諫臣。屏斥元老。乞皇上獨斷梟雄之首。以謝天下。斬臣之首。以謝羣奸。有掠縣令妻子者。鑑殺之。破裕州。殺都指揮詹濟。同知郁采。屠其城。命遼東巡撫都御史彭澤提督軍務。以咸甯伯仇鉞爲平賊將軍。充總兵官。帥延綏。榆林諸路軍馬討河南賊。澤至。大陳軍容。擐甲引見諸大校。責以退縮。嚴軍政。論行法。建彙諸大校無不惕息。頓首請自効。良久釋之。遂鼓行前。時河南親藩告急。何鑑建議復於宣府。大同。遼東。延綏諸將部下續調未發。官軍分道赴之。復以諸賊分責諸將。計日勦滅。七年春正月。劉六等復攻霸州。何鑑續調宣府邊兵在涿州者。遏之。賊遁去。先是陸完聞賊北奔。恐犯京師。卽調許泰。郤永追至德州。泰永方恐後。期獲罪。而賊東遁之報忽至。泰永驚喜久之。乃知遏賊。宣府續調兵也。嘗語人曰。何公此舉。旣解霸州之危。復舒吾輩之罪。旣而遼東續調軍亦至。郤永率邊軍追賊至山東。大敗賊李隆於穆陵關。隆奔劉七營。劉七惡其反覆。斬之。并其衆。復歸河南。陸完分調諸將許泰等大敗賊衆於汴北。時撫治鄖陽李士實亦發兵夾攻。賊奔商水。倉皇阻河。不能渡。官軍併力蹙之。方可殄滅。而紀功御史雷宗力勸諸將朝崇府。盤薄久之。賊因得渡商水。何鑑劾宗阻誤兵機。逮下獄。伏羌伯毛銳至真定。敗績。銳衰老怯懦。所領京軍萬餘。皆怯不諳戰。谷大用擁衆觀望。不敢進。銳帥師至真定。遇劉七等與戰。大敗。適許泰援至。銳僅以身免。失亡所佩將軍印。徵回京師。以與大用同事。不問。罷歸第。

二月趙鏐等攻唐縣先後二十八日不破邢老虎病死鏐併其衆號十三萬騎五千轉掠襄陽樊城棗陽隨州新野破泌陽前大學士焦芳僅以身免盡發其先世家墓無遺骸取芳衣冠被庭樹歷數其惡命劍士斬之曰吾手誅此賊以謝天下進攻均州不克賊黨聲言欲屠城趙鏐以馬文升家在圍中引衆去之總制彭澤咸甯伯仇鉞督各邊將帥敗鏐於西河縣殺賊二千餘人奪回馬贏器械無算鏐奔鄢陵焚掠而過至新鄭鄭州攻城不能入遂至滎陽汜水攻偃師陸完右副都御史先是楊一清議擒斬賊三名者陞一級時劉六劉七齊彥名雖擁衆數萬然多劫掠脅從之徒其親信驍勇善騎射者不及千人官軍每追及賊首驅脅從良民對敵并棄所掠財帛奔逸而去官軍競取財帛斬獲脅從首級屢執捷音陸完谷大用降敕獎勵十餘次前後報功萬計而正賊卒無獲者甚至賊已去而官軍遇平民亦殺之以報功大同游擊江彬過冀州入民家殺二十三人有司申狀大用完皆不問大用復奏帶權勢子弟僕從坐功冒級日費餼廩自出師以來芻糧犒賞費太倉銀二百萬餘府庫爲之虛耗三月劉三趙鏐等至河南府參將金輔懼不敢渡河總兵馮禎率榆林兵方列陣而姚信所部京軍馳越禎前失利先遁賊麾衆突至禎下馬力戰死賊亦殺傷多乘夜奔汝州復犯汝甯府殺湖廣土軍數十人入潁州朱皋鎮官軍追敗之前後斬賊及渡河淹死人馬五千有餘沿途逃散者甚衆鏐等由光山六安州攻破舒城劫掠人馬夏四月桐柏知縣李聚率鄉兵敗趙鏐於縣外生擒潘僧等八名泌陽縣劉機率鄉兵擒獲逆盜劉喜等總制彭澤督官軍敗趙鏐於六安州殺獲四百餘人追至定遠連敗之湖廣僉事郭韶敗劉三趙鏐等於應山縣二郎畝廣水店追逐懸崖溺水者千餘人彭澤同巡撫劉丙督各路軍馬追殺鏐等於應山并

子鋪、隨州、蓬甌山等處。劉三、劉資等潛匿山谷去。李鉉率邊軍敗劉六等於臨煦、沂水，殄之。劉六、劉七等東入登萊，掠膠州、平度、萊陽，破文登，招遠，攻圍甯海。陸完復分調許泰、卻永合兵追勦，賊潰分兩隊。一隊由高密西奔，李鉉追至沂水，勦殺無遺。劉六、劉七、齊彥名等復北走霸州，犯香河、寶坻、玉田諸縣，敗官軍。殺參政王杲於武清八里莊。兵部奏調參將成釗等統領京軍，陸完、甯杲亦分調諸將會兵截殺。賊過馬束圈，殺戮甯杲子弟兵甚衆，乃越霸州，竟往雄縣，迤南直抵山東。賊雖屢衄，然隨在脅聚，寡而復衆。先是正月，劉六等自文安而下，二月，至宿遷，屯小河口，劫船欲渡，指揮周正禦之，不得前，退往桃源，屯於城子河。率衆萬餘，掠邳州之沭口集，遂由贛榆過邳城，旣擁衆復寇邳州，賊皆白衣，瀾漫郊野。知州周尙化悉力拒走之。三月，賊過呂梁，沿途焚掠無遺。總兵劉暉破賊於滕之呂孟社，尋敗賊於邳之郭家莊，殺獲千餘人。賊且戰且走，至魚頭集，復破之。四月，賊奔登州海套，陸完率大軍與劉六、劉七、齊彥名等遇於嵩淺坡、古縣集等處。時宣大鐵騎及中土材官良家子悉集，將十萬人合圍。諸軍奮勇鏖戰，斬首二千三百，殺傷三千有奇，俘獲百餘，諸酋渠殆盡。六、七、彥名獨挾驍騎三百餘潰圍而走，間道馳至河西務，其勢無前。諸軍悉出，莫能禦。賊將北出塞外，尼關險不得通，乃復越臨清而南下邳之新安，迤邐馬家淺、雙溝，頻欲渡不得，復由靈壁西南而去。閏五月，劉三自河南入羅田，轉掠黃陂，都指揮陳表擊敗之。還據羅田，仇鉞擊賊於光山，神周、姚信爲左，時源、金輔爲右，大敗之，斬首三百九十人。盜奔六安，諸將進至七里岡，賊分爲三，神周追趙風子，姚信追賈勉兒，二賊急，復合其黨張通等率衆數千降。鉞屢與官軍戰，不利。陳翰見勢敗，亦向總兵仇鉞降。時源、金輔追劉三由黃陂，光羅至桐柏南，召從騎十七人，夜亡其半，至土地

坡指導王瑾射劉三。中其左目。三縱火自焚。瑾滅火斬其首。都指揮朱忠等復追擊。買勉兒於扶溝。賊奔沙河。溺死者甚衆。追至永城。勉兒變姓名匿項城之下村。老人王斌獲之。餘衆悉潰。趙風子走德安。知事不成。行至應山縣東化山坡下。遇僧真安。因削鬚鬚髮藏度牒。令賊黨邢本道等各散。遂同真安欲渡江。從江西賊再圖大舉。湖廣巡撫劉丙督官軍擒邢本道等三十餘人於隨州。天王險寨等處斬賊百餘級。獲馬贏器械千數。本道被獲。始知鏹削髮遁去。分命各道物色之。武昌衛軍人趙成、趙宗等行至黃陂縣九十三里坡。遇鏹過。見鏹狀貌異常。思與頒示合。心疑之。追至武昌江夏縣管家套。鏹入軍人唐虎店飯。成等進擒之。搜獲真安度牒。檻車入京伏誅。劉七、楊寡婦以千騎犯利津。僉事許達追至高苑。敗之。錢鸞以百騎劫德平。達復引兵追至楊二莊。盡殲之。劉六、劉七圍邳州。督漕都御史張縉擊敗之。東海千戶張瀛率銳卒開柵迎敵。賊三騎馳突而前。皆渠帥也。中矢斃。其黨悉遁。六等遂從棗林渡邳。騎能屬者纔三百人。奔河南光山。確山入湖廣。棄馬登舟。沿江掠聚。復聚黨至七百人。駐兵武昌陽邏團風鎮。湖廣巡撫都御史馬炳然攜家赴官。賊遇之於爛泥鋪。脅與俱至南京。炳怒罵之。遂遇害。掠其家人。內旨立監槍名。太監陸闇以陸完討賊久不滅。謀出統軍禮部尚書傅珪曰。今兵老民疲。直以多冒功者失將士心。禍旦夕及宗社。諸公尙唯唯乎。力爭之。明日。竟遣闇監槍出征。傅旨令珪致仕。劉六爲湖廣官軍所追。風折帆檣。擊死於水。其子劉仲淮數人亦死。劉七、齊彥名等糾合水寇。自黃州下九江。剽湖口、彭澤等一帶郡邑。經安慶、太平。儀真所過殘滅。六月。陸完帥諸將邊兵馳至揚州。斬退避指揮程鵬。劉七、龐文宣等舟過蕪湖。操江官軍不敢逼。直抵瓜州。燒燬戰船。搶奪軍器。鎮江官軍禦之。敗績。殺掠過壩。泊於通州。

之狼山。常熟之福山港。遂凌駕江面。縱橫上下。通泰如皋濱江之區。咸被創殘。秋七月。劉七等復自通州泝流上犯九江。劉七、彥名等在江不安舟居。日上通州遊掠。欲自通泰登岸。趨淮安。復還山東。爲揚州官軍所拒。與其黨韓三等謀復自海門而上泝流。過采石。泊蕪湖之月子湖。賊凡三過南京。往來如入無人之境。賊在海門東七里港。謀入海。由張網海口深入裏河。不果。又泊隸上斷腰地方。遂自湖口縣乘風而西。寇南康。迤邐蘄黃。登光州。固始。還泛九江。安慶。至石灰河江口。遂往銅陵。時陸完自臨清馳至江上。都御史張縉、王鎮、叢蘭、俞諫及副總兵時源等分兵守要害。賊復沿江東下。越瓜州。蹂周家橋。歷孟瀆下港。掠常州。殺常州守李嵩。遂犯江陰。殺縣丞余凌雲。仍泊狼山下。賊有舟三十餘。衆六七百人。陸完至鎮江。留總兵仇鉞駐溫恭騎兵駐江北。劉暉卻永以舟師趨江陰。八月。劉七等既泊狼山。其黨以失地利相尤。多潰去。丁丑。賊率衆二百餘攻通州。我軍擊之。賊退入船。是夕。颶風大作。賊船皆解散飄墮。其衆顛踣不支。嘔泄臭穢。自相擊撞。蘇人有應募獻計用火攻。其名水老鴉。藏藥及火於礮矢中。發之。又爲形如鳥喙。持之入水。以喙鑽船。機發。自爲運轉。轉透船。沈試賊一舟。沈之。賊益駭。勢迫。乃登山團聚。或下崖散逸。輒爲通州兵所蹙。通州最與賊密邇。而守吏亦特嚴整。壬辰夜三鼓。副總兵劉暉帥遼東兵千總任璽帥大同兵游擊卻永帥宣府兵竝進。癸巳。與賊戰。我軍聲燄震天。風火交熾。賊披靡躋山巔古垣。憑高控險。槍矢瓦石雨下。鏖戰。賊初不識山路。火勢既熾。僧行居人逸出。賊從之上山。得路。而我軍方奮勇直前。日加晡。劉暉率部將張春、蕭澤、高雲、李春美、饒徵等誓死決戰。分軍爲三。劉暉在山北。卻永在山南。皆戴盾跪行而上。手施槍礮。且上且攻。盾上矢集如蝟。不退。遂奪其垣。賊墜崖死者無算。其餘先具舡艦山下。以備。

逃竄。至是，覓嬰谷下山爭船，不得入。劉暉立崖下，百矢齊發。劉七勢迫，遂赴水死。彥名爲宣府遊兵十旗，張鑑斬首。劉暉擒獲餘賊，及龐文宣等解京伏誅。賊逸而北者，高雲追斬之，皆盡。九月，論平流賊功，封谷大用弟谷大寬爲高平伯，陸闇弟陸永爲鎮平伯，咸甯伯仇鉞進封咸甯侯，竝賜誥券世襲。都御史陸完、彭澤加太子少保，完召回掌院事，廕一子錦衣衛百戶。內閣李東陽、楊廷和、梁儲、費宏各廕一子錦衣衛正千戶。

谷應泰曰：劉六、劉七、齊彥名等初發難於霸州，趙鑑、邢老虎、劉三等附之，而盜愈劇。至鑑等入河南，七等入山東，是羣盜分寇之始也。旣而并兵薄都城，至尊倉皇召對，左順中旨夜出，指授方略，社稷無人，幾於發蒙振落矣。乃馮禎纔破鑑於景州，而田彬沒全師於山左，許泰甫奏捷於裴巖，而劉七屠名城於翼右，徒敗車奔，旗靡轍亂，以此易彼，得不償失。游魂漸大，禍延淮北，賊騎有京觀之築，池隍無卽墨之堅，指斥乘輿，妄陳天命，而羣盜再薄都城矣。夫金湯天險，百靈呵護，么麼小寇，敢爾蹂躪，則以七等固嘗潛入宮門，縱觀禁掖，窺龍顏於豹房，分天香於御苑，彼項籍偶觀會稽，石勒倚嘯東門，亦未有睥睨彤闈，鼾寢臥榻如茲盜者也。於是宮門晨扃，南郊幾阻，徵調繁興，六師雲集，然後七等再入齊，鑑等再入豫，自此以後，盜不復合。劉三、趙鑑猖獗於兩河，巡撫彭澤以大同、遼東、宣府之師禦之。劉六、劉七枝蔓於濟北，少司馬陸完及禎、暉許泰諸將禦之。其餘咸甯侯仇鉞、伏羌伯毛銳、中貴谷大用、邊將江彬類皆將門世胄，良卒信臣，莫不赤羽耀日，鐵騎屯雲，然而魚賊鳥窮，狼奔豕突，偏師少利，擁麾不前，軍氣初揚，緩追逸賊，甚至斬掠難民，邀勳幕府，紈袴輿徒，動加青紫，太倉少府，濫若泥沙，此怨毒所以日深，中原所以不靖也。旣而



鑓等屢挫。自豫南竄楚境。楊虎縊而賊勢盛。趙鑓擒而賊黨盡矣。七等自齊北掠京畿。南窺徐宿。鋒似鴟張。勢亦窮迫。由邳流豫。由豫流楚。劉六沈於水濱。此亦天亡之秋也。然而舍陸登舟。死灰復然。賈其餘勇。三江騷動。天門無安都之柵。京口無徐盛之城。踰楚窺吳。如履平地。幸而妖星已隕。風伯揚威。當是時。劉暉帥遼東兵。任璽帥大同兵。卻永帥宣府兵。聚天下之全力。撲窮途之逋寇。猶莫不水戰火攻。矢窮弦絕。然後骨載專車。頭行萬里。當其始也。劉瑾以威激之。張忠以賄縱之。及其繼也。甯杲以酷激之。馬中錫以撫縱之。事發於中宮。禍成於庸帥。卒之封爵定勛。先及中人子弟焉。夫張讓通書張角。黃巾平而讓等俱封列侯。令致致亂。黃巢長安破而令致居功。扈駕敗亡之主。各賢其臣。而五省生靈。魚糜肉爛。悲夫。

## 卷四十六

### 平蜀盜

武宗正德三年冬十月。四川保甯賊藍廷瑞、鄢本恕起漢中。攻陷郡縣。起右副都御史林俊巡撫四川。兼贊理軍務。督兵討之。初。廷瑞行山中。得古棄印。亡何。又得一劍。自謂有天命。遂與其黨惑愚民。倡亂。時保甯賊劉烈亦聚衆作亂。侵掠陝西漢中等處。

四年十二月。藍廷瑞自稱順天王。鄢本恕自稱刮地王。廖惠自稱掃地王。合衆十萬。入寇湖廣、鄖陽等處。已而聞巡撫林俊督兵捕勦。因流侵他境。劉烈等復還至四川。初。烈等四出剽掠。侵陝西、漢中。勢頗猖獗。至是復還。敕巡撫都御史林俊相機勦賊。未幾。劉烈爲亂兵所殺。餘黨廖麻子、喻思俸復熾。

五月春正月。命刑部尚書洪鐘兼左都御史。總督川、陝、湖廣、河南四省軍務。征勦四川等處流賊。夏四月。藍廷瑞、廖惠等破通江縣。林俊遣官兵及調羅狗石柱等處土兵攻敗之。殺溺死者六千餘人。生擒廖惠。藍廷瑞奔紅口。與鄔本恕合兵。過陝西、漢中三十六盤。至大巴山。俊復遣兵追及。大敗之。賊棄輜重走。六年春正月朔。江津賊曹甫自稱順天王。攻圍縣治。僉事吳景被殺。巡撫都御史林俊聞報馳赴。乘元日。賊方醉酒不設備。乃夜半蓐食銜枚往圍燒之。賊奔潰。又於山坪伏子岸等處連戰敗之。抵賊營。殺曹甫等。先後擒斬三千餘人。收回被掠男婦七百餘口。獲馬羸器仗無算。五月。鄔本恕、藍廷瑞等縱掠蓬、劍二州。命總制尚書洪鐘同巡撫林俊、總兵楊宏相機勦捕。以靖地方。復敕巡視都御史高崇熙鎮守太監韋興同洪鐘、林俊會勦劇賊藍廷瑞、鄔本恕。六月。洪鐘至四川。與林俊議多不合。軍機牽制不得速進。藍廷瑞招集散亡。勢復大振。攻燒營山縣治。殺僉事王源鐘。乃會俊督四川兵。陝西巡撫都御史藍章督陝西兵。及檄湖廣、河南兵分路進勦。鐘與俊親監督之。湖廣兵先追及於陝西石泉縣熨斗壩。賊見追急。求招撫。令至四川東鄉縣金寶寺聽撫。鐘給榜示。并檄召廷瑞等約日出降。賊意在緩師。延至六月十四日。始至信地。依山駐營。廷瑞、本恕俱不出。但使人來言欲得營山縣治。或臨江市駐其衆。方出見。且要取旗牌官爲質。鐘等俱許之。鄔本恕來見。回營。藍廷瑞始復來見。且降。且肆殺掠。仍於松樹壩劫掠民家。計欲脫走。官兵分七哨扞之。不得間。賊窘甚。漸潰散。十五日。廷瑞以所掠女子詐爲己女。嫁與領兵土舍彭世麟爲妾。結歡世麟。世麟白軍門受之。遂邀賊首至營宴會。鐘令廷瑞所親鮮于金說廷瑞及本恕於十六日帥諸賊二十八人同至彭世麟赴宴。伏兵盡擒之。衆聞變。遂大潰。四出奔逸山谷。鐘等遣諸路兵分

道追勦之。擒斬溺死。并俘獲老弱兵仗羸馬甚衆。未盡者。許自首撫之。惟賊首廖麻子未獲。捷聞。加鐘太子太保。俊章陞賚有差。江津賊曹甫餘黨方四。任鬚子。麻六兒等擁衆走綦江。入思南。石阡等府。方四僞稱總兵。任鬚子僞稱御史。賊首三十餘人。僞稱評士等名。貴州兵敗之於思南。播州兵敗之於三跳等處。先後擒斬三千人。賊由貴州復入四川。八月。賊攻南川。馬頸。雀子岡等關。官兵禦之。又攻東鄉。永澄諸處。羅猶兵禦之。前後頗有斬獲。會百戶柳芳等陣沒。官軍卻。賊遂聲言欲取江津。重慶。瀘州。敘州。以攻成都。遠近震駭。林俊駐江津。高崇熙駐瀘州。太監韋興駐成都。都御史王綸駐重慶。檄副使何珊。都指揮鄒慶帥兵由合江進。副使李鉞。知府曹恕率兵由江津進。夾攻之。九月。賊攻江津。會石砭兵至。并力禦之。賊敗走。追至合小坪。破其四營。賊以八千人昇攻具復攻江津。林俊。李鉞。曹恕督酉陽。播州。石砭等兵三道迎擊之。賊敗。追至高觀山。斬首五百餘級。俘獲二百餘人。官兵乘勝追擊。賊乃乘高下石。不得進。賊復擁衆時出衝擊。李鉞幾不免。賴從吏何士昂等力戰得解。林俊見賊勢猶盛。遣降賊周大富入營招撫之。方四僞令其黨李廷茂出降。竟不出。高崇熙知賊首皆仁壽人。遣人詣仁壽。取各賊家屬入營招之。方四等殺其族屬。不聽撫。遣人來言聽其自散去。乃從。翼日李鉞督諸將校分兵爲六哨。由大壩。小壩。月壩。關竝進。直衝高梁。賊不能支。六面皆合。破其中堅。斬賊首任鬚子等。賊大敗。追殺三十餘里。斬首一千八百餘級。生擒方四妻妾。俘獲男婦三千四百餘人。餘衆墜崖填壑數里。奪獲馬羸四千五百有奇。士兵乘勝追勦。又殺二百餘人。賊見官兵少。還擊。殺千戶田宣。冉廷質等。方四妻妾復逸去。遂率餘賊二千餘人遁入思南境內。巡撫右副都御史林俊乞致仕。許之。時宦者用事。各邊征勦。必以其弟姪私人寄名兵。

籍冒功陞賞。俊一切拒絕。權倖惡之。又與洪鐘議多不合。因乞致仕。疏上。忌者謂盜已平。內批卽允之。臺諫疏留不報。俊歸。蜀人號哭追送。未幾麻六兒、喻思俸、駱松祥、范藻等賊復熾。內江、蒙慶之境騷然。踰年不能定矣。命巡撫都御史高崇熙調兵討方四、廖麻子、麻六兒等。

七年二月。江津賊方四等自去年正月奔貴州。八月復聚。至是。劫掠南川等縣。高崇熙連戰敗走之。閏五月。方四自南川破綦江。僉事馬昊敗之。奔婺川。衆遂散。乃變姓名潛走開縣。義官李清獲之。送於官。十一月。漢中賊廖麻子、喻思俸、內江賊駱松祥、崇慶賊范藻等分劫州縣。衆號二十萬。洪鐘分勦不暇。給御史王綸劾鐘縱寇殃民。罷職。命右都御史彭澤總制軍務。同總兵時源征之。

八年二月。巡撫四川右都御史高崇熙以盜賊不盡滅。逮下獄。以右僉都御史馬昊巡撫四川。夏四月。彭澤率苗兵攻漢中劇賊廖麻子。破之。衆遜竄山寨。多伏匿箐棘中。澤分兵搃出入。奪水道渡。開二面縱賊。夾誅之。且盡。廖有異術。能隱形。事急。跳身遁。購之。卒不獲。因移兵內江。討松祥。平之。

九年春正月。彭澤率兵討崇慶劇賊范藻等。平之。四川羣盜悉定。加總制軍務彭澤爲太子太保。左都御史時源爲左都督。

谷應泰曰。正德中。蜀盜藍廷瑞、鄒本恕、廖惠起漢中。曹甫、方四起江津。廷推林俊。優詔特起。俊時憂闕家。居也。俊旣受命。通江之戰。擒廖惠。走廷瑞。賊勢窮蹙。轉窺秦隴。吳景之死。曹甫授首。江津不振。僅走貴州。俊之視蜀。初効。可謂李綱入來。方有朝廷。光弼代軍。旌旗變色者矣。而乃洪鐘出督。崇熙會勦。兵有連鷄之形。將無輔車之勢。我志方暇。醜氛復振。然後羣帥戮力。數道竝進。雖誘而殺降。疑近不祥。詎知縱之復。

叛無異養癰。廷瑞本恕檻車詣闕。保甯餘黨誅鋤略盡。所不獲者廖麻子一賊耳。方四再寇江津。俊又六面督攻。斬其渠帥。四之妻孥悉俘帳下。雖蠻官小衄。四幸漏網。喙息黔中。已墮心膽。假令借籌有人。處置得宜。璽詔優獎。留俊撫綏。汲黯臥治淮陽。韋皋久鎮西川。錦江三峽之間。遂將桴鼓不鳴乎。角巾扁舟。輕裝還里。蜀民追送。涕泗橫流。誰秉國成。何其謬哉。於是漢中餘孽。廖麻子再與喻思俸等倡亂矣。黔中逋寇。方四復與麻六兒等出掠矣。內江崇慶相繼效尤。范藻松祥人思雄長。夫蜀寇紛紜。本非劇賊。王師壓境。實皆勁旅。然而中人邀爵。必使子弟監軍。鄙夫秉均。喜言賊平受賞。彭澤再出。餘黨旋平。蓋用兵六載。屢成屢衄。俊既去位。人多畏咎。至崇熙逮而洪鐘撤。爭利諸臣。抑已知難而退矣。澤遂得專制閬外。削平全蜀。夫林俊當小腆初張。舉朝貪功之日。而彭澤當賊氛滋蔓。命臣畏禍之時。澤遂享有功名。俊以齋志老死。君子於俊不無李廣祖述之感焉。

## 卷四十七

### 宸濠之叛

武宗正德二年夏四月。劉瑾受甯王宸濠重賂。矯詔擅復護衛屯田。甯藩舊在大甯。今三衛地也。初太祖諸子。燕王善謀。甯王善戰。靖難兵起。燕王以計挾甯王遷北平。後以其地與朵顏三衛。遂徙封江西。天順間。甯府不法。革去護衛。改爲南昌左衛。至是宸濠遣內官梁安輦金銀二萬通瑾。朦朧奏請準改南昌左衛爲護衛。又準與南昌河泊所一處。侵奪民利。

五年秋八月。劉瑾伏誅。兵部奏革甯王宸濠護衛。仍爲南昌左衛。

六年冬十月。甯王宸濠葬母於西山青嵐。乃先朝禁革舊穴也。

八年夏四月。甯王宸濠建陽春書院。僭號離宮。宸濠懷不軌。術士李自然等妄稱天命。謂濠當爲天子。又招術士李日芳等。謂城東南隅有天子氣。遂建書院當之。

九年春三月。復甯王宸濠護衛屯田。先是。陸完爲江西按察司。爲宸濠所重。常曰。陸先生他日必爲公卿。完亦心附之。至是。完爲兵部尚書。濠喜曰。全卿爲司馬。護衛可復得矣。全卿。完字也。自完入內。與王歲時問遺不絕。王致書完。欲復護衛。完答書。須以祖訓爲言。時伶人臧賢者。有寵於上。左右近習錢甯、張銳、張雄輩。皆陰結之。以求固寵。賢壻司鉞。坐法充南昌衛軍。宸濠因之以通於賢。每手書寄賢。字賢爲良之。至是。乞護衛。輦載金寶於賢家。分饋諸權要。大學士費宏知之。宣言曰。今甯王以金寶鉅萬復護衛。苟聽其所爲。吾江西無噍類矣。陸完知宏必阻之。乃密謀於錢甯等。會三月十五。廷試進士。內閣與部院大臣皆在東閣讀卷。完遂於十四日投覆甯王乞護衛疏。十五日。中官盧明以疏下閣。密約楊廷和。出下制許之。而宏竟不與聞。廷和與完懼宏發其狀。會言官交章論護衛不可復。乃謀去宏。以宏私其弟費竊。入翰林。鄉人黃初及第。讚之。且曰。乾清宮災。下詔皆宏視草。歸咎朝廷。傳旨令宏致仕。宏南歸。舟至清源。濠黨陰遣人入舟中縱火。行李皆爲煨燼。濠黨使人舟尾窺之。見舟焚而餘貲盡。遂以是復濠。濠乃已。甯王宸濠自稱國主。妄傳護衛爲侍衛。改令旨爲聖旨。夏六月。甯王宸濠密令承奉劉吉等。招劇盜楊清、李甫、王儒等百餘人入府。號把勢。八月。甯王宸濠令撫臣以下朝服見。撫臣俞諫不可。時宸濠久蓄異志。會

有上賜。欲撫臣等朝服見。諫不可。又嘗去其左右爲惡者。濠深銜之。冬十月。甯王宸濠招鄱湖賊首楊子喬。統賊徒楊清等肆行劫掠。

十年春二月。甯王宸濠招舉人劉養正入府密謀。濠聞養正有才名。習兵法。延至府。講論宋太祖陳橋之變。養正甚稱濠有撥亂之才。密約待時舉事。夏六月。甯王宸濠忌都指揮戴宣擅權。殺之。冬十月。江西按察司副使胡世甯奏甯王宸濠無道罪狀。下兵部移文甯府。令鈐束其下。時宸濠反跡已著。人莫敢言。世甯發憤上疏。略曰。甯王自復護衛以來。騷擾閭閻。鈐束官吏。禮樂政令。漸不出自朝廷。臣恐江西之患不止羣盜也。伏乞聖明。廣集羣議。簡命才節威望大臣。兼任提督巡撫之職。假以陳金彭澤之權。銷隙寢邪於無形。敕王自王其國。仰遵祖訓。勿撓有司。以防未然。疏上。宸濠頗懼。委過近屬以自解。以河南左布政孫燧爲都察院右副都御史。巡撫江西。先是。俞諫以忤宸濠奪官閑住。宸濠謀益橫。朘削百姓。輦珍寶。結禁近。以爲奧援。及結連各洞寨。逋賊縱其流劫。鎮巡藩臬以正自持者。必百計去之。畏禍者。遂翕然依附。燧知大變將作。乃均征賦。飭戎備。實倉儲。散鹽利。諸凡摧剝黎萌者。漸次削除。偵奸黨置之法。以翦其羽翼。宸濠奏副使胡世甯離間親親。妖言誹謗。賄營內。旨逮之。先是。世甯已陞福建按察使。宸濠臨發毒之下。血幾殆。濠深銜世甯。必欲置之死。摘前疏語爲謗。上賂用事者。中以危法。逮捕之。世甯既遷福建。便道抵浙歸家。濠屬其黨巡浙御史潘鵬發。卒募取世甯。欲甘心焉。會李承勛爲按察使。匿世甯。變姓名。間道歸命京師。得不死。下錦衣獄。世甯獄中三上書。言江藩橫逆。朝野皆聞。微臣愚戇。天日共鑒。兩京言官陳啓充。徐文華。交章論救。世甯繫再經冬。訊鞠撈掠。幾瘐死。十一月。江西豕生象。宸濠三司稱。

賀左布政使張嶺以義折羣議止之。

十一年春三月甯王宸濠以上東宮未立密遣萬銃林華賄錢甯等稱長子宜入太廟司香爲名迎取來京錢甯臧賢受厚賂陰助之。夏五月宸濠欲拓府居擬大內左布政張嶺以非制拒之。秋八月謫福建按察使胡世甯戍遼東瀋陽衛初世甯刑訊一年錢甯蕭敬張雄張銳江彬等受宸濠重賄脅刑官必坐以誣告親王罪至死大理寺少卿胡瓚抗言曰濠謀賴世甯以發而置之極刑何以服天下衆直之及行撫按孫燧李潤奉勘委曲明世甯無辜得減死謫戍奪瓚等俸。九月宸濠奪官池賄李士實左布政張嶺不可濠遣承奉劉吉饋以四果啓視之則棗梨薑芥也嶺呼吉曰我知之矣是欲我早離江西界也。臣子受命於君行止豈人所能預濠聞之默然。冬十月以王守仁爲都察院右僉都御史巡撫南贛汀漳等處。

十二年春二月甯府典寶閣順內官陳宣劉良奏宸濠不法事濠遣承奉劉吉賄錢甯矯旨發順等孝陵衛充軍濠疑承奉周儀實使之併家人六十餘人盡捶死。三月宸濠令王春余欽等招募劇盜凌十一、閔廿四等五百餘人四集亡命同楊清等藏丁家山寺劫掠官軍民財商貨復厚結廣西土官狼兵并南贛汀漳洞蠻欲圖爲應遣人往廣東收買皮帳製作皮甲及私製槍刀盔甲并佛郎機銃兵器日夜造作不息。夏五月宸濠忌布政使張嶺賄錢甯囑吏部陸光祿卿以遠之。秋七月以許逵爲江西按察司副使宸濠以進貢方物爲名遣徐紀趙隆盧孔章等赴京偵伺沿途伏健步快馬限十二日報知。九月巡撫孫燧奏宜重九江兵備之權湖東分巡兼理兵備佞倖阻之不行。冬十一月宸濠仇大學士費



宏遣人焚毀其廬墓。并攻城掠羣從兄弟殺之。孫燧請兵擒捕。下兵部議。十二月。命太監畢貞守江西。貞遂附宸濠謀逆。

十三年春正月。甯王宸濠誣奏清軍御史范輅賄近侍。逮問除名。輅與畢貞爭坐。及辨朝王服色。故被陷。秋八月。宸濠大集羣盜。凌十一。閔廿四。吳十三等四出劫掠。有抗者。陰使盜屠其家。吳十三劫新建庫銀七千餘兩。南昌知府鄭璵置其窩主何順於理。濠怒。誣璵事。執送按察司監禁。九月。宸濠賄佞倖。改中官畢貞鎮守浙江。冬十月。巡撫孫燧捕賊首吳十三等繫南康府獄。濠恐泄謀。陰令賊黨劫獄奪之。十四年春二月。甯王宸濠持重賄交通南京留守太監劉琅。夏四月。孫燧自劾乞罷。不許。時李士實、劉養正、王春、劉吉、萬銳等日夜與宸濠謀。恐事起以反爲名。欲伺晏駕後乘變起。益遣奸黨盧孔章等分布水陸要道。萬里傳報。浹旬往返。縱跡大露。先是孫燧託禦盜名城進賢、南康、瑞州。又請敕湖東道分巡兼理兵備。與饒相犄角。九江當湖衝。最要害。請重兵備。兼設南康、甯州、武甯、瑞昌及湖廣興國。通城。便控制。廣信橫降香山諸寨。地險人悍。設通判駐其地。兼督六縣。又恐宸濠一旦起劫兵器。假討賊。盡調衛城兵器於外。嘗笑曰。卽賊起。吾不滅賊。賊必以吾處分。故速滅也。會江西大水。凌十一。吳十三。閔廿四等出沒鄱陽湖爲寇。燧與許逵自江外掩捕之。夜大風雨。不克濟。三賊走匿宸濠林墓中。竟不得。濠恐。乃致書陸完曰。急去孫燧。用梁辰湯沐來。王守仁亦可。切勿用吳廷舉。時鑑疏宸濠逆謀。凡七上。宸濠奸黨邀諸途。皆不得達。燧又以朝廷懿親。不敢先發。故自劾乞休。不報。五月。遣太監賴義。駙馬都尉崔元。都御史顏頤壽戒飭宸濠。時江彬、錢甯有隙。太監張忠等常欲借彬以傾甯。會濠居父喪。矯情飾禮。復令南昌生徒

保舉孝行。挾孫燧并巡按御史王金奏其事。燧等欲緩其逆謀。具疏上之。上見奏。驚曰。百官賢當陞。甯王賢欲何爲。且將置我何地耶。張忠乃乘間密言曰。錢甯、臧賢交通甯王。謀不軌。陛下不知乎。稱王孝。譏陛下不孝也。稱王早朝。譏陛下不朝也。上領之。東廠太監張銳。大學士楊廷和。初亦黨濠。爲復護衛。已而銳知有反謀。且知上入忠言。乃與廷和謀。欲復革去護衛。以免後患。於是御史蕭淮疏稱甯王不遵祖訓。包藏禍心。招納亡命。反形已具。疏入。江彬、張忠贊其說。遂敕義等往革其護衛。給事中徐之鸞、御史沈灼各上疏。宸濠不法事。詔發兵大索宸濠。偵卒於臧賢家。時宸濠偵卒林華匿賢家。家多複壁。外鑰木廚。開則長巷。人無覺者。華以是得脫歸。不獲。六月丙子。甯王宸濠反。都御史孫燧按察司副使許達死之。先是朝廷遣賴義、崔元、顏頤壽等行。崔元過楊廷和詢之。廷和曰。宣德中有疑於趙府。常令駙馬袁泰往。竟得釋。或此意也。元等遂行。而京師競傳以爲且擒治甯王。偵卒林華者。卽兼程逃歸。以六月十三日至江西。值濠生日。宴鎮巡三司等官。聞報大驚。蓋舊日擒荆王時。差太監蕭敬、駙馬蔡震。都御史戴珊過南昌。甯王親見之。遂以此必擒我。不復記廷和所云趙府事也。罷宴。遂密召劉養正、劉吉等謀之。養正曰。事急矣。明早鎮巡三司官入謝宴。可就擒之。殺其不附己者。因而舉事。乃夜集賊首吳十三、凌十一、閔廿四等。飭兵器以候。待旦。急召致仕侍郎李士實入。以謀反告之。士實唯唯而已。尋各官入謝。拜畢。左右帶甲露刃。侍衛者數百人。宸濠出立露臺。大言曰。太后有密旨。令我起兵入朝監國。汝等知之乎。都御史孫鏐毅然曰。密旨安在。濠曰。不必多言。我今往南京。汝保駕否。鏐張目直視濠。厲聲曰。天無二日。臣安有二君。太祖法制在。誰則敢違。濠大怒。命縛鏐。衆駭愕。相顧失色。按察司副使許達大呼曰。孫都御史朝廷大臣。汝反。

賊敢擅殺耶。顧鑑語曰：我欲先發不聽。今制於人，尚何言。濠併縛之，訊遠且何言。遠曰：惟有赤心耳。豈從汝反。且縛且罵。賊捶折鑑左臂，并縛遠。喝校尉火信等拽出惠民門外殺之。遠且死罵曰：今日賊殺我，明日朝廷必殺賊。時烈日中忽陰暝慘淡，城中聞之，無不流涕者。遂執御史王金、主事馬思聰、金山右布政胡濂、參政陳杲、劉斐、參議許效廉、黃宏、僉事顧鳳、都指揮許清白、并太監王宏俱械鎖下獄。思聰、黃宏不食死。逆黨舉人劉養正至，宸濠自出城迎之。養正常言：帝星明江漢間，故屬意宸濠。至是與李士實謀，令參政季燾、僉事潘鵬、師夔持檄諭降諸郡縣。左布政梁宸、廉使楊璋、副使唐錦爲所脅，移咨府部。傳檄遠近。革正德年號，指斥乘輿，以李士實、劉養正爲左右丞相，參政王綸爲兵部尚書，總督軍務大元帥，分遣逆黨婁伯、王春等四出收兵。戊寅閏廿四，吳十三等奪船順流攻南康。知府陳霖等遁走，進攻九江。兵備副使曹雷、知府汪穎等亦遁，城俱陷。宸濠卽令師夔居守，婁伯至進賢，知縣劉源清誅之。提督南贛軍務都御史王守仁移檄遠近，暴露宸濠罪惡，起兵討之。先是，守仁提督江西，致仕侍郎李士實素與宸濠通。一日，守仁見宸濠舉宴，士實亦在座。宸濠因言上政事缺失，外示愁嘆。士實曰：世豈無湯武耶。守仁曰：湯武亦須伊、呂。宸濠曰：有湯武，便有伊、呂。守仁曰：有伊、呂，何患無夷、齊。於是守仁陰爲之備。會五月間，福州三衛軍人進貴等作亂，兵部尚書王瓊知宸濠且反，謂主事應典曰：進貴亂小事，不足煩王守仁。但假此便宜，敕書在彼手中，以待他變可也。乃具題降敕令守仁查處福州亂軍。故宸濠之叛，江西守臣俱遇害被執。惟守仁以往勘福建，出六月初九日，自贛起行。十五日，守仁至豐城，知縣顧佖告濠反。守仁易服潛至臨江，幾爲宸濠所及。臨江知府戴德孺聞守仁至，喜，迎入城調度。守仁曰：臨江居大江之濱，與省

會近。且當道路之衝。莫若抵吉安爲宜。又以三策籌之曰。宸濠若出上策。直趨京師。出其不意。則宗社危矣。若出中策。趨南都。則大江南北亦被其害。但據江西省城。則出下策。勤王易爲也。及行至中途。恐其速出。乃爲計。佯奉朝廷密旨。先知甯藩反狀。令兩廣湖廣都御史楊且。秦金。暗伏要害地方。以俟甯藩兵至。復收優人數輩。厚賞以全其家。令其至伏兵處所。飛報竊發日期。將公文縫置袷衣絮中。臨發。適捕李士實家屬至舟尾。故令覘知之。守仁乃佯怒。令牽上岸處斬。而陰縱之。令其奔報宸濠。邏獲優人。果於袷衣絮中搜得公文。不敢卽發。庚辰。守仁飛報宸濠反。王瓊宣言曰。有王伯安在何患。不久當有捷報耳。丁亥。守仁集兵糧。傳檄四方諸郡縣。知府伍文定等皆至。議所向。守仁曰。兵家之道。急衝其鋒。攻其有備。皆非計之得。我故示以自守不出之形。彼必他出。然後尾而圖之。先復省城。以擣其巢穴。俟彼還兵來援。然後邀而擊之。此全勝之策也。宸濠果使人探。守仁不出。秋七月壬辰朔。宸濠會李士實。劉養正。造僞檄。指斥朝廷。參政季穀。同南昌教授趙承芳等。賈僞檄榜諭吉安。守仁執縛軍門。固封上進疏。略曰。陛下在位十四年。屢經變難。民心騷動。尙爾巡遊不已。致使宗室謀動干戈。冀竊大寶。且今天下之覬覦。豈特一甯王。天下之奸雄。豈特在宗室。言念及此。可爲寒心。昔漢武帝有輪臺之悔。而天下向治。唐德宗下奉天之詔。而士民感泣。伏望陛下痛自刻責。易轍改絃。罷奸回以動天下忠義之心。絕遊幸以杜天下奸雄之望。宸濠率兵出江西。留其黨宜春郡王拱樛。同內官萬銳等守南昌。自與拱樛。李士實。劉養正。閔廿四等六萬人。號十萬。以劉吉爲監軍。王綸爲參贊。指揮葛江爲都督。載其妃。媵。世子。從。總一百四十餘隊。分五哨出鄱陽。舳艫蔽江而下。聲言直取南京。太監畢貞守浙江。許起兵應之。戊戌。宸濠趨安慶。知府張文錦。都

指揮楊銳、指揮崔文令軍士鼓譟登城大罵之。宸濠遂留攻安慶。時九江、南昌既陷，遠近震駭。二人憑城以忠義激士，誓衆死守。僉事潘鵬，安慶人也。宸濠令鵬遣家屬持書入城，諭降。崔文手斬之，磔其尸投城下。宸濠令鵬至城下說之，文引弓欲射鵬，鵬走免。張文錦即鵬家，盡誅之。宸濠盡攻擊之術，不能克。時朝廷聞濠反，乃收太監蕭敬、秦用、盧明、都督錢甯、優人臧賢、尙書陸完等俱下獄，籍其家。後蕭敬罰二萬金得免，秦用、陸完謫戍邊，餘死獄中。癸卯，王守仁率知府伍文定等起兵，會於臨江樟樹鎮。於是知府戴德孺引兵自臨江，徐璉引兵自袁州，邢珣引兵自贛州，通判胡堯元、童琦引兵自瑞州，通判談儲、推官王暉、徐文英、新淦知縣李美、太和知縣李楫、甯都知縣王天、與萬安知縣王冕各以其兵至。十八日己酉，至豐城。衆議所往，或謂甯王經畫旬餘始出，留備南昌必嚴，攻之恐難猝拔。今甯王攻安慶久不克，兵疲意沮，若以大兵逼之江中，與安慶夾攻之，必敗。甯王敗，南昌不攻自破矣。守仁曰：不然，我師越南昌下，與甯王持江上，安慶之衆僅能自保，必不能援我於中流。而南昌兵議其後，絕我糧道。南康、九江又合勢乘之，腹背受敵，非利也。不若先攻南昌，甯王久不克安慶，精銳皆出，守禦必單弱。我兵新集氣銳，南昌可克也。甯王聞我攻南昌，必解安慶圍，還兵自救。暨來，我師已克南昌，彼聞之自奪氣，首尾牽制，此成擒矣。乃分其兵爲十三哨，哨三千人，少者千五百人，令伍文定等各攻一門，以四哨爲遊兵策應之。諜報甯王別伏兵攻廠，爲城中聲援。守仁遣知縣劉守緒夜從間道襲破之，以撼城中。十九日發兵，以二十日昧爽各至汎地。守仁下令曰：一鼓附城，再鼓登，三鼓不登，誅。四鼓不登，斬其隊將。又先期爲榜入諭城中居民，令各閉戶自守，勿助亂，勿恐畏逃匿。遂舁攻具至城下，梯絙而登。城上雖設守禦，聞風倒戈。城門有不閉者，

兵遂入。守仁乃入城撫定之。時贛州奉新等兵皆降盜。頗驍悍。然多肆殺掠。不遵約束。民被殺傷者衆。守仁執數人斬之。衆稍定。擒拱樛及萬銳等十餘人。宮中皆縱火自燒。殺不盡者拘繫之。散遣脅從。府庫被宸濠取充軍資。及兵士略取不盡者。籍封之。城中始安。時宸濠憤安慶不下。方自督兵填壕塹。期在必克。聞守仁帥兵攻南昌。大恐。李士實等勸宸濠勿還兵。舍安慶徑取南京。既卽大位。江西自服。宸濠不從。解安慶圍。移兵泊阮子江。先遣兵二萬還援江西。宸濠自率大軍繼之。二十二日。諜報至江西。守仁乃集衆議。或謂甯王兵盛。憑自憤怒。悉衆而來。我援兵未集。勢不能支。不若堅壁自守。以待四方之援。彼久頓堅城之下。兵孤援絕。將其潰矣。守仁曰。甯王兵力雖強。然所至徒恃焚掠。劫衆以威。未嘗逢大敵。與之旗鼓相當。一鏖戰者。彼所誘惑其下。不過以事成封爵富貴爲說。今進取不能。巢穴又覆。沮喪退歸。衆心已離。我以銳卒乘勝擊之。彼將不戰自潰矣。是日。撫州知府陳槐亦帥兵至。於是守仁大賑城中軍民。慰諭諸宗室。榜示宥釋脅從。常受賊官爵能自逃歸投首者。皆置不問。二十三日。諜報宸濠先鋒已至樵舍。守仁乃遣諸將帥兵迎擊之。令伍文定以正兵當其前。余恩繼文定後。邢珣帥兵繞出賊背。徐連、戴德孺、張兩翼分擊之。諸將各受命出。二十四日乙卯。賊兵乘風鼓譟而前。逼黃家渡。氣驕甚。伍文定、余恩佯北致之。賊爭進趨利。前後不相及。邢珣兵從後急擊。橫貫其陣。賊敗走。文定、恩還兵乘之。徐連、戴德孺兵合勢夾擊。賊不知所爲。遂大潰。追奔十餘里。擒斬二千餘級。溺水死者萬計。賊氣大沮。退保八字腦。是夜。宸濠問舟所泊地。其下對黃石磯。南人謂黃王。宸濠惡其音爲王。失機殺對者。賊衆見兵敗。稍稍散去。是日。建昌知府曾瓊等帥兵至。守仁謂九江、南康不復。則道終梗。且湖廣援兵不能達。乃別遣知府陳槐帥兵四百。

合知府林械兵攻九江。知府曾瑛帥兵四百合知府周朝佐兵攻南康。宸濠大賞將士當先者千金。被傷者百金。使人盡發南康九江兵至。丙辰并力合戰。官兵敗死者數百人。伍文定急斬先卻者以徇。身立礮銃間。火焚其鬚鬢。不移足。士殊死鬪。兵復振。礮及宸濠舟。賊遂大敗。擒斬二千餘級。溺水死者甚衆。賊復退保樵舍。聯舟爲方陣。盡出其金帛賞士。伍文定等乃爲火攻之具。邢珣擊其左。徐璉、戴德孺擊其右。余恩等分兵四伏。期火發兵合。丁巳宸濠朝羣臣。執其不盡力者將斬之。爭論未決。官兵四集。奮擊之火。及宸濠副舟。賊復大潰。宸濠與諸妃嬪泣別。妃嬪皆赴水死。將士執宸濠及其世子郡王儀賓。并僞丞相元帥等官李士實、劉養正、徐吉、涂欽、王綸、熊瓊、盧行、羅璜、丁賸、王春、吳十三、凌十一、秦榮、葛江、劉勛、何鏗、王信、吳國士、火信等數百餘人。被執脅從官太監王宏、御史王金、主事金山、按察使楊源、僉事王疇、潘鵬、參政陳杲、布政司梁宸、都指揮郝文、馬驥、白昂等。擒斬賊黨三千餘級。溺水死者約三萬。棄其衣甲器仗財物。與浮尸積聚。橫亙若洲。餘賊數百艘四散逃潰。復遣兵分勦。擊破之於樵舍。又破之於吳城。擒斬千餘級。守仁所遣曾瑛、陳槐亦攻復九江、南康二郡。各於沿湖諸處擒斬千餘級。將士執宸濠入江西。軍民聚觀。歡呼之聲震動天地。宸濠見守仁呼曰：王先生。我欲盡削護衛。請降爲庶民可乎？守仁曰：有國法在。遂頹首不言。初宸濠謀反。妃婁氏泣諫不聽。及宸濠被擒。於檻車中泣語人曰：昔紂用婦人言而亡天下。我以不用婦人言而亡其國。今悔恨何及？守仁爲求婁妃尸葬之。得宸濠交賄大小臣僚手籍。悉焚置不問。

八月。上下詔親征。時王守仁擒宸濠捷書未至。諸邊將在豹房者各獻擒濠之策。上亦欲假親征南遊。太監張永等見錢甯、臧賢事敗。又欲因此邀功。於是上自稱奉天征討威武大將軍鎮國公。邊將江彬、許

泰、劉暉、中貴張永、張忠等俱稱將軍。所下璽書改稱軍門檄。上方出師，駐蹕良鄉。而守仁捷奏至，且慮有沿途竊發，欲自獻俘闕下。疏略曰：臣於告變之際，選將集兵，振揚威武，先收省城，虛其巢穴，繼戰鄱湖，擊其惰歸。今宸濠已擒，逆黨已獲，從賊已掃，閩廣赴調，軍士已散，地方驚擾之民已定。竊惟宸濠擅作威福，睥睨神器，招納叛亡，輦轂之動靜，探無遺跡，廣置奸細，臣下之奏白，百不一通。發謀之始，逆料大駕必將親征，先於沿途伏有奸黨，期爲博浪、荆軻之謀。今逆不旋踵，遂已成擒。法宜解赴闕門，式昭天討。然欲付之部下各官，誠恐潛布之徒乘隙竊發，或虞意外。臣死有餘憾矣。蓋時事方艱，賊雖擒，亂未已也。奏入，上屢檄止之，令以俘候車駕至。大學士梁儲、蔣冕屢請回鑾，不聽。九月上至南京，王守仁發南昌，將獻俘闕下。張忠、江彬等謂當縱之鄱湖，俟上親與遇戰，而後奏凱論功。屢遣人至廣信止之。守仁不得已，乘夜過玉山，械繫宸濠等，取道由浙河以進。張永已候於杭州。守仁至杭，謂永曰：江西之民久遭濠毒，今經大亂，繼以旱災，又供京邊軍餉，困苦旣極，必逃聚山谷爲亂。昔助濠，尙爲脅從，今遂成土崩之勢。然後興兵定亂，不亦難乎？永深然之。乃徐曰：吾之此出，爲羣小在君側調護左右，以默輔聖躬，非爲掩功來也。但皇上意將順而行，猶可挽回萬一。若逆其意，徒激羣小之怒，無救於天下大計矣。於是守仁信其無他，以濠付之。乘夜渡浙江，過越還江西。太監張永復命，先見上，備言王守仁之忠，并江彬等欲害之意。初，江彬、張忠等謀欲奪功，誣守仁初附宸濠。及知其勢敗，然後擒濠攘功。張永知其謀，語家人曰：王都御史忠臣爲國，今欲以此害之。他日朝廷有事，何以教臣子之忠？乃先見上，備言其事。彬等毀遂不入。張忠又言守仁在杭，竟不至南京。陛下試召之，必不來。無君可知。上召之，守仁卽奔命至龍江，將進見。忠殊失意，又



從中阻之。守仁乃綸巾野服入九華山。張永聞之。又力言於上曰。王守仁忠臣。今聞衆欲爭功。欲棄其官。入山爲道士。由是上益信之。命守仁巡撫江西。擢吉安知府伍文定爲江西按察司。贛州知府邢珣爲江西布政司右參政。十一月。上在南京。張忠、許泰、劉暉等復營內旨。領京邊軍討宸濠餘黨。時守仁受命巡撫江西。許泰等領京邊軍萬餘人在南昌。勦捕餘賊。給事中祝續、御史章綸隨軍紀驗。望風附會。肆爲飛語。北軍旦暮呼守仁名。嫚罵。或衝道啓釁。守仁略不爲動。務待以禮。預遣官諭市人移家於鄉。而以老羸應門。始欲犒賞北軍。泰等預禁之。令勿受。守仁給示內外。述北軍離家苦楚。居民當致主客禮。每出遇北軍喪。必停車問故。厚與之櫬。嗟歎乃去。久之。北軍咸曰。王都堂待我有禮。我安得犯之。會冬至。時新經濠亂。民間哭泣。酬酒聲聞不絕。北軍無不思家。泣下求歸者。忠、泰自挾所長較射教場。江西官軍射多不中。忠、泰乃強守仁。守仁故不得已。應之。忠、泰笑。守仁乃三發三中。每一中。北軍在傍同聲踴躍。呼應遠近。忠、泰不樂而罷。且曰。我軍皆附彼矣。遂班師。時江西已甯。忠等搜求微隱。羅織平民。妄誅戮以爲功。而沒其貨財。軍馬駐省城五閱月。糜費浩繁。江西騷然。不勝其擾。十二月。宸濠等至南京。上欲自以爲功。乃與諸近侍戎服。整軍容。出城數十里。列俘於前。爲凱旋狀。旣入。囚禁之。

十五年秋九月。上以大將軍鈞帖。令巡撫江西都御史王守仁重上捷書。守仁節略前奏。入江彬、張忠等姓名於內。上之疏入。始議北旋。冬十月。上自南京班師還京。十二月。上至通州。賜宸濠死。燔其尸。餘黨至京師。磔誅之。獨抑王守仁功未敘。至嘉靖初。始起爲南京兵部尙書。封新建伯。

谷應泰曰。武宗慢棄神器。王綱不守。累葉金甌。視爲中原之鹿。於是羣邪睥睨。蕭牆之內。眈眈虎視。人有

風雲之想矣。宸濠復護衛於正德二年。舉兵於正德十四年。十餘年之間。碁布星羅。賊黨幾徧海內。當其始也。覘螽斯龍種之衰。妄冀千秋萬歲之約。畜梁孝淮南之志。要結伍被。嚴助之歡。輿服升朝。儼然大寶。稱戈喋血。詎其本懷。既而玉歷無疆。妖謀漸洩。羅落彌嚴。腹心愈廣。其骨鯁不附者。內則大學士費宏。外則巡撫孫燧。副使許達。數人已耳。宮掖樹其私人。六卿半其羽翼。京省津梁。飛騎立達。荆蠻百越。振臂能呼。知義旗之莫舉。料乘輿之必東。設伏關輔之間。陰謀博浪之事。嗟乎。飛鷹颺羽。已上其鞫。游魚鼓鬣。已吞其餌。武宗方且改號將軍。貶名鎮國。右挈江彬。左倚忠永。張皇國門。有同兒戲。豈不危哉。所幸宸濠身居彭蠡之間。結聚椎埋之客。地利既失。人謀不臧。玉燭灰而復明。皇輿昃而旋正。是乃天意。夫豈人事焉。若王新建。崎嶇江介。倡率羣僚。亟攻南昌。覆其巢穴。迎戰鄱陽。擊其惰歸。柴桑捷而長鯨晝徙。湓口圍而寶帳宵灰。兵甫萬餘。時纔旬日。天生李晟。爲國非爲朕也。大功甫立。疑謗旋生。角巾野服。口不言功。委蛇於羣閹之間。調護於悍軍之日。所憂在國。憂而不在身危。所爭在民心。而不在己爵。卒之上勳格而不行。五等加而又奪。然而陳湯之爵失而不泯。其功魏徵之碑仆而詎損。其直微彰柔剛。龍蛇伸屈。殆所謂浩然正氣。日月爭光者與。若夫孤城單旅。牽制賊兵。不使下留都者。安慶知府張文錦。武臣楊銳。崔升也。聞難赴義。先登摧敵。佐成大功者。知府伍文定。及邢珣。徐璉。戴德孺也。分翦支蔓。收復降郡者。知府陳槐。曾璉也。王瓊拔守仁於未有事之先。未雨綢繆。國之元臣。張永一寺人耳。片言感悟。力爲左右。呂彊張承業之功。何以加焉。悲夫。樊噲以呂戚而得免。顏醯杜預賂朝貴而始遂功名。功臣志士所遇。抑又何窮與。

卷四十八

平南贛盜

武宗正德六年夏四月。江西盜起。命右都御史陳金總制軍務。右副都御史俞諫提督軍務討之。先是。江西諸郡盜賊蠭起。贛賊犯新淦。執參政趙士賢。靖安賊胡雷二等。據越王嶺。瑪瑙寨。華林賊陳福一破瑞州。既而撫州東鄉。饒州桃源洞等處賊亦作亂。金等奏調廣西田州。東蘭等處狼兵合征之。七年春正月。南贛巡撫都御史周南率兵攻破大帽等山寨。盡平之。大帽山交界江。閩。廣三省。賊首張番。瓊。李四仔。鐘聰。劉條。黃鏞等聚徒數千流劫。攻陷建甯。甯化。石城。萬安諸縣。南分遣江西兵從安遠入攻。破巢穴七。廣東兵從程鄉入攻。破巢穴九。福建兵從武平入攻。破巢穴八。擒番瓊等悉斬之。俘獲賊屬奪回良善甚衆。二月。江西按察司副使周憲率兵討廬山左湖盆塘賊。敗之。擒斬數百人。四月。周憲移軍攻華林賊於仙女寨。拔之。進克鷄公嶺。先後擒斬千餘人。進薄華林。絕其出道。賊益窘。五月。周憲攻華林賊。及其子幹俱死之。先是。陳金檄周憲等分兵三路討華林賊。憲率兵進。會諜者言賊饑疲。憲信之。遂檄兵夾攻。其二路失期不至。憲與賊戰。獨深入山谷峻險。賊憑高發礮石。下如雨。兵敗。憲被執。刀中憲首。流血滿面。左髀復中槍。不能行。大罵賊不絕口。賊怒。支解之。子幹見父被執。躍馬直前。中流矢。力戰墮崖死。賊勢復振。事聞。贈憲官諡忠愍。旌其子。六月。南昌知府李承勳會同按察使王秩督兵進攻華林賊。勳招降賊帥黃奇。置麾下。有智略。任用之。人謂勳宜防不測。勳益親信。令宿帳中。奇感奮。誓以死報。勳乃令奇入賊寨。說其黨多來降者。與約期。令俟報。至期。承勳令士酋岑猛選精兵五百人。夜與俱至山下。

勳令黃奇密入寨。誘所與約降者來。既見。復縱之去。令為內應。勳乃與猛帥五百人夜銜枚登山。歷重險。上黃奇與數人前導。至壘。賊方鼾睡。直夜者擊三更。奇拔柵率眾入。五百人奮刀砍之。內應降賊亦合勢夾攻。賊倉卒不知所為。求甲仗皆不得。斬首三千餘級。餘眾奔出壘。乘夜逃匿山谷。候曉搜諸山。又斬獲千餘人。華林賊遂平。於是移兵擊靖安瑪瑙寨賊。盡俘之。都御史陳金奏江西華林賊已勦平。桃源賊王浩八願撫。加金太子少保。餘論功行賞有差。冬十月。命右都御史陶琰總督諸軍務事。初。廷議以河北江西諸寇未平。故復敕琰總理軍務事。至則劉六已滅。王浩八聽撫。琰慮浩八譎詐難信。乃奏設兵備及簡拔郡寮有才者分處要害。

八年春正月。桃源賊王浩八等復作亂。率五洞蠻兵與東鄉賊分劫州縣。命操江副都御史俞諫提督軍務。同總兵劉暉率狼兵進勦。夏四月。江西兵備副使胡世甯約王賽一內應。引兵征東鄉劇賊樂庚二。陳邦四等。盡擒之。東鄉故賊巢。世甯撫御反側。務立信義。樂庚二、陳邦四怙亂復叛。悉擒馘。王賽一效順有功。奏原其死。既而修城濠。遷縣治。經武賑飢。百姓晏然。五月。江西參政吳廷舉單騎入桃源。諭劇賊王浩八等。計擒賊渠以出。桃源賊用兵歷年。征討費以萬計。而賊益熾。廷舉欲用奇謀取勝。免胄單騎入賊巢。諭令解散。為賊所留。耀武劫威。廷舉略不為動。久之。因得以識其左右有謀勇者。陰結之。使執其渠。因奉廷舉歸。俞諫率狼兵大敗桃源賊於裴源。初。諫因吳廷舉被執。移兵桃源進勦。知府李承勳曰。賊乏食。必掠裴源積粟。請贛兵及南昌兵自岳陽分兩翼伏裴源待之。賊果入裴源。大敗遁去。桃源賊棄巢奔突。四出踰饒信。縱掠徽衢諸州縣。初。賊聞狼兵至。頗懼。欲降。按察司王秩欲受之。已有約。議者以賊

反覆不可信。欲乘兵威撲滅。取降者殺之。賊復大亂。棄巢奔突。四出劫掠。徽衢等處民被其害。六月。總督浙江軍務都御史陶琰。巡撫應天都御史王縝。會總制江西都御史俞諫。夾攻桃源賊王浩。八於徽衢。平之初。琰慮桃源賊聽撫難信。預爲之防。至是果突入境。督兵會勦。餘黨悉平。總制俞諫奏江西賊平。請建東鄉萬年二縣。分治地方。撫安人民。從之。十二月。俞諫調兵征建昌賊徐九齡等。平之。建昌賊爲患數年。勢逼益府。官軍不能討。至是諫命師悉擒以還。

九年三月。總制軍務俞諫檄兵備胡世甯等會兵勦臨川四寨宿盜。盡平之。十月。陞南昌知府李承勳浙江按察司。太監黎安欲奪承勳功。誣陷之。大理卿燕忠卽訊廣信得直。

十二年二月。巡撫南贛都御史王守仁檄四省兵備官。選募民兵操練。初。陳金討桃源。華林諸賊。多所招撫。未大示懲創。又民間父兄被殺者。不得報讎。時相詬訾。諸凶不自安。轉徙嘯聚。不數年。仍起爲盜。又南贛地多山險。易爲巢穴。南安橫水桶岡。諸寨有賊首謝志山。藍天鳳。漳州泮頭等寨有賊首池大鬢等。於是福建。江西。湖廣。廣東之界。方千里。皆亂。兵部尙書王瓊知守仁才。特薦用之。守仁至。以前者多調狼達土軍。糜費踰萬。乃使四省兵備官於各屬。弩手。打手。機快中。選饒勇有膽力者。縣千人。少或八九百。選最者。優廩餼。署爲將領。其兵備原額官軍。汰老弱三分之一。各縣賢能官統之。專守城隘。所募精兵。隨各兵備官屯紮。別選官分隊統習之。於是各縣屯戍。旣足防守。而兵備召募者。又可應變出奇。盜賊漸知所畏。三月。王守仁調三省兵攻信豐。龍南流賊。連敗之。賊突至信豐。守仁令乘險設伏。厚集以待之。乃潛令兵往徑道夾攻。賊奔潰。象湖山拒守。又潛兵擣其巢穴。大敗之。賊復潰入流恩山岡等巢。尋遁去。五月。

王守仁調兵攻何塘洞山寨賊曾張師富等及長富村等處二十餘巢。平之。其脅從餘黨悉願攜帶家口出官聽撫。守仁委官安插。復業四千餘人。復檄知府季燾調兵擒賊帥陳能。平其巢穴。秋七月。王守仁請提督軍務。許之。初。守仁上疏論狼兵所過不減於盜。轉輸之苦。重困於民。乃請便宜行事。期於成功。不限以時。兵衆既練。號令既明。事無掣肘。可以相機勦滅。衆迂其議。屢不報。尚書王瓊慨然曰。朝廷有此等人。不與以柄。又將誰用。因守仁疏覆議。卽奉旨改提督南贛汀漳等處軍務。冬十月。王守仁討汀州左溪賊藍天鳳等。平之。天鳳等與贛南下新穩下等洞賊雷文聰。高文輝等盤據千里。守仁集從事議曰。諸巢爲患。雖同事勢各異。以湖廣言之。則桶岡諸巢爲賊之咽喉。而橫水。左溪諸巢爲之腹心。以江西言之。則橫水。左溪諸巢爲賊之腹心。而桶岡諸巢爲之羽翼。今不先去腹心之患。而欲與湖廣夾攻桶岡。進兵兩寇之間。腹背受敵。非吾利也。况賊但聞吾擊湖廣。夾攻桶岡。橫水。左溪必觀望未備。出其不意。可以得志。橫水。左溪既破。移兵桶岡。勢如破竹矣。乃遣都指揮許清率兵自南康新溪入。知府邢珣率兵自上猶縣石人坑入。知縣王天與率兵自上猶縣白面峪入。皆會橫水。指揮郝文率兵自大庾縣義安入。知府唐淳率兵自大庾縣聶都入。知府季燾率兵自大庾縣穩下入。縣丞舒富率兵自上猶縣金坑入。皆會左溪。知府伍文定。知縣張戢各率兵從上猶。南康分入。以遏奔軼。守仁親率兵千餘自南康進擣橫水。與諸軍會。分布既定。乃以初七日分道並進。守仁至橫水。謝志山等倉卒據險拒之。守仁未至。賊巢三十里駐兵。夜募鄉兵善登山者四百人。各執一旗。賈統礮。由間道攀崖上險。分布近賊巢。左右極高山頂。伏覘賊度。我兵至險。舉礮火應。又預遣人夜率壯士緣崖上險。奪發其滾木礮石。十二日。守仁率兵進至十八面隘。

賊方憑險迎敵。忽聞近巢諸山頂礮聲如雷，烟焰漲天。守仁麾兵進逼之。賊大驚失措，謂官兵已盡得其巢穴，遂棄險走。我兵乘勝驟進，指揮謝杲、馬廷瑞兵由間道先入焚賊巢。賊退無所歸，大奔潰。遂破橫水大巢。邢珣、王天與等各破數巢，皆會於橫水。郊文、唐淳等各破數寨，皆會於左溪。會天霧雨，休兵。已諜知諸潰賊收集餘衆，據險立柵，然倉卒無資糧。守仁乃下令各營皆分兵爲奇正二哨，一前攻，一後繼。用土人爲鄉導，自是諸營各分道破餘巢。伍文定、張戢亦連破數巢，入會左溪。賊悉平。十一月，王守仁會兵攻桶岡。初，守仁乘橫水、左溪之勝，遣人諭以禍福。於是桶岡賊鍾景納款降。守仁使夜入賊巢諭之。期以初一日使人於鎖匙籠出降。賊方恐，見使至，皆喜而橫水、左溪賊持不可，遲疑未決。守仁遣使於鎖匙籠促降，而別遣邢珣率兵入茶坑，伍文定率兵入西山界，唐淳帥兵入十八磊，張戢帥兵入葫蘆洞，俱冒雨入藍廷鳳方於鎖匙籠聚議，忽聞諸兵已入險，皆震愕，急奔入內隘，阻水爲陣。邢珣麾兵渡水前擊，張戢衝其右，伍文定又自張戢右懸崖繞出賊旁，賊敗走。舒富、王天與亦由鎖匙籠入，賊悉衆奔十八磊。唐淳嚴陣迎擊之，賊又敗。會日暮，扼險相持。明日諸軍合勢併擊，邢珣先破桶岡大巢，諸軍奮勇竝進，俘斬甚衆。湖廣兵亦至，賊餘衆遁入山谷。守仁遣諸將分道捕之。於是橫水、左溪、桶岡之賊略盡。賊首藍廷鳳、蕭貴模等皆斬獲無遺。守仁出師凡兩月，平賊巢八十四處。遂議於橫水等處建城，設安遠縣治，控禦三省。捷聞，擢守仁右副都御史。

十三年春正月，王守仁討泃頭賊，平之。先是，守仁征橫水、桶岡等賊，慮泃頭賊乘虛出擾，乃使人賞以銀布諭降之。惟賊首池大鬐不從。守仁計兵力未暇羈縻之，勿深問。有金巢等率衆降，守仁厚撫之，令從征。

及橫水破。大鬢懼，遣其弟池仲安率老弱二百詣守仁，亦降。卽願從征立功，實覘虛實爲內應也。守仁知之，令從別哨遠其歸路，陰使人分召近泐頭諸縣被賊害者詢之，得其情，各授方略，遣之歸，令密集兵衆。候平桶岡後，報師期，及桶岡平，大鬢益懼。守仁遣使至泐頭，賜諸賊牛酒，見賊嚴爲備，詭語使者曰：龍川新民鄭志高、盧珂欲讎殺掩襲，故備，非虞官兵也。守仁佯信其言，怒盧鄭，移檄臨川、廉二人擅兵狀，且令大鬢除道，候還兵討之。大鬢假使來謝，無勞官兵，當自防禦之。盧珂、鄭志高、陳英者，龍川已招新民也，仍領舊部三千餘衆。時諸縣民皆爲大鬢所脅，三人者獨抗賊，賊讎之。守仁還兵，三人來告變，言大鬢反狀。時池仲安方領兵在守仁所，守仁乃佯怒，三人收縛將斬之，曰：大鬢方遣弟領兵報効，安得有此。仲安遂叩首辨列三人罪惡，守仁佯信之，械繫珂等，置之獄。守仁密使人至獄中諭以意，令三人無恐，且遣使歸，集衆以候。十二月二十日，守仁還至贛，張樂大享將士，下令橫水、桶岡旣平，泐頭歸順，境內無虞矣。民久勞苦，宜休兵爲樂，遂散兵使歸農，乃遣仲安歸報其兄，以盧珂被繫故，遣使令大鬢勿撤備，以防珂黨掩襲。大鬢意乃大安，守仁別購仲安所親，說仲安令自來投訴，云官意良厚，何可不親一往謝。况使盧珂等言無所入，大鬢信之，謂其下曰：欲伸先屈，贛州伎倆，須自往觀之。遂帥其徒四十餘人自詣贛。守仁先已檄諸郡縣及龍川等勒兵候報，至是探知大鬢就道，亟遣使發諸路兵候泐頭，然道經賊巢始達，則使別賣一檄爲捕盧珂黨與者，佯示賊，賊果問，見檄遂不爲意。大鬢至贛，謁守仁，見門軍無用兵形，又覘知珂等繫獄，意益安，遣人歸報其黨，謂事無他。守仁乃夜釋珂等，使問道歸發兵，而令諸官屬以次設牛酒，日宴犒大鬢等，緩其歸。久之，度珂已至家，諸郡縣兵當大集，守仁乃設犒於庭，先伏甲士，引大鬢等入，悉擒



之出珂狀訊之。皆服。遂悉置獄。而趣諸路兵同抵賊巢。守仁率親兵由龍南縣冷水徑直擣下洲大巢。諸路兵皆令入三洲。賊弛備既久。驟聞官兵四集。驚懼。乃分投出禦。而悉其精銳千餘。據險設伏於龍子嶺。官軍爲三衝。犄角進。指揮余恩首擊賊。戰良久。賊敗。王受等追之。伏發被隕。適推官危壽兵至。鼓譟前衝之。千戶孟俊率兵遶其後。賊大潰。遂克三洲大巢。餘賊精銳尙八百人。聚九連山。山四面險絕。惟一面得上。賊設礮石滾木拒之。官兵不敢近。守仁乃令官兵衣賊衣。抵暮詐爲賊敗。奔者上山。賊見之。果相招呼。官兵乃得渡險。遂隕其路。賊覺急禦。則大衆已闌入矣。賊不支。乃退走。潰出。官兵先四路設伏待之。擒斬略盡。餘徒二百人。慟哭請降。守仁納之。相視諸險隘。以和平地方。控隕三省。奏設縣治。下部議從之。遂班師。捷聞。賜璽書褒賞。餘功賞賚有差。南贛自此無警矣。

谷應泰曰。正德濁亂。羣盜蠡起。而江西之盜有五。大帽山者號贛賊。仙女寨。鷄公嶺者號華林賊。瑪瑙寨。越王嶺者號靖安賊。王浩八爲桃源賊。樂庚二。陳邦四爲東鄉賊。自江西副使周憲戰死華林。總督陶琰再撫浩八。而二賊稱最劇矣。至巡撫周南平贛賊。知府李承勳平華林。靖安參政胡世甯。吳廷舉平桃源。東鄉。當是時。陳金。俞諫。實筦節鉞。承勳。廷舉功最出奇。經營九載。至正德十一年。而南贛賊黨略平。皇靈未暢。苞蘖旋萌。於是江西之賊復有四。藍天鳳等爲左溪賊。謝志山等爲橫水賊。鍾景等爲桶岡賊。池大鬚等爲涖頭賊。新建以廷推舊望。簡荷新銜。規畫山川。廣行間諜。親破賊巢者八十餘。增設縣治者二。特設南贛提督軍門者一。自正德十二年受命。至十三年。而江西賊悉平矣。夫諸臣平賊遲而變隨。新建平賊速而賊定。蓋江西南臨百粵。北枕大江。東連閩嶠。西接荆蠻。地延千里。址交五省。又有崇山峻嶺。鳥道

叢篁車騎不得長驅。米芻不得時給。王師直指。則鳥遁深林。振旅還朝。卽鼠謀竊發。揆其形勢。則決地之翼不能離巢。徑丈之鱗終難失水。然而尉陀有七郡之計。任囂效坐大之志。庾嶺以南。舉足非國家有也。當四賊再發。泐頭遠在汀州。桶岡實處楚境。左溪橫水。連互其中。彼且視狡兔之窟。成率然之形。漢天子有神靈。豈能從天而下乎。而當時議者動思言撫。此何異招麋鹿於金鑣。呼亡援於朱檻。有躑躅儻祥去之。惟恐不速耳。撫不就而用勦。徵調狼達。兼招苗峒。劫掠性成。罕知王制。引入內地。恃爲長城。賊甫獸駭。我已鷓鴣張。賊苟帖耳求生。則我已受之恐後矣。羈縻勿絕。豈久安長治之道也哉。新建悉罷客兵。自募鄉勇。養兵數月。觀釁旬時。德裕築籌邊之樓。文淵畫聚米之勢。猶慮賊兵四出。牽制我師。僞撫泐頭。佯委桶岡。使皆懷疑。觀望徘徊之間。鼓行而進。直擣中堅。奇兵雲擾。鐵騎鸚馳。橫水覆巢。左溪失險矣。桶岡旣斷。右臂。王師已入門庭。兼兩寨逋逃。自相駭觸。乘其破膽。一鼓遂登。兵法所謂出其不意者也。泐頭愚狡。新建玩弄股掌。賊首池大鬚等皆千里誘致。縛之樽俎。渠魁已在檻車。天兵已薄賊險。而彼且鼯寢晏然。鼓角一鳴。千山聲動。賊於斯時登陴授兵。則一木不支。倉皇出逸。則四面楚歌。相顧解甲。慟哭請降。武侯五月渡瀘。而南人不復反矣。夫江介嶺表。限在天南。拊背掘吭。專支閩外。楊僕樓船。馬援銅柱。比之新建。何以稱焉。

卷四十九

江彬奸佞錢甯附

武宗正德七年冬十月。內旨欲調邊兵入衛京師。大學士李東陽等及府部科道力諫不聽。時倖豎有獻密計者。言京軍不習戰陣。欲調宣府官軍入衛京師。而以京軍充數戍邊。每歲春秋更調。如班操例。上遣司禮監谷大用至閣議。東陽力持以爲不可。大用謂上有先入之言。不可破。姑試之。以俟再議。東陽曰。某等職在論思。今日曲從。卽有後患。百死何贖。乃上疏曰。宣府京師北門。切近漠北。朝廷屯宿重兵。分地防守。尚恐不給。每年河南等處邊軍輪班備禦。近因流盜猖獗。動調官軍。乃一時權宜。甚非得已。蓋京軍官軍各有分地。無故而動。一不便也。京軍備邊。不習戰陣。恐傷國威。二不便也。京軍出京。駭人耳目。聞之各處。未免驚疑。三不便也。京軍在外。恃勢淫占。將官護短。而不可禁。邊方受害。而不敢言。四不便也。邊軍在內。挾恩恃愛。傲睨軍民。蔑視官府。小則怠緩。大則違法治之。則或不能堪。縱之則愈不可制。五不便也。遠違妻子。棄捐墳墓。或風俗之不相宜。或糗糧之不相續。六不便也。糧草之外。必須行糧。布花之外。必須賞賚。糜費無紀。七不便也。往來交替。日無甯息。倉卒之際。或變起於道途。厭倦之餘。或患生於肘腋。八不便也。示京營之空虛。見中國之單弱。九不便也。西北諸邊。見報聲息。齒唇之地。正須策應。脫有疏失。咎將誰歸。十不便也。疏上。翌日。竟降內旨行之。召大同遊擊江彬等入京師。彬宣府人。驍勇狡險。時從宣府副總兵張俊征流賊於山東。惟殺掠良民以邀賞。班師入京。賂錢甯引入豹房。得見上。彬機警善迎人意。上喜。留侍左右。陞左都督。冒國姓。爲義兒。時時在上前講說兵事。因請盡調遼東宣府大同延綏四鎮精兵入京操練。時許泰劉暉等皆有寵於上。號外四家。而彬尤甚。邊卒縱橫驕悍。都人苦之。上嘗於西內練兵。令彬等率兵入習營陣。校騎射。或時爲角觝之戲。上戎服臨之。銃礮之聲不絕禁中。千戶周麒常叱之。彬

竟陷麒死。於是左右皆畏彬。

八年冬十月。以錢甯掌錦衣衛事。賜姓朱甯。鎮安人。太監錢能鎮守雲南。甯幼鬻能家。能死事劉瑾。因得見上。上甚悅之。嘗醉枕甯臥。百官候朝至。晡莫得帝起居。但伺甯。甯內侍帝。外招權納賄。諸大臣造謁。恐後。小拂意。卽中害。內侍武臣率重資投甯。求鎮守總兵。都察院經歷錢岌至。拜甯爲父。密伺廷臣忤甯者。彈斥之。是時內臣張銳掌東廠。威勢與甯埒。中外號曰廠衛。

九年春二月。帝始微行黃花鎮等處。近倖朱甯、張銳、張雄等日導上游。收微行。不可諫止。

十年秋七月。浙江左布政方永良劾朱甯鬻鈔害民不報。時甯黷貨無厭。以鈔二萬發浙江。易銀三萬餘兩。永良上言。四方羣盜甫息。瘡痍未瘳。邊塞多虞。浙東西雨雹爲災。嗷嗷千里。臣苟隱忍不爲陛下言之。則已斂之財必入朱甯之手。而民心傷。民心傷則邦本搖。陛下甯不爲之寒心乎。臣惟朱甯竊寵以來。陛下之賜與無算。四方之饋遺不貲。篋笥之中必不少。此乃苛斂無已。負恩實深。伏乞陛下割偏私之愛。下之詔獄。明正典刑。仍急行浙江巡按監察御史。將已斂鈔銀盡給還民。民怨可慰。臣死且甘心。儻不以臣言爲然。置之不問。日復一日。尾大不掉。必蠹軍食。民肆無厭之求。有出於尋常所不料者。陛下悔之晚矣。疏入。甯頗懼。乃委過下人。遣衛卒追所發鈔。而以價銀還之民。時甯怙寵藉威。舉朝屏息。獨永良訟言攻之。憾之不置。尋永良上疏乞致仕。從之。

十一年春正月。上御豹房。與江彬等同臥起。彬、秦、暉皆賜姓朱。彬等與都督錢甯、中貴張忠、盧明、秦用、蕭敬、優人臧賢表裏擅權爲奸。諸司章疏多阻格不上。然諸寵皆出彬下。彬時導上出宮禁。遊獵近郊。羣臣

諫不聽。八月，大學士楊一清上疏乞休，略言宮府異體，用舍違宜，官帑空虛，浮費冗食，不能革，民力困弊，徵求苛斂，不能除，讒言可以惑聖聽，匹夫得以搖國是，禁庭雜介胄之夫，京師無藩翰之託，地震天鳴，日食星變，旱乾水溢，報無虛日，覲顏在位，將安用之。疏入，忤朱甯，致仕歸。

十二年夏六月，中旨革彭澤職爲民。先是，彭澤經略哈密，納幣土番，頗失國體。既召回，掌都察院事，常與言官論及朱甯，輒忿曰：「吾恨不手刃此賊！」兵部尚書王瓊數憾澤，因以語甯，且曰：「吾爲公致彼來，公自察之。」遂招澤相過，匿甯屏後，故以言激之。澤復大罵甯，由是深銜之。至是，瓊劾澤擅命納幣土番，致啓邊釁，奏上，甯營內旨除名。八月，上出關遊獵。先是，江彬等屢導上出宮，遊戲近郊，彬竝騎鎧冑，幾不可辨，因數數言宣府樂。至是，遂出居庸關，至宣府，臨塞下，巡關御史張欽上疏諫，不報。彬爲上營鎮國府第於宣府，輦豹房珍玩女御其中。時時入民家，益索婦女以進，帝樂之，忘歸。九月上幸大同，獵陽和諸城。上時獨乘一馬，鹵簿侍從皆不及。二十七日方獵，天雨冰雹，軍士有死者。是夜又有星隕之異。明日，駕赴大同，北寇數萬騎犯陽和，掠應州。上命諸將擊之，引去。十月，南京吏科給事中孫懋上疏言都督江彬以梟雄之資，懷儉邪之志，自緣進用以來，專事從諛導非，或遊獵馳驅，或聲色貨利，凡可以蠱惑聖心者，無所不至。去年導陛下幸南海子，幸功德寺，又幸昌平等處，流聞四方，驚駭人聽。今又導陛下出居庸關，既臨宣府，又過大同，以致寇騎深入應州，使當日各鎮之兵未集，強寇之衆沓來，幾何不蹈土木之轍哉。是彬在

一日，國之安危未可知也。不報。上還京，封江彬平鹵伯，許泰安邊伯，冒應州功也。典膳李恭具疏請回鑾，指切江彬罪，擬朝賀上之。彬聞，逮恭拷斃於獄。給事石天柱刺血上疏，御史葉忠言尤深切，俱不省。

十三年春正月上郊祀畢復出關游幸太皇太后王氏崩乃還京江彬爲營卒報怨遣百戶朱英執人於平谷御史董相杖而繫之且欲奏聞彬遽譖於上降相徐州判官夏四月上以太后將祔葬親詣天壽山祭告六陵遂幸黃花鎮密雲等處遊獵六月甯夏塞有警上復議北征自稱威武大將軍太師鎮國公朱壽巡邊以江彬爲威武副將軍扈行令內閣草敕大學士楊廷和梁儲蔣冕毛紀上疏力諫且云萬一宗藩中援祖訓指此爲言陛下何以應之又或以朝無正臣內有奸邪爲名陛下之左右與臣等何以自解不聽廷和遂稱疾不出上御左順門召梁儲面趣令草制儲對曰他可將順此制斷不可草上大怒挺劍起曰不草制齒此劍儲免冠伏地泣諫曰臣逆命有罪願就死草制則以臣名君臣死不敢奉命良久上擲劍去乃自稱之不復草制彬亦罷副將軍命禮部尚書李遜學等廷議建儲居守時錢甯意在甯藩世子江彬意別有屬梁儲厲聲曰皇上春秋鼎盛建儲未易輕言萬一有他吾輩伏斧鑕矣邪謀豈可聽徇兵部尚書王瓊吏部侍郎王鴻儒亦力言不可議遂寢七月上北巡出居庸關先是上旣還京輒思宣府樂稱曰家裏至是復歷宣府至大同大同巡撫都御史胡瓚乞回鑾瓚以沙漠之地不宜久留而扈從邊將恃江彬等怙寵大爲邊地害上疏極論且引漢袁盎諫文帝爲言不報十月上自偏頭關渡河幸榆林彬索金璧裘馬數十萬令邊吏獻虎豹犬馬南京禮部右侍郎楊廉兵部尚書喬宇上疏諫止不報

十四年二月上自榆林還京三月上自稱總督軍務威武大將軍太師鎮國公朱壽制下南巡上欲登岱宗歷徐揚至南京臨蘇浙浮江漢祠武當徧觀中原時甯王宸濠久蓄異謀制下人情洶洶翰林修撰

舒芬等約羣臣上疏乞留。俱會闕下。吏部尙書陸完迎謂曰。主上聞直諫。輒引刀爲刎狀。完意蓋以阻言者也。於是翰林修撰舒芬等疏先入。兵部郎中黃鞏。員外陸震。聯疏入。吏部郎中夏良勝。禮部郎中范潮。太常博士陳允川。疏繼入。醫士徐鏊。以醫諫。吏部郎中張衍慶。禮部郎中姜龍。兵部郎中孫鳳。陸倬等。率部察合疏入。工部郎中林大輅等。大理寺正周敍等。行人司副余廷瓚等。亦合疏先後入。上大怒。召江彬示之。以彬言下黃鞏。陸震。夏良勝。范潮。陳允川。徐鏊。錦衣獄。命舒芬。張衍慶。姜龍。孫鳳。陸倬等。百有七人。跪午門外五日。林大輅。周敍。余廷瓚等。二十餘人。俱下獄。明日。黃鞏等六人。亦跪五日。時舒芬疏最切直。而鞏以事出。江彬故獨劾之。芬疏略曰。陛下之出。以鎮國公爲名號。苟所至親王地。據助臣之禮。以待陛下。將朝之乎。抑受其朝乎。萬一循名責實。求此悖謬之端。則左右寵倖之人。無死所矣。陛下大昏。十有五年。而聖嗣未育。故凡一切危亡之迹。大臣知之而不言。小臣言之而不盡。其志非恭順。蓋聽陛下之自壞也。尙有痛哭泣血。不忍爲陛下言者。江右有親王之變。大臣懷馮道之心。以祿位爲故物。以朝寧爲市塵。以陛下爲弈棋。以革除年間事爲故事。特左右寵倖者。知術短淺。不能以此言告陛下耳。使陛下得聞此言。雖禁門之外。亦警蹕而出。安肯輕褻而漫游哉。鞏疏略曰。陛下臨御以來。祖宗紀綱法度。一壞於逆瑾。再壞於佞倖。又再壞於邊帥之手。至是將蕩然無餘矣。天下知有權臣。而不知有陛下。甯忤陛下。而不敢忤權臣。陛下勿知也。亂本已生。禍變將起。竊恐陛下知之晚矣。因陳六事。一曰崇正學。二曰通言路。三曰正名號。四曰戒遊幸。五曰去小人。六曰建儲貳。陸震見其疏稿。同署名以進。於是京師連日陰霾晝晦。禁中水自溢。高橋四尺許。橋下七鐵柱。齊折如斬。時三月二十五日也。金吾衛指揮張英者。肉袒挾兩囊土。

數升當蹕道哭諫不允。卽拔刀自刎。血流滿地。侍衛人縛送詔獄。問英囊土何爲。曰。恐汚帝廷。灑土掩血耳。殞命獄中。是日。內旨舒芬等百有七人俱廷杖三十。疏首謫外任。餘奪秩半年。黃鞏等六人俱廷杖五十。徐整戍邊。鞏、震、良勝、潮俱削籍。林大輅、周敍、余廷瓚、廷杖五十。降三級外補。餘杖四十。降二級外補。死杖下者。員外陸震、主事劉校、何遵、評事林公黼、行人司副余廷瓚、行人詹軾、劉槩、孟陽、李紹賢、李惠、王翰、劉平甫、李翰臣、刑部照磨劉珏十餘人。車駕竟不出。彬等亦知朝廷有人。稍畏憚之。六月。甯王宸濠反。初。錢甯受濠賄。左右之。太監張銳思傾甯。力言濠不法事。銳言先入。甯不知也。見帝。且盛稱濠賢。帝不應。甯懼。乃馳報濠。而委罪臧賢。賢謫戍邊。中道使校尉僞爲盜。掩殺之。帝亦執甯下之獄。彬等欲邀功。贊上親征。會王守仁已擒宸濠。以俘獻上。詔止之。九月上戎服至南京。令百官皆戎服迎。各官竟朝服往。上不問。

十五年春正月朔。上受朝賀於南京。時江彬率邊卒數萬扈從。恃恩無人臣禮。公卿而下側足事之。魏國公徐鵬舉設宴招彬。不啓中道門。又不設座中堂。彬大怒。問故。對以高皇帝曾幸其第。遂爲故事。彬不得已就宴。六月。江彬遣兵官索南京各城門鎖鑰。兵部尙書喬宇危言止之。宇爲南京兵部。務持法守正。亦多材略。每事稍裁抑。彬人倚以爲重。彬亦頗憚之。一日。彬遣使索城門鑰。城中大駭。督府使問宇。宇曰。守備者所以謹非常。城門鑰有祖宗法制在。雖天子詔不能得。督府以宇言拒之。乃止。彬每矯制。日有所求。宇承制。必請面覆始行。彬計少沮。時上駐蹕南京。久居舊邸。不入大內。復欲往幸蘇、浙、湖、湘間。宇倡九卿臺諫三上章。伏闕請回鑾。上召彬議。彬怒。欲重譴。其黨勸之曰。往歲京師已甚。何可再也。彬意乃解。請



慰諭百官各歸治事。七月，扈從大學士梁儲、蔣冕跪伏行宮門外泣諫，請從百官奏回鑾。自未至酉，上遣中官取奏入，且諭之起。對曰：「臣未奉旨，不敢起。」乃令中官復出傳旨，不日即還。儲等出。閏八月上至鎮江。十月上自南京班師。

十六年春正月上還京。江彬益驕橫，其所部邊卒桀驁不可制。二月十四日丙寅，上以疾崩於豹房。皇太后張氏與大學士楊廷和等定議奉遺詔，迎取興獻王長子嗣皇帝位。初，上寢疾，彬猶改團營爲威武團練，自提督軍馬。中外慮彬旦夕反，帝崩，彬偶不在左右。皇太后召廷和等議，恐彬爲亂，祕不發喪。以上命召彬入，彬不知帝崩，并其子入，俱收之。皇太后下制，暴彬罪惡，厚賞彬所部諸邊卒，散遣歸鎮，執其黨數人，下詔錦衣獄論罪，磔於市，籍其家，金七十匱，銀二千二百匱，金銀珠玉珍寶首飾不可勝計。隱匿奏疏百餘本。世宗即位，正彬黨罪惡，謫戍，及論死者數十人，并誅錢甯、太監竄逐者亦數十人。

谷應泰曰：江彬以邊卒入侍，稔惡十年，顛越乘輿，幾危社稷，然跡其所爲，非有他謀，特倔強驚悍庸材耳。方彬之起家塞上，睥睨宮闈，此何異祿山之侍玄宗乎？且其外握邊兵，內交近侍，錢甯、張忠皆其羽翼，辟之莽乃依恭，卓復結讓，庭湊內附，守澄、沙陀通好，令致區區之天下，一物亡商，二憾覆晉。武宗存，則挾天子以令諸侯，武宗崩，即矯遺命以擅大寶，不待智者而決矣。而乃招致邊軍入演大內，君臣戎服，凶器爲娛，繼遂厭心萬乘，屏足九重，誘導以離宮之歡，恣情於馳騁之樂，搏蒼鹿，搯元熊，樂如是足矣。即其殄滅善類，斥譴正人，血飛狂狴，逐半朝堂，亦猶之猛虎在檻，咆哮欲出，饑鷹在韝，忿鷙思飛。初非有翦除異己之心，質劫公卿之志也。夫彬本武人，而武宗所喜在戎服言兵，彬生沙磧，而武宗所喜在游巡天下，順其

志卽相與揚戈躍馬。拂其意則相與嚴威峻法。同聲相應。同道相謀。書曰。予有亂臣十八。同心同德。非徒聖主。彼亦誠然。逮其震主之威已立。赤族之禍將成。雖有中庸。亦必巧營三窟。計成百足。乃至武宗彌留之際。彬猶晏然。歸臥私第。命一介之吏。奉尺一之詔。召之而卽至。同車疾驅。父子駢首。何其愚與。夫曹爽釋兵歸天子。求老私第。商鞅刑太子傅。孝公崩。欲自亡入魏。自古以來。器小而位高。威重則身危。奸邪前敗。禍患後隨。瀕死而不之悟者也。然予以爲武宗之世。逆瑾之變。十常侍甘露之黨也。河北山東江西四川之寇。黃巾黃巢之亂也。眞鐮宸濠之變。七國八王之孽也。江彬之奸。董卓祿山之釁也。然而陰噎甫合。旭日旋升。大廈欲傾。漂搖不入者。則以構禍諸人。類皆乳臭。茫茫草澤。更無英雄。至於在內。如六給事。十三御史。編修舒芬等。百有七人。在外。如楊一清。王守仁。林俊。彭澤。莫不慟哭斬奸。呼號阻駕。枕戈流涕。投袂登舟。觀於水溢宮門。橋柱七折。上天告譴。似爲言官。兼之明星夜隕。特勸回鑾。吳楚颶風。盡飽魚腹。此非諸君子格天之功。抑或祖宗在天之祐與。傳曰。善人國之紀也。詩云。人之云亡。邦國殄瘁。斯之謂與。

卷五十

大禮議

武宗正德十六年夏四月。帝卽位。帝興獻王子。憲宗純皇帝孫也。憲宗生十皇子。長孝宗敬皇帝。次興獻王。宏治七年甲寅。興獻王之國安陸州。正德二年秋八月。帝生於興邸。時黃河清。慶雲見。軫翼分。已而獻王薨。帝受敕嗣理國事。至是年十有五矣。武宗無子。臨崩。遺詔曰。朕紹承祖宗丕業。十有七年。有孤先帝。

付託。惟在繼統得人。宗社生民有賴。皇考孝宗敬皇帝親弟。興獻王長子。厚聰。聰明仁孝。德器夙成。倫序當立。遵奉祖訓。兄終弟及之文。告於宗廟。請於慈壽皇太后。與內外文武羣臣。合謀同辭。即日遣官迎取。來京。嗣皇帝位。時三月丙寅也。翼日丁卯。遣司禮監太監韋彰。壽甯侯張鶴齡。駙馬都尉崔元。大學士梁儲。禮部尚書毛澄。齋詔諭金符之安陸州。戊寅。彰等至興邸。帝迎詔國門外。至承運殿。開讀已。乃登座受符。朝藩衛。四月壬午。帝辭興獻王園寢。癸未。發安陸。辭帝母蔣妃。嗚咽涕泗。帝母曰。吾兒此行。荷負重任。毋輕言。帝曰。謹受教。比發安陸。帝以藩衛官校不隸有司。恐爲沿途擾。特命從官駱安等嚴敕之。所過辭謝諸王。供饋屏絕。有司珍獻。禁行殿。毋過奢。丁卯。禮部員外郎楊應魁上禮儀狀。請由東安門入居文華殿。翼日。百官三上箋勸進。俟令旨。俞允。擇日卽位。大學士楊廷和命儀部郎中余才所擬也。壬寅。車駕至良鄉。帝覽禮部狀。謂長史袁宗皋曰。遺詔以吾嗣皇帝位。此狀云何。癸卯。至京師。止城外。廷和固請如禮部所具狀。帝不許。乃御行殿受箋。由大明門入。日中卽位。以明年爲嘉靖元年。凡正德間冒濫軍功。將校。賚緣。監織。權稅諸弊。政盡行釐革。赦死雜犯以下。末減有差。丙午。遣官往迎帝母興獻妃。戊申。命禮官集議崇祀興獻王典禮。禮部尚書毛澄請於大學士楊廷和。廷和出漢定陶王。宋濮王事授之曰。此篇爲據。異議者卽奸諛。當誅。時有待對公車舉人張璫者。爲禮部侍郎。王璫同鄉士。詣璫言。帝入繼大統。非爲人後。與漢哀。宋英不類。璫然之。宣言於衆。廷和謂璫獨持異議。令言官列璫他失。出爲南京禮部侍郎。而以侍讀學士汪俊代之。尚書毛澄會公卿臺諫等官六十餘人。上議漢成帝立定陶王爲嗣。而以楚王孫後定陶承其王祀。師丹以爲得禮。今上入繼大統。宜以益王子崇仁主。後興國。其崇號則襲宋英故事。以

孝宗爲考。興獻王及妃爲皇叔父母。祭告上箋稱姪署名。而令崇仁主考興獻王。叔益王。帝覽曰。父母可移易乎。其再議。於是廷和及蔣冕。毛紀等復上言。程頤濮議最得禮義之正。皇上采而行之。可爲萬世法。興獻祀事。今雖以崇仁主。異日仍以皇次子後興國。而改崇仁爲親藩。天理人情庶兩無失。尙書澄侍郎俊等六十餘人亦復上議。如廷和言。帝不聽。仍命博考典禮以求至當。已而廷和復上言。舜不追崇瞽瞍。漢世祖不追崇南頓君。皇上取法二君。斯聖德無累。澄等七十餘人又上議。武宗皇帝以神器授之陛下。有父道焉。特以昭穆旣同。不可爲世。孝廟而上稱祖。曾高以次加稱。豈容異議。興獻王雖有罔極恩。斷不可以稱孝廟者稱之也。因錄魏明帝詔文以上。留中不報。御史周宣進士屈儒。侯廷訓亦各奏議。如禮官指。帝終不從。六月。敕修武宗實錄。仍命禮官集議追崇大禮。七月。觀政進士張璉上大禮疏曰。朝議謂皇上入嗣大宗。宜稱孝宗皇帝。爲皇考。改稱興獻王爲皇叔父。王妃爲皇叔母者。不過拘執漢定陶王。宋濮王故事耳。夫漢哀。宋英皆預立爲皇嗣。而養之於宮中。是明爲人後者也。故師丹。司馬光之論。施於彼一時猶可。今武宗皇帝已嗣孝宗十有六年。比於崩殂。而廷臣遵祖訓。奉遺詔。迎取皇上入繼大統。遺詔直曰興獻王長子。倫序當立。初未嘗明著爲孝宗後。比之預立爲嗣。養之宮中者。較然不同。夫興獻王往矣。稱之以皇叔父。鬼神固不能無疑也。今聖母之迎也。稱皇叔母。則當以君臣禮見。恐子無臣母之義。禮。長子不得爲人後。况興獻王惟生皇上一人。利天下而爲人後。恐子無自絕父母之義。故謂皇上爲繼統武宗。而得尊崇其親。則可。謂嗣孝宗。以自絕其親。則不可。或以大統不可絕爲說者。則將繼孝宗乎。繼武宗乎。夫統與嗣不同。非必父死子立也。漢文帝承惠帝之後。則弟繼。宣帝承昭帝之後。則以兄孫繼。若

必強奪此父子之親。建彼父子之號。然後謂之繼統。則古當有稱高伯祖。皇伯考者。皆不得謂之統矣。臣竊謂今日之禮。宜別爲興獻王立廟京師。使得隆尊親之孝。且使母以子貴。尊與父同。則興獻王不失其爲父。聖母不失其爲母矣。疏入。上遣司禮監官送至內閣。諭曰。此議實遵祖訓。據古禮。爾曹何得誤朕。楊廷和曰。書生焉知國體。復持入。上熟覽之。喜曰。此論一出。吾父子必終可完也。是日。帝御文華。召廷和。冕紀入。諭曰。至親莫若父母。因授以手敕曰。卿等所言俱有見。第朕罔極之恩。無由報耳。今尊父爲興獻皇帝。母興獻皇后。祖母爲康壽皇太后。廷和退。而上言曰。皇上聖孝出於天性。臣等雖愚。夫豈不知禮謂所後者爲父母。而以其所生者爲伯叔父母。蓋不惟降其服。而又異其名也。臣等不敢阿諛順旨。仍封還手敕。於是給事中朱鳴陽。史于光等。御史王濬。盧瓊等。復奏興獻王尊號未蒙聖裁。大小之臣皆疑陛下垂省張璠之說耳。陛下以興獻王長子不得已入承大統。難拘長子不得爲人後之說。璠乃謂統嗣不同。豈得謂會通之宜乎。又欲別廟興獻王於京師。此大不可。昔魯桓僖宮災。孔子在陳聞火曰。其桓僖乎。以非正也。如廟興獻王於京師。在今日則有朱熹兩廟爭較之嫌。在他日則有魯僖躋閔之失。乞將張璠斥罰。奏入。俱命禮部議。八月。尚書毛澄等仍議。給事中朱鳴陽。御史王濬等皆欲皇上早從原議。蓋有見於天理人情之公斷。不容以私意爲初政累也。御史盧瓊。給事中史于光。歷數張璠建議之偏。若與仇者。豈得已哉。誠懼其上搖聖志。下起羣疑。宜將張璠戒諭不聽。九月。興獻王妃至通州。先是禮部具議。聖母至京。宜由東安門入。帝不從。再議由大明左門入。復不從。帝斷議由中門入。謁見太廟。朝議譁然。以婦人無謁廟禮。太廟非婦人宜入。張璠曰。雖天子必有母也。焉可由旁門入乎。古者婦三月廟見。孰謂無謁廟

禮乎。九廟之禮后與焉。孰謂太廟非宜入乎。上又命駕儀奉迎聖母。禮部請用王妃儀仗。迓之。帝不從。命錦衣衛以母后駕儀往。又命所司製太后法服以待。至是聖母至通州。聞朝廷欲考孝宗。恚曰。安得以我子爲人之子。謂從官曰。爾曹已極寵榮。獻王尊稱胡猶未定。因留通州不入。帝聞之。涕泗不止。啓慈聖皇太后。願避位奉母歸。羣臣惶懼。冬十月。上諭內閣楊廷和、蔣冕、毛紀曰。朕受祖宗鴻業。爲天下君長。父與獻王獨生。朕一人。旣不得承緒。又不得微稱。朕於罔極之恩。何由得安。始終勞卿等委曲折中。俾朕得申孝情。廷和上言。聖諭令臣等委曲折中以申孝情。切念大禮關係萬世綱常。四方觀聽。議之不可不詳。必上順天理。下合人情。祖宗列聖之心安。則皇上之心始安矣。張璠乃復爲或問一帙。辨析統嗣之異。及尊崇墓廟之說甚悉。吏部主事彭澤錄遺內閣及禮官。勸改前議。不從。璠乃齋至左順門上之。廷和令修撰楊維聰等阻之。不得。帝覽之。留中不下。廷和見勢不得已。乃草敕下禮部曰。聖母慈壽皇太后懿旨。以朕纘承大統。本生父興獻王宜稱興獻帝。母宜稱興獻后。憲廟貴妃邵氏稱皇太后。仰承慈命。不敢固違。帝從之。廷和意假母后。示非廷議意也。壬午。興獻后至自通州。由大明中門入。帝迎於闕內。朝議不謁太廟。止見奉先。奉慈二殿而已。兵部主事霍韜見張璠言欲用。亦上言。禮官持議非是。時同知馬時中、國子監諸生何淵、巡檢房濬各上言如璠議。帝益爲之心動矣。甲午。楊廷和以追崇禮成。擬上慈壽皇太后及武宗皇后尊號。帝因遣司禮監諭廷和曰。邵太后興獻帝后亦各擬上尊號。廷和等上言不可。宜俟明年大昏禮成。慶宮闈加之可也。巡撫雲南都御史何孟春上言。以爲興獻王不宜稱考。廷和覽疏。乃擢孟春吏部侍郎。給事中熊浹上言。皇上貴爲天子。聖父、聖母。以諸王禮處之。安乎。臣以爲當稱帝后。而

祀興獻於別廟。則大統之議。所生之恩兼盡矣。乃出爲按察司僉事。沙。大學士費宏鄉人也。宏慮廷和疑己。故出之。十二月。除張璫南京刑部主事。先是。帝下大禮。或問於禮部。時楊一清家居。遺書吏部。尚書喬宇曰。張生此論。聖人不易。恐終當從之。宇不聽。至是。廷和銜璫。授意吏部。除爲南京主事。尚書石瑤語璫曰。慎之。大禮說終當行也。廷和寄語曰。子不應南官。第靜處之。勿復爲大禮說難我耳。璫怏怏而去。都御史林俊致仕家居。廷和寓書於俊。以定國是。俊上疏曰。孔子謂觀過知仁。陛下大禮未協。過於孝故耳。司馬光有言。秦漢而下。入繼大統。或尊崇其所生。皆取譏當時。貽笑後世。陛下純德。何忍襲之。疏入。留中。廷和遂奏起林俊爲工部尚書。俊力辭不聽。庚寅。帝下御札。諭加興獻帝后以皇字。廷和等上言。漢宣帝繼孝昭後。追謚史皇孫。王夫人曰悼考。悼后而已。光武上繼元帝。鉅鹿南頓君以上。立廟章陵而已。皆未嘗追尊。今日興獻帝后之加。較之前代。尊稱已極。若加皇字。與慈壽孝廟竝。是忘所後而重本生。任私恩而棄大義。臣等不得辭其責。願罷歸。吏部尚書喬宇等奏曰。皇者正統大義。若加皇字於本生之親。則與正統溷而無別。揆之天理。則不合。驗之人心。則不安。非所以重宗廟。正名分也。上曰。慈壽皇太后懿旨。有諭。今皇帝昏禮將行。其興獻帝宜加與皇號。母興獻皇太后。朕不敢辭。爾羣臣其承后命。廷和等見不可爭。乃俱求罷歸。不報。禮部尚書毛澄。侍郎賈詠。汪俊等上言。若帝后之上有加。則正統之親無別。恐不可以告郊廟而布天下。內閣大臣直言規諫。宜賜諭旨。帝不聽。仍曰。宜遵懿旨。稱興獻皇帝。興獻皇太后。於是給事中朱鳴陽等。御史程昌等。編修陳沂等。百餘人各上言。加稱非是。因請斥璫不聽。世宗嘉靖元年春正月。郊祀甫畢。清甯宮小房災。楊廷和。蔣冕。毛紀。費宏上言。火起風烈。此殆天意。况迫

清甯後殿。豈與獻帝后之加稱。祖宗神靈。容有未悅乎。給事中鄧繼曾上言。五行火主禮。今日之禮。名紊言逆。陰極變災。臣雖愚。知爲廢禮之應。主事高尚賢。鄭佐相繼上言。鬱攸之災。不於他宮。而於清甯之後。不在他日。而在郊祀之餘。變豈虛生。災有由召。帝覽之。心動。乃從。廷和等議。稱孝宗爲皇考。慈壽皇太后爲聖母。與獻帝后爲本生父母。而皇字不復加矣。巡撫湖廣都御史席書具疏曰。邇者廷議。大臣比之宋事。竊謂英宗入嗣。在袞衣臨御之日。皇上入繼。當宮車晏駕之後。比而同之。似或未安。故皇上嗣續大業。非繼孝宗之統。繼武宗之統也。非繼武宗之統。繼祖宗之統也。以皇上承繼武宗。仍爲興獻王子。別立廟祀。張璁、霍韜之議。未爲迂也。禮本人情。皇上尊爲天子。慈聖將臨。設無尊稱。於情難已。故追所生曰帝后。上慰慈闈。今踰年改元。尊號未上。明詔未頒。毋乃擬議之未定乎。臣愚謂宜定號皇考。興獻帝。別立廟於大內。每時祭太廟。畢。仍祭以天子之禮。蓋別以廟祀。則大統正。而昭穆不紊。隆以殊稱。則至愛篤。而本支不淪。尊尊親親。並行不悖。至於慈聖。應稱曰皇母。某后。不可以興獻字加之。吏部員外郎方獻夫亦具疏曰。陛下之繼二宗。當繼統而不繼嗣。興獻之異羣廟。在稱帝而不稱宗。繼統者。天下之公。三王之道也。繼嗣者。一人之私。後世之事也。興獻之得稱帝者。以陛下爲天子也。不得稱宗者。以實未嘗在位也。請宣示朝臣。改議。布告天下。稱孝宗曰皇伯。稱興獻帝曰皇考。別立廟祀之。夫然後合於人情。當乎名實。二疏俱中沮。不果上。三月。上孝宗太后尊號曰昭聖慈壽皇太后。武宗皇后曰莊肅皇后。聖祖母邵氏曰壽安皇太后。本生父曰興獻帝。母曰興國太后。先是。司禮監傳諭興獻帝册文。朕宜稱子。廷和等上言不可。復傳諭宜稱孝子。廷和等言册文稱長子本生。文情自明。請勉行正禮。從之。遣官詣安陸。上興獻帝尊號。



命司禮太監溫祥督禮儀。成國公朱輔上册寶。禮部侍郎賈詠題神主。詠遵廷和指題其主曰興獻帝神主。不稱考及叔。亦不敍子名。冬十一月。壽安皇太后崩。楊廷和定爲哭臨一日。喪服十三日而除。文移兩京。不以詔天下。禮官請素服御西角門。帝曰。朕哀慕方切。豈忍遽從所請。十二月上。壽安皇太后尊諡孝惠皇太后。羣臣奏壽安皇太后服制已滿。宜漸從吉典。御奉天門視事。久之。乃允。仍命不鳴鐘鼓。不鳴鞭。

二年春二月。太常卿汪舉上言。安陸廟宜用十二籩豆。如太廟儀。從之。禮部請置奉祀官。又言樂舞未敢輕議。帝命楊廷和集議之。禮部侍郎賈詠會公侯九卿等上言。正統本生。義宜有間。八佾既用於太廟。安陸樂舞似當少殺。以避二統之嫌。帝曰。仍用八佾。於是何孟春及給事中張翀、黃臣、劉最、御史唐僑、儀秦武等。南京給事中鄭慶雲各上言力爭。不報。冬十一月。奉孝惠皇太后主於奉慈殿。遣官告安陸廟。南京刑部主事桂萼日與張璁討論古禮。其議符合。至是。上言大禮。并獻席書。方獻夫議草。疏曰。臣聞古者帝王事父孝。故事天明。事母孝。故事地察。未聞廢父子之倫。而能事天地。主百神者也。今禮官以皇上與爲人後。而強附末世故事。滅武宗之統。奪興獻之宗。夫孝宗有武宗爲子矣。可復爲立後乎。武宗以神器授皇上矣。可不繼其統乎。今舉朝之臣。未聞有所規納者何也。蓋自張璁建議。論者指爲干進。故達禮之士不敢遽言其非。切念皇上在興國太后之側。慨興獻帝弗祀三年矣。而臣子乃肆然自以爲是可乎。臣願皇上速發明詔。循名考實。稱孝宗曰皇伯考。興獻帝曰皇考。而別立廟於太內。興國太后曰聖母。武宗曰皇兄。則天下之爲父子君臣者定。至於朝議之謬。有不足辨者。彼所執不過宋濮王議耳。臣按。宋臣范

純仁告英宗曰。陛下昨受仁宗詔。親許爲仁宗子。至於封爵。悉用皇子故事。與入繼之主事體不同。則宋臣之論亦自有別。今皇上奉祖訓入繼大統。果曾親承孝宗詔而爲之子乎。則皇上非爲人後。而爲入繼之主明矣。然則考與獻帝。母與國太后。可以質鬼神。俟百世者也。臣久欲上請。乃者復得見席書。方獻夫二臣之疏。以爲皇上必爲之惕然更改。有無待於臣之言者。至今未奉宸斷。豈皇上偶未詳覽耶。抑二臣將上而中止耶。臣故不敢愛死。再申其說。并錄二臣疏以聞。疏奏上曰。此關係天理綱常。仍會文武羣臣集議可否。

三年春正月。楊廷和罷。禮部尙書汪俊請曰。公去。誰與主者。適主事侯廷訓據宗法爲大禮辨。遍示羣臣。俊得之。喜曰。違斯議者當斬也。於是吏部尙書喬宇率九卿上言。必以孝宗爲考。而後大宗爲不絕。俊復會公侯卿佐及翰林臺諫官上言。祖訓兄終弟及。以同產言也。皇上爲武宗親弟。自宜考孝宗。母昭聖前。後章奏惟張璁、霍韜、熊浹與桂萼議同。其他八十餘疏。二百五十餘人。皆如部議。其當從違可知矣。帝曰。更參衆論議之。給事中張翀等三十有二人。御史鄭本公等三十有一人。各抗章力論。以爲當從衆議。上怒其朋言亂政。俱奪俸。修撰唐皋亦言。陛下宜考所後。以別正統。隆所生。以備尊稱。帝謂皋模稜持兩可。亦奪俸。於是汪俊等更議於興獻帝。興國太后止。各加一字。以備尊稱。不報。是時楚王榮誠以儀賓沈寶疏上。代府長史李錫、南京都察院經歷黃綰、錦衣衛千戶聶能。遷各上疏議。其言與璁議合。帝益心動。乃命取督賑侍郎席書、南京刑部主事桂萼、張璁詣京集議。時霍韜居里中。亦並召之。興國太后千秋節。命婦各上箋觀賀。宴賚倍常。是月晦日。昭聖皇太后聖旦。先期有旨。命婦免入朝賀。朱濶、馬鳴衡上言。暫

免朝賀在尋常固可。然當議禮紛更之時。正人心愆惶之際。忽傳報罷。安得無疑。竊謂此意若出太后。其間必有因事拂抑之懷。往時存歿之感。若出自聖意。則母子至情有隆無已。豈可以聖旦嘉節而輟此盛禮哉。疏入。帝怒。命逮訊。侍郎何孟春論救不報。已而陳逅、李本、刑部員外郎林惟聰各抗言。馬鳴衡、朱淵不知太后懿旨。輒有論列。原其本心。以爲議禮之初。太后輒不受朝。人將謂陛下之心有所偏主。而奸讒之流。或從而乘間獻媚。其禍有不可言爾。今乃下之詔獄。加以嚴刑。天下聞之。將謂陛下以宮闈之故。罪及言官。本生正統之義。不能無所軒輊。而忠臣義士。且將杜口結舌。不敢復議天下事矣。帝怒其煩擾。併逮繫考訊。大理卿鄭岳論救不報。三月。奉興獻帝爲本生皇。考恭穆獻皇帝。興國太后爲本生母。章聖皇太后。初。帝召張璠等。都御史吳廷舉恐璠至不變初說。請救諸生。及南京大臣及耆德舊臣各陳所見。以備采擇。璠等乃復上疏。申明統嗣之辨。璠且曰。今之加稱。不在皇與不皇。實在考與不考。若徒爭一皇字。則執政必姑以此塞今日之議。臣恐天下知義禮者。仍必議之不已也。帝嘉納之。是日。帝御平臺。召冕、紀宏。諭加尊號。及議建室。冕對曰。臣等願陛下爲堯舜。不願爲漢哀帝。曰。堯舜之道。孝弟而已矣。冕等不能對。乃命草詔。加上尊號。給事中張翀等。御史朱實昌等。交章力諫。帝切責之。敕禮部曰。聖母昭聖慈壽皇太后。特加尊號。爲昭聖康惠慈壽皇太后。又敕曰。本生父興獻帝。本生母興國太后。今加稱爲本生皇考。恭穆獻皇帝。本生母章聖皇太后。又曰。朕本生父母。已有尊稱。仍於奉先殿側別立一室。盡朕追慕之情。禮部尙書汪俊上議曰。皇上入奉大宗。不得祭小宗。爲本生父立廟大內。從古所無。惟漢哀帝嘗爲其王立廟京師。師丹以爲不可。請於安陸廟增飾爲獻皇帝。百世不遷之廟。俟他襲封與王子孫世世奉享。

陛下歲時遣官祭祀。亦足以伸至情矣。上曰。朕奉太廟。豈敢閒越。與漢哀帝不同。務協公論。以伸至情。吏部尚書喬宇等復奏曰。皇上聖睿。於宗法大小。必洞然無疑。故曰建室。以避立廟之名也。於奉先殿側。以避大內之名也。推此。則專於大宗。必降於小宗。安陸祭祀無庸改議矣。時湛若水、石瑤、張翀、任洛、汪舉等皆具奏。不聽。於是汪俊求去。上切責罷之。戶部侍郎胡瓚等上言。大禮已定。席書督賑江淮。實關民命。不必徵取來京。上從之。併止璉等勿來。時璉、萼已抵鳳陽矣。見邸報。敕加尊號。乃復上疏。極論兩考之非。且曰。臣知本生二字。決非皇上之心。所自裁定。特出禮官之陰術。皇上不察。以爲親之之辭也。不知禮官正以此二字爲外之之辭也。必亟去二字。繼統之義始明。而人心信從矣。疏入。上命復召來京。蔣冕言於帝前曰。二人若來。必撲殺之。帝不問。而遣人趣使速來。遂降中旨。以書爲禮部尚書。給事中安磐等上言。大禮之失。自霍韜、張璉欲考本生而邪說始起。自桂萼進席書。方獻夫之論。而邪說益張。乞寢書新命。治萼等奸罪。張漢卿等亦上言。書督賑乖方。煮粥誤民。致死生民數萬。宜正國法。以快人心。南京給事中黃仁山等亦上言。書巧詐邪佞。私蓄議稿。而不自進。陰託桂萼代奏。干寵而璉、萼每造書所。必在暮夜。其爲陰類。儉人無疑。乞加罷斥。召還汪俊。南道御史田麟等亦上言。汪俊、席書邪正相反。進退失宜。且祖制。上卿俱推舉簡用。今何取於書。而出自內降耶。乞同璉、萼併黜。以避賢路。俱不報。禮部侍郎吳一鵬等會侯伯鄉貳翰林臺省。力言建室之非。且曰。臣等遵祖訓。本禮經。守師丹、程頤之論。以悟主心。姑停建室。仍廟安陸。歲時遣官奉祭。俟異日皇子衆多。襲封興王。世世承享。帝曰。朕承天命。祇奉宗祀。孝養聖母。皇考陵園。遠在安陸。卿等安乎。今黨同執奏。敗父子之倫。傷君臣之義。欺朕冲年。眇忽綱常。其奉先殿西室。亟

行修飾。盡朕歲時急切之情。於是修撰呂柟、編修鄒守益俱上疏爭之。帝怒，俱逮赴鎮撫司考訊。給事中張紳、章僑、御史張鵬翰等交章論救，不報。已而獄具，謫柟解州判官，守益廣德州判官。命內閣擬撰聖母昭聖皇太后與本生聖母章聖皇太后冊文。帝遣司禮官傳諭，欲於昭聖冊內稱嗣皇帝，獻皇帝冊內稱孝長子。章聖冊內加稱聖母，自稱長子。蔣冕等力言不可，仍以原文封進。帝覽之，遂於獻皇帝冊內加一孝字。章聖冊內欲去本生母三字。冕等復上言：「此字惟宗廟祝文用之，今稱長子，已盡孝情。又加此字，有干正統。且本生母三字係敕諭擬定，亦難輕去。」仍封還。御批乃依原文，止稱長子。章聖冊內加一聖字。帝御奉天殿受賀，布詔天下，詔曰：「朕躬膺天命，嗣承皇兄武宗毅皇帝大統，祇奉宗祀，惟我皇考孝宗敬皇帝神謨聖政，是繼是行。仰惟聖母昭聖慈壽皇太后擁翊之功，莫罄名言。本生父母與獻帝興國太后鞠育之恩，罔殫報稱。尊稱未極，恆用歉然。恭奉冊寶，加上聖母尊號，曰昭聖康惠慈壽皇太后。興國太后曰本生聖母章聖皇太后。義專隆於正統，禮兼盡夫至情。是時張璠至東昌，讀詔書，歎曰：「執政忍爲此欺乎？」兩考並稱，綱常紊矣。蔣冕求罷歸。帝曰：「朕方倚任，共圖治理，建室禮儀，朕自裁定。既而冕上言，皇上恭詣仁壽宮，加上尊號，聖母昭聖皇太后，遽有懿旨，免命婦入賀，其故非臣等所知。」又命書爲禮部尚書，璠等復取來京，聖意所向，中外不能無疑。宜追寢前命，不報。冕遂移疾乞去。帝從之。御史王泮等疏留，不報。

五月，以奉先殿西室爲觀德殿，欲安獻皇帝主也。禮部侍郎吳一鵬、朱希周、郎中江必東、員外郎翁磐、主事彭黯等上言：「獻皇帝主在安陸廟中，神靈攸依，奉先殿西室宜設神位，以便時享，如奉慈殿之儀。不報。」遣司禮監太監賴義、京山侯崔元、侍郎吳一鵬之安陸，改題神主，奉上冊寶尊號，曰本生皇考恭穆獻

皇帝迎如京師。一鵬等復上言。歷考前代。無自寢園迎入大內者。况安陸乃啓封之地。獻皇帝神主不宜輕動。惟永祀安陸。則本生之情盡。而正統之義得不報。霍韜將赴召。復上言。力辨二統之非。而席書在鳳陽。亦上大禮考議。言諸臣講學不明。固執私意。且曰。斯禮也。廷臣耆舊自有知者。不敢犯衆。而璉、萼等感激不平。力犯羣議。舉朝疾之如仇。甚可畏也。臣途窮矣。尚言此者。九廟神靈使之言耳。六月。璉、萼至京。復同上疏。條七事。極論兩考之非。以伯孝宗而考興獻爲正。俱留中不下。鴻臚寺少卿胡侍上言。唐睿宗不當兄中宗。宋太宗不當兄藝祖。不當稱兄。則不當稱伯明矣。帝怒其狂率。出侍爲潞州判官。初。張璉、桂萼至京師。廷臣欲捶擊之。無一人與通。璉、萼稱疾不出數日。後退朝班。恐有伺者。出東華門。走入武定侯郭勳家。勳喜。約爲內助。臺諫官交章攻擊。以爲當與席書並正其罪。章十餘上。俱報聞。給事中張璠取羣臣彈章。奏發刑部。令擬璉等罪。尚書趙鑑私語璠曰。若得俞旨。便撲殺之。帝廉知之。遂降中旨。命桂萼、張璉爲翰林學士。方獻夫爲侍講學士。切責璠、鑑罪之。璉、萼獻夫各上疏辭。不允。吏部尚書喬宇上言。萼等偏執異說。搖動人心。願賜罷黜。帝怒。切責之。宇遂求去。從之。修撰楊慎。廷和子也。率同官姚涑。編修許成名。崔桐。簡討邊憲。金皋等上言。君子小人不並立。正論邪說不並行。臣等所執者。程頤、朱熹之緒也。萼等所言者。冷褒、段猶之餘也。學術不同。議論亦異。臣等恥與萼等同列。上罷其俸。給事中李學會等。御史吉棠等。亦爭之。俱下獄。外補已而南京尚書楊旦、顏頤壽、沈冬魁、李克嗣、崔文奎及侍郎陳鳳梧、都御史鄒文盛、伍文定等。復以爲言。俱切責之。員外薛蕙著爲人後。解以駁璉、萼之議。略曰。禮立後者。重大宗也。適子不爲後。輕小宗也。爲人後者。爲之子。言雖出公羊。實與儀禮相表裏。旣爲之子。則當稱父矣。而可仍

曰伯叔父乎。帝覽之，怒，逮繫詔獄。已而釋之。秋七月，璫、萼既拜新命，復列十三事以上。一曰：三代以前無立後之禮。二曰：祖訓亦無立後。三曰：孔子射於矍圃，斥爲人後者。四曰：武宗遺詔不言繼嗣。五曰：禮輕本生父母。六曰：祖訓姪稱天子爲伯叔父。七曰：漢宣帝、光武俱爲其父立皇考廟。八曰：朱熹嘗論定陶事爲壞禮。九曰：古者遷國載主。十曰：祖訓皇后治內外事，無得干預。十一曰：皇上失行壽安皇太后三年喪。十二曰：新頒詔令決宜重改。十三曰：臺諫連名上疏，勢有所迫，皆條列禮官欺罔之罪，疏入，留中。何孟春爲論條辨，帝切責之。璫、萼復辭職，不許，乃就官。帝采其議，屢遣司禮監官至閣諭毛紀等去冊文本生字，紀等力言不可。亡何，帝御平臺，召紀等責之曰：此禮當速改，爾輩無君，欲使朕亦無父乎？紀等惶怖退，召百官至左順門，敕曰：本生聖母章聖皇太后，今更定尊號曰聖母章聖皇太后。後四日，恭上册寶。何孟春退草疏達旦，語禮部侍郎朱希周曰：此禮復更，禮官尤當爭之。於是希周率郎中余才、江必東等上言：皇上考孝宗，母昭聖，已越三年，今更定之，諭忽從中出，則明詔爲虛文，不足取信於天下。孟春與尚書秦金、學士豐熙等及翰林寺部臺諫諸臣各上言，力爭本生二字不宜削。章十三上，俱留中不報。戊寅，帝朝罷，齋居文華殿，金獻民、徐文華倡言曰：諸疏留中，必改孝宗爲伯考，則太廟無考，正統有間矣。何孟春曰：憲宗朝尚書姚夔率百官伏哭文華門，爭慈懿皇太后葬禮，憲宗聞之，此國朝故事也。楊慎曰：國家養士百五十年，仗節死義，正在今日。王元正、張翀等遂遮留羣臣於金水橋南，曰：萬世瞻仰，在此一舉。今日有不力爭者，共擊之。何孟春、金獻民、徐文華復相號召，於是秦金、趙鑑、趙璜、俞琳、朱希周、劉玉、王時中、張潤、汪舉、潘希曾、張九敘、吳琪、張瓚、陳霑、張縉、蘇民、張仲賢、葛檜、袁宗儒凡二十有三人。賈詠、豐熙、張璧、舒

芬、楊繼聰、姚涑、張衍慶、許成名、劉棟、張潮、崔桐、葉桂章、王三錫、余承勳、陸鉞、王相應良、金皋、林時、王思凡、二十人、謝贄、毛玉、曹懷、張嵩、王瑄、張挺、鄭一鵬、黃重、李錫、趙漢、陳時明、鄭白璧、裴紹宗、韓楷、黃臣、胡炳凡、十有六人、余翱、葉奇、鄭本公、楊樞、劉穎、祁杲、杜民表、楊瑞、張英、劉謙亨、許中、陳克宅、譚纘、劉狝、張錄、郭希愈、蕭一中、張恂、倪宗嶽、王璜、沈教、鍾卿密、胡瓊、張濂、何鰲、張曰韜、藍田、張鵬翰、林有孚、凡三十有九人、余寬、黨承志、劉天民、馬理、徐一鳴、劉勳、應大獻、李舜臣、馬冕、彭澤、張鵬、洪伊、凡十有二人、黃待顯、唐昇、賈繼之、楊昌、楊淮、胡宗明、栗登、黨以平、何巖、馬朝卿、申良、鄭漳、顧可久、婁志德、徐嵩、張庠、高圭、安璽、王尚志、朱藻、黃一道、陳儒、陳廷鸞、高登、程旦、尹嗣忠、郭日休、李錄、周詔、戴亢、繆宗周、邱其仁、祖琚、張希尹、金中夫、丁律、凡三十有六人、余才、江必東、張聽、張懷、翁磐、李文中、張潔、張鏜、豐坊、仵瑜、丁汝夔、臧應奎、凡十有二人、陶滋、賀縉、姚汝皋、劉淑相、葛潮、劉漳、楊儀、王德明、汪溱、黃加賓、李春芳、盧襄、華鑰、鄭曉、劉一正、郭持平、余禎、陳賞、李可登、劉從學、凡二十人、相世芳、張峨、詹潮、胡連、范祿、陳力、張大輪、葉應駿、白轍、許路、戴欽、張儉、劉士奇、祁勅、趙廷松、熊宇、何鼈、楊濂、劉仕、蕭樟、顧鐸、王國光、汪嘉會、殷承敍、陸銓、錢鐸、方一蘭、凡二十有七人、趙儒、葉寬、張子衷、汪登、劉璣、江珊、金廷瑞、范綱、龐淳、伍餘福、張鳳來、張羽、車純、蔣珙、鄭錙、凡十有五、人、毋德純、蔣同仁、王瑋、劉道、陳大綱、鍾雲瑞、王光濟、張徽、王天民、鄭重、杜鸞、凡十有二人、俱赴左順門跪伏、有大呼高皇帝孝宗皇帝者、帝聞之、命司禮監諭退、不去、金獻民曰、輔臣尤宜力爭、朱希周乃詣內閣告毛紀、紀與石瑤遂赴左順門跪伏、上復遣司禮太監諭之退、羣臣仍伏不起、自辰迨午、帝怒、命司禮監錄諸姓名、收繫諸爲首者、豐熙、張狝、余寬、黃待顯、陶滋、相世芳、毋德純等八人於獄、楊慎、王元正乃撼門



大哭。一時羣臣皆哭。聲震闕廷。上大怒。遂命逮繫馬理等凡一百三十有四人於獄。何孟春等二十有一人。洪伊等六十有五人。姑令待罪。己卯。上聖母章聖皇太后冊寶。庚辰。錦衣衛以在繫官。上請初逮繫時。有奔匿者。至是悉追繫之。併待罪者總二百有二十人。上責之。命拷訊豐熙等八人。編伍其餘四品以上者。俱奪俸。五品以下者杖之。於是編修王相等一百八十餘人。各杖有差。王相與王思、裴紹宗、毛玉、胡瓊、張曰韜、楊淮、張燦、申良、臧應奎、牟瑜、余禎、安璽、殷承敍等十有九人。俱病創。先後卒。恭穆獻皇帝主。至自安陸。帝迎於闕內。奉謁奉先、奉慈二殿。已乃奉於觀德殿。上册寶尊號曰皇考恭穆獻皇帝。不復言本生。是日復趣席書來京。南京祭酒崔銑以災異陳言議禮一事。或擯斥。或下獄。非聖朝美事。上不悅。令致仕。而陳洸先爲給事中。言事忤旨。出爲按察司僉事。至是上言曰。陛下察幾致決。毅然去本生二字。有人心者。咸謂始全父子之恩。無不感泣。乞罷喬宇、夏良勝。以息邪說。復史道于桂、曹嘉。以作正氣。帝悅。復以洸爲給事中。逮繫。修撰楊慎、編修王元正、給事中劉濟、安磐、張漢卿、御史張原、王時柯於詔獄。復撲之。謫楊慎、王元正、劉濟戍邊。何孟春調南京工部。毛紀罷。南甯伯毛良上言。楊廷和要定策功。沮撓大禮。使陛下失天倫之正。廢追崇之典。千戶聶能遷、百戶陳紀、教諭王价、錄事錢子威各論奏議禮差謬。更正得宜。俱留中不報。八月。席書至京。以孝宗考名未正。悉發諸議留中者。命禮部集議。鄭岳、徐文華仍力言孝宗祝享昭聖冊寶尊奉已久。不宜輕改。帝切責之。胡世甯時居憂里中。亦上言與璫等合。帝嘉之。九月。改稱孝宗敬皇帝爲皇伯考。昭聖皇太后爲皇伯母。初集議時。汪偉、鄭岳、徐文華等猶與璫等力辨可否。武定侯郭勳遽曰。祖訓如是。古禮如是。璫等言當。書曰。人臣事君。當將順其美。於是書、璫及獻夫會公。

鶴齡、侯勳、鸞等六十有四人上言。三代之法，父死子繼，兄終弟及，人無二本。孝宗，伯也，宜稱曰皇伯考。昭聖，伯母也，宜稱曰皇伯母。獻皇帝主，別立禰室，不入太廟，尊尊親親，兩不悖矣。議上，從之。乃改稱孝宗爲皇伯考，昭聖爲皇伯母，祭告天地宗廟，布詔天下，安陸松陵。帝既改名顯陵，等諸陵矣。及大禮既定，百戶隨全請改遷顯陵，下工部議。尙書趙璜等上言：太祖不遷皇陵，太宗不遷孝陵，願以爲法。帝命禮臣會多官集議。尙書席書等會公侯九卿諸廷臣上言乞治全罪。帝曰：先陵遠在安陸，朕瞻仰哀切，其再議之。書與璉、萼等復上言舉大事當順人心，今多官皆曰帝魄不可輕動，地靈不可輕洩，臣等敢不盡言。帝乃罷議，命顯陵祭如七陵。十二月，評事韋商臣上言：臣以廷平庶獄爲職，臣自今年七月授官以來，見以大禮伏闕觸犯聖怒，大臣改任者何孟春一人，邊戍者學士豐熙等八人，決杖死者編修王思等十有七人，以忤使臣而逮繫者副使劉秉鑑、知府羅玉等，若而人以織造抗使臣逮繫者布政使馬卿、知府查仲道等，若而人以失儀下獄者御史葉奇、主事蔡乾等五人，以京堂官爲所屬訐奏下獄者御史任洛、副使任忠等二人，此皆國家大獄，上干天象，下駭民俗，所關甚鉅者也。臣不敢愛死，惟陛下大奮明斷，將諸臣錄復其官，及其子孫，庶不失欽恤之意。疏入，調外。巡撫江西都御史陳洪謨亦言之，留中不報。

四年春三月，詔修獻皇帝實錄。夏四月，光祿寺丞何淵請立世室，崇祀皇考於太廟。帝命禮部集議。尙書席書等上議：王制，天子七廟，三昭三穆，周以文武有大功德，乃立世室。與后稷廟皆百世不遷。我太祖立四親廟，德祖居北，後改同堂異室，議祧則以太祖擬文世室，太宗擬武世室。今獻皇帝以藩王追崇，帝號何淵乃欲比之太祖。太宗立世室於太廟，甚無據，不報。張璉、桂萼具言不可。璉曰：臣與廷臣抗論之初，

卽曰當改爲獻皇帝立廟京師。又曰別立禰廟不干正統。此非臣一人之私。天下萬世之公議也。今淵乃以獻皇帝爲自出之帝。比周文武不經甚矣。上干九廟之威。監下駭四海之心。臣不敢不爲皇上言之。昔漢哀帝尊定陶共王爲其皇。立廟京師。比孝元帝至今非之。今淵請入獻皇帝於太廟。不知序於武宗之上。與武宗之下。與昔人謂孝子之心無窮。分則有限。得爲而不爲。與不得爲而爲之。均爲不孝。別立禰廟。禮之得爲者也。此臣昧死勸皇上爲之。入於太廟。禮之不得爲者也。此臣昧死勸皇上勿爲。席書會羣臣復上議爭之。大學士費宏、石瑤、賈詠、尙書廖紀、秦金及九卿臺諫官各上疏力爭。俱不報。璫乃謂書曰。觀德殿規制未備。宜聖心未慊也。須別立廟。不干太廟。尊尊親親。並行不悖。書等遂上議。宜於皇城內擇地別立禰廟。不與太廟並列。祭用次日。尊尊親親。庶爲兩全。從之。六月。作世廟。初。席書上廟議。有曰。親盡之期與孝廟同。帝問其故。書對曰。我朝德祖比后稷。太祖太宗比文武。皆百世不遷。懿祖以下隨世而祧。獻皇帝與孝宗同世親。盡同祧。帝曰。別廟不與祖宗序列。他日奉祧。藏於何所。何以伸朕世享之情。其再議之。書上言宜藏主寢殿。歲暮出祭。如太廟議。帝曰。皇考生朕一人。入繼大統。今特立廟。世世不遷。伸朕孝思。乃命工部相地於太廟左環碧殿旁立廟。前殿後寢。一如太廟。而微殺其制。路由闕左門入。已而命定廟名曰世廟。禮科給事中楊言等上疏乞罷世室。略曰。祖宗身有天下。大宗也。君也。獻皇帝舊爲藩臣。小宗也。臣也。以臣並君。亂天下大分。以小宗並大宗。干天下大統。無一可者。不聽。十二月。席書上大禮集議。帝命頒賜藩府及中外羣臣。仍令各省刊布以傳。五年夏六月。獻皇帝實錄成。秋七月。帝以觀德殿在奉慈殿後。地勢迫隘。欲改建於奉先殿左。工部尙

書趙璜言移觀德殿於奉先殿左。必與奉慈殿對峙。孝肅太皇太后獻皇帝之祖母。孝惠皇太后又聖母也。廟出其左。恐神靈有所不安。席書亦言世廟之建。民勞踰年。今甫告成。力亦當節。帝復諭大學士費宏等曰。遷觀德殿與奉慈殿無預。卿等勿蹈前日之誤。宏等乃乞敕禮工二部。卜日營度。給事中張嵩、衛道御史郭希愈、陳察等各上言。災異非常。乞仍舊以寬民力。不報。丁丑。世廟成。帝自觀德殿奉獻皇帝主於世廟。復自武英殿迎獻皇帝神位於觀德殿。禮成。羣臣表賀。撰世廟樂章。九月。帝奉章聖皇太后謁見世廟。先是。帝諭輔臣曰。聖母欲謁世廟。卿謂何如。費宏、楊一清曰。國初禮制。皇后謁太廟。永樂時改謁奉先殿。無至太廟者。帝以問璉。璉對曰。唐開元禮有皇后廟見之儀。國初。皇后謁太廟。內外命婦陪侍。永樂祇謁奉先。皆當時禮官失考。非祖制也。皇太后中宮宜先見太廟。以補前禮之闕。次謁世廟。以成今禮之全。宏一清曰。璉所引開元禮不可爲法。國初禮文未定。二臣欲復廟見。是彰祖宗之闕也。不可。席書、劉龍曰。高皇帝準古廟見禮爲大昏册后之制。未及施行。復定册后祇謁奉先殿。璉、書所引。俱大昏禮。今世廟告成。是大祭禮。不可附會。章聖皇太后宜於奉主之後。祇謁觀德殿。則祖宗法守之益堅矣。璉、書曰。周天子宗廟之祭。王服袞冕而入。立東序。后服副褱而入。立西序。九獻各四拜。是天子與后共承宗廟也。皇上毅然舉行。以復古禮。未爲不可。因自具儀以上。席書等不能難。大學士石瑤上言。祖宗家法。凡后妃入宮。未有無故復出者。太廟尊嚴。乃天子對越之所。非時享祫祭。亦未輕出入。而况后妃乎。漢唐之季。事不師古。女禍時作。其患不可勝言。可不慮哉。帝怒。切責之。席書等乃上請。聖母謁廟。必得上同行。以主斯禮。從之。禮部議。祭世廟。用太廟次日。太常寺謂時享太廟及觀德殿。先三日齋戒。先一日視牲。今祭用次。

日則齋戒、視牲日各不同。且歲暮之際，難於次日舉行。禮部復請歲暮權與太廟同日。帝曰：俱用同日，次第舉行。

六年春正月，諭修典禮全書。張璠纂要略二卷以進。上言：此禮之失，非今日也。自漢、宋諸君失之，此禮之爭，非今日也。自漢、宋諸臣爭之，故皇上之改，改漢、宋諸君也。臣等之爭，爭漢、宋諸臣也。昔唐有開元禮，宋有開寶禮，所載皆儀文制度而已。今宜如通鑑凡例，以年月日爲綱，事關大禮者，必書備載聖裁。乃輯爲要略以獻。帝命付史館纂述。費宏等定議：世廟樂舞止用文舞，隨堂何淵上言：世廟樂舞未備。下禮部集議。侍郎劉龍等議：宜仍舊。帝諭輔臣再議。大學士楊一清、賈詠、翟鑾上言：漢高帝以武功定天下，故奏武德、文治、舞、惠、文二帝不尚武功，故止用文治。昭德世廟止用文舞，亦此意也。不爲缺典。張璠獨上言：王制有曰：祭用生者。皇上身爲天子，尊獻皇爲天子父，宜以天子禮樂祀之。缺一不可。且天子八佾爲人六十，有四。諸侯六佾爲人三十，有六。國朝太廟文武佾各八，計百有二十八人。王國宗廟文武佾各六，計七十，有二人。獻皇在藩時固用七十，有二人。今乃六十，有四，可乎？以天子父不得享天子禮樂，何以式四方，法萬世？帝從之。

七年夏六月，明倫大典成。加張璠少傅，兼太子太傅。吏部尚書謹身殿大學士，追奪議禮諸臣官。敕曰：大學士楊廷和、謬主濮議，尚書毛澄不能執經據禮。蔣冕、毛紀轉相附和。林俊著論迎合，喬宇爲六卿之首，乃與九卿等官交章妄執。汪俊繼爲禮部，仍注邪議。吏部郎中夏良勝脅持庶官，望遂邪志。何孟春以侍郎掌吏部，鼓舞朝臣，伏闕喧呼。朕不欲已甚，姑從輕處。楊廷和爲罪之魁，以定策國老自居，門生天子視

朕法當僂市特寬宥削籍爲民毛澄林俊俱已病故各奪其生前官職蔣冕毛紀喬宇汪俊俱已致仕各奪職閑住何孟春情犯特重夏良勝釀禍獨深俱發原籍爲民其餘兩京翰林科道部屬大小衙門各官附名入奏或被入代署而已不與聞者俱從寬不究其先已正法典或編戍爲民者不問爾禮部揭示承天門下俾在外者咸自警省秋七月加上皇考聖母尊號皇考爲恭睿淵仁寬穆純聖獻皇帝聖母爲章聖慈仁皇太后詔告天下

八年十月朔日食刑部員外郎邵經邦上言詩十月之交刺無良也意者陛下以議禮之故亟用張璠皇父專權致召天變則所議者不爲公禮矣可守也亦可變也可成也可毀也疏入帝怒其疏末有引用茅焦語譎鎮海衛與楊慎等永遠不宥死戍所

十五年冬十月更世廟爲獻皇帝廟帝諭禮部尙書夏言曰朕思皇考廟名似大不安太宗百世不遷故名世室恐皇考亦敦讓太宗宜別擬議且世字來者或用作宗號今施於皇考徒擁虛名可會郭勳李時議之既而又諭曰皇考廟止稱獻皇帝廟庶別宗稱以見推尊之意於是夏言上言禮惟有功德者別立廟祀百世不遷名之曰世周之文武世室是也皇考獻皇帝雖篤生皇上比跡契稷而前有文皇既稱太宗義當尊讓後有聖帝必爲世宗理宜虛埃今欽定獻皇帝廟庶幾明祀正而公議定帝從之命以所議付史館十二月九廟成獻皇帝廟止修時祀以避豐禰之嫌

十七年五月議集明堂秋饗禮先是皇考獻皇帝止舉時祀不祀太廟於是揚州府同知致仕豐坊上言孝莫大於嚴父嚴父莫大於配天宜建明堂尊皇考爲宗以配上帝又天下郡邑宜各立明堂歲時祝拜

君上以尊朝廷。勿寄位釋宮。褻體統。下禮部議。坊熙子也。尙書嚴嵩上言。諸儒論禮不一。臣惟明堂園邱。皆以事天地。今大祀殿在園邱之北。正應古之方位。明堂秋饗之禮。卽此可行。不必更建。至於侑饗之禮。傳以爲萬物成形於秋。故秋祀明堂。以父配之。自漢武迨唐宋諸君。莫不皆然。主親親也。至於錢公輔。司馬光。孫抃。程朱諸賢所論。主祖宗之功德。今以功德則宜配文皇。以親則宜配獻皇。第揆以嚴父之旨。以皇考而不得配。陛下庸有所弗甯矣。至於稱宗之禮。則未有帝宗而不祔太廟者。臣不敢妄議以負陛下。惟聖明裁擇。帝以示夏言。言不敢議。帝曰。明堂秋饗。宜於奉天殿行之。其配享皇考稱宗。不爲過情。何在爲不宜也。復命集議。戶部侍郎唐胄疏爭之曰。三代之禮。莫備於周。郊祀后稷以配天。宗祀文王於明堂。以配帝。未聞成王以嚴父之故。廢文王配天之祭。移於武王也。皇上嗣統之初。廷臣執爲人後之說。於是力正大倫者。惟張孚敬。席書諸臣。及何淵有建廟之議。陛下嘉答諸臣。亦云朕奉天法祖。豈敢有干太廟。顧今日乃惑於豐坊耶。臣謂明堂之禮。誠不可廢。惟當奉太宗配於禮。爲宜。若獻皇帝得聖人爲之子。不待稱宗。議配而專廟之享。百世不遷矣。疏入。上大怒。下胄錦衣獄。出爲民。尙書嵩乃上言。考秋饗成物之旨。嚴父配天之文。皇考侑饗。允合周道。帝嘉納之。秋七月。議祔皇考於太廟。初。帝因嚴嵩請。旣敕禮部議。又諭嵩曰。太宗靖難功。與開剗同。當稱祖以別之。嵩遂上議曰。古者父子異昭穆。兄弟同世次。殷有四君。一世而同廟。不係父子故也。晉則十一室而六世。唐則十一室而九世。宋真宗詔議太廟禮。學士宋湜議以太祖太宗合祭同位。其後禘祫圖。又以太祖太宗同居昭位。皆古事之可據者。皇考親孝宗弟。臣謂宜奉皇考於孝宗之廟。我太祖卽位。仁祖雖自布衣。必饗天子之祀。皇考顧獨闕焉。聖心必有所不安。又

曰古禮宗無定數。祖非有功者不得稱。漢世稱祖者二。高祖、世祖。光武再造漢室。故無二祖之嫌。我文皇定鼎持危。功莫大焉。尊稱爲祖。聖見允宜。嵩奏出羣臣翕然無異議。時張孚敬死已六年矣。九月辛巳。奉太宗文皇帝爲成祖。皇考獻皇帝爲睿宗。癸未。祔祖考於太廟。辛卯。大饗上帝於元極殿。奉睿宗配享。二十年夏四月辛酉。九廟災。時久暘不雨。是日初昏。陰雨驟至。大雷雹以風。忽震火起仁廟。烈風噓之。須臾燬其主。延及成祖主亦燬。遂及太祖。昭穆羣廟。惟獻廟獨存。

二十四年秋七月。太廟成。布詔天下。

穆宗隆慶元年春三月。禮科左給事中王治上言。獻皇帝入廟稱宗。在今日猶有當議者。蓋獻皇雖貴爲天子之父。實未嘗南面臨天下。而今乃與祖宗諸宗諸帝並列。雖親爲武宗之叔父。然嘗北面武宗。而今乃設位於武宗之右。揆之古典。終爲未合。故先帝於獻皇帝祔廟之後。世廟之享。猶不忘設是先帝之心。亦自有不安者。臣以爲獻皇祔太廟。千萬歲後。不免遞遷。若專祀世廟。則億萬世不改。惟陛下下廷臣議。求至當。以妥獻皇之靈。以光先帝大孝。章下所司。格不行。

谷應泰曰。孝宗仁聖。麟趾不蕃。武廟盤游。前星失耀。再世衰微。古今至變也。當是時。重繼嗣者私恩。重承統者大義。而世宗以臣紹君。以弟承兄。敷天臣民。誰忍孝宗之嗣。一傳卒斬者。旣已斬焉。則忠臣義士。不能復續。求其同氣之近者立之。統在嗣亦在矣。所以武宗遺詔。不敢子視世廟也。旣已兄稱武廟。因欲併考孝宗。則孝以無孫。反因得子。於義爲誣。稱子逼武。二統嫌孝。於理亦礙。况父子至親。豈可隔世軼代。妄相附屬。比之定陶濮王。生視寢膳。死視斂舍。曾有鞠養之恩。蚤定父子之分者。迥相判也。旣不考孝。卽考



興獻。天下有無父之人乎。漢宣不皇其父。未嘗不考皇孫。光武不皇其父。未嘗不考南頓。既考興獻。卽當皇興獻。天下有子爲天子。父爲列侯者乎。據稱兵逆。父遂不敢皇。猶之舜不王瞽。禹不王鯀也。興獻以肇允啓聖。儼然皇焉。亦猶之周王王季。周王文王也。湯不王商。癸而周王王季。光武不王南頓。而世宗王興獻。踵事增華。禮以義起。孝子之至也。所疑者。考興獻。則疑於無孝宗。皇興獻。則疑於躋武宗。憑几彌留。奉迓入繼。不能得世宗而延其嗣。反欲召興獻而亂其統。此舉朝所以沸騰。百官所以號泣也。不知太廟者。承統之地。皇而不廟者。有異稱宗者。繼統之名。皇而不宗者。亦殊懿文太子亦得爲康皇帝。英宗斥郕王。然亦稱景泰帝。不入廟。則地不偪。不稱宗。則名不嫌。親近則尊。親盡則祧。辟之遙。除之官。追贈之號。曲體罔極之私情。無預朝廷之名器。乃世宗尊爲天子。必欲使之不王其父。興獻爲天子。父。必欲與之共臣。其子。此則議禮諸臣之過也。至於觀德殿足矣。必欲遷近太廟。與之同門。獻皇帝足矣。必欲削去興獻。崇加徽號。見太后於世廟。著獻皇之實錄。折中禮經。毋乃不倫。興國皇太后聖旦。則宴賚有加。昭聖皇太后千秋。卽傳免朝賀。傳聞乖異。存歿傷心。卒之不加宗。不入廟。殺徽稱。止遷葬。則亦聰。尊有功於存統也。若夫廷和等之伏闕呼號。甚於牽裾折檻。世宗之疾威杖戍。竟同元祐黨人。大禮未成。大獄已起。君臣交失。君子譏焉。而廷和戮及身後。楊慎謫死貶所。濮議諸臣。旋蒙賜還。興國之獄。無復金雞。此則世宗乏錫類之仁。亦聰。尊諸人無休休之量也。至於豐坊倡議。嚴嵩附和。嚴父之說。興容宗之號。進孝宗。幾疑逼宮。武廟嫌躋新鬼。以明察始。以豐禰終。蓋豐坊固子政之劉歆。分宜實議禮之林甫。善作者不必善成。惜乎不令張孚敬見也。

卷五十一

更定祀典

世宗嘉靖九年二月。給事中夏言請更郊祀。洪武初中。書省臣李善長等進郊社宗廟議。分祭天地於南北郊。冬至則祀昊天上帝於圓邱。以大明夜明星太歲從。夏至則祀地於方澤。以五嶽五鎮四海四瀆從。德祖而下四代各爲廟。廟南向。以四時孟月及歲除凡五享。孟春特祭於各廟。孟夏孟秋孟冬歲除則合祭於高祖廟。祀社稷以春秋二仲月上戊日。太祖從之。行之十年。水旱不時。多災異。太祖曰。天地猶父母也。泥其文而情不安。不可謂禮。乃以冬至合祀天地於奉天殿。列朝仍之。至是。給事中夏言上言。古者祀天於圓邱。祭地於方澤。是故兆於南郊。就陽之義。瘞於北郊。卽陰之象。凡以順天地之性。審陰陽之位也。豈有崇樹棟宇。擬之人道者哉。至於一祖二宗之配享。諸壇之從事。不於二至而於孟春。稽之古禮。俱當有辨。因引程朱之論以駁合祀之不經。疏入。上方以大禮恚羣臣。將大有更易。得之。甚悅。賜言四品服。織幣以旌其忠。夏四月。廷臣集議郊祀典禮。先是。夏言疏見納。詹事霍韜嫉之。上言分郊爲紊朝政。亂祖制。帝置不問。韜復爲書遺言。甚言祖宗定制不可變。周禮爲王莽僞書。宋儒議論皆爲夢語。東西郊之說起。自是而九廟亦可更矣。言飛章并其書上之。帝怒。下韜獄。於是中允廖道南上疏。雜引周禮漢志唐六典諸書。以明我朝郊廟之禮。皆所當議。其略曰。我太祖高皇帝初年。建圓邱鐘山之陽。方邱鐘山之陰。分祀天地。至十年。感齋居陰雨之應。覽京房災異之說。始命卽舊址爲壇。行合祀。夫前之分祀。酌萬世帝王

之道。禮本太始者也。後之合祀。感一時災異之應。禮緣人情者也。太宗遷都。當時未有建白以復古制者。禮樂百年而後興。詎不信哉。至於宗廟之制。國初立四親廟。德祖居中。懿熙仁祖次分左右。昭穆有定位。禘祫有定時。視商周七廟九廟。其揆一也。九年十月。改建太廟。乃比漢人同堂異室之制。時享歲祫。則設累朝衣冠於神座而祀之。於是始以功臣配享矣。恐非古先聖王尊尊親親之道也。周禮大宗伯。兆日於東郊。兆月於西郊。我聖祖亦有朝日夕月之禮。有其舉之。莫敢廢也。且今之大祀殿。正倣古明堂之制。宜法聖祖初制。兆南邱於南郊以祀天。兆方邱於北郊以祀地。尊聖祖配享。以法周人尊后稷之意。而又宗祀太祖。太宗於大祀殿。以法周人宗祀文王於明堂之禮。兆大明於東郊。兆夜明於西郊。以法周人朝日夕月之禮。增太廟大禘之祭。正太祖南向之位。移功臣於兩廡。庶尊尊有殺。親親有等。而古典復疏入。下禮臣議。贊善蔡昂。修撰倫以訓。姚濂。祭酒許詔。學士張潮。編修歐陽德。給事中陳侃。趙廷瑞。御史陳講。譚纘。皆以合祀爲宜。而漶言猶切。夏言復疏申明祀享之議曰。周人以后稷配天於郊。以文王配帝於明堂。欲尊文王。而不敢以配天者。避稷也。今宜奉太祖配天於圓邱。所以尊太祖。奉太宗配上帝於大祀殿。所以尊太宗。於是復會羣臣集議。右都御史汪鏞。編修程文德。給事中孫應奎。御史李循義等八十二人皆主分祀。大學士張璠。董玘。聞淵等八十四人亦主分祀。而謂成憲不可輕改。時詘不可更作。尙書李瓚。編修王教。給事中魏良弼。御史傅炯。行人秦鼇。柯喬等二十六人亦主分祀。而欲以山川壇爲方邱。尙書方獻夫。李承勳。詹事霍韜。魏校。編修徐階。郎中李默。王道二百六人皆主合祀。而不以分祀爲非。英國公張崙等一百九十八人無所可否。帝命再議。於是張璠雜引五經及諸史言郊祀者條析合祀之非。明分祀

之是名曰郊祀考議上之。又疏言太祖太宗分配未當。帝然其郊議。疏言不報。尚書方獻夫詹事霍韜亦上言前主合祀非是。帝不問。尋復韜職。五月初建西郊。羣臣議上。帝曰。分祀良是。乃命建圓邱於南郊。其北爲皇穹宇。建方邱於北郊。其南爲皇祇室。作朝日壇於東郊。夕月壇於西郊。秋七月。罷姚廣孝配享太廟。移祀於大興隆寺。從禮部尚書李時之請也。罷列代帝王南郊從祀及南京廟祭。命立帝王廟於京師。初立文華殿聖師之祭。奉皇帝伏羲氏、神農氏、軒轅氏、帝師陶唐氏、有虞氏、王師夏禹王、商湯王、周文王、武王南向。左先聖周公、右先師孔子、東西向。凡歲春秋開講。先期一日。皇帝皮弁服拜跪行奠禮。冬十月。正孔子祀典。易木主。及釐正從祀諸賢。洪武初。司業宋濂上孔子廟堂議。略曰。世之言禮者。皆出於孔子。不以禮祀孔子。褻祀也。古者主人西向。几筵在西也。漢章帝幸魯。祀孔子。帝西向再拜。開元禮。先聖東向。先師南向。三獻官西向。猶古意也。今襲開元二十七年之制。遷神南面。非神道尙右之意矣。古者木主棲神。天子諸侯廟皆有主。大夫束帛。士結茅爲菹。無像設之事。今因開元八年之制。搏土而肖像焉。失神而明之之義矣。古者灌鬯炳蕭。求神於陰陽也。今用薰蕕代之。非簡乎。古者郊廟祭享。皆設庭燎。示嚴敬也。今以秉炬當之。非瀆乎。古之道。有德者使教焉。死則以爲樂祖。祭於瞽宗。謂之先師。若漢禮有高堂生。樂有制氏。詩有毛氏。書有伏生也。凡始立學者。必釋奠於先聖先師。非其師弗學。非其學弗祭。開元禮。國學祀先聖孔子。以顏子等七十二賢配。諸州惟配顏子。今以荀况之言性惡。揚雄之事王莽。王弼之宗老莊。賈逵之忽細行。杜預之建短喪。馬融之附世家。亦廁其中。吾不知其何說也。古者立學以明倫。子雖齊聖。不先父食。今回參。偃坐饗堂上。而其父列食於廡間。吾不知其何說也。古者士見師。以菜爲

贊。故始入學者。必釋菜以禮。其先師。其學官時祭。皆釋奠。今專用春秋。非矣。釋奠有樂。無聲。釋菜無樂。是二釋之輕重。以樂之有無也。今襲用漢魏律所制大成樂。乃先儒所謂亂世之音。可乎。古者釋奠。釋菜。名義雖存。而儀注皆不可考。開元禮彷彿儀禮饋食篇。節文爲詳。所謂三獻。獻後各飲福。卽尸酢主人。主婦及賓之義也。今憚其煩。惟初獻得行之可乎。他如廟制之非宜。冕服之無章。器用雜乎雅俗。升降昧乎左右。更僕不可盡。昔者建安熊氏欲以伏羲爲道統之宗。神農黃帝堯舜禹湯文武次而列焉。皋陶伊尹太公周公暨稷契夷益傳說箕子皆天子公卿之師式。宜秩祀天子之學。若孔子實兼祖述憲章之任。其爲通祀。則自天子下達。苟如其言。則道統益尊。三皇不淪於醫師。太公不辱於武夫矣。昔周立四代之學。學有先聖。虞庠以舜。夏學以禹。殷學以湯。東膠以文王。復取當時左右贊成其德業者爲之先師。以配享焉。此天子立學之法也。上不喜。謫濂安遠知縣。不果用。天順間。林鶚知蘇州。時蘇學廟像歲久剝落。或欲加以修飾。鶚曰。塑像非古也。我太祖於太學。易以木主。彼未壞者。猶當毀之。幸遇其壞。易以木主。有何不可。或以毀聖像疑之。鶚曰。此土耳其。豈聖賢耶。孔子生佛教未入中國之前。烏識所謂像哉。於是併易從祀諸賢皆爲木主。然其他郡縣如故也。至是上因纂祀典議成。諭大學士張璠。凡雲雨風雷之祀。以及先聖先師祀典。俱當以次纂入。璠奏曰。孔子祀典。自唐宋以來。未有得其正者。臣謹採今昔儒臣議。上聖明垂覽。以爲百世永遵之典。一謚號。漢平帝元年初。追謚孔子曰褒成宣聖公。唐玄宗追謚爲文宣王。元武宗加大成至聖文宣王。宋姚燧曰。孔子卒。哀公誄之。子貢以爲非禮。平帝始封謚。蓋新莽以文其奸也。國初大學士吳沈孔子封王。辨曰。後世之禮。有甚似而實非者。春秋列國僭王。則黜之。夫子人臣也。生非王爵。死

而諡之。可乎。書曰：天降下民，作之君，作之師。師也者，君之所不得而臣者也。故曰：詔於天子，無北面。所以尊師也。彼以王爵之貴而隆於稱師者，習俗之見也。布政夏寅曰：唐玄宗開元，既尊老子爲元元皇帝，尊太公爲武成王，則追諡孔子不得而缺，豈可以李林甫不學無術之謬制爲萬世程乎。祭酒邱濬曰：自漢平帝追諡孔子爲宣尼公，至開元加以文，文者經天緯地者也。若夫宣之爲言，諡法之美，不過聖善周聞而已。何足爲聖人輕重哉。又曰：自古諡號未聞有喻言者。大成之言出於孟子，成者樂之一終也。加此於至聖文宣王之上，於聖德無謂也。一章服，唐玄宗開元間，詔追諡文宣王，仍出王者袞冕之服以衣之。宋真宗祥符間，加先聖冕服，桓圭一，從上公之禮。冕九旒，服九章。徽宗崇甯間，始詔冕用十二旒，袞服九章。金世宗大定間，大成殿聖像冠十二旒，服十二章。朱熹曰：宣聖之設像，非古也。洪武間，創南京太學，止用神主，不設像。今國子監有設像者，仍元之舊也。邱濬曰：塑像之設，自佛教入中國始。李元瓘言：顏子立侍，則像在唐前已有之矣。嗚呼！姚燧有言：北史敢有造泥人銅人者，門誅。則泥人固非祀聖人法也。後世化其道而爲之，長短豐瘠，郡異縣殊，非神而明之之道也。一籩豆樂舞，唐開元間，詔祀先聖，樂用九宮，舞用八佾。宋徽宗大觀間，賜禮器一副，內籩十，簠全，豆十，蓋全。國朝成化十三年，用禮部尙書周洪謨議，詔增六佾爲八佾，加籩豆爲十二，祭酒章懋及夏寅皆非之，以爲十二籩豆八佾，惟太學可行。天子所自祭也。郡縣皆行之，祭禮僭矣。夫孔子不觀魯僭王之禮，甯自蹈非禮之祀哉。一配享，唐貞觀間，始詔顏回配享。曾參、孔伋俱宋咸淳間配享。孟軻元豐間配享。宋洪邁曰：自唐以來，以顏淵至子夏爲十哲，坐祀廟堂上。其後升顏子配享，則進曾子於堂，居子夏次。然顏子之父路，曾子之父點，乃在廡下，從祀之列。子雖齊聖，

不先父食。其何以安。熊禾曰。宜別設一室。以齊國公叔梁紇居中。南面。杞國公顏無由。萊蕪侯曾點。泗水侯孔鯉。邾國公孟孫氏侑。食西嚮。宏治時。謝鐸。程敏政俱是之。敏政又以程子之父珦。朱子之父松。請珦不附王安石新法。松不附秦檜和議。其歷官行己足述也。一從祀。程敏政疏曰。唐貞觀三十一年。始以左邱明等二十七人從祀孔子廟庭。而并及馬融等。臣考歷代正史。馬融初應鄧騭之召。爲祕書。歷官南郡太守。以貪濁免。髡徙朔方。又爲梁冀草奏殺李固。作西第頌美之。劉向初以獻賦進。喜誦神仙方術。嘗上言黃金可成。鑄作不驗。下吏當死。所著洪範五行傳流爲陰陽術家之小技。賈逵以獻頌爲郎。附會圖讖。致通顯。不修小節。蓋左道亂正之人也。王弼何晏倡清談。所註易專祖老莊。而范甯追究晉室之亂。以爲王何之罪深於桀紂。何休則止有春秋解詁一書。黜周王魯。又註風角等書。班之於孝經論語。蓋異端邪說之流也。戴聖爲九江守。多不法。何武劾之而免。及爲博士。毀武於朝。子賓客爲盜繫獄。武平心決之。得不死。則又造武謝。王肅仕魏。封蘭陵侯。乃以女適司馬昭。又爲司馬師畫策討文欽。毋邱儉濟其惡。杜預守襄陽。數饋遺洛中貴要。伐吳因斫瘦之議。盡殺江陵人。以吏則不廉。以將則不義。凡此諸人。皆當罷黜。而議者謂能守其遺經。轉相授受。臣竊以爲不然。夫守其遺經。若左邱明。公羊高。穀梁赤之於春秋。伏勝。孔安國之於書。毛萇之於詩。高堂生之於儀禮。后蒼之於禮記。杜子春之於周禮。可以當之。融等不過訓詁釋章句而已。至於鄭衆。盧植。鄭元。服虔。范甯五人。雖若無過。然所行未能窺聖門。所著未能明聖學也。臣愚乞罷戴聖等八人祀。鄭衆等五人祀於鄉。后蒼在漢初說禮數萬言。號后氏曲臺禮。禮記賴以傳。乞加封爵與左邱明等。至孔子弟子見於家語者。顏回而下六十六人。而司馬遷史記所載多公伯寮。秦冉。

顏何三人。文翁成都廟所書多蘧瑗、林放、申根三人。臣考宋邢昺論語註疏。申根孔子弟子。在家語作申續。史記作申黨。其實一也。今朝廷從祀申根。封文登侯。在東廡。申黨封淄川侯。在西廡。甚無謂。且公伯寮乃聖門之謗。而孔子稱瑗爲夫子家語。史記林放俱不在弟子之列。秦冉、顏何疑亦字畫相近之誤。臣愚以爲申根、申黨位號宜存其一。公伯寮等五人宜罷其祀。而瑗、放者各祀於其鄉。又洪武三十九年。行人司副楊砥請黜揚雄。進董仲舒。高皇帝納其言之。然苟况、揚雄實相伯仲。而况以性爲惡。以禮爲僞。以子思、孟子爲亂天下。宜并况黜之。其尙可議者。則隋之王通。宋之胡瑗也。先儒以通爲僭經。而瑗亦少論著。程子曰。王通隱德君子也。其粹處殆非苟。揚所及。朱子小學書亦備載瑗事。以爲自秦漢以來。師道之立。未有過瑗者。亦宜加封爵。使得從祀學宮。臣按敏政所奏。率多正論。可採。而宏治初。禮官沮格不行。同時謝鐸請祀楊時。罷吳澄。舉人桂萼亦請祀蔡元。定以爲呂律。大衍諸書俱有功於性理。又授其子皇極範數。此亦衆論之公也。臣又按歐陽修所著本論。有翊道之功。蘇軾曰。自漢以來。道術不出孔子。五百餘年而得韓愈。愈之後三百餘年而得歐陽子。夫韓愈旣以從祀。歐陽修豈可缺哉。疏入。上命禮部會翰林諸臣議。編修徐階上言。天子王祀孔子。承襲已久。一旦不王。衆人愚昧。將妄加臆度。以爲陛下奪孔子王爵。易惑難曉。且天子像祀孔子。衰冕章服。顯然王度。苟去王號。勢必撤毀。臣聞愛其人者。杖履猶加珍惜。况先聖之遺像乎。國家廟祀孔子。宮牆之制。下天子一等。樂舞籩豆。與天子同。今八佾十籩。蓋猶諸侯之禮。苟去王號。將復司寇之舊。彝宮殺樂。以應禮文。恐妨太祖之初制矣。帝覽疏。不懌。出階爲延平府推官。帝乃自著正孔子祀典說。頒賜羣臣。總復爲孔子祀典。或問上之上嘉焉。衆議乃定。於是改大成至聖。



文宣王爲至聖先師孔子。其配享四子。仍稱復聖。宗聖。述聖。亞聖。從祀弟子。稱先賢。左邱明以下。稱先儒。俱罷。公侯伯爵。撤像。題主祀之。申棖。申黨。二人。存棖。去黨。罷公伯寮。秦冉。顏何。荀况。戴聖。劉向。賈逵。馬融。何休。王肅。王弼。杜預。吳澄。十三人。林放。蘧瑗。鄭玄。盧植。鄭衆。服虔。范甯。祀於其鄉。進后蒼。王通。胡瑗。歐陽修。又以行人薛侃議。併進陸九淵。從祀。而別祀啓聖公。叔梁紇。以顏無由。曾點。孔鯉。孟孫氏。程珦。朱松。蔡元定。從祀焉。改稱大成殿爲先師廟。十一月己酉。初有事於南郊。先是。上命製圜邱祀器。金爐。玉爵。錦幕。圭璧。及鐘磬。賁鼓。諸樂器。旣成。陳於文華殿。召大學士張璠。閱視。是日。帝親祀於圜邱。奉太祖西向配。各駢犢一。用璧三。獻九。奏樂。舞用八佾。從祀四大明夜。各駢牛一。恆星五。曜羣星。及雲雨風雷師。各牛一。羊一。豕一。明日。布詔天下。頒恩錫於庶官。布寬恤於小民。大學士張璠言。頃者。生員李時。颺疏請舉祀郊禱之禮。以祈聖嗣。夫古后稷之生。祈於禱。孔子之生。亦禱於尼山。大雅旣醉之詩曰。公尸嘉告。曰君子萬年。永錫祚允。曰釐爾女士。從以孫子。夫公尸之告。皆祖考之錫福也。臣願當茲慎選淑女之時。以廣求嗣續之誠。告於太廟。世廟。以祈祖考之祐。慰聖母之心上。嘉其請。擇十二月二十四日行禮。夏言充祈嗣醮壇監禮使。

十年春正月乙未。特享太廟。正太祖南向位。初。太祖立四親廟。德。懿。熙。仁。同宮異廟。各南向。孟春特享於羣廟。三時各祭於德祖廟。序用昭穆。後改建太廟。同堂異室。亦各南向。四孟及歲除。俱各祭於中室。仍序昭穆如初。罷特享禮。至英宗升祔。九室悉備。憲宗將祔。用禮官儀。祧懿祖。孝宗祔。祧熙祖。武宗祔。祧仁祖。獨德祖不祧。時享則太祖太宗以下。俱東西向。至是。帝諭張孚敬曰。朕欲自今春享奉太祖居中。太宗而

下各居一室。行特享禮。三時仍聚羣廟於太祖之室。昭穆相向。行時禘禮。季冬中旬。並享太廟。親王功臣配食兩廡。以存太祖當代之制。歲暮節祭。行於奉先殿。世廟止行四時之享。歲暮祭於崇先殿。庶祭義明。而萬世可行也。邪論勿惑。卽會李時議上。或咨夏言以助之。孚敬唯唯。如諭議聞。帝從之。乃命祠官於廟中設轡如九廟狀。奉太祖南向。羣宗遞遷就室。各南向。特享之。始退德祖於祧殿。不復預時享矣。祈穀於大祀殿。初。帝以孟春上辛。行祈穀於大祀殿。祭皇天上帝。用騂犢一。蒼玉一。三獻。九奏樂。舞八佾。奉太祖太宗配享。夏言建議。二郊奉太祖配。祈穀奉太宗配。張孚敬以爲不可。留中不下。言又疏請。帝謂羣臣違君悖禮。切責之。乃命祈穀太祖太宗並配。二郊專奉太祖焉。已而驚蟄。始祈穀。命議禘祭。大雩。秋報諸禮。帝旣正太祖位向。欲復古禘祭。乃命輔臣及禮官集議。已而兼問大雩。秋報諸禮。命五品官亦與議焉。侍讀學士夏言上言。惟天子有禘。故立始祖之廟。則有世系可考者。十世猶將立之。然則又以何者爲始祖。自出之帝。而祀之始祖之廟乎。我祖宗之有天下。以德祖爲始祖。百有六十餘年。尊享太廟之祭。今又定爲大禘。統羣廟之主矣。然則王禘之祭。又可復尊德祖乎。身爲始祖。而又爲始祖之自出。恐無是禮也。三代而下。必欲如夏商之禘。黃帝帝嚳。則無所考。若強求其人。如李唐之祖。聃又非孝子慈孫之所忍爲也。臣愚以爲宜設先祖虛位。而以太祖配享。蓋太祖始有天下。實始祖也。疏入。帝深然之。時中允廖道南上言。皇姓爲顓頊之後。宜禘顓頊。大學士孚敬曰。言虛位者。失之幻。言顓頊者。失之誣。惟禘德祖爲當。李承勛等皆以爲然。夏言復抗疏折其非。是已而。帝竟從言議。定以丙辛年孟夏行大禘禮於太廟。凡祭。先一日。令中書官書神牌於太廟。曰皇初始帝神。南向。太祖配位西向。帝又欲於奉天殿行秋報禮。中陞

行大雩禮。夏言言秋報宜於大祀殿。奉文皇帝配。大雩宜於郊兆。傍爲壇。孟夏後雩祭。帝謂孟春上辛旣行祈穀禮。若春夏雨暘以時。時雩祭代攝。否則躬祀。秋報禮姑寢不舉。二月庚辰。初朝日。是日春分。初行朝日禮於東郊。太牢一。用玉。禮三獻。樂七奏。舞八佾。三月。建大神殿於南郊。初。南郊撤屋爲壇祭之。奉上帝神牌。圓邱上。配以太祖。旣祭。而神牌莫知所藏。帝命建大神殿以藏之。帝又念舊存齋宮在圓邱北。是踞視圓邱也。欲改建於邱之東南。夏言言向者大神殿之建。乃陛下竭誠事天。此制爲可。若更起齋宮。圓邱之傍。似於古人掃地之意。未爲允協。且秦漢以來。並無營室者。質誠尊天。不自封樹。以明謙恭之意。故惟大次之設。爲合古典。陛下前日考據精詳。豈今偶未之思耶。伏望齋宮寢建。以仰答天靈。帝報可。遂建土穀祗先蠶壇於西苑。初議。皇后親蠶於北郊。自夏言首發之。至是。帝召張孚敬。李時詣西苑。相地。建土穀壇。乃併建先蠶壇於神壽宮側。而毀北郊蠶室焉。五月壬子。初有事於北郊。是日夏至。帝祀地於方澤。用騂牛一。黃琮一。三獻。九奏樂。舞八佾。太祖西向配。騂牛一。從祀四壇。五嶽及基運翊聖神烈山爲一。五鎮及天壽紀德山爲一。四海四瀆爲二。各太牢一。八月癸未。初夕月祭於西郊。如朝日祭東郊。十一年夏四月。初營九廟。帝御文華殿東室。召大學士李時。翟鑾。禮部尙書夏言議復古七廟制。其太廟寢祧俱存。舊弗撤。惟度地分建羣廟。不決而退。廖道南疏請建九廟。併獻大祀禮成感雪賦。及御札會及其名者三。帝悅。下禮臣議。夏言上言。昔唐虞五廟。夏后因之。殷周皆七廟。而祭法王制與劉歆宗說又各不同。朱熹古今廟制引王制天子七廟。外爲都宮。內敍昭穆。漢不考古。諸帝異廟。異地不合。都宮不敍。昭穆。明帝遵儉自抑。遺命勿別爲廟。遂有同堂異室之制。魏晉唐宋皆然。我太祖初立四親廟。始爲近古。後

改建太廟。又用明帝之制。皇上下大釐祀典。於廟制不能無疑。形諸翰札。召論者屢矣。第太廟南近宮牆。東邇世廟。西阻前廟。地勢有限。垣外隙地不盈數十丈。若依古制。列六廟。卽盡闢其地。猶不能容。欲稍減規制。則太廟崑然而羣廟湫隘。於義未安。卽使廟成。皇上冠冕佩玉。循紆曲之途。遍列羣廟。而奠獻之日。亦不足矣。議者謂羣廟可攝。皇上仁孝誠敬。可終歲舉祭。止對越太祖。而不一至羣廟乎。邱濬謂宜開日祭一廟。自十四日而遍。此蓋無據而強爲之說也。馬端臨曰。後世失禮。豈獨廟制。漢儒以來。講究非不詳明。而卒不能復古者。以昭穆難定故也。蓋昭穆必父子繼世而後可。兄弟相及則紊矣。故東都以來。同堂異室。未可盡非也。帝曰。朕於天地百神祀典。俱已釐正。獨太廟之禮。未能復古。可乎。今太廟堂寢俱有定制。不必更移。其昭穆廟次。卽會官相度地勢。奏聞。於是言惶懼謝罪。請先詣太廟旁。量定地勢。審度方位。以聞。帝從之。乃撤故廟。改建新宮。太祖居中。昭穆各三廟。成祖廟在六廟之上。諸廟合爲都宮。廟各有殿。殿後有寢藏主。太廟寢後別有祧寢。藏祧主。太廟門殿皆南向。羣廟門東西相向。內門殿寢皆南向。

十三年三月。帝視太學。釋奠先師。帝以孔子改稱先師。服皮弁。服謁拜。用特牲奠帛。行釋奠禮。樂三奏。文舞八佾。從祀及啓聖分奠。用酒脯。已視學。進諸生橫經布講。仍諭令敦本尙實。勿徒事辭章。六月。南京太廟災。夏言上言。京師宗廟行將復古。而南京太廟遽罹回祿。陛下建德之意。聖祖啓後之靈。不可不默會於昭昭之表也。帝喜。令亟起新廟。南京太廟不復建。遺址築周垣焉。時祀并入南京奉先殿。蓋失鎬洛遺意矣。

十四年二月初。建九廟。先是。夏言請定七廟額。謂陛下復古廟制。正太祖南向位。則太廟之名。實符周典。

太宗功德隆赫。特建百世不遷之廟。宜曰文祖。世室在三昭上。仁宗宣宗各爲昭穆第一廟。英宗憲宗爲昭穆第二廟。孝宗武宗爲昭穆第三廟。則萬世不刊之制也。帝從之。

十五年二月。纂修祀儀成。自天地日月神祇帝王社稷及禘祫先師先農諸祀。悉爲分類成書。首冠祀壇圖制及宸諭詩歌。中書禮儀禮器樂舞樂章。末附諸王表箋。羣臣疏頌。於是侍讀學士廖道南撰禋頌九章以獻。五月。建慈慶慈甯宮。黜禁中佛像。時帝欲除去禁中釋殿。以其地奉建慈慶慈甯二宮。命廷臣議。僉以爲可。帝卽命撤之。召李時夏言入視大善殿。見金範佛像不下千百。俱命銷毀。其几案懸鍍金函。藏貯尙多佛骨佛牙諸物。言退。上疏力請焚瘞。帝從之。於是禁中邪穢迭斥殆盡。六月。敕祀姜嫄。后稷於武功。十一月。詔天下臣民得祀始祖。夏言據程頤議爲請也。十二月。九廟成。詔天下。帝乃定五年一禘。祀皇初祖於太廟。以太祖配。每立春。特享祖宗於羣廟。三時合享於太廟。季冬大祫於太廟。皇考獻皇帝止舉時祀。

十七年秋九月。奉太宗文皇帝爲成祖。皇考獻皇帝爲睿宗。配上帝。詳大禮議十一月。薦大號於天。改昊天上帝稱皇天上帝。

二十年夏四月辛酉。九廟災。詳大禮議

二十四年夏六月。撤元世祖廟祀。及其侑享木黎華等五人。從給事中陳棐議也。秋七月。太廟成。復同堂異室之制。

穆宗隆慶元年。禮官言先農之祭卽祈穀遺意。今二祀並行於仲春。不無煩數。宜罷祈穀於先農壇行事。

大饗禮亦宜罷。詔可。惟四郊如舊。

谷應泰曰。漢制近古。然禮制缺焉。唐祖李聃。宋祀靈應。禮官式微。愈彰誣褻。明初宋濂諸臣。講禮戎行。頗多釐正。高祖喜簡易。不見採擇。豈禮樂必百年後興歟。後世謹守故府。學士大夫莫敢辨難。世宗自大禮議。慨然有更定制作之思。而諸臣紛紛言祀事矣。嘉靖九年二月。議郊社禮。冬十月。議孔子禮。十一月。有事南郊。十年春正月。饗太廟。議祧禮。二月。祈穀。議禘。行朝日禮。建土穀。先蠶壇。五月。有事北郊。八月。行夕月禮。十三年四月。視太學。行釋奠禮。十四年二月。建九廟。十七年五月。議明堂秋饗禮。九月。祔獻皇帝。加睿宗配祀上帝。嗚呼。盛哉。至尊莫大於天地。至親莫大於祖宗。教天下莫大於孔子。養天下莫大於土穀。尊天地。故有郊社。郊壇於南。社壇於北。本其氣也。日月風雷山海嶽瀆隨焉。從其類也。配以太祖。明受命也。秋復饗於元極殿。報其功也。秋則配於太宗。告成功也。晚易睿宗昵於私己。親祖宗。故有太廟。太廟七。太祖三。昭三。穆也。文世室一。別祀成祖。不敢祧也。立春特享。三時合享。勤時祭也。季冬大禘。萃渙也。五年一禘。設皇初祖主。配於太祖。追本報遠也。德祖祧矣。禘宜用德祖焉。虛設皇初祖位。泥古而誣者也。黜德祖。若羣帝。然嫌高帝已教天下。故祀孔子。孔子加封。自漢平帝始也。王拜於帝。僭已稱先師。禮也。廟祀設像。自唐開元始也。其褻已甚。易木主。禮也。八佾十二豆籩。自宋徽宗始也。祭用生祿。太學仍之。郡國減等。禮也。帝釋奠。舞六佾。謬已從祀。四聖七十二賢矣。曾點顏路退食廡下。子先父食。改附啓聖。禮也。刪申黨。黜公伯寮等十三人。改蘧瑗等七人。進后蒼等五人。考證班班。勿僭勿黷。禮也。養天下。故祀土穀。祈穀於太祀殿。用人道也。配以太祖太宗。有天下之主也。遷蠶室於西苑。申內禁也。土穀壇亦遷焉。非其類已。帝

採稽典聞。精思禮祀。進退羣心。斟酌美備。庶幾一代之典。亦十世可知之故也。







萬有文庫

第一集一千種

王雲五主編

明史紀事本末

(八)

谷應泰著

商務印書館發行

萬有文庫

第一集一千種



商務印書館發行

明史紀事本末

(八)

谷應泰著



國學基本叢書

吉



星3421—8

# 明史紀事本末

## 卷五十二

### 世宗崇道教

嘉靖元年春三月。簿錄大能仁寺妖僧齊瑞竹財資。及元明宮佛像。毀括金屑一千餘。悉給商以償宿逋。齊瑞竹正德間賜玉璽書金印。賞賚無算。至是從工部侍郎趙璜言也。禮部郎中屠墀發檄徧查京師諸淫祠。悉折毀之。七月。帝漸興寺觀。崇奉諸教。汪珊疏言十漸。其三言議復諸不經淫寺觀。非初罷之意。章下所司。

二年夏四月。暖殿太監崔文以禱祀誘帝。乾清諸處各建醮。連日夜不絕。又命內監十餘人習經教於宮中。賞賚不貲。大學士楊廷和九卿喬宇等疏請斥遠僧道。停罷齋醮。給事中周瑯、張嵩、張汝、安盤等交章劾文。乞置重典。俱不報。閏四月。停齋祀。時給事中鄭一鵬上言。臣巡光祿。見正德十六年以來。宮中自常膳外。少有所取。邇者禱祀繁興。制用漸廣。乾清坤甯諸宮。各建齋醮。西天、西番、漢經諸廠。至於五花宮、西暖閣、東次閣。亦各有之。或連日夜。或間日一舉。或一日再舉。經筵俱虛設而無所用矣。傷太平之業。失天下之望。莫此爲甚。臣謂挾此術者。必皆魏彬、張銳之餘黨。曩以欺先帝。使生民塗炭。海內虛耗。先帝已誤。陛下豈容再誤。陛下急誅之。遠之可也。伏願改西天廠爲寶訓廠。以貯祖宗御製諸書。西番廠爲古訓廠。以貯五經子史諸書。漢經廠爲聽納廠。以貯諸臣奏疏。選內臣謹畏者司其筭鑰。陛下經筵之暇。遊息

其中則壽何以不若堯舜。治何以不若唐虞哉。帝曰。天時饑饉。齋祀暫且停止。

五年。以道士邵元節爲真人。吳尙禮爲左至靈。

七年春正月。大學士楊一清等言。宮寢之中。非祀天之所。每日拜祝。恐勞且褻。請已之。報聞。

十年十一月。遣行人召大學士張孚敬還朝。建祈嗣醮。欽安殿。以禮部尙書夏言充醮壇監禮使。侍郎湛若水。顧鼎臣充迎嗣導引官。文武大臣遞日進香。上親行初終兩日禮。

十一年冬十月。編修楊名上修省疏。斥汪鋹。郭勛之奸。乞罷工作禱祀。上怒。收繫械。訊瀕死。謫戍。

十三年五月。上御重華殿。召大學士張孚敬。武定侯郭勛等五人入觀祀天青爵。作紀樂同遊詩。

十四年夏四月。大興隆寺災。御史諸演請順天心。絕異端。敕禮部尙書夏言覆奏。改僧錄司於大隆善寺。僧徒還俗者聽。併移姚廣孝神位。廣孝神位。帝更定祀典。撤太廟配享。移入興隆寺者也。

十五年春正月。加致一真人邵元節道號。賜玉帶冠服。元節興安人。仙源范文泰見而奇之。授以龍圖龜

範之祕。嘉靖初。徵入京。召對便殿。首以真教主靜之說進。帝嘉納之。已爲禱雪。輒應。命爲致一真人。領金

籙醮事。給玉。金。銀。象。印。各一。會帝有事南郊。召元節分獻風雷靈雨壇。預宴奉天殿。班二品。并封其師爲

真人。敕建真人府。都城西。落成。命夏言作記。刻之庭。歲給祿一百石。遣緹騎四十人充掃除役。贈田三十

頃。蠲其租徭。至是。寵待益隆。夏四月。詔求紅黃玉以禮神。十月。除禁中佛殿。建慈慶。慈甯宮。時帝欲

除去釋殿。召武定侯郭勛。大學士李時。禮部尙書夏言入視。大服千善殿。有金鑄象神鬼淫褻之狀。又金

函玉匣藏貯佛首佛牙之類。及支離傀儡凡萬三千餘斤。言退。上疏力請瘞之中野。不得瀆留宮禁。帝曰。

朕思此類智者以爲邪穢而不欲觀。愚民無知，必以奇異奉之。雖瘞中野，必有竊發以惑民者。其燬之通衢，永除之。於是禁中邪穢，迸斥殆盡。十一月，大修金籙醮於立極殿，七日夜，以謝儲祥。以大臣爲上香，監禮，迎嗣，引導等使如舊。十二月，以皇嗣生，錄致一真人邵元節禱祀功，加授禮部尚書，給一品服，俸賜白金、文綺、寶冠、法服、貂裘，授其徒邵啓爲等錄秩有差。先是，上命中使卽貴溪山中建仙源宮，旣成，元節乞暫還山，已而帝遣錦衣千戶孫經往趨起之。舟至潞河，命中使迎入，賜彩蟒衣，併闡教輔國玉印。時帝以祈嗣設醮，旦夕有雲氣見於圻壇上，大悅。越三日，皇子生，遂有是命。

十七年，命建金籙大齋於內皇壇，白鶴遶壇，卿雲捧日，賞賚天師張彥頽有加。嘉靖初，彥頽入賀，上賜問，以清心寡慾對，加封正一嗣教真人，賜金冠、玉帶、蟒衣、銀幣，遂留京邸。旣而請還山，上遣行人持詔召之，稱卿不名，宅燬爲作治，給事中黃臣諫曰：「昔者欒巴、郭憲，喫酒止火，彥頽宅燬，陛下又安用治之？」上不從。彥頽尋卒，詔如列侯例，賜卹典。天師永緒，上所命名也。

十八年八月，致一真人邵元節死，時上躬視顯陵，元節留京師。一日晨起，召其徒語之曰：「我殆將逝矣，安得走行在一見皇帝，言未旣卒，帝駐蹕裕州，聞之慟，手詔敕行在禮部贈諡，命中官錦衣護其喪，喪還，敕有司營葬，卹典如伯爵例。」以方士陶典真爲神霄保國宣教高士，典真一名仲文，黃岡人，少爲縣掾，喜神仙方術，嘗授符術羅田萬玉山，而邵元節微時亦往來仲文家。嘉靖初，仲文授遼東庫大使，秩滿至京師，時元節貴幸，比老，欲請骸骨，未有聞。會宮中黑眚見，元節治之無驗，遂薦仲文代己，試宮中，稍能絕妖，帝寵異之。至是，扈駕南巡，至衛輝，白晝有旋風繞駕不散，帝以問仲文，對曰：「當火。」遣仲文禳之，仲文曰：「火

終不免。可謹護聖躬耳。是夜行宮果災。宮中死者無算。錦衣陸炳排闥入負帝出。竟無恙。明日敕行在吏部授仲文是職。給誥印許攜其家於官。九月上諭輔臣曰。朕欲命東宮監國。朕靜攝一二年。然後親政。太僕卿楊最上言。聖諭至此。不過信方士調攝耳。夫堯舜性之湯武身之。非不知修養可以成仙。以不易得也。不易得。所以不學。豈堯舜之世無仙人。堯舜之智不知學哉。孔子謂老子猶龍。龍卽仙也。孔子非不知老子之爲仙。不可學也。不可學。豈易得哉。臣聞皇上之諭。始則驚而駭。繼則感而悲。犬馬之誠。惟望端拱穆清。恭默思道。不邇聲色。保復元陽。不期仙而自仙。不期壽而自壽。黃白之術。金丹之藥。皆足以傷元氣。不可信也。帝覽之。大怒。逮繫鎮撫司考訊。久之。死獄中。

十九年春正月上。疾不朝。拜天玄極殿。二月。祈建宮禳三日。八月。萬壽聖節。建三晝夜醮。告天玄極殿。郭勛以方士段朝用見曰。能化物爲金銀。因以所化銀器進。上大悅曰。殆天授也。因授朝用紫府宣忠高士。薦其器於太廟。加勛祿米百石。十一月。進陶仲文爲忠孝秉一真人。領道教事。尋加少保。禮部尙書。又加少傅。食一品俸。

二十年春正月。逮繫御史楊爵。下詔獄。爵上言曰。君人者。奉天安民。而使之各得其所也。今饑民顛連無告。委命溝壑。而土木之工。十年不止。又重委部臣。遠建雷壇。以一方士之故。朘民膏血。民何以得其所哉。執左道以惑衆。聖主所必誅。今異言異服。列於廷苑。金紫赤紱。賞及方術。保傅之位。坐而論道。非極天下之選。不足以當此貴。而畀之迂怪之徒。名器之濫。至此極矣。陛下以天縱之聖。爲上天元子。若遠宗帝道。近守祖法。則和氣致祥。罔有天災。山川鬼神。亦莫不甯。安用此邪佞之術。列諸法禁之地。而藉之以爲福。



哉。古人有言。君聖則臣直。若震之以天威。加之以危禍。如往年楊最言出而身卽死。近日羅洪先等以言罷黜。國體治道所損實多。臣恐忠藎杜口。則讒諛交進。安危休戚無由以見。而堂陛之近。遠於萬里矣。疏入。帝大怒。命鎮撫司長繫之。

二十二年春二月。段朝用下獄論死。初。朝用以黃白術結郭勛于進。久之技窮。勛有罪繫獄。脅索勛賂。捶死勛家。廝役張瀾復上疏瀆奏。帝怒。收送法司論死。宮婢楊金英等謀弑伏誅。帝曰。朕非賴天地鴻恩。遇除宮變。焉有今茲。朕晨起至醮朝天宮七日。醮之日。白鶴四十餘翔空中。羣臣賀。

二十三年冬十月。大同邊卒獲叛人王三。上曰。叛惡就擒。固義勇之效力。實神鬼有以默戮之。加秉一真人禮部尚書陶仲文爲少師。餘如故。前此大臣無兼總三孤如仲文者。

二十四年三月。建祈年醮朝天宮。秋八月。永和王知燠獻白鹿上壽。遂告鹿瑞於太廟。是時。上重箕仙。箕下亦命有司掩骹幣。出故御史楊爵。給事中周怡。工部郎中劉魁。詔獄皆從之。爵。怡。魁甫出三日。吏部尚書熊浹諫止。箕仙復逮獄如故。浹乞休。命錦衣衛遣校尉送原籍爲民。

二十五年秋七月。久雨。上曰。鹿瑞龜祥。洊呈去歲。今朕辰日近。醴泉復出承華。雖聖賢不恃以怠也。而不可不敬謝。其自二十五日至八月望。舉謝。停封貢事。毋慢。八月。加封陶仲文伯爵。仲文特進光祿大夫。柱國。兼支大學士俸。任一子尚寶司丞。

二十九年夏四月。加封陶仲文恭誠伯。先是春不雨。上以問仲文。仲文曰。疑有冤獄。時楊武知縣王濂以罪坐絞。子策走京師。誣巡撫胡纘宗私隙。故入人罪。述纘宗迎駕詩有穆王八駿飛雲殿。湘竹英皇淚不

磨爲詛咒。上怒，逮訊久不決。至是因仲文言釋之。是夜漏下四鼓，大雨，明日傳旨封仲文，賜誥歲祿一千二百石。

三十年夏五月，復事鎮鹵法壇。先是，帝從陶仲文請，設立符鎮鹵法壇，嚴事之。曰：禡鹵魄，勿窺我邊圉。至是，帝以馬市成，俺答款塞，欲撤之。忽報鹵有異謀，帝諭羣臣曰：朕於十九日欲撤鎮鹵法壇，二十日即有警報。玄威所至，亦不可忘。遂益敬事之。冬十月，邊吏獲叛人哈舟兒，陳通事禮部上言二逆就擒，實賴玄貺所至，宜告謝雷霆洪應壇，行獻俘禮，從之。

三十一年二月，太上道君誕辰，建醮永壽宮九日。三月，詔修太和山玄帝宮。

三十三年秋七月，命駙馬都尉鄔景和、安平伯方承裕、吏部尚書李默、禮部尚書王用賓、左都督陸炳、吏部左侍郎程文德、禮部左侍郎閔如霖、吏部右侍郎郭朴、吳山並直西內，撰玄文。景和以不諳玄理，辭免。俄以金幣賜玄，修諸臣猶及景和。景和自疏無功，辭願洗心滌慮，效馬革裹屍之報。帝怒曰：景和故出不祥語，當擬怨訕律，乃革爵，安置崑山。時諸臣覬撰玄營進，景和獨不屑直贊。夏四月，舉祀高玄大典，止封停刑。工部尚書趙文華乞歸，以病請。上方修玄，禁奏疏，尤諱言疾，疏入，觸上怒，罷。

三十五年夏四月丁巳，命翰林院侍讀嚴訥修撰李春芳並爲翰林學士，右春坊右中允董份直西內撰玄。自是詞臣多舍本職，往往求供奉，希進用。九月，廢徽王載堉爲庶人，王善伺上意，上宮中有需，王輒先時獻。道者南陽梁高輔年八十餘，手甲長數寸，善導引，王厚遇之，進之上，拜散人。高輔謹有所賜，予皆辭。王使人求謝，不能應。王故煉女癸服之，上亦需此。高輔馳求，王不與，而王方自恣，興土木，詐稱張世德。

自走南京。市美女。事聞。奪爵。幽鳳陽。王聞之自殺。是歲。上睿皇帝道號三天金闕無上玉堂都仙法主。玄元道德哲慧聖尊開真仁化大帝。獻皇后號三天金闕無上玉堂總仙法主。玄元道德哲慧聖母天后。孝烈皇后號九天金闕玉堂輔聖天后。掌仙妙化元君。上自號靈霄上清統雷元陽妙一飛元真君。後加號九天宏教普濟生靈掌陰陽功過大道思仁紫極仙翁。一陽真人元虛玄應開化伏魔忠孝帝君。再號太上大羅天仙紫極長生聖智昭靈統三元證應玉虛總掌五雷大真人玄都境萬壽帝君。

三十六年冬十月。玄嶽諸山獻紫芝。已而總督胡宗憲巡撫阮鶚御史路楷等相繼上者不可勝計。

三十七年夏四月。總督胡宗憲獻白鹿。五月。復獻白鹿於齊雲山。帝曰。一歲二瑞。天眷也。命告謝玄極殿。太廟。以宗憲忠敬。陞一級。百官表賀。

秋七月。禮部類進四方獻芝凡千八百六十有四。詔更求廣徑尺以上者。

三十八年六月。以陶世恩爲太常寺丞。世恩以蔭歷尙寶少卿。爲言官所列。奪官。至是。仲文乞復子原職。帝命改爲太常寺寺丞。兼道錄司右演法。是時。仲文請假還里。帝下璽書褒諭之。遣錦衣千戶一人護歸。仍賜白金彩繪。以示眷懷。令有司歲時存問。

三十九年二月。浙江總督胡宗憲上汪直獄。上曰。玄祐也。命告玄極殿。而論宗憲功有差。已而宗憲獻芝草五。白龜二。上悅。賜金帛。金彩鶴衣一襲。禮部請謝玄告廟。許之。不數日。白龜亡。上曰。天降靈物。朕固疑處塵寰不久也。十一月。秉一真人陶仲文死。仲文習祈禳術。得幸。賜坐。稱爲師。然亦小心。憚帝威嚴。不敢他有所干。列爵五等。死諡榮康惠肅。以伯禮葬。隆慶初。奪爵。籍其家。

四十年二月分遣御史王大任、姜儆、奚鳳等往天下訪求仙術異人及符篆祕方諸書。十一月禮部奏四方進芝凡七百六十九本，命採五色盈尺者。淮王獻白雁二，賜金幣。帝曰：天降祥羽，其告廟。四十一年三月萬壽宮成，宮災於四十年十一月，不二月而告成。宮中有壽源、萬春、太玄、仙禧諸殿，極其宏麗。上悅，加大學士徐階等秩有差。夏四月癸酉，方士鄆縣王金進五色龜、靈芝，授太醫院御醫，命成國公朱希忠告廟表賀。壬寅，大學士嚴嵩免。初，方士藍道行以箕幸，上故有所問，密封使中官至箕所焚之，不能答，則咎中官穢。中官乃合方士啓示而後焚之，每答具如旨。上問：今天下何以不治？對曰：賢不竟用，不肖不退耳。則問其賢否。對曰：賢如徐階、楊博，不肖如嵩。上心動，會御史鄒應龍劾之。詳嚴嵩用事上曰：人惡嚴嵩久矣，朕以其贊玄壽君，特優眷，乃縱逆子負朕，其令致仕。已而上思嵩贊玄功，意忽忽不樂，諭徐階欲傳位退居西內，專祈長生。階諫上曰：必皆仰奉上命，闡玄修仙乃可有再言嵩者，併鄒應龍斬之。嵩知上意密賂左右，發道行怙權，及矯稱玉詔諸不法事，竟以妖言律論死。秋七月內苑獻嘉禾一莖，三穗者，兩穗者三十有一，羣臣賀。十二月辛酉，甘露降顯陵，松上守備太監張方奉祀都督僉事蔣華等以進。上悅，告郊廟。

四十二年夏四月嚴嵩上祈鶴文檢及法祕，嵩罷歸。至南昌，延道士藍田玉等爲上醮鐵柱宮。玉因以所藏名鶴符驗法書附奏。嵩、玉皆賞賚有差。秋八月御苑龜生卵者五。巡撫湖廣都御史徐南金獻白鵠言出自景陵，羣臣表賀。

四十三年三月妖人李應乾等伏誅。應乾居河南之濟源，一目微眇，兩手涅日月字，懷衛間不逞者多附

之陰鑄印章數百。太白旗數十。付徒衆爲符驗。約四月八日起兵。時山東宣大真順諸處妖人尤衆。互相煽結。而呂某者潛入京。以白社法惑衆。陰結無賴千餘人。其黨有以僞告身二帙。辟穀藥餌一裹。首告大學士徐階者。緝獲鞫實。奏聞。應乾匿山西。久之乃獲。俱伏誅。五月乙卯。桃夜降於御幄。左右云。目空墮。上喜。修迎恩典五日。丙辰。桃復降。是夜白兔生二子。上益喜。謝玄告廟。頃之。壽鹿亦生二子。羣臣表賀。上以奇祥三錫。手詔答之。

四十四年春正月。帝不豫。帝注意玄修。先是。王大任奉命陝西。湖廣。招至方外士王金等。能合內養諸藥。姜倣奉命江西。廣東。亦得能通符法者。還復命。俱授翰林侍講。倣不自安。乞還里。大任仍在朝。不爲翰林所齒。上雖修玄西內。而權綱總攬。夜分至五鼓。猶覽決章奏。自王金等以修鍊幸。與陶仲文子世恩希求恩澤。乃僞造五色靈龜靈芝。以爲天降瑞徵。又與陶倣。劉文彬。申世文。高守中。僞造諸品仙方。養老新書。及以金石藥進御。其方詭祕不可辨。性燥熱。非神農本草所載。帝服稍稍火發。不能愈。然倣竟得遷太醫院使。世恩。太常寺卿。金。太醫院御醫。文彬。太常寺博士。三月。方士熊顯。趙添壽各進法書數十册。帝令留覽。賜冠帶銀幣遣還。添壽又進法祕。乞留靜虛觀祈咒。五月。方士胡大順。藍田玉等伏誅。初。有藍道行者。以方術見帝。帝頗信之。已而事敗。下獄死。胡大順者。故陶仲文徒也。亦以事敗斥去。希復進用。乃僞造萬壽金書一帙。詭稱呂祖以箕授者。用黑鉛取白。名先天玉粉丸。命其黨何廷玉齋至京。時嚴世蕃已敗。乃資以賄。因道行徒藍田玉。遇內侍趙楹獻之。帝曰。旣云箕書。扶箕者何在。田玉等遽謂帝念之也。遂與羅萬象者。詐僞旨徵大順至京。更名胡以甯。薦於帝。具奏求圖書及建宮地。及至。則大順也。帝惡之。時

宮中屢有氛孽。田玉等遂以爲藍道行下獄故。至此欲以動帝。帝頗惑之。以問徐階。階力言大順小人。不畏法紀。而田玉尤甚。且宮孽已久。恐非道行下獄所致。帝悟。階又言田玉乃嚴世蕃黨。妄進白鉛。其意叵測。至妄傳密旨。罪惡尤重。帝乃命收大順等下訊。獄具。帝猶欲寬之。復問階。階曰。聖旨至重。若聽詐傳。他日夜半出片紙有所指揮。將若之何。於是併檻論死。八月。御几及褥各得藥丸一。躬謝太極殿。告宮廟。冬十月。戶部主事海瑞上言。陛下卽位初年。敬一箴心。冠履辨分。除孔廟之像。立敬聖之祠。瘞斥元世祖於國門之外。宦官外戚。悉奪其權。天下忻忻。謂煥然更始。無何而銳精未久。妄念牽之。謬謂長生可得。一意修玄。土木興作。二十餘年。不視朝政。法紀弛矣。數行推廣事例。名器濫矣。二王不相見。人以爲薄於父子。以猜疑誹謗戮辱臣下。人以爲薄於君臣。樂西苑而不返大內。人以爲薄於夫婦。今愚民之言曰。嘉者家也。靖者盡也。謂民窮財盡。靡有子遺也。然而內外臣工。修齋建醮。相率進香。天桃天藥。相率表賀。陛下誤爲之。羣臣誤順之。臣愚謂陛下之誤多矣。大端在玄修。夫玄修。所以求長生也。堯舜禹湯文武之爲君。聖之至也。未能久世不終。下之方外士。亦未見有歷漢唐宋至今存者。陛下師事陶仲文。仲文則旣死矣。仲文不能長生。而陛下獨何求之。至謂天賜仙桃。藥丸。怪妄尤甚。臣聞伏羲御宇。龍馬圖河。大禹隨山。神龜書洛。天不愛道。猶日月星辰昭布森列。焉可誣也。宋真宗獲天書。乾裕山。孫奭諫曰。天何言。豈有書也。桃必採。乃得藥。必擣。乃成。茲無因而至。有脛行耶。云天賜之。有手授耶。然則玄修之無益可知矣。陛下玄修多年。靡有一獲。左右奸人。揣逆聖意。投桃設藥。以謾長生。理之所無。斷可見已。陛下誠然悟悔。日且視朝。與輔宰九卿侍從。言官講求天下利害。洗數十年君道之誤。置身堯舜禹湯文武之域。使諸臣亦

洗心數十年阿君之恥。置身臬、夔、伊、傅、周、召之列。內之宦官、宮妾、外之蔭恩、紱勞。多有無事而官者。上之內廚、內庫、下之寶物、貨賄。多有無事而積者。諸臣必有爲陛下言者矣。諸臣言之。陛下行之。在一節省間耳。官之侵漁。將之怯懦。吏之爲奸。諸臣必有爲陛下言者矣。諸臣言之。陛下行之。在一振作間耳。陛下爲此非勞也。民熙物洽。薰爲泰和。陛下性中真藥也。道與天通。命由我立。陛下性中真壽也。此理之所有。可旋至立效。乃縣思服食不終之餌。鑿想遙興輕舉之方。切切然散爵祿。竦精神。求之終身而不得。大臣持祿外爲諛。小臣畏罪面爲順。君道不正。臣職不明。此天下第一事也。疏上。帝大怒。命逮繫瑞。下鎮撫。交城王表柚得白兔於藐姑射山。撰頌以獻。賜金袞。四十五年春正月。上久病不痊。諭大學士徐階。欲幸承天。拜顯陵。取藥服氣。階奏止之。是年冬。帝崩於乾清宮。詔曰。朕奉宗廟四十五年。享國長久。累朝未有一念惓惓。惟敬天勤民是務。祇緣多病。過求長生。遂至奸人誑惑。自今建言得罪諸臣。存者召用。沒者卹錄。見監者卽釋復職。穆宗踐祚。釋戶部主事海瑞於獄中。逮方士王金陶。倣申世恩。劉文彬。高守中。陶世恩。下詔獄。論死。谷應泰曰。宋臣李沆之言曰。人主當知四方艱難。不則土木禱祠。次第並作。而伊尹之訓太甲。亦曰。酣歌恆舞。時謂巫風。此皆豫大之良規。嗣王之炯戒矣。世宗起自藩服。入纘大統。累葉昇平。兵革衰息。毋亦富貴吾所已極。所不知者壽耳。以故因壽考而慕長生。緣長生而冀狎舉。惟備福於箕疇。乃希心於方外也。爰考初政。卽設齋宮。及其末年。猶餌丹藥。蓋游仙之志。久而彌篤。未有若斯之甚者也。方其前星未耀。玄鳥方來。瑤筐誕祥。高禩有應。世宗信之。欣然以天神可降焉。於是命道士邵元節爲致一真人。金銀象印。

陪祀南郊。風雨靈壇。職司祕籙。而且祠神紅玉。分謫詔使。享天青爵。召視重華。雖黃帝憑五城以授神人。漢武寵文成以延方士。未爲過也。繼又召真人張彥頽。設金籙大齋。則有白鶴降庭。卿雲捧日。去天尺五。幾於呼吸可通矣。然元節身死。玉棺不來。彥頽宅火。嚙酒不滅。而世宗之意。冀遇其真。復召陶仲文者。拜爲神仙高士。徐市旣去。更用盧生。混康以還。復徵靈素。卽蓬萊之想。愈殷。祈年之觀。益麗矣。乃若旋風四繞。則行宮果災。疑獄初平。卽春霖早霑。以至白鹿一雙。獻於浙地。紫芝千本。貢自荊州。又且雲氣降於圻壇。綏桃來於御幄。比之建章宮中。芝房露掌。玉津園裏。幡節樓臺。以今準古。史不勝書。宜世宗之甘心於此也。雖其後段朝用下獄被戮。胡大順。藍田玉等。以次伏誅。不過少翁牛腹致疑。辛平玉杯得譴耳。而仲文死後。更訪異人。羈縻弗絕。一至此乎。更可駭者。世宗清虛學道。不御萬幾。奸嵩擅權。二十餘載。二世居深宮。而趙高柄國。徽宗稱道君。而蔡京專政。陰行蠱惑。吾無責焉。至於周瑯。鄭一鵬等。諫之於前。楊爵。海瑞等。爭之於後。而永嘉再相同游。撰詩。貴溪典禮。充壇監醮。豈王旦附會祥符。寇準依阿乾祐。爲國大臣。澳溼宜爾耶。然而世宗初御。括燬佛金。燒除佛骨。海內喁喁。想聞聖學。而乃於佛則絀。於道則崇。崔伯深不事胡神。更奉天師。孔祭酒。詆訶佛法。心存道黨。較長絜短。卽二氏何擇也。究之金石燥烈。鼎湖旣有龍升。王陶論死。雲中不乏鷄犬。語云。服食求神仙。多爲藥所誤。又云。君以此始。必以此終。吁。可慨也夫。

卷五十三

誅岑猛



世宗嘉靖五年夏四月。姚鏌督師討田州。指揮岑猛。按廣西諸土族。岑氏爲大。自稱漢岑彭後。國初元安撫總管岑伯顏以田州歸附。高帝嘉其誠。設田州府。令伯顏爲知府。子孫世襲。三傳爲岑溥。溥二子長猯。次卽猛。宏治六年。猯以失愛弒溥。土目黃驥。李蠻發兵殺猯。嗣位未定。而驥與蠻構釁。驥以猛奔梧州。督府奏以猛襲其父官。慮蠻方命。乃檄思恩知府岑濬以兵衛猛入田州。濬猛族也。亦土官。兵力方雄。兩江洎至田州。李蠻拒猛不納。驥復以猛奔思恩。濬留之不遣。十一年。都御史鄧廷瓚檄濬歸猛。濬不從。以兵徵之。濬始釋猛。督府納之田州。遂與濬仇釁。十五年十月。濬襲攻陷田州。僞以其族子洪守之。猛走免。十八年。都御史潘蕃奏發兵討濬。戮之。并誅洪。改思恩爲流官知府。兼攝田州。降猛福建平海所千戶。正德初。猛賂劉瑾得復爲田州府同知。領府事。猛撫輯遺民。兵威復振。稍蠶食傍郡。自廣嘗自言督府有調發。願立功。冀復故秩。督府使至田州。猛厚賂之。衆譽猛籍甚。會江西盜起。都御史陳金檄猛討之。猛兵大肆侵掠。所至民徙村落避之。賊平。金疏猛功。稍遷指揮同知。猛冀復知府秩。授官不愜初意。遂怨望。驕蹇。督府使又不得曩者厚賂。多譖猛不法。猛亦恃兵力。陵轢鄰府日甚。或言猛反者。都御史盛應期惴猛。冀得猛重賂。猛遂出不遜語。應期怒。疏猛反狀。請討之。未報。應期去。都御史姚鏌代。遽再疏請征猛。制曰。可。至是。鏌遣都指揮沈希儀、張經、李璋、張佑、程鑒等五將軍帥兵八萬。分道進。而令參議胡堯元爲監軍督之。九月。岑猛奔歸順州。知州岑璋誅之。初。猛聞大軍至。令其下毋交兵。裂帛書冤狀。陳軍門乞憐察之。鏌不聽。督兵益急。沈希儀擊斬猛長子邦彥。諸軍繼入。猛懼。謀出奔。猛婦翁岑璋歸順州知州也。以其女失愛於猛。素憾之。欲乘間擒猛自爲功。乃誘猛走歸順。先是。軍門令諸土官有能擒猛者。賜千金。爵一級。畀

其半地。黨惡者移兵誅之。又恐璋爲猛婦翁。或黨猛。召希儀問計。希儀知璋以女失愛。故憾猛。對曰。俟旬日。當得實以復。希儀察其部下千戶趙臣者。雅善璋。乃召臣問曰。聞岑璋與猛有隙。吾欲遣說之。藉令破猛如何。臣曰。璋多智善疑。直語之。必不信。當以計說之。希儀曰。計將安出。臣曰。鎮安與歸順爲世讐。督府往使人歸順。則鎮安疑。使人鎮安。則歸順疑。公今誠遣臣徵兵鎮安。臣迂道過璋。璋必詢故。臣爲好故。以死泄漏其事。璋要領可得也。希儀曰。善。乃遣臣往檄鎮安兵。臣過璋。璋果喜。迂臣曰。久不見故人。今肯念我來耶。臣默然。佯爲不豫者。璋曰。趙君有嗔乎。臣曰。感故人厚意。久契闊。故迂道來。何嗔也。稍語。須臾。復歎息起。璋心疑之。明日。璋置酒款臣。臣愈不豫。若有沈思者。璋益疑問。故曰。軍門有意督我過耶。臣曰。無之。璋曰。鄰壤有所控訴。將逮勘耶。臣曰。無之。璋挽臣臥內。跪叩之。臣潛然泣下。璋亦泣曰。璋死卽死耳。君何祕不告我。臣乃曰。託君肺腑。有急不敢不告。然今日非君死。卽我死矣。璋驚曰。何故。臣曰。督府討田州。謂君猛婦翁。必黨猛。令我檄鎮安兵襲君。我不言。君死。我言。君必驟發。爲自脫計。卽我泄漏機事矣。必我死。柰何。璋頓首謝曰。君實生我。君不言。我亦族不悟。猛取吾女。讎視之。吾何曜焉。吾欲殺猛久矣。無閒也。臣曰。君心如是。盍自列督府。匪直免禍。功有藉也。璋遂強臣稱病。留傳舍。亟遣馳詣希儀。所告變。陳猛反狀。恐連及。願擒猛自效。希儀許之。遂陽使追臣返。以其事白。鎮喜。乃不備璋。岑猛子邦彥守工堯隘。璋以姻故。遣兵千人助之。實爲間。邦彥欣然納之。璋則遣報希儀曰。已遣千人爲內應矣。衣別有識。幸勿加戮。希儀許之。及戰。歸順兵先呼敗。惑衆。田州兵驚潰。希儀斬邦彥。猛欲奔。璋使人招之曰。事急矣。願主君走歸順。三四夕可達安南。再圖興復耳。猛倉卒無所之。又以姻故。遂佩印走歸順。璋佯涕泣迎之。處猛別

館盛供張。列侍美女。地遠僻。左右無一田州人。璋日詭猛曰。天兵退矣。又曰。天兵聞君走交南。不敢輒加兵。交南境遣使詣督府請進止也。猛喜不疑。胡堯元與諸將見希儀已破隘。欲攘其功。頗聞猛走匿璋所。遂以兵萬人擣歸順。璋亟遣人持牛酒犒師境上。而自來見諸將頓首謝曰。猛敗。昨越歸順。欲走交南。璋邀擊之。猛日被流矢。南走不知所之。急之恐入交南。連逆賊爲變。幸緩五日。當捕致之。堯元等許之。璋歸復詭猛曰。天兵已退。非陳奏事不白。爲君草封事。令人上之。如何。猛曰。固所願也。乃爲疏。令猛出印印之。璋得知猛寘印所。乃置酒賀猛。樂作。持鵠酒一盃。獻曰。天兵索君急。不能庇也。請自爲計。猛大怒罵曰。悔墮此老奸計也。遂飲鵠死。璋斬其首。并所佩印。遣使問道馳詣軍門上之。諸將聞之。引還。猛三子。長爲邦彥。旣敗死。次邦佐。邦相出亡。邦彥側室子曰芝。方襁褓。匿民間。諸惡目韋好。陸綬。馮爵俱被擒斬。惟盧蘇。王受未授首。捷聞。論功行賞。鏐請置流官治之事。下兵部覆奏從之。

六年五月。盧蘇。王受反。有自右江來者。言岑猛實不死。糾安南莫氏入寇。陷思恩矣。藩省旦暮當不保。於是靖江諸宗室倉皇出奔。人情惶懼。藩臬諸司素銜姚鏐者。又倡言猛實未死。鏐爲歸順所給。御史石金聞之。遂劾鏐攘勦無策。輕信罔上。圖田州不得。并思恩而失之。帝大怒。落鏐職。以王守仁代之。先是。鏐上言田州遺黨復叛。再乞集兵勦捕。軍興。錢穀相應。議處。帝命動支廣東司府帑庫金錢。不得自分彼我。致誤事機。至是。守仁未至。鏐候代。偵知思恩未陷。欲徵兵擒蘇等自贖。乃徵廣西諸司議事。而銜鏐者給郵吏發檄交誤。各以檄誤不至。鏐竟不獲集兵而去。

七年春正月。王守仁將至田州。調集湖兵數萬人南下。諸土目皆憚之。守仁乃自弢晦。示以無事。及抵南

甯見盧蘇、王受勢熾，度不可卒滅，乃使人招諭，使來輸罪。會有造浮言誑蘇，受欲取其賄者，蘇受疑懼，不即來。守仁遣使慰諭之，且與之誓。蘇受言來見，必陳兵衛，又欲易軍門左右，祇候皆盡以田州人。守仁許之。蘇受乃期日來見，盛兵自衛。守仁數罪箠之。蘇受裹甲受箠，已而諭歸，俟命。守仁乃上疏言：思田久苦兵革，民間已不勝，况田州外捍交趾，縱使克之，置流官，兵弱財匱，恐生他變。岑氏世有功，治田州，非岑氏不可。請降田州府爲田州官，猛子邦相爲判官，以盧蘇、王受爲巡檢，別立思恩府，設流官統之。帝皆從焉。乃命邦相歸田州，盧蘇等各之官。田州以甯守仁復薦，布政使林富爲巡撫，都御史張佑爲總兵官，鎮廣西。守仁乃往南甯。三月，王守仁檄盧蘇、王受等攻斷籐峽八寨盜賊，盡平之。兩江底定，守仁上言盛稱蘇受等功，大獲賞賚。時兵部侍郎張璫及桂萼言：守仁處田州，非是，上頗疑之。

十三年秋九月，巡檢盧蘇殺田州判官岑邦相。先是，林富代王守仁爲提督，奏言：思恩改設流官二十年，兵不得罷，田州決非流官所能控禦，竟主守仁前議，降田州爲州治，以邦相爲判官，命副總兵張佑鎮之。許以三年而代。時邦相年十五六，張佑兒子畜之。盧蘇自矜功大，專橫，邦相不能平，遂有隙。會張佑將代去，望邦相厚賂己，邦相賄之，不滿意。佑遂與盧蘇比，欲沮奪邦相，乃購得邦彥子芝，育之別所。邦相時時欲殺芝，佑不果代，留鎮。庇芝得免，尋佑中邦相毒卒。芝奔梧州，督府都御史陶諧畜之。至是，盧蘇遣其黨刺邦相不克，邦相與土目羅玉等伐盧蘇。事覺，蘇伏甲擒斬羅玉，遂劫諸土目，攻邦相，執而殺之，燔其屍。賂陶諧言：邦相病死，無後，乃立芝，遣歸田州。於是猛仲子邦佐爭立，而鄰府諸土官皆不平。盧蘇弑主也，合兵助邦佐攻田州，入之。蘇走免，亂復大作。兩江震駭，諧遣人諭諸土官曰：邦相實病死，盧蘇何與，而爾

等自相殘害也。亡何，諧以憂去。都御史潘旦、蔡經相繼代，皆曰：「思田苦兵革久矣，朝廷今復以盧蘇故，興問罪之師，征伐當何時已乎？」朝議下核實。副使葉俛、參議陳大珊曰：「盧蘇稱亂弑主，罪安可盡赦也。縱宥之不誅，當以上聞，令立功贖罪耳。」經不聽。上言：「邦相不孝，奪其母田，又虐殺其部下，盧蘇因衆怨殺之。朝廷遂置蘇不問，仍官芝等如故。」於是兩江士官聞之，莫不解體。

谷應泰曰：「田州爲粵西南徼，蠻瘴荒裔，不足重輕。後失安南，議者稍稍視田州爲南海外屏，欲寄重焉。岑氏世守田州，自宏治六年，岑猛父膏逆，鎭身逼強鄰，間關奔走，存邢遷衛，朝廷視猛恩至渥也。至十八年，岑濬始懸首藁街。正德中，岑猛始克復舊業，黎子式微，重耳河水，猛身扞天朝，不忘舊德，分固應爾。而乃晉惠入絳，遽絕秦關，衛燬廬漕，坐觀齊亂，猛之單騎棄軍，仰藥逆旅，天亡之矣。然猛桀驁性成，反形未見，追兵四集，猶敕下勿交鋒，裂帛書冤，上狀軍門，亦云哀已。而雲夢陳兵，決收韓信，陳平奉詔，竟斬舞陰。姚鏌輕於討賊，重於受降，信於請兵，疑於對壘，猛旣冤死，不白，鏌亦功名不終，猛負國恩而身殞，鏌貪軍功而官奪，天道好還，適相當也。至盧蘇，王受之反，釁本姚鏌，實又似由新建，蓋新建憐田恩，厭苦兵革，曲撫盧王，立岑氏之後，設田州之官，陰假戰功，陽羈蘇受，而所舉張佑貪賄比匪，種禍岑族，張佑旣隕，邦相之毒，邦相旋膏，蘇受之戈，沈王構惡，義真必棄關中，鍾鄧相傾，姜維幾反，蜀道新建寄託不終，識者微有憾焉。而繼佑來督者，陶諧也。邦相賊殺鎮臣，朝廷寢而不問，蘇受執殺州主，大臣陽言病亡，夫天南末郡，不知天子寵靈，式憑皆懸督府，張佑索裘不與，拘執唐侯，陶諧寶賂亟行，遂黨莒僕，處置舛錯，刑賞乖張，貽笑蠻方，損傷國體，君子知明綱不振，先在遠彝矣。要之姚鏌之非，在於捕反太急，而貽謀者索賄之盛，應

期。陶諧之罪。在於有賊不討。而貽謀者亦索賄之張佑。官務賄章。邊釁日急。故皇甫安邊。奏免墨吏。奉仙載寶。僕固稱兵。好利亡國。好色亡身。古今龜鑒。蓋不誣矣。

卷五十四

嚴嵩用事

嘉靖十五年冬十二月。以南京吏部尚書嚴嵩爲禮部尚書兼翰林院學士。時禮部選譯字諸生。嵩至。卽要貨賄。已而苞苴過多。更高其價。御史桑喬列其狀。請罷黜之。嵩乃疏辨求免。帝曰。卿所云。爲人臣於今日。率皆觀望禍福。必使人主孤立自勞。此言已盡。但盡心翼贊。以副簡任。不必復辭。嵩意得甚。給事中胡汝霖復劾其穢行。旣彰。招致論列。不得飾辭自明。以傷大體。帝乃令以後大臣被劾。宜自省修。勿得疏辨。嵩懼。益爲恭謹。以媚上。

十六年秋九月。禮部尚書嚴嵩劾應天試官品。罵文字不書名。大不敬。大學士夏言又謂策以戎祀爲問。多譏訕語。當寘於理。遂命官校逮繫典試官江汝璧。歐陽衢。下詔獄。其提調官孫懋。楊麒。何宏。沈應陽。俱命南京法司卽訊。同試官舒文奎等各行所在。巡按卽訊。貢士不得應試南宮。十一月。嚴嵩摘廣東試錄有體存故。可以厚本。用利故。可以明微。厚本故。可以合同。明微故。可以鼓舞等語。參錯不經。飛衛。紀昌。道遇交射。及黃郊。紫微。碧虛子之問答。詭異尤甚。且中庸。畢命二篇。不道口指。俱戾體格。帝怒。命監臨余光法司鞫問。提調陸杰。余鑑。監視蔣淦。鄒守愚。巡撫都御史鞫問。試官王本才等各巡按官鞫問。貢士不

得赴試南宮。

十七年夏五月。通州致仕同知豐坊上言。請復古禮。尊皇考獻皇帝廟號稱宗。以配上帝。下禮部集議。嚴嵩上言。萬物成形於秋。故王者秋祀明堂。以父配之。自漢武迨唐宋諸君。莫不皆然。主親親也。若稱宗之禮。則未有帝宗而不祔太廟者。恐皇考有所不寧。帝悅。已而嵩復阿上旨。請尊文皇帝稱祖。獻皇帝稱宗。上從之。乃尊太宗文皇帝爲成祖。皇考獻皇帝爲睿宗。配上帝。詔天下。詳更定祀典

十八年二月。景雲見。夏言。顧鼎臣以聞。嚴嵩請帝御朝。受羣臣賀。嵩乃作慶雲賦。及大禮告成。頌上之。詔付史館。帝南幸。嚴嵩從。賞賚優渥。與輔臣等。嵩以桑喬。胡汝霖。故慚且恨。因於帝前。以他事自白。且激怒帝。

十九年春正月。巡按雲南御史謝瑜上言。嚴嵩爲桑喬所劾。不自咎責。反謂贊議明堂。扈蹕南幸。爲諸臣所嫉。將以揚己功。激聖怒。箝衆口。且臣以嵩之可論。難以枚數。選擇字諸生。通賄無算。宗藩有所陳乞。每事徵索。故王府胥吏交代。動以千計。至於齋詔官役。去索重賄。旋索土物。收買內外童子。充斥家庭。豈宗伯大臣所爲乎。嵩不以此自省。而巧佞誣罔。何奸邪無賴至此也。不報。

二十年秋七月。交城王絕。輔國將軍表。相謀襲之。遣校尉任得貴至京。以黃白金三千兩賂嚴嵩。復賂儀制司令史徐旭。及王府科胥人。皆受焉。嵩乃題覆從之。東廠邏卒執其籍以聞。下法司問。受賂者皆戍邊。嵩無恙。旣而永壽共和王庶子惟熈。與嫡孫懷燿爭立。以白金三千賂嵩。亦受之。爲覆允。永壽莊僖王妃遣人擊登聞鼓奏訴。於是御史葉經劾嵩貪狀。乞賜敕正。嵩急歸誠於帝。帝憫之。乃曰。表相。惟熈。襲爵應

否。行所司勘之。嵩安意任事。勿以介意。

二十一年夏六月。大學士夏言罷。言與嚴嵩同鄉。稱晚進。以議禮驟貴。嵩謹事之。言不爲下。時嵩爲禮部尚書。初見寵信。欲入閣。而言阻之。遂有郤。會言坐失旨當罷。呼嵩與謀。而嵩已造上所幸秉一真人第。謀倚言。言覺之。囑所善者劾嵩。時上已心愛嵩。攻益力。上益憐之。上在西苑齋居。許入直。諸貴人得乘馬。言獨用小腰輿以乘。上怪之。勿言。會上不欲翼善冠。而御香葉巾。命尚方倣之製。沈水香爲五冠。以賜言。及嵩等。言密揭謂非人臣法服。不敢當。上大怒。嵩於召對日。故冠香葉。而冒輕紗於外。令上見之。上果悅。留嵩慰諭。甚至因泣訴。言見凌狀。上怒。卽下敕逐言。科道官以失職不糾。降調奪秩者七十三人。秋八月。以禮部尚書嚴嵩爲武英殿大學士。參預機務。仍掌部事。吏科都給事中沈良材。御史童漢臣等首論嵩奸污。不當乘君子之器。南京給事中王燁。御史陳詔等復論嵩。并及子世蕃同惡相濟。關通苞苴。動以千百計。嵩疏辨乞休。帝優詔百餘言慰留之。賜嵩銀記曰忠勤敏達。賜其家藏璽書之樓曰瓊翰流輝。奉玄之閣曰延恩堂曰忠弼。冬十月。給事中童漢臣。伊敏生。喻時等再上疏論嚴嵩。巡按四川御史謝瑜上言。堯舜相繼百四十年。誅四凶。而陛下數月之間。轉移之頃。四凶已誅其二。如郭勳。胡守中。而其二則張瓚。嚴嵩是也。請陛下奮乾斷。亟譴之。以快人心。於是嵩復上疏乞罷。帝慰諭留之。已而謝瑜。童漢臣俱以他事謫去。

二十二年夏四月。嚴嵩解部事。嵩旣入內閣。竊弄威柄。內外百執事有所建白。俱先白嵩許諾。然後上聞。於是副封苞苴輻輳其戶外。大學士翟鑾位望先嵩。而勢實不競。遂至不相能。給事中周怡上疏論之。語



多侵嵩。疏入。下獄。已而鑾以二子倖第。削籍去。秋九月。逮山東巡按御史葉經。廷杖死。初。經劾嚴嵩受表。柵。惟憶賂。嵩銜之。及經監山東鄉試。嵩摘試錄中有諷上語。激帝怒。逮之。至京。杖闕下死。布政使陳儒以下皆遠謫。自是中外益側目畏嵩矣。

二十二年秋八月。以吏部尚書許讚。禮部尚書張璧爲文淵閣大學士。嚴嵩事取獨斷。不相關。曰。讚論之。嵩乃上言。獨蒙宣召。於理未安。往歲夏言惡與郭勛同列。以致生隙。夫臣子比肩事主。當協恭同心。不宜有此嫌異。今諸閣臣凡有宣召。乞與臣同。如祖宗朝。蹇夏三楊故事。嵩蓋欲示厚同寮。且明言妬也。

二十四年夏五月。出南京吏部考功郎中薛應旂補外職。初。嚴嵩入內閣。南京給事中王燁首劾嵩。於是言者踵至。嵩恨之。是春。大計京官。嵩令所私尚寶丞諸傑。移書應旂。使黜燁。應旂執傑使。并其書白尚書張潤。欲以奏聞。潤止之。釋其使。而傑先爲南京兵部主事。有貪聲。於是尚書潤及都御史王以旂并黜之。常州守符驗故留臺御史也。亦在所黜。嵩乃嗾御史桂榮劾應旂以私怨黜本郡守。謫補外。十一月。許讚削籍去。十二月。復召夏言入閣。自嚴嵩入相。同事者多罷去。嵩獨相。以太廟工成。加太子太師。後帝微聞其橫。厭之。於是詔起夏言。言至。盡復其原官。且加少師。位在嵩上。言凡所擬旨。行意而已。不復顧問。嵩嵩亦唯唯。雖斥逐其黨。不敢救。心甚恨之。是時嵩子世蕃爲尚寶司少卿。通路遺。且代輸戶轉納錢穀。多所朘削。言知之。欲以上聞。嵩懼甚。挈世蕃詣言求哀。言稱疾不出。嵩賂其門者。直走言榻下。及世蕃長跪泣謝。言遂置不發。嵩父子愈恨之。會御史陳其學以鹽法論都督陸炳。言擬旨令陳狀。炳等造言請死。有所進橐。皆長跪而解。嵩知之。日與謀傾言。言不悟。上左右小璫來。言恆僕視之。詣嵩。必執手延坐。持黃

金置其袖中。故璫輩爭好嵩而惡言。上或使夜瞰嵩。言言多酣寢。嵩知之。每夜視青詞草。初言與嵩俱以青詞得幸。至是言已老倦思。令幕客具草。不復簡閱。每多舊所進者。上輒抵之地。而左右無爲報言。嵩則精其事。愈得幸。言以是益危。

二十六年秋七月。以尙寶司少卿嚴世蕃爲太常寺少卿。仍掌尙寶司事。世蕃納賄日盛。嵩憚夏言知之。乃疏遣世蕃歸。帝特命馳驛往還。世蕃益橫。

二十七年春正月。夏言罷。嵩既忌言。都督陸炳亦怨言持己。陰比嵩圖之。會都御史曾銑議復河套。言主之。而嵩則極言其不可。語頗侵言。及言請給誓劍。得專僂節帥以下。上亦稍稍惡之。會澄城山崩裂。又京師大風。上益疑。以套議問嵩。嵩因詆言擅權自用。及退。復上疏劾銑。開邊起釁。言雷同誤國。并自求去甚力。上溫旨留嵩。而切責言。於是吏部尙書聞淵。禮部尙書費案。左都御史屠僑。皆謂言誤國。帝乃命緹騎捕銑至京。因盡奪言師傅。俾以尙書致仕。三月。殺都御史曾銑。銑既被逮。嚴嵩復令仇鸞訐之。刑部侍郎詹瀚。左都御史屠僑。錦衣衛都督陸炳。阿嵩意。謂銑行賄。夏言論斬。棄西市。冬十月。殺大學士夏言。先是言既歸。舟至丹陽。復就逮至京。上疏極陳爲嚴嵩所陷。帝不聽。刑部尙書喻茂堅等據曾銑律以請。而謂言實當八議。所謂議貴議能者。帝怒。責茂堅等阿附言。值居庸報警。嵩復以開釁力持。竟坐與銑交通律。棄西市。言既死。大權悉歸嵩矣。十二月。給事中厲汝進劾嚴嵩及子世蕃奸惡。謫爲典史。尋以大計削籍。

二十八年五月。杖給事中沈束於闕廷。初。大同總兵周尙文屢立邊功。卒。其家奏求卹典。不報。沈束上疏。

請卹尙文。語侵嚴嵩。嵩恚。乃下束法司訊鞫。法司論贖刑上。嵩恨未泄。仍予廷杖。長繫鎮撫司。二十九年夏六月。以仇鸞爲宣大總兵。鸞坐廢已久。以重賂嚴世蕃得之。八月。加嚴嵩上柱國。嵩力辭。謂人臣無上。引郭子儀不敢當尙書令爲比。帝悅。進嚴世蕃爲太常寺卿。仍行尙寶司事。俺答薄都城。令人持書入朝求入貢。言多悖慢。上召嚴嵩及禮部尙書徐階於西苑曰。事勢至此。柰何。嵩曰。此窮寇乞食耳。毋足患。帝曰。何以應之。嵩無以對。乃命階集羣臣議。司業趙貞吉抗言其不可。帝壯之。予金五萬募戰士。而敕中無督戰語。不得統攝諸將。因謁嵩。嵩故與貞吉有隙。辭。貞吉怒。會通政趙文華趨入謂曰。公休矣。天下事當徐議之。貞吉愈怒。罵曰。汝權門犬。何知天下事。叱守門者。嵩大恨。已而貞吉單騎出城。徧諭諸營將。諸將皆感奮。而大將軍仇鸞獨難之。比復命。嵩謂貞吉狂誕。且追論其申理周尙文。沈束非是。廷杖謫嶺南。殺兵部尙書丁汝夔。初。俺答薄都城。嵩授汝夔計。謂地近喪師。難掩。當令諸將勿輕戰。寇飽自去。諸將固怯戰。輒相謂曰。有禁勿戰。故民間歸罪汝夔。及被逮。嵩恐露前畫。給曰。毋慮。吾爲若地。汝夔信之。弗自辨。臨刑。乃大呼曰。賊嵩誤我。遂棄市。冬十二月。帝以俺答故。詔羣臣。令人人盡言。刑部郎中徐學詩上言。外攘之備。在急修內治。內治之要。貴先正本原。今大學士嵩位極人臣。貪瀆無厭。內而勛貴之結納。外而羣小之趨承。輔政十年。日甚一日。釀成敵患。其來有漸。而嵩泄泄自得。謬引佳兵不祥之說。以謾清問。縱子世蕃受失事李鳳鳴金。使任薊州總兵。又受郭琮金。使補漕運。私徒南還輜車數十乘。駟車四十乘。潞河樓船十餘艘。貯載而歸。悉假別署封識。以誑道路。嵩謀已得。如君父何。今士大夫語嵩父子。無不嘆憤。而莫有一人敢抵牾者。誠以內外盤結。上下比周。積久而勢成也。世蕃狡鷲。擅執父政。凡

諸司奏請稍涉疑畏者。必關白然後上聞。蓋嵩之機械足以先發制人。利勢足以廣交耳目。乘機構隙。足以示威脅衆。文詞便給。足以飾非強辨。精神敏給。揣摩巧中。足以趨避利害。而彌縫闕失。私交密會。令色脂言。足以結歡當路。而緘奪人口。故凡諸論嵩者。嵩雖不能顯論之於正言直指之時。亦必托事假人。陰中之於遷除考察之際。如給事中王燁、陳愷、御史謝瑜、童漢臣等。當時已蒙聖恩寬宥。今則安在。天下之人視嵩父子如鬼如蜮。不可測識。痛心疾首。敢怒而不敢言者。誠畏其陰中之也。臣請亟罷嵩父子。以清本源。疏入。帝謂其乘間報復。下鎮撫司拷訊。斥爲民。

三十年春正月。杖錦衣衛經歷沈鍊於闕廷。初。俺答薄都城求通貢。趙貞吉以爲不可。鍊在衆中申貞吉指不休。吏部尙書夏邦奇目之曰。何小吏而言若是。鍊曰。大吏弗言。故小吏言之。已而上疏請以萬騎護陵寢。萬騎護通州軍儲。而合勤王師。邀擊其惰歸。必大捷。是時。大學士嵩用事。數寢格邊檄。不以上聞。故鍊書奏不報。鍊乃抗疏言。嵩受國重任。貪婪愚鄙。不聞諮諏方略。治國安邊。惟與子世蕃爲全家保妻子計。以朝廷之賞罰爲己出。故人皆計嵩愛憎。不知朝廷恩威。因歷數其十大罪。請戮之以謝天下。詔以鍊詆誣大臣。廷杖之。謫田保安。三月。大計京官。嚴嵩授指吏部。中傷善類甚衆。以徐學詩劾己。削籍。并黜其兄中書舍人應豐。吏部奏上。帝察其枉。留之。然亦不問。

三十一年冬十月。御史王宗茂疏論嚴嵩負國大罪八。帝謂其狂率。謫平陽縣丞。三十二年春正月朔。日食。陰雨不見。巡按御史趙錦請罷嵩以應天變。疏上。帝方以供奉青詞悅嵩。命逮繫錦衣獄。久之。削籍爲民。兵部員外郎楊繼盛上疏論嚴嵩十大罪。五奸略曰。方今在外之賊。惟俺答。

在內之賊惟嚴嵩。賊有內外。攻宜有先後。未有內賊不去。而外賊可除者。故臣請誅賊嵩。當在勦絕俺答之先。嵩之罪惡。徐學詩、沈鍊、王宗茂等論之已詳。然皆止言貪污之小。而未嘗發其僭竊之大。去年春。雷久不聲。占云。大臣專政。夫大臣專政。孰有過於嵩者。又冬日下有赤色。占云。下有叛臣。凡心背君者。皆叛也。夫人臣背君。又孰有過於嵩者。如四方地震。與夫日月交食之變。其災皆感應賊嵩之身。乃日侍左右而不覺。上天警告之心。亦恐怠且孤矣。不意陛下聰明剛斷。乃甘受嵩欺。人言不信。雖上天示警。亦不省悟。以至於此。臣敢以嵩之專政叛君十大罪爲陛下陳之。我太祖高皇帝詔罷中書丞相而立五府九卿。分理庶政。殿閣之臣。唯備顧問。視制草。故載諸訓有曰。建言設立丞相者。本人凌遲。全家處死。及嵩爲輔臣。儼然以丞相自居。挾一人之權。侵百司之事。凡府部題覆。先面稟而後敢啓。藁嵩之直房。百官奔走如市。府部堂司。嵩指使絡繹不絕。一或少違。顯禍立見。及至失事。又駕罪於人。是嵩無丞相之名。而有丞相之權。有丞相之權。而無丞相之責。壞祖宗之成法。一大罪也。權者。人君所以統御天下之具。不可一日下移。嵩一以票本自任。遂作威福。用一人。卽先謂曰。我薦之也。罰一人。則又號於衆曰。此得罪於我。故報之也。羣臣感嵩。甚於感陛下。畏嵩。甚於畏陛下。竊君上之大權。二大罪也。人臣善則稱君。過則歸己。今陛下苟有一善。嵩必令子世蕃傳於人曰。上故無此意。我議而成之。將聖諭及嵩所進揭帖刻板刊行爲書。名曰嘉靖疏義。欲使天下後世謂陛下所行之善。盡出於彼。而後已。掩君上之治功。三大罪也。陛下之令。嵩票本。蓋取君逸。臣勞義也。嵩何所取。而令子世蕃代票。又何所取。而約諸義子趙文華等羣會而擬題疏。方上。滿朝紛然。旣下。若合符契。如錦衣衛經歷沈鍊劾嵩疏。發大學士李本擬旨。本卽叩之世蕃。乃同趙

文華自擬以上。此人所共知也。嵩既以臣而弄君之權。世蕃復以子而弄父之柄。京師有大丞相小丞相之謠。縱姦子之僭竊。四大罪也。邊事廢壞。皆原於功罪賞罰之不明。嵩爲輔臣。欲令孫冒功於兩廣。故置其表姪歐陽必進爲總督。朋奸比黨。將長孫嚴效忠。冒功奏捷。遂陞鎮撫。效忠告病。嚴鵠襲代。加陞錦衣千戶。效忠嚴鵠皆世蕃豢養乳臭子。冒朝廷之軍功。五大罪也。仇鸞總兵甘肅。以貪虐論革。世蕃乃受鸞重賄。薦爲大將。後知陛下疑鸞。遂互相誹謗。以掩初迹。是通寇者逆鸞。而受賄引用鸞者嵩與世蕃也。進不肖。蒙顯戮。引悖逆之奸臣。六大罪也。俺答犯內深入。兵法擊其惰歸。嵩乃曰。京邊不同勢。敗於邊可掩。敗於京不可掩。且俺答飽自退耳。故丁汝夔傳令不戰。及汝夔臨刑。而後知爲嵩所給。誤國家之軍機。七大罪也。刑部郎中徐學詩以論劾嵩。世蕃革任爲民矣。又於考察京官之時。罷其兄中書舍人徐應豐。戶科給事中厲汝進以劾嵩。世蕃降爲典史矣。嵩於考察外官之時。逼吏部削汝進籍。夫考察。巨典也。陛下持之。以激厲天下之人心。賊嵩竊之。以中傷天下之善類。亂黜陟之大柄。八大罪也。府部之權。皆撓於嵩。而吏兵二部。尤大利所在。將官旣納賄於嵩。不得不剝削乎軍士。有司旣納賄於嵩。不得不濫取於百姓。皇上雖累加撫卹。豈足以當嵩殘虐之害。臣恐天下之患不在塞外。而在域中。失天下之人心。九大罪也。先朝風俗淳厚。近自逆瑾用事。始一少變。至嵩爲輔臣。守法度者。以爲固滯。尚巧滑者。以爲通材。勵節介者。以爲矯激。善奔走者。以爲練事。風俗之壞。未有甚於此者。壞天下之風俗。十大罪也。嵩有十大罪。昭人耳目。以陛下之神聖。而若不知者。蓋有五奸。以濟之。嵩知知陛下之意向者。莫過於左右侍從。厚於賄結之。聖意所愛憎。嵩皆預知。以得遂其逢迎之巧。是陛下之左右皆嵩之間諜。其奸一通政司。納言之官。嵩

令義子趙文華爲之。凡疏到，必有副本送嵩。世蕃先閱而後進，早爲彌縫。是陛下之納言，乃嵩之鷹犬。其奸二。嵩既內外周密，所畏者廠衛之緝訪也。嵩則令世蕃籠絡廠衛，締結姻親。陛下試詰嵩所娶者誰女，立可見矣。是陛下之爪牙，乃嵩之瓜葛。其姦三。廠衛既已親矣，所畏者科道言之也。嵩於進士之初，非親知不得與中書、行人之選。知縣、推官，非通賄不得與給事、御史之列。是陛下之耳目，皆嵩之奴隸。其姦四。科道雖入其牢籠，而部臣如徐學詩之類，亦可懼也。嵩又令子世蕃將各部之有才望者，俱網羅門下。各官少有怨望者，嵩得早爲斥逐。是陛下之臣工，多嵩之心腹。其奸五。夫嵩之十罪，賴此五奸以濟之。五奸一破，則十罪立見。陛下何不忍割一賊臣，顧忍百萬蒼生之塗炭乎？陛下聽臣之言，察嵩之奸，或召問二王，令其面陳嵩惡，或詢諸閣臣，諭以勿畏嵩威，重則置之憲典，以正國法，輕則諭令致仕，以全國體。內賊去而後外賊可除也。疏奏，帝怒其引用二王，命繫錦衣獄。詰訊主使者，繼盛曰：「盡忠在己，豈必人主使乎？」又問引用二王故，繼盛大言曰：「奸臣誤國，非二王誰不畏嵩者？」獄具，杖百，送刑部。尚書何鼐受嵩意，欲坐以詐傳親王令旨。郎中史朝賓曰：「疏中但云二王亦知嵩惡，原無親王令旨。三尺法豈可誣也？」嵩怒，降朝賓爲高郵判官。侍郎王學益助成其說，竟坐絞繫獄。二月，逮兵部郎中周冕，下詔獄。初，楊繼盛劾嚴嵩父子言及歐陽必進竄嚴效忠名，冒功濫擢事，必進上疏辨，請下兵部查覈。世蕃乃自爲題草，遣人遺武選司郎中周冕，欲冕依草上覆。冕奏之，略曰：「臣職司武職，敢以冒濫軍功一事爲陛下陳之。按二十七年十月，據通政司狀送嚴效忠年十有六，考武舉不第，志欲報效。本部資送兩廣聽用。次年，據兩廣總兵平江伯陳圭及都御史歐陽必進題瓊州黎寇平，遣效忠奏捷，卽援故事授錦衣衛鎮撫。無何，效忠病廢，嚴

鵠以親弟應襲。又言效忠前斬賊首七級。例宜加陞。遂授千戶。問效忠爲誰。曰嵩之厮役也。鵠爲誰。曰世蕃之子也。不意嵩表率百僚。而壞朝亂紀。一至於此。今蒙明旨下本部查覈。世蕃猶私創覆草。架虛遺臣。欲臣依草覆奏。天地鬼神照臨在上。其草見存。伏望聖明特賜究正。使內外臣工知有不可犯之法。疏入。帝以冕爲挾私。逮繫詔獄。削籍。嚴嵩以十五載考滿。錄其二子。又以京師外城完。嵩與有閱視勞。遷世蕃爲工部左侍郎。嵩辭。帝諭以修城贊玄。實爲忠首。不允。

三十三年春。倭寇浙江。工部侍郎趙文華請禱滄神殺賊。遂遣文華爲主事。有貪名。出爲州判。以賄嵩得復入爲郎。未幾改通政。與嵩子世蕃比周。嵩目爲義子。不二年。擢工部侍郎。至是往浙。凌轢官吏。搜括財物。公私苦之。

三十四年冬十月。殺兵部員外楊繼盛。初。仇鸞旣誅。上思繼盛言。自謫所。月餘。遷主事。隨改兵部武選司員外。繼盛嘗感激思報。妻張氏曰。公休矣。一鸞困公幾死。今相公嵩父子。百鸞也。公何以報爲。休矣。且歸耳。繼盛不聽。密具疏。疏成。上方怒。逮諸言官。乃更越十五日而齋。齋三日乃上。竟得罪。繼盛每出朝。審諸內臣士庶夾道擁視。共指曰。此天下義士。又指其三木竊歎曰。奈何不以此囊嵩頭。司業王材詣嵩曰。人言籍籍。謂繼盛且不免。公不憂萬世耶。嵩曰。吾行當救之。令其子世蕃謀之。胡植。鄢懋卿。懋卿曰。此養虎自遺患也。植亦言不可。嵩意遂決。乃以張經。李天寵。疏覆奏。附繼盛於尾。上覽之。謂江南釀寇遺患。遂下旨行刑。是歲論大辟當刑者凡百餘人。詔決九人。而繼盛與焉。將刑。張氏疏言。臣夫諫阻馬市。預伐仇鸞。聖旨薄謫。旋因鸞敗。首賜湔雪。一歲四遷。臣夫銜恩圖報。誤聞市井之言。尙狃書生之見。妄有陳說。荷上



不卽加戮。俾從吏議杖後入獄。割肉二觔。斷筋二條。日夜籠檻。備諸苦楚。年荒家貧。臣紡績供給。兩賜奏。俱蒙特宥。今混入張經疏尾。奉旨處決。儻以罪不可赦。乞將臣梟首以代夫命。夫生一日。必能執戈矛禦魍魎。爲疆場效命之鬼。以報陛下。奏入。爲嵩所抑。不得達。蓋殺諫臣自此始。由是天下益惡嵩父子矣。

三十五年春正月。趙文華自江南還京。與吏部尚書李默構隙。知默與嵩異。疏劾之。摘其部選策題有漢武征四夷而海內虛耗。唐憲復淮蔡而晚業不終。爲謗訕。上怒。收繫獄拷訊。竟死獄中。嵩德文華。擢爲工部尚書。加太子太保。二月。以大學士李本攝吏部事。本疏諸臣百十有三人。別爲三等。其上二十八人。吳鵬、趙文華、嚴世蕃等。其中七十人。鄒懋卿、徐履祥等。其下十五人。宜斥免。乃葛守禮、艾守淳等多可大用者。時論非之。十一月。逮總兵俞大猷。下錦衣衛獄。大猷不善滑刺。世蕃怒其不附己。授胡宗憲意。論其失事故。有是逮。逮至。大猷假貸三千金。餽世蕃。得不死。罷職。發大同立功。時有建議薊州增設戶部侍郎督糧練兵者。嚴嵩佯以推趙貞吉。且召之飲酒。詭曰。是行非公不可。貞吉曰。人臣之義。死生以之。酒半。貞吉徐曰。今戶侍督糧。督京運乎。抑民運乎。若二運已有職掌。徒增擾耳。况兵之不練。其過宜不在是。縱十戶侍出。無益也。嵩作色而罷。嗾其黨張益劾之。奪官去。十二月。賜大學士嚴嵩免朝賀。惟入直西苑。仍賜腰輿。先是。賜得乘馬入禁。至是。復加恩寵。爲異數云。

三十六年冬十月。楊順路楷殺前錦衣衛經歷沈鍊。初。鍊旣編保安。卽子身至里。長老問知鍊狀。咸大喜。遣其子弟從學。鍊稍與語。忠義大節。乃爭爲鍊。詈嵩。以快鍊。鍊亦大喜。日相與詈嵩。父子以爲常。嘗束芻爲偶人三。目爲林甫、檜及嵩。而射之。語稍稍聞。嵩父子銜之。而侍郎楊順來爲總督。故嵩黨也。應州之役。

多殺邊民掩敗。鍊怒讓之。且爲樂府以誚順。順大恚。以其私人經歷金紹魯。指揮羅鎧走世蕃所白之。且謂鍊結死士。擊劍習射。將以間而取若父子。世蕃曰。吾固知之。卽以屬巡按御史李鳳毛。鳳毛謬爲謝曰。有之。竊陰已解散其黨矣。鳳毛得代歸。而御史路楷來。又嵩黨也。世蕃爲酒壽楷。而使謂順曰。幸爲我除吾瘍。楷至。則與順合筴捕諸白蓮教通叛者。竄鍊名籍中。以叛聞。下兵部議。尙書許論不爲申理。嵩竟殺之。籍其家。嵩乃予順一子錦衣千戶。楷遷太常卿。順猶怏怏曰。丞相猶有所不足乎。謀之楷。復取鍊二子杖殺之。併繫其長子襄。順楷敗。乃得脫。十二月。趙文華罷。文華自浙歸。私行珍寶於嵩夫婦及世蕃。至入內室叩首嵩妻。嵩妻勞苦文華。謂相公尙不能爲郎君易腰帶耶。兼以李默故。嵩亟稱文華於帝。進位尙書。躡加太子太保。然文華得寵眷。乃稍欲結知帝。不稟嵩命。一日密進藥酒。方言授之。仙飲可不死。獨臣與嵩知之。帝曰。嵩有是方。不奏。乃文華奏我。嵩聞之。大懼且恨。立召文華問之曰。若何所獻。對曰。無有。嵩取疏示之。文華慚頓首謝罪。嵩怒。不令起。呼左右拽出。令門者毋得爲文華通。文華日憂懼。不知所出。從世蕃乞憐。爲白夫人。夫人以其兒也。憐之。一日嵩休沐。諸義兒及世蕃咸候起居。置酒堂上。嵩夫人上坐。義兒及世蕃侍列。文華遙望不得入。乃曲賂左右。伏軒櫺下。酒中夫人曰。今日舉家在座。何少文華。嵩嘻曰。阿奴負人。那得在此。夫人因宛轉暴白。嵩色微和。文華竊望見。遽走入。伏席前涕泣。嵩不得已。遂留侍飲。然意未慊也。又文華初賂世蕃金絲幕一具。其姬二十七人皆寶髻。一世蕃以爲薄。恨之。乃爲疏草使上。引疾歸。帝從之。而是時帝方修玄。以其疏中有病語。怒削其職。子戍邊。

三十七年三月。給事中吳時來上疏劾嚴嵩輔政十二年。引用匪人。邊事日壞。令其子世蕃入直。干預國

政窺覘幾微。以市私恩。引其親萬寀爲文選郎中。方祥爲職方郎中。比周爲奸。公行賄賂。進退一人。行止一事。必關白世蕃。不論賢否是非。唯視所入多寡。如趙文華南還。餽遺數萬。猶爲未足。而授草引疾。張經被逮。行金五千。及聖斷不貸。而爲治裝賻卹。王汝孝失律。以三千而得遣戍。蔡克卿撫淮陽。以三千而轉地卿。楊順誤國。而三蔭其子。吳嘉會修邊。侵冒而驟遷三官。邊事之不振。由於軍民之困窮。軍民之困窮。由於上官之貪縱。上官之貪縱。由於謀國之匪人。拔本塞源之喻。願皇上察之。主事張翀。董傳策亦交章論之。俱下獄。廷杖。謫戍嶺南。

三十八年夏五月。逮總督侍郎王忬。下獄論死。嚴嵩以忬愍楊繼盛死。銜之。忬子世貞。又從繼盛遊。爲之經紀其喪。弔以詩。嵩因深憾忬。嚴世蕃嘗求古畫於忬。忬有臨幅類真者以獻。世蕃知之。益怒。會灤河之警。鄒懋卿乃以嵩意爲草授御史方輅。令劾忬。嵩卽擬旨逮繫。爰書具刑部。尙書鄭曉擬謫戍。奏上。竟以邊吏陷城律棄市。

三十九年夏六月。以都御史鄒懋卿總理天下鹽運。懋卿益通賄無虛日。御史林潤劾其貪冒五罪。懋卿疏辨不問。

四十年春正月。以萬壽宮災。命大學士徐階。工部尙書雷禮與工重建。先是。嚴嵩在內閣。凡御札下問。辭旨深奧。西苑玄修。聖躬臥起不常。外廷得失。時厪於懷。內侍傳出。或早或暮。嵩毫而智昏。多瞠目不能解。世蕃一見躍然。揣摩曲中。據之奏答。悉當上意。又陰結內侍。纖悉馳報。報必重賚。每事必先有以待。上益喜。蓋上不能一日亡嵩。嵩又不能一日亡其子也。專政旣久。諸司以事請裁。嵩必曰。與小兒議之。甚曰。與

東樓議之。東樓世蕃別號也。世蕃益自恣。一時無行之士、債帥墨吏、羣然趨之。嵩妻歐陽氏嘗語嵩曰：「不記鈴山堂二十年清寂耶？」嵩甚愧之。馭世蕃尤嚴。歐陽氏卒，世蕃當護喪歸。嵩上言：「臣老無他子，乞留侍。」許之。以孫鵠代行。世蕃因大佚樂，干預各司事如故。然不得入直房代議。問飛札走問，則世蕃方擁諸姬狎客，徵逐胡盧不甚了了，亦不能得當如往時。中使守直房，迫促嵩引領待片紙，不得至。乃自以意對。既至，追還復改。大抵故步皆失，上不懌。頗聞世蕃淫縱，心惡之。會方士藍道行以扶鸞見得幸，上以爲神。一日從容問輔臣賢否。道行遂詐爲箕仙對，具言嵩父子弄權狀。上曰：「果爾，上玄何不殛之？」詭曰：「留待皇帝正法。」上默然。適萬壽宮災，宮在西苑。上自壬寅宮變，卽移於此，不復居大內。忽火作，乘輿服御皆燬。上暫居玉熙宮，隘甚。邑邑不樂。廷臣請還大內，上以列聖晏駕於此，不報。嵩請徙南內，故英宗幽錮所也。大不樂。次相徐階與尚書禮疏并力營新宮，上喜報允。自是凡軍國大事悉諮之。階間有及嵩者，不過齋醮符籙之類而已。十二月，吏部尚書吳鵬罷。鵬嚴嵩黨也。先是御史耿定向劾其六罪，故罷。嵩復薦所親歐陽必進代之。未久，亦勒歸。進禮部尚書袁煒，太子太保，入閣參預機務。時帝漸有疑嵩意，密諭徐階舉堪輔政者。階密奏曰：「人君以論相爲職，陛下斷自宸衷，則窺伺陰阻之私自塞矣。」帝從之。遂有是命。四十一年三月，萬壽宮成，加大學士徐階少師，任一子袁煒少保。嵩加祿百石而已。五月，嚴嵩罷，猶給歲祿。繫其子世蕃詔獄。以御史鄒應龍爲通政司參議。初，嵩見張璠、夏言以言禮驟貴，乃從與獻。帝稱宗祔太廟，眷遇日隆。人言不復入。自徐學詩、王宗茂、楊繼盛、沈鍊、吳時來、張翀、董傳策或死或戍，縉紳側目不敢言。至是，徐階日親用事，廷臣多知之未發。御史鄒應龍欲具疏，一夕夢出獵，見一高山，射之不中。

東有培壘樓。其下甚壯。樓俯平田。有米草覆其上。一注矢。拉然醒而悟曰。此小兒東樓之兆也。遂上疏劾世蕃。數其通賄賂行諸不法狀。乞置於理。因及嵩植黨蔽賢。溺愛惡子。且曰。如臣言不實。願斬臣首懸之藁竿。以謝世蕃父子。帝覽之。心動。命嵩致仕。乘傳去。而下世蕃於理。擢應龍。嘉其敢言。世蕃因行金內侍云。鄒應龍疏皆藍道行泄之。帝怒。并逮道行。鄒懋卿。萬案復私致道行。許以金。令其委罪徐階。則無事矣。道行大言曰。除貪官。自是皇上本意。糾貪罪。自是御史本職。何與徐閣老事。懋卿案懼。乃囑法司量坐世蕃。贓銀八百兩。擬罪上請。於是戍世蕃雷州衛。子嚴鵠。嚴鴻。及其爪牙羅龍文。牛信等。分戍邊遠衛。家人嚴年錮獄。追贓。年最黠惡。卽士大夫所呼爲蓼山先生者也。上猶以嵩故。特宥其孫鴻爲民。嵩旣去。上追思嵩贊玄功。意忽忽不樂。諭徐階欲遂傳位。退居西內。專祈長生。階極言不可。上曰。卿等卽不欲違大義。必天下皆仰奉君命。闡玄修仙。乃可。嚴嵩已退。伊子已伏罪。敢有再言同鄒應龍者。俱斬。嵩知上意已動。仍密賂左右。發道行怙寵招權諸奸利。道行亦下獄論死。六月。御史鄭洛劾大理卿萬案。刑部侍郎鄒懋卿。太常少卿萬虞龍。皆朋比奸賊。不職。案懋卿罷。虞龍降調。九月。給事中趙灼劾工部侍郎劉伯躍。刑部侍郎何遷。右通政胡汝霖。光祿少卿白啓常。副使袁應樞。給事中沈瀄。劾湖廣巡撫都御史張雨。給事中陳瓚。劾諭德唐汝楫。國子祭酒王材。俱罷去。伯躍女適嚴嵩之甥。應樞。嵩壻。遷撫江西時。厚斂遺嵩父子。汝霖。雨。貪肆不簡。啓常匿喪。遷光祿。入世蕃幕。至以粉墨塗面爲歡笑。汝楫。吏部尙書龍之子。以父事嵩得及第。世蕃弟畜之。與材俱出入臥內。交通請託。至是。士論大快之。

四十二年夏四月。嚴嵩具奏起居。并進祈鶴文及各宗祕法。上優詔答之。仍賜銀幣。始嵩之致仕歸也。至

南昌。值聖誕。卽鐵柱觀。延道士藍田玉等爲上建醮。玉自言能書符召鶴。嵩試之。良驗。會上遣御史姜儆。王大任訪祕法。嵩乃索玉所藏諸符籙以上。久之。疏言臣年八十四。惟一子世蕃。及孫鵠。俱赴戍千里之外。臣一旦先狗馬填溝壑。誰可託以後事。惟陛下哀其無告。特賜放歸。終臣餘年。上曰。嵩有孫鴻侍養。已恩逮矣。竟不許。世蕃未達雷州。至南雄而返。龍文亦逃伍。潛住歙縣。藏匿亡命刺客。一日被酒。大言曰。要當取應龍與徐老頭洩此恨。階聞。厚爲備。嵩久之亦聞。驚曰。兒誤我多矣。幸聖恩善歸。汝雖行戍。猶在枕席上。久可望赦。若作此舉。止如武元衡故事。橫屍都門。上方眷徐。厚陞應龍官。一震。全族沈矣。初。階之入政府也。肩隨嵩者且十年。幾不敢講鈞禮。嵩懲夏言禍。亦頗自恭謹。惟世蕃多行無禮。階旣曲忍。嵩亦不知也。方應龍疏上。階往謁。慰藉甚。嵩喜。頓首謝。世蕃亦盡出妻子爲託。旣歸。其子密啓曰。大人受侮已極。此其時已。階僞罵曰。吾非嚴氏不至此。負心爲難。人將不食吾餘。嵩遣所親探之。語如前。蓋階亦知上猶眷戀。未能卽割也。嵩旣去。書問不絕。久之。世蕃亦忘舊事。請徐老不我毒。鳩工大治館舍。陰賊彌甚。先是。伊王不法。納數萬金求援。嵩旣歸。遣校尉樂工三十餘人。走分宜坐索。如數與之。密遣人邀於湖口。盡劫殺。取前貲以歸。其他睚眦。必報類如此。嵩益老。謬示恭謹。而終不能禁世蕃。世蕃勢益橫。

四十三年冬十月。復逮嚴世蕃下獄。先是。御史林潤旣劾懋卿罷去。知讐在必報。會袁州推官郭諫臣以公事過嵩里。工匠千餘方治園亭。其僕爲督。諫臣至。箕踞不起。役人戲以瓦礫擲。諫臣亦不禁。或尤之。曰。京堂科道官候主人門。叱嗟誰敢動。此何爲者。諫臣遂具揭。上之潤。潤得之大喜。乃上疏言。臣巡視上江。備防江洋盜賊。多入逃軍羅龍文之家。龍文卜築深山。乘軒衣蟒。有負險不臣之志。推嚴世嵩爲主事。

之。世蕃自罪謫之後，愈肆兇頑。日夜與龍文誹謗朝政，動搖人心。近者假治第，聚衆至四千人。道路洶洶，咸謂變且不測。乞早正刑章，以絕禍本。疏入，詔以世蕃、龍文卽付潤逮捕至京。潤下郭諫臣捕世蕃，徽州府推官栗祁捕龍文，自駐九江，勒兵以待。

四十四年三月，嚴嵩削籍，沒其家。其子世蕃及羅龍文俱棄市。初，林潤聞命馳至九江，郭諫臣白監司盡散其工匠四千人。龍文走匿世蕃家，捕得之。潤因諭袁州府詳具嚴氏諸暴橫狀，得之。復上疏數世蕃父子罪。略曰：世蕃罪惡積非一日。任彭孔爲主謀，羅龍文爲羽翼，惡子嚴鵠、嚴珍爲爪牙，占會城廩倉，吞宗藩府第，奪平民房，而又改釐祝之宮以爲家祠，鑿穿城之池以象西海，直欄橫檻，峻宇雕牆，巍然朝堂之規模也。袁城之中，列爲五府：南府居鵠，西府居鴻，東府居紹慶，中府居紹庠，而嵩與世蕃則居相府。招四方之亡命爲護衛之壯丁，森然分封之儀度也。總天下之貨寶，盡入其家。世蕃已踰天府，諸子各冠東南。雖豪僕嚴年，謀客彭孔，家資亦稱億萬。民窮盜起，職此之由。而曰朝廷無如我富，粉黛之女，列屋駢居，衣皆龍鳳之文，飾盡珠玉之寶。張象床，圍金幄，朝歌夜絃，宣淫無度。而曰朝廷無如我樂。甚者畜養廝徒，招納叛卒，旦則伐鼓而聚，暮則鳴金而解。郭甯三、劉相誼、洪斗、段回等數十百人，明稱官舍，出沒江廣，劫掠士民。其家人壽二、銀一等陰養刺客，昏夜殺人，誘人子女，奪人金錢。半歲之間，事發者二十有七。而且包藏禍心，陰結典樸。在朝則爲甯賢，居鄉則爲宸濠。以一人之身而總羣奸之惡，雖赤其族，猶有餘辜。嚴嵩不顧子未赴伍，朦朧請移近衛。旣奉明旨，居然藏匿，以國法爲不足遵，以公議爲不足恤。世蕃稔惡，有司受詞數千，盡送父嵩。嵩閱其詞而處分之，尚可諉於不知乎。旣知之，又縱之。又曲庇之。此臣謂嵩不能無

罪也。疏入，帝怒，詔下法司訊狀。世蕃猶抵掌曰：「任他燎原火，自有倒海水。」已而聚其黨竊議，自謂賄字自不可掩，然非上所深惡。聚衆以通倭之說，得諷言官使削去，而故填楊。沈下獄爲詞，則上必激而怒。上怒，乃可脫也。謀既定，乃令其黨揚言之。刑部尙書黃光昇、左都御史張永明、大理寺卿張守直亦以爲然。依其言具稿詣徐階議之。階固已豫知，姑問稿安在。吏出懷中以進，閱畢曰：「法家斷案，良佳。延入內庭，屏左右。」語曰：「諸君子謂嚴公子當死乎？生乎？曰：死不足贖，然則此案將殺之乎？生之乎？曰：用楊。沈正欲抵死，階徐曰：別自有說。」楊沈事誠犯天下公惡，然楊以計中上所諱，取特旨。沈暗入招中，取泛旨。上英明，豈肯自引爲過。一入覽，疑法司借嚴氏歸過於上，必震怒。在事者皆不免。嚴公子騎款段出都門矣。衆愕然，請更議曰：「稍遲事，且洩從中敗事者必多。」事且變，今當以原疏爲主，而闡發聚衆本謀，以試上意。然須大司寇執筆，謝不敢當。羣以讓階。階乃出一幅於袖中曰：「擬議久矣。」諸公以爲何如？皆唯唯。因曰：「前囑攜印及寫本，吏固至，甯忘之乎？」皆曰：「已至。」卽呼入，扃戶，令疾書，用印封識。而世蕃不知也。竊自喜計行，謂龍文曰：「諸人欲以爾我償楊，沈命奈何？」龍文不應，執其手耳語曰：「且鬯飲，不十日，釋縲綯善歸。」上因此念吾父，別有恩命，未可知。雖然，先取徐階首，當無今日。吾父養惡，故至此。今且歸矣。用前計未晚。誰謂阿儂智者？」龍文喜，問故曰：「第俟之。」已而階改疏上，但言其通賄僭侈狀。且曰：「逆賊王直，徽州人，與羅龍文姻舊，遂投金十萬於世蕃，擬爲授官。兇藩典模，陰冀非常。世蕃納其賄，爲護持，向非聖神威斷，或徙或誅，則貽憂宗社矣。世蕃罪擢髮難數。陛下曲赦其死，謫戍邊衛，不思引咎，輒自逃歸。羅龍文招集王直餘黨，謀與世蕃外投日本。世蕃班頭牛信者，徑自山海棄伍北走，擬誘至北寇，相爲響應。臣按世蕃所坐死罪非一，而缺望排



上尤爲不道。罪死不赦。上覽疏曰。此逆情非常。爾等第述潤疏一過。何以示天下。其會都察院、大理寺、錦衣衛鞫訊。其實以聞。命下。階袖之出。長安門。法司官俱集。階略問數語。速至私第。具疏以聞。世蕃雖善探。亦不得知也。疏中極言事已勘實。其交通倭寇。潛謀叛逆。具有顯證。請亟正典刑。以洩神人之憤。上從之。命斬世蕃。龍文於市。二人聞。相抱哭。家人請寫遺書謝其父。不能成一字。鄰人聞之大快。各相約持酒至西市看行刑。有譽階能翦大慙者。盛額曰。彼殺桂洲。我又殺其子。人必有不亮者。知我其天也。已而籍嵩家得銀二百五萬五千餘兩。其珍異充斥。踰於天府。江西巡按鞫彭孔及嚴氏家人。得其蔽匿奸盜。椎埋殺人及奪民田宅子女罪狀二十七人。各遣配有差。十一月。山西巡按張欖言。往者嚴嵩與逆子世蕃。奸惡相濟。皇上納言官鄒應龍議。悉置之法。而籍其家矣。復顯陟應龍。以旌其直。第先年首發大奸諸臣。如吳時來、董傳策、張翀、王宗茂等。或雜列戎行。或流離瘴癘。臣竊痛之。乞赦過錄用。以旌直臣之節。疏入。上大怒。命緹騎逮欖下於理。十二月。謫原任大理寺卿萬案充邊衛軍。廣西副使袁應樞充煙瘴軍。下刑部侍郎鄔懋卿於巡按逮問。尋亦遣戍。亡何。嵩寄食故舊以死。

谷應泰曰。嚴嵩相世宗。入於嘉靖二十年八月。去位於嘉靖四十一年五月。盤踞津要。盜竊寵靈。凡二十餘歲。比之林甫相玄。寵任十九載。元載輔代。驕佚十餘年。嵩且過其歷矣。考嵩以茸闕庸材。黷貨嗜利。帝號英睿。竟稱魚水。嵩遵何道哉。或者謂其議禮贊玄。典當上旨。然議禮創自張桂。嵩晚拾唾餘。不足要結主權。惟佑贊玄功。帝心感嵩。夫加爵賜醕。封禪用以媚臣民。美酒明珠。天書用以結朝貴。英主好怪之心。避謗之智。方交戰於中。而朱能造書。寇準召相。桓譚非讖。光武加誅。桂洲胎禍於香冠。分宜追思乎召鶴。

批逆鱗者無全功。盜領珠者有巧術也。况嵩又真能事帝者。帝以剛。嵩以柔。帝以驕。嵩以謹。帝以英察。嵩以樸誠。帝以獨斷。嵩以孤立。賊婪累累。嵩卽自服帝前。人言藉藉。嵩遂狼狽求歸。帝且謂嵩能附我。我自當憐嵩。方且謂嵩之曲謹。有如飛鳥依人。卽其好貨。不過驚馬戀棧。而諸臣攻之以無將。指之以煬竈。微特訐嵩。且似汚帝。帝怒不解。嵩寵日固矣。漢武甯用公孫賀。田蚡不能用董仲舒。汲黯。德宗甚喜盧杞。裴延齡。甚不喜陸贄。顏真卿。猜忌之主。喜用柔媚之臣。理有固然。無足怪者。嗟乎。嵩下有殺人之子。上事好殺之君。身之頻死。固亦危矣。又從而固寵持位。鼓餘沫於焦釜。餽殘膏於兇鋒。二十七年。殺曾銑。是年殺夏言。三十四年。殺楊繼盛。三十六年。殺沈鍊。三十七年。殺王忬。假令嵩早以賄敗。角巾里門。士林不齒已矣。乃至朝露之勢。危於商鞅。燎原之形。不殊董卓。非特嵩誤帝。帝實誤嵩。歐陽氏勸憶鈴山堂。鄒御史夢射培壘樓。霍山將誅第門自壞。申生訴帝。被髮見形。嵩父子至此。甯有死所乎。夫羊舌之族。將覆。叔向之母已知。獨惜世宗自負非常。而明殺輔臣。始於夏言。明殺諫官。始於繼盛。大禮之獄。猶云母子之恩。爲其太甚。夏楊之誅。乃以儉壬之相。甘爲戎首。萊朱貽戒於自用。仲尼致恨於鄙夫。其所由來也久矣。

卷五十五

沿海倭亂

太祖洪武二年夏四月。時倭寇出沒海島中。數侵掠蘇州。崇明。殺略居民。劫奪貨財。沿海之地皆患之。太倉衛指揮僉事翁德帥官軍出海捕之。遇於海門之上幫。及其未陣。麾兵衝擊之。斬獲不可勝計。生擒數

百人得其兵器。海艘命擢德指揮副使。其官校賞綺幣白金有差。仍命德領兵往捕未盡諸寇。

三年三月遣萊州同知趙秩持詔諭日本國王良懷。令革心歸化。日本古倭奴國。在東海中。縮波而宅。自元菟樂浪底於徐聞東筦。所通中國處無慮萬餘里。國君居山城。所統五畿七道三島。爲郡五百七十有三。然皆依水附嶼。大者不過中國一村落而已。戶可七萬。課丁八十八萬三千有奇。自元師討日本者沒於水。不得志。日本亦不復來貢。至是帝遣使諭降之。

四年冬十月癸巳日本國王良懷遣其僧祖朝來進表箋。貢馬方物。并僧九人來朝。又送至明州。台州被掠男子七十餘人。詔賜文綺答之。十二月詔靖海侯吳禎藉方國珍所部溫台慶元三府軍士及蘭秀

山無田糧之民嘗充船戶者。凡十一萬一千七百餘人。隸各衛爲軍。仍禁濱海民不得私出海。時國珍餘黨多入海剽掠。故也。禎既至三郡。每挾私意。多引平民爲兵。瀕海大擾。甯海知縣王士宏曰。吾甯獲死罪。不可誣良民爲兵。卽上封事。詞甚切。上立罷之。

六年春正月德慶侯廖永忠上言。今北邊遺孽遠遁萬里之外。獨東南倭寇負禽獸之性。時出剽掠。擾瀕海之民。陛下命造海舟。翦捕此寇。以奠生民。德至盛也。然臣竊觀倭彘竄伏海島。因風之便。以肆侵略。來若奔狼。去若驚鳥。臣請令廣洋江陰橫海水軍四衛添造多櫓快船。令將領之。無事則沿海巡徼。以備不虞。倭來則大船薄之。快船逐之。彼欲爲內寇。不可得也。上從之。

七年夏六月倭寇膠海靖海侯吳禎率沿海各衛兵捕至琉球大洋。獲倭寇入船。俘送京師。十三年春正月胡惟庸謀叛。約日本令伏兵貢艘中。會事覺。悉誅其卒。而發僧使於陝西四川各寺中。示

後世不與通。

十七年春正月。倭頻寇浙東。命信國公湯和巡視海上。築山東、江南北、浙東西海上五十九城。咸置行都司。以備倭爲名。

二十年二月。置兩浙防倭衛所。夏四月戊子。命江夏侯周德興往福建、福興、漳、泉四郡。視要害。築海上十六城。藉民爲兵。以防倭寇。增置巡檢司四十有五。分隸諸衛。

二十二年冬十二月。倭寇甯海。尋犯廣東。

二十七年春二月。倭寇浙東。命都督楊文、劉德、商嵩巡視兩浙。復命魏國公徐輝祖、安陸侯吳傑往浙訓練海上軍士。同楊文等防倭。秋八月。命吳傑同永定侯張全往廣東訓練海上軍士防倭。冬十月。倭

寇金州。

三十一年春二月。倭寇山東、浙東。

成祖永樂元年。日本王源道義遣使入貢。賜冠服文綺。給金印。四年冬十月。平江伯陳瑄督海運至遼東。舟還。值倭於沙門。追擊至朝鮮境上。焚其舟。殺溺死者甚衆。

九年春正月丙戌。命豐城侯李彬、平江伯陳瑄等率浙江、福建舟師剿捕海寇。三月。中軍都督劉江守遼東。不謹斥堠。海寇入寨。殺邊軍上怒。遣人斬江首。旣而宥之。使圖後效。夏五月。倭寇浙東。

十四年夏五月。敕遼東總兵都督劉江及緣海衛所備倭寇。相機勦捕。命都督同知蔡福等率兵萬人於山東沿海巡捕倭寇。六月。倭舟三十二艘泊靖海衛楊村島。命福等合山東都司兵擊之。十二月。

置遼東金州旅順口、望海塢、左眼、右眼、三手山、西沙洲山、頭爪牙山敵臺七所。

十五年春正月，倭寇浙江松門、金鄉、平陽。冬十月，遣禮部員外郎呂淵等使日本。先是，帝命太監鄭和等齎賞諭諸海國，日本首先歸附，詔厚賚之，封其鎮山，賜勘合百道，與之期，期十年一貢，無何，捕倭將士寇數十，俘獻京師，俱日本人，羣臣請誅之，以正其罪，上乃遣淵賜敕切責之。

十七年夏六月，遼東總兵都督劉江大破倭寇於望海塢。先是，江巡視各島，至金州衛金線島西北望海塢上，其地特高廣，可駐兵千餘，詢諸土人云：洪武初，都督耿忠亦嘗於此築堡備倭，離金州城七十餘里，凡寇至，必先經此，實濱海咽喉之地。上疏請用石壘堡置烟墩瞭望，上從之。一日，瞭者言東南夜舉火，有光，江計寇將至，亟遣馬步官軍赴塢上堡備之。翼日，倭寇二千餘乘海艚直逼塢下，登岸魚貫行，一賊貌醜惡，揮兵率衆，勢銳甚。江令犒師秣馬，略不爲意，以都指揮徐剛伏兵於山下，百戶江隆帥壯士潛燒賊船，截其歸路，乃與之約曰：旗舉，伏起，鳴礮奮擊，不用命者以軍法從事。旣而賊至塢下，江被髮舉旗鳴礮，伏盡起，繼以兩翼並進，賊衆大敗，死者橫仆草莽，餘衆奔櫻桃園空堡，官軍追圍之，將士奮勇請入堡勦殺。江不許，特開西壁以待其奔，分兩翼夾擊之，生擒數百，斬首千餘，間有脫走艚者，又爲隆等所縛，無一人逸者。凱還，將士請曰：將軍見敵意思安閑，惟飽士馬，及臨陣作真武披髮狀，迨賊入堡，不殺而縱之，何也？江曰：窮寇遠來，必勞且饑，我以逸飽待饑勞，固治敵之道。賊始魚貫而來，爲蛇陣，故披髮作此狀以鎮服之，所以愚士卒之耳目，作士卒之銳氣，賊旣入堡，有死而已，我師攻之，彼必致死，未必無傷。寇出，縱其生路，卽圍師必缺之意，此固兵法。顧諸君未察耳。事聞，上賜敕褒進，封江廣甯伯，子孫世襲。將士賞賚有

差。先是元末瀕海盜起。張士誠方國珍餘黨導倭寇出沒海上。焚民居。掠貨財。北自遼海。山東。南抵閩。浙。東粵濱海之區。無歲不被其害。至是爲江所挫。斂跡不敢大爲寇。然沿海稍稍侵盜。亦不能竟絕。英宗正統四年夏四月。倭寇浙東。先是倭得我勘合方物戎器。滿載而東。遇官兵。矯云入貢。我無備。卽肆殺掠。貢卽不如期。守臣幸無事。輒請俯順倭情。已而備禦漸疎。至是倭大鬻入桃渚。官庾民舍焚劫。驅掠少壯。發掘冢墓。束嬰孩竿上。沃以沸湯。視其啼號。拍手笑樂。得孕婦。卜度男女。刳視中否。爲勝負飲酒。積骸如陵。於是朝廷下詔備倭。命重師守要地。增城堡。謹斥堠。合兵分番屯海上。寇盜稍息。世宗嘉靖二年五月。日本諸道爭貢。大掠甯波沿海諸郡邑。鄞人宋素卿者。初奔日本。正德六年。與其國人源永壽來貢。其從父澄識之。告素卿附倭狀。守臣以聞。置不問。至是其主源義植幼闇。不能制命。羣臣爭貢。各強給符驗。左京兆大夫內藝興遣僧宗設。右京兆大夫高貢遣僧瑞佐。及宋素卿。先後至甯波。爭長不相下。故事。番貨至市舶司。閱貨及宴坐。並以先後爲序。時瑞佐後。而素卿狡。賄市舶太監。先閱佐貨。宴又坐設上。設不平。遂與佐相讎殺。太監又以素卿故。陰助佐。授之兵器。而設衆強。拒殺不已。遂燬嘉賓堂。劫東庫。逐瑞佐及餘姚江。佐奔紹興。設追之城下。令縛佐。出不許。乃去。沿途殺掠。至西霍山洋。殺備倭都指揮劉錦。千戶張鏜。執指揮袁璣。百戶劉恩。又自育王嶺奔至小山浦。殺百戶胡源。浙中大震。設負固據海島。巡按御史歐珠。鎮守太監梁瑤奏聞。逮素卿下獄待訊。倭自是有輕中國心矣。給事中夏言上言。倭患起於市舶。遂罷之初。太祖時。雖絕日本。而三市舶司不廢。市舶故設太倉黃渡。尋以近京師。改設福建。浙江。廣東。七年罷。未幾復設。蓋以遷有無之貨。省戍守之費。禁海賈。抑奸商。使利權在上也。自市舶

內臣出稍稍苦之。然所當罷者市舶內臣，非市舶也。至是因言奏，悉罷之。市舶罷而利權在下，奸豪外交內訌，海上無寧日矣。

四年二月，宋素卿伏誅。初，宗設遁海島，不獲。獨素卿及瑞佐下獄。會朝鮮兵徼海者，得其魁仲林、望古、多羅等三十三人。國王李懌奏獻闕下。於是發仲林等至浙，責與素卿對簿，備鞠遣貢先後。及符驗真偽，既悉，有司以爰書上請，乃論素卿死，釋瑞佐還本國。

十八年，國王源義植復以修貢請，許之。期以十年，人無過百，船無過三。然諸夷嗜中國貨物，人數恆不如約。至者率遷延不去，每失利云。

二十五年，倭寇甯台，自罷市舶後，凡番貨至，輒主商家，商率爲奸利，負其責。多者萬金，少不下數千。索急則避去，已而主貴官家，而貴官家之負甚於商。番人近島坐索其負，久之不得，乏食，乃出沒海上爲盜，輒搆難，有所殺傷，貴官家患之，欲其急去，乃出危言撼當事者，謂番人泊近島，殺掠人，而不一兵驅之，備倭固當如是耶。當事者果出師，而先陰洩之，以爲得利。他日貨至，且復然如是者久之。倭大恨，言挾國主資而來，不得直，曷歸報，必償取爾金寶以歸。因盤據島中不去，並海民生計困迫者，糾引之，失職衣冠士，及不得志生儒，亦皆與通，爲之鄉導。時時寇沿海諸郡縣，如汪五峯、徐碧溪、毛海峯之徒，皆華人，僭稱王號，而其宗族妻子田廬皆在籍，無恙。莫敢誰何。巡按浙江御史陳九德請置大臣兼巡浙、福海道，開軍門治兵捕討，聽以軍法從事。從之。乃以朱執爲右副都御史，巡撫浙江、彙攝福、興、泉、漳，未至而泊甯波、台州諸近島者已登岸，攻掠諸郡邑無算。官民廨舍焚燬至數百千區。巡按御史裴紳劾防海副使沈瀚守土

參議鄭世威因乞敕執嚴禁泛海通番勾連主藏之徒。從之。執乃下令禁海。凡雙檣艚艫一切毀之。違者斬。乃日夜練兵甲。嚴糾察。數尋舶盜淵藪。破誅之。因上言去外盜易。去中國盜難。去中國羣盜易。去中國衣冠盜難。遂鑄暴貴官家渠魁數人姓名。請戒諭之。不報。於是福建海道副使柯喬。都司盧鏜。捕獲通番九十餘人。以上。執立決之於演武場。一時諸不便者大譁。蓋是時通番浙自甯波定海。閩自漳州月巷。大率屬諸貴官家。咸惴惴重足立。相與詆誣不休。諷御史周亮。給事中葉鏜。奏改執爲巡視。未幾。執復上言。長嶼諸處大俠林參等。號稱刺達總管。勾連倭舟人。港作亂。更有巨奸擅造艚艫。走賊島爲鄉導。躡海濱。鞠論明確。宜正典刑。章下兵部。侍郎詹榮覆奏。中國待外裔。不以向背責之。以昭天地之量。執所論坐。俱關重刑。乞下都察院覆覈。從之。於是御史周亮等劾執注措乖方。專殺啓釁。因及福建防海副使柯喬。都指揮使盧鏜。黨執擅殺。宜置於理。帝遂奪執官。命還籍聽理。遣給事中杜汝禎往福建。會巡按御史陳宗夔。訊喬等。併覈執事。汝禎宗夔勘執聽信。姦回柯喬。盧鏜擅殺無罪。皆當死。奏下兵部。尚書丁汝夔如其議上。帝從之。命喬鏜繫福建按察司待決。執恚自殺。士論惜之。遂罷巡撫御史。不復設。

三十年夏四月。浙江巡按御史董威。宿應參前後請寬海禁。下兵部尚書趙錦覆議。從之。自是舶主土豪益自喜。爲奸日甚。官司莫敢禁。

三十一年夏四月。倭寇犯台州。破黃巖。大掠象山。定海諸邑。汪直者。徽人也。以事亡命走海上。爲舶主渠魁。倭人愛服之。倭勇而鬻。不甚別死生。每戰輒赤體提三尺刀。舞而前。無能捍者。其魁則皆浙閩人。善設伏。能以寡擊衆。大羣數千人。小羣數百人。而推直爲最。徐海次之。又有毛海峯。彭老生。不下十餘帥。列近



洋爲民害。至是登岸犯台州。破黃巖。四散象山。定海諸處。猖獗日甚。知事武偉敗死。浙東騷動。秋七月。廷議復設巡視重臣。以都御史王忬提督軍務。巡視浙江海道及興、漳、泉地方。忬巡撫山東。聞命。卽日至浙。度所治軍府皆草創。而浙人柔脆。不任戰。所受簡書。輕不足督率吏士。乃上疏請假事權。誅賞得便宜。且欲嚴內應之律。寬損傷之條。勦撫勿拘。從之。改巡視爲巡撫。忬乃任參將俞大猷。湯克寬爲心膂。徵狼土諸兵。及募溫、台諸下邑桀黠少年。分隸諸將。布列瀕海各鎮堡。嚴督防禦。浙人恃以無恐云。

三十二年春三月。王忬破倭於普陀諸山。初。忬廉知俞大猷。湯克寬材勇。旣虛已任之。而都指揮盧鏜坐前都御史朱執事。尹鳳坐賊累。俱繫獄。忬知其能。奏釋之。以爲別將。亦募兵分帥之。日犒撫激勵。欲得其死力。倭魁汪直等結砦海中。普陀諸山。時出近洋襲官軍。忬偵知之。乃夜遣俞大猷帥銳兵先發。而湯克寬以巨艘佐之。徑趨其砦。縱火焚之。倭倉皇覓艖走。官軍隨擊大破之。斬首一百五十餘級。生獲一百四十三人。焚溺死者無算。值颶風發。兵亂。汪直等乘閒率衆逸去。都指揮尹鳳復以閩兵邀擊於袁頭北。菱諸洋。斬首百餘級。生獲二百餘人。先後以捷聞。賜白金文綺有差。

夏四月。汪直、毛海等旣潰散。剽忽往來不可測。溫、台、甯、紹俱罹其患。參將湯克寬率兵循海壘。護城堡。捕奔軼。斬獲亦相當。於是賊移舟而北。犯蘇、松、郡。二郡素沃饒。賊至。捆載而去。有蕭顯者。尤桀狡。率勁倭四百餘屠上海之南匯。川沙。逼松江。而軍餘衆圍嘉定。太倉。所過殘掠不可言。王忬遣都指揮盧鏜倍道掩擊。斬蕭顯。餘衆復奔入浙。俞大猷等邀殺殆盡。先是。吳淞閒人習選。愞而文武大吏。復不能以軍法繩下。遂至破昌國。臨山。鄞。甯。乍浦。青村。柘林。吳松江諸衛所。圍海鹽。平湖。餘姚。海甯。上海。太倉。嘉定諸州縣。忬不欲冒功。有所隱沒。隨擊走之。計

倭所得亦不償失。前後俘斬共三千餘級。東南賴之。五月。給事中賀涇奏留都根本重地。海洋密邇。鎮江、京口乃江淮咽喉。瓜埠、儀真又漕運門戶。請設總兵駐鎮江。從之。秋七月。太平府同知陳璋敗倭於獨山。斬首千餘。餘衆浮海東遁。冬十月。倭寇太倉州。攻城不克。分掠鄰境。有失舟。倭三百人突至平湖、海甯等縣。自獨山之敗。倭東遁。江南稍甯。惟崇明南泊失風者幾三百人。不能去。總兵湯克寬及僉事任環留兵守之。環屬兵三百。皆新募。勵以必死。不入與家人訣。爲書赴之而去。親介胄臨陣。士無敢不用命者。環敝衣芒履。與士雜行伍。依草舍閒。嚙糲飲水。同甘苦。至是相守不下。賊潛出沒。環常夜追之。出其前。後宰夫佩恐有失。衣環衣。介馬而馳。故賊不知所取。環嘗匿溝中。賊過之不知。匿至明。士始得之。又遇矢石。士以死捍環。境被傷。昇之至水濱。梁已徹丈餘。超而過。追急。宰夫留禦之。死焉。環求其首。爲流涕親酬之。相拒數月。不克。克寬復督邳、漳等兵擊之。敗績。失亡四百人。官軍疫。不能攻。乃開壁東南陬。倭遂潰圍。出掠蘇、松各州縣。百餘人由華亭縣滌缺登岸。流劫至木涇金山衛。移舟泊寶山。克寬引舟師迎擊。及於高家觜。毀其舟。斬七十三級。生擒十四人。倭別隊失風。至興化。殺千戶葉臣卿。知府黃士宏。指揮張棟。擊殲之時。沿海諸奸民乘勢流劫。真倭不過十之二三。

三十三年三月。倭自太倉潰圍出。乃掠民舟入海。趨江北。大掠通州、如皋、海門諸州縣。復焚掠鹽場。有漂入青、徐界者。山東大震。改王忬爲右副都御史。巡撫大同。以徐州兵備副使李天寵代之。忬在浙江。薦盧鏜。釋柯喬。激勵諸將。鄧城、劉堂、孫敖等爭奮逐北。以死綏著節。復廣爲偵刺。凡沿海大猾爲倭內主者。悉繫之。按覆其家。自是倭不復知中國虛實。與所從向往。而餘艦在海中者。亦無以菽粟火藥通。往往食

盡自遁。又行視諸郡邑未城者，計寇緩急，次第城之，凡三十餘所。杭州官吏以烽火不時發，日集坊民登陣守，多怨苦。忬曰：「吾斥堠明，無慮勿及。奈何先敵受困耶？」令罷之一郡，皆歡。至是去，以徐州兵備副使。李天寵爲僉都御史，代忬。忬去而浙復不甯矣。初，忬薦盧鏜爲參將，鎮閩。閩人故忌鏜，劾鏜兇險不可用，罷之。而沿海大猾且言：「忬令大猷搗巢，非計，欲搖動忬，忬不爲動。已而南京各官復薦鏜，乃用鏜爲參將，而以俞大猷爲浙直總兵。」以南京兵部尚書張經總督浙福南畿軍務。時朝議方徵狼士兵勦倭，以經營總督兩廣有威惠爲狼士所戴服，故用之。敕令節制天下之半，便宜從事。開府置幕，自辟參佐。經亦慷慨自負，中外忻然，謂倭寇不足平。夏四月，倭寇自海鹽趨嘉興，參將盧鏜禦之，稍卻。次日復戰於孟宗堰，伏發，殺官軍四百人，溺死無算。都司周應禎等死之。賊乘勝入據石墩山，分兵四掠，攻嘉興府城。副使陳宗夔帥兵禦卻之，焚其舟。賊遜入乍浦，與長沙灣寇合，犯海甯諸縣。旣而東掠入海，至崇明，夜襲破其城。知縣唐一岑死之。倭自崇明進薄蘇州，大掠。六月，倭自吳江掠嘉興，都指揮夏光禦之。背王江涇而陣，倭鼓譟而前，我兵大潰。光急入舟，中流矢溺死。蘇州倭寇至嘉善，轉掠松江出海。總兵俞大猷擊敗之於吳松所，擒七人，斬二十三級。八月，倭寇自嘉興還屯採淘港，柘林諸處進薄嘉定。會募兵參將李逢時、許國以山東民槍手六千人至，與賊遇於新涇橋。逢時率麾下先進，敗之。賊退據羅店，官軍追及之，斬八十餘人。許國恨逢時與同事不約己，乃別從閒道擊賊，欲分逢時功。追至採淘港，乘勝深入，伏起，大潰，溺水死者千人。指揮劉勇等死之。工部侍郎趙文華上言：「倭寇猖獗，請禱祀東海以鎮之。」帝命往祀，兼督察沿海軍務。文華至浙，陵轢官吏，公私告擾，益無甯日。

三十四年。柘林倭奪舟犯乍浦。海甯攻陷崇德。轉掠塘西、新市、橫塘、雙林、烏鎮、菱湖諸鎮。杭城數十里外流血成川。巡撫李天寵束手無策。惟募人縋城自燒附郭民居而已。張經駐嘉興。援兵亦不時至。副使阮鶚僉事王詢竭力禦之。僅免失陷。致仕僉都御史張濂日擊時事。痛之。乃上言。臣本杭人。頃復家居五載。頗知海寇始末。始以海禁乍嚴。遂致猖獗。而督撫因循玩愒。養成賊勢。夫堂堂會城。閉門旬日。已有垂破之勢。徒以意得志滿而去。更無一兵一旅阻其去來。賊寇野心。欲如谿壑。能保其不復至哉。臣恐賊退之後。又復收拾傷殘首級。虛張功次。以欺陛下。仍有從而庇之者。則罰罪之典。又移而爲賞功之命矣。臣寓父母之邦。同舟共濟。志惟切於報君。嫌何避於出位。敢以三策爲陛下陳之。一曰重軍法。以作積弱之氣。士惟力戰而後克敵。亦惟畏法而後力戰。今江南非無義勇也。迎敵九死。退走十生。何怪其有退而無進哉。軍法之行。不在行陣。而在平時。誠得必死之士萬夫。海寇百萬不足平矣。一曰選民兵。以收必勝之功。夫江南衛所已成虛設。地方有急。輒假外兵。糊口而來。原非義勇。掉臂而去。莫可勾查。臣愚以爲莫若盡散調募之兵。專責州縣立保伍。更番較閱。期於不擾。一遇有警。按籍而呼。共保身家。寇小至則率衆以攻之。大至則堅壁以守之。一曰復海市。以散從賊之黨。夫海市舊制。原非創設。向使瀕海之軍衛如故。則市舶未爲害也。惟武備日弛。不能制變。而後海禁漸嚴。倭寇乏食。海寇由之以起。惟軍民旣練。寇掠則擢遭斬獲。交易則可保首領。彼雖至愚。必不以彼易此。然後相機稍復海市之舊。不惟散已聚之黨。而瀕海窮民假此爲生。又足以收未潰之人心。

夏四月。廣西田州土官婦瓦氏引狼土兵至蘇州。總督張經分隸總兵俞大猷等殺賊。時倭據川沙窪。柘林爲巢。經冬涉春。新倭日至。地方甚恐。聞狼兵至。人心稍安。賊分

衆三千過金山衛。俞大猷遣游擊白泫及瓦氏兵邀之。稍有斬獲。趙文華至松江。因謂狼兵可用。厚犒之。使擊賊。至漕涇。遇倭數百人。戰不勝。頭目鍾富、黃維等十四人俱死。失亡甚衆。於是賊知狼兵不足畏。復縱掠如故。倭犯江北淮揚諸處。前後由通州之餘東場、海門之東夾港登岸。流劫狼山、利河諸鎮。呂四、餘西諸場。復突入通州南門。燒民屋二十餘間而去。三丈浦倭賊分掠常熟、江陰村鎮。兵備任環督保靖。土兵及知縣王秩統兵三千攻其巢。破之。賊奔江陰、川沙窪。駕舟出海。官兵縱火焚其巢。賊舟一至戚家墩。游擊白泫、劉恩邀獲之。江陰賊亦出江東遁。五月。張經破倭於王江涇。逮經及巡撫都御史李天寵。俱下詔獄。論死。初。經至浙中。用將佐何卿、沈希儀輩。名位已抗。驕不爲用。而新拔士又慄。猶不任兵。所徵田州兵、瓦氏、山東槍手。俱不受律。連戰敗衄。望大損。侍郎趙文華出視師。頤指凌經。經自以大臣。位出文華上。文華恚。則連疏劾經。謂其才足辦賊。特以閩人避賊讐。故縱賊耳。帝大怒。會臺諫亦有言者。趣官校逮捕經。時倭寇自拓林犯嘉興。經遣參將盧鏜督狼士兵水陸攻之。大敗賊於石塘灣。賊北走平望。俞大猷邀擊奔平望。至王江涇。永順宣慰官舍彭翼南攻其前。保靖宣慰使彭蠡臣躡其後。遂大敗之。斬首二千級。溺死者稱是。餘衆奔柘林。縱火焚其巢。駕舟二百餘艘出海遁。自有倭患來。此爲戰功第一。而文華論經之疏已上矣。捷聞。兵科言宜留經平倭。以自贖。不聽。并李天寵、湯克寬俱逮。至京。以縱寇論死。文華郎楊宜爲總督。倭寇自海洋突犯蘇州。南京都督周于德來援。一戰而敗。鎮撫蘇憲臣被殺。賊中分其衆。一由齊門撞馬頭而北。轉掠滸墅關、長洲五都地。一由胥門木壩而南。轉掠吳縣橫鎮。蔓延常熟、江陰。

無錫之境。出入太湖。莫能禦者。御史屠仲律上言。宜守平陽港。拒黃花澳。據海門之險。則不得犯温台。塞寧海關。絕湖口灣。遏三江之口。則不得窺甯紹。扼鼈子門。則不得近杭州。防吳淞江。備劉家河。則不得掩蘇松。嘉興。責江南守令。以訓練士兵。保全境內。爲殿最。沿海沙民鹽徒。及打生手。宜收錄。併力禦賊。詔從之。川沙窪倭賊犯閘港。周浦僉事董邦政。游擊周藩擊之。遇賊驚潰。藩被創死。賊屯石塘橋。流劫崑山石浦。六月。倭寇蘇。常諸縣。常熟知縣王秩。江陰知縣錢錚。及居鄉參政錢泮。各督士民出禦。力屈。死之。旋復寇蘇州。民爭入城。門不啓。號呼震野。乘陴者望之而嘆。攀援上者。又絕而下。任環還自儀真。曰。柰何坐視之。縱有覘謀。我在無患也。乃出辟門。令男女以列進。所活蓋數萬人。復率解明道兵出城力戰。賊退入太湖。遣舟師邀之。乃棄所獲逸去。環以功進副使。環復擊賊馬蹟山。圍逃倭嘉定民家。投火爇之。盡死。旣而環有親喪。詔留之。任事如故。八月。倭賊百餘。自上虞爵谿所登岸。犯會稽高埠。奪民居據之。知府劉錫。千戶徐子懿圍之。賊潛縛木筏。由東河夜渡。潰圍而出。居鄉御史錢鯨。遭於蠓浦。見殺。賊自杭州西掠於潛。昌化。至嚴州淳安。以浙兵迫急。突入歙縣。流劫至南陵。趨太平。操江兵扼之。賊引而東。犯江甯鎮。指揮朱襄率勇士數百人禦之。是時賊已至板橋。襄等不知。方袒褐縱酒。突遇。盡爲所殲。遂由安德。鳳臺。夾岡沿鄉搶掠。趨秣陵關。時應天府推官羅節卿。指揮徐承宗。率兵千人守關。望風奔潰。賊過關而去。自南京出秣陵。流劫溧水。溧陽。趨宜興。無錫。一晝夜奔一百八十里。至潁墅關。南直巡撫曹邦輔。慮與柘林賊合。且爲大患。乃親督兵備。王崇古會集各部兵。扼其東路。四面蹙之。隨地與戰。親召僉事董邦政。指揮樓宇。以沙兵助勦。一戰斬首十九級。賊始卻奔吳舍。欲走太湖。覺之。追及於楊家橋。盡殲其衆。賊自

紹興高埠流劫杭、嚴、徽、甯、太平，犯南都。六十七人經行數千里，殺傷無慮四五千人。歷八十餘日，始滅。邦輔以捷聞，歸功僉事邦政。時趙文華聞寇且滅，欲攘功，急趨赴之。比奏，則邦輔已先之。文華怒，會柘林賊進據陶家港。文華乃悉簡浙兵，得四千人。文華及胡宗憲親將之，營於松江之甄橋。約邦輔以直兵會勦。浙兵分四道，直兵分三道，東西並進。賊悉銳衝浙兵，諸營皆潰。損失軍士千餘人。直兵亦陷賊伏中，死者二百餘人。賊勢大張。文華恨邦輔，至是乃以罪委之。及僉事邦政詔下，邦政總督逮問。既而刑科給事中孫濬言後期之罪不在直兵。今蘇、松士民交稱邦輔實心任事，而流劫留都之倭，又爲邦輔所滅。功績顯然，遽請罪斥。文華非是。兵科給事中夏棡亦言之。上乃申飭文華秉公視師，以圖大效。已而邦政及指揮樓宇賞竟不及。文華惡之也。邦輔旋亦謫戍邊。巡按直隸御史張雲路爲論奏，不報。十一月，止徵狼土諸兵。土兵瓦氏等至浙，驕悍不受約束。所過殘掠，百姓苦之。於是總督楊宜力請止徵，從之。命兩廣督臣隨路掣止。閏十一月，給事中孫濬上言：防倭諸臣既有巡撫、總兵，又有總督及都察院重臣，事權不一。牽掣靡定，迄無成功。兵部覆奏諸臣職守督察，主竭忠討寇，實覈布聞。總督主徵集官兵，指授方略。巡撫主督理軍務，措置糧餉。總兵主設法教練，身親戰陳。至於有司，責在保安地方，固守城垣。帝然之。命行諸臣各遵敕諭施行。十二月，趙文華疏乞還京。許之。文華初奉命至浙，適狼兵瓦氏等至，知倭厚畜銳意請戰。文華惑之，亟趨張經進戰。不得，則上書痛詆。經被逮，代經者周琬、楊宜皆無遠略。賊勢益熾。及瓦氏戰敗，攻陶宅餘。倭復大衄，始知賊未易圖。有歸志。至是，川兵破周浦賊，俞大猷復有海洋之捷。文華遽言水陸成功請還。然是時海洋回倭泊浦東，川沙窪舊巢及嘉定高橋皆倭據如故。副使任環率永順保

靖土兵勦新場倭寇時賊衆二千人皆伏不出而詐令人舉火於數里外若將引去者土舍彭翹先入嘗之不見一人於是頭目田蓄田豐等爭入伏發皆死之賊豕突去未幾復攻上海環以輕兵三百及之擊敗於五里橋習家墳又以兵援崑山而身閒行抵太倉毛家葛隆諸屯賊方會集治攻具衝梯隊道肉薄而登環率死士刃砍之連碎其首矢石交下相殺傷甚衆又縋兵下突而前賊漸氣奪遂棄委走環既居憂哀毀又積苦兵間疾作卒

三十五年春正月巡按御史周如斗參總督楊宜提督曹邦輔輕率寡謀致川兵敗於東溝苗兵敗於新場東兵敗於四橋乞罷黜時上深以南寇爲憂疑趙文華言餘寇將滅爲不實屢問大學士嵩嵩曲爲營解上意終不釋文華懼因言餘寇指日可滅督撫非人一敗塗地皆因吏部尙書李默恨臣前歲劾其同鄉張經思爲報復臣繼論曹邦輔則嗾給事夏棡孫濬媒孽臣及胡宗憲黨留邦輔浙直總督又不用宗憲而用王誥然則東南塗炭何時可解陛下宵旰何時可釋也默因得罪宜削籍爲民邦輔亦被逮罷王誥以宗憲爲兵部侍郎兼僉都御史夏四月倭薄温州同知黃釗馳檄出迎擊被報倭欲還之索千金爲贖釗罵之不置倭怒磔殺之江北倭流劫至盪山山北等港無爲州同知齊恩率舟師迎戰敗之斬首百餘級恩長子尙文次子嵩叔仲實弟寶榮姪慎寅友良大卿孫童俱在行間嵩年十八饒勇善射獨前追賊至安港恩等從之伏發恩及其家丁錢鳳等二十一人力戰皆死之獨嵩慎寅三人得脫賊遂乘勝至金山殺鎮江千戶沈宗玉王世良於江中倭率衆數千自乍浦入欲犯杭州游擊將軍宗禮帥兵九百禦之逆戰於阜角林分左右翼夾擊三戰三捷獲首功七十餘級賊首徐海等皆辟易稱爲神兵會



橋陷軍潰。禮與鎮撫侯槐、何衡、義官霍貫道力戰，俱陷陣死之。禮驍勇敢戰，所部箭手三千人皆壯士，事聞，贈卹有差。總督胡宗憲奏遣生員蔣洲、胡可願使倭砦，傳諭渠魁，令無犯順，從之。已而可願等還言：倭渠欲通貢市，宗憲以聞，下兵部集議不可，乃止。倭圍巡撫阮鶚於桐鄉，初，鶚督學浙江，開武林門納難民，全活數萬人，超擢巡撫，方倭之寇嘉興也。鶚議主勦，而胡宗憲議主撫，不相能。倭自嘉興轉寇桐鄉，氛益銳，去來實徐海，麻葉領之。陳東附焉，東薩摩王弟書記也。宗憲謀間之，遣辯士說海，海心動，私語桐鄉守兵曰：吾已款督府矣。城東門陳黨善備之，是夕海道崇德而西，東方急攻桐鄉，宗憲說海縛麻葉，因僞爲麻葉書致東，令圖海，故達海所。東海中自疑，始解圍去。五月，御史邵惟忠上言：倭薄通州，圍未解，餘衆自狼山轉掠瀕江諸郡縣，而瓜儀爲留都門戶鎮，常乃漕運咽喉，不可視爲緩圖，宜大集兵，敕諸臣戮力靖亂，下兵部議，請調河南睢陳及山東八衛、陝西延綏兵，及徐、沛募兵，敕遣才望大臣一人總督，以爲犄角保障，留都帝善之。已命兵部侍郎沈良才矣。嚴嵩揣知上覺趙文華欺罔，且見譴，乃令文華自以其意請復視師，嵩爲言：良才不勝任，江南人引領俟文華至，上乃止。良才命文華以工部尚書兼右副都御史，總督浙、福直隸軍務。文華既至浙，假監督權，凌脅百官，搜括庫藏百萬計，兩浙江、淮、閩、廣所在徵兵集餉，留漕粟，除京帑，給醢課，迫富民脫凶惡，浪授官職，於是外寇未甯，而內憂益甚。六月，倭入慈谿縣，知縣柳東伯亡。初，王忬在浙，計城各邑未城者，慈谿士人獨持不可，至是倭衆大至，知縣不知所禦，攜印組亡去。殘殺民人無算，而縉紳尤甚。始悔失計，東伯失守，當坐死，以無城可憑，削籍爲民。省祭官杜槐與其父文明率兵追敗倭於王家團，海道劉起宗委防餘姚，慈谿定海未幾，與賊遇於白沙，一日三戰，殺賊

三十餘人。斬其一帥。槐被創墜馬死。文明別將兵擊倭於演武場。斬白眉倭帥一。從七。生擒二。倭驚遁。呼爲杜將軍。已而追至奉化楓樹嶺。以兵少無繼。陷陣死。倭薄海鹽。指揮徐行健。程祿。百戶方存仁逆戰。死之。八月。海寇徐海伏誅。初。胡宗憲以簪珥遺徐海侍女翠翹。綠珠。令日夜說海縛陳東以報朝廷。海且感。而趙文華方治兵擊海。宗憲佯曰。彼且縛陳東。何戰爲。海果賂薩摩王弟。縛東以獻。於是海勢日孤。海自念數有功。又信羅龍文誘。約八月入謁督府於平湖。海先期以數百人胄而入。宗憲。文華。鶚坐堂上。海等叩罪。復謝宗憲。宗憲下堂摩其頂曰。朝廷且赦若。慎勿再虞。厚犒遣之。海既出。知官兵大集。自疑。宗憲使使諭之曰。官兵防東黨。爾毋恐。海請居東沈莊。陳東居西沈莊。又令東詐爲書遺其黨曰。海約官兵夾勦汝矣。東黨果疑相攻。海令裨將辛五郎歸島。宗憲密遣盧鏗計擒之。文華調兵六千。既集。移營薄沈莊。督之急。宗憲猶心憐海。不欲遽戰。文華迫之。宗憲乃下令與總兵俞大猷整師前進。海知事變。掘深塹自守。柵數重。重兵望之不敢入。阮鶚檄趣之。大猷乃從海鹽進攻東沈莊。破之。又追擊於梁莊。會大風。縱火。諸軍鼓譟乘之。賊大潰。斬獲一千六百餘級。海倉皇溺水死。引出。斬其首。濶直海寇平。海故杭之虎跑寺僧。雄海上。稱天差。平海大將軍。至是捷書上。文華皆襲爲己有。帝命械繫首惡。至京正法。時濶東仙居。濶西桐鄉。二寇略平。其分掠海門者。把總張成敗之。江北寇流入常鎮者。總兵徐珏敗之。蘇松甯紹相繼告捷。兵部奏文華功。帝從之。降敕令文華還京。論平倭功。加文華少保。宗憲右都御史。各任一子錦衣千戶。餘陞賞有差。倭俘麻葉。陳東等械繫至京。禮。兵部請獻俘。從之。羣臣俱賀。時倭略平。惟舟山賊據險。結巢未下。官兵環守之。不能克。諸狼土兵俱已遣歸。而川貴兵六千人始至。胡宗憲方留防春汛。隸俞大猷。

經營舟山之賊。會夜大雪。大猷乃督兵四面攻之。賊悉銳出敵。官軍競進。賊敗歸。乃以棕箠捲火擲之。賊四散潰出。斬首一百四十餘級。餘悉焚死。

三十六年冬十一月。海寇汪直伏誅。徐海等既死。汪直復糾衆三千餘入寧波岑港。大掠四境。汪直。徽人也。宗憲亦徽人。乃以金帛厚賂誘之云。若降。吾以若爲都督。置海上。通互市。乃迎直母與其子入杭。厚撫之。而奏遣生員蔣洲往諭。與之盟。直信之。遂自奮言能肅清海波。贖死命。與其黨毛海峯、葉碧川等從蔣洲來杭州。洲至而直未至。人疑其詐。巡按周斯盛請罷貢罪洲。於是逮洲獄。洲乃陳諭倭始末。及言直以誠來。其未至。必風阻耳。已而直果乘巨舟。遣頭目數十人隨來。泊舟定海。蓋初舟實爲颶風所損也。宗憲使人招直。直願見洲。洲方對理。疑其舛望。不遣。遣千戶夏正質其舟。直素與正善。不疑。遂詣軍門請罪。具言自效狀。宗憲待以賓禮。使指揮爲其館主。給輿夫出入。復出蔬米酒肉供餽其舟人。日費數百金。且交質爲信。因具狀聞。請赦之。科臣王國禎力持不可。疏入。上謂直元兇不可赦。宗憲乃密檄按察司收直等。斬之。論平倭功。加宗憲太子太保。餘皆遷賞。然直雖就誅。而三千人皆直死士。無所歸。益恚恨。復大亂。三十七年春二月。倭犯潮州之鮑浦。攻蓬州千戶所。僉事萬仲分部水陸兵馬東西哨攻之。臨敵而哨兵皆潰。領哨千戶魏岳、高洪俱死。尋犯福州。巡撫阮鶚不能禦。取庫銀數萬兩賂之。以新造大舟六艘俾載而去。夏四月。倭掠台州臨海之三石鎮。約數千人。總督胡宗憲擊走之。倭攻福清。破之。執知縣葉宗文。舉人陳見率家僮禦賊。不克。與訓導郎中涵俱罵賊死。五月。自海口出港。參將尹鳳引舟師擊之。沈其舟七。斬首六十餘級。生擒七人。餘衆遁去。鳳追擊東洛外洋。復敗之。銃傷及溺水死者甚衆。福興患少熄。

倭攻惠安。知縣林咸乘城禦之。攻五晝夜不克。丁壯死者數百人。倭亦失亡相當。乃引去。咸率兵擊倭鴨山。乘勝追奔。陷伏中。死之。倭分犯同安、長樂、漳、泉諸處。秋七月。以浙江岑港海寇未平。詔奪總兵俞大猷參將戚繼光職。期一月。蕩平。命胡宗憲督之初。宗憲遣毛海峯誘降王直。直至下獄。海峯遂與倭目善妙等五百餘人。燒船登岸。列柵舟山。阻岑港而守。官軍四面圍之。屢斬獲。然海中數苦毒霧。賊憑高死鬪。先登者多陷沒。新倭復大至。冬十月。岑港倭移巢柯梅。胡宗憲屢督兵討之。不能克。兵備副使谷嶠捍禦海上。屢破倭。制府以捷聞。進川東參政。

三十八年春三月。倭寇自象山河金纜井諸處焚舟登岸。海道副使譚綸與賊戰於馬岡。敗之。斬首七十級。總督胡宗憲上言。舟山殘孽移住柯梅。卽其焚巢夜徙。力已窮蹙。勢易成擒。而總兵俞大猷參將黎鵬舉邀擊不力。縱之南奔。播害閩廣。宜加重治。上命逮大猷。鵬舉至京訊治。時人言藉藉。謂倭之開洋也。宗憲實陰遣之。倭南行。泊浯嶼。焚掠居民。由是福建人大譟。謂宗憲嫁禍。御史李瑚數其三大罪。瑚與大猷俱福建人。宗憲疑大猷漏言。故委罪以自掩。而大猷不善滑刺。素不爲嚴世蕃所喜。故有是逮。廷臣惜大猷才。共假貸得三千金。餽世蕃不死。罷職發大同立功。夏四月。江北倭趨通州。總兵鄧成禦之。不利。指揮張容被殺。倭進據白浦鎮。兵備副使劉景韶以遊擊邱陞擊白浦於丁堰。如皋海門三戰三捷。賊謀犯揚州。景韶復督陞等以火攻其老營。擊敗之。焚死二百人。賊逸入潘家莊。盡銳攻之。先後斬首三百餘級。初。賊自南沙登岸。犯通州。至是勦絕。廟灣倭合衆攻淮安。參將曹克新禦之。戰於姚家蕩。自寅至申。大敗之。斬首四百七十級。賊遁入姚莊。縱火焚莊。死者二百七十餘。賊退入廟灣。拒守。劉景韶督兵擊倭。

於印莊斬首四十級。賊西走。次日復戰於新州。賊遁入民莊。我兵以火攻之。凡再戰。斬首二百六十級。賊悉焚死。無一人脫者。時江北流倭悉殄。惟廟灣據險固守不出。五月。江北兵攻倭於廟灣。衝其巢。斬首四千。我兵死傷過當。復退守之。時賊營甚固。巡撫李遂以我軍鼓戰而疲。宜圍守之。賊乏食。且水陸斷其行道。可收全勝。通政唐順之以爲玩寇。乃自擐甲持矛。麾兵以進。屢挑戰。賊終不出。遂督兵入險。賊盡銳東西衝。殺傷相當。自是復稍稍出掠。覓舟爲走計矣。順之知失計。乃駕言經略三川沙。倭南去。踰月。倭困廟灣既久。劉景韶督卒填壕塹。逼壘而陣。令水兵載葦焚其舟。復水陸進擊。倭潛遁入舟。官兵進據其巢。追奔至瑕子港。斬獲頗多。餘倭無幾。不復能戰。乘風開洋而去。福建新倭大至。多賈攻具。先攻福甯。連江。羅源。流劫各鄉。進攻福州不克。移攻福安。破之。參將黎鵬舉以舟師擊倭於海中七星山。屏風嶼。斬首六十七級。生擒六十八人。時沿海長樂。福清等境皆有倭舟。廣東流倭往來詔安。漳浦間。浙江舟山倭移舟南來者。尚屯浯嶼。福州。漳。泉無地非倭矣。舟山倭屯浯嶼經年。至是乃開洋去。其毛海峯者。復移衆南島。建屋而居。永福倭移舟出梅花洋。參將尹鳳擊敗之。巡按樊獻科請趨胡宗憲應援。未及行。巡撫阮鶚往勦之。倭稍創。六月。倭衆別部二十餘艘屯崇明三川沙。總督胡宗憲檄總兵盧鏜帥師攻破之。前後斬首百餘。遁去。宗憲以捷聞。兼言唐順之贊畫功。擢僉都御史。秋七月。三川沙倭突犯江北。由海門縣七星港登岸。流劫過金沙西亭。將犯揚州。參將邱陞禦之。戰於鄧家莊。賊敗走。仲家園。復追至鍋團。陞輕騎先進。賊覘無後繼。盡銳來衝。陞馬蹶被殺。已而官軍大至。賊遁。八月。倭自鄧家莊敗後。沿海覓舟不得。官軍尾之於劉家橋。白駒沙諸處。倭餒甚。奔莊。我兵圍之。時劉顯兵至。先登。各營繼進。縱火衝擊。破其巢。斬首

二百餘。賊奔白駒沙，追擊，又敗之於七竈莊、花墩，共斬首四百餘。賊盡殄焉。顯驍勇敢戰，江北軍悉屬。顯節制，故有功。

三十九年春二月，倭寇六千餘人，流劫潮州等處。時浙直倭患稍息，而閩、廣警報日至。五月，加胡宗憲兵部尚書，兼右副都御史。

四十一年春三月，泉州指揮歐陽深率兵擊倭，破之，生擒江一峯。泉寇稍甯。倭陷福建永甯衛，大掠數日而去。復攻永甯城，破之，大殺城中軍民，焚燬幾盡。冬十一月，逮總督兵部尚書胡宗憲，削籍，從給事中陸鳳儀之言也。獄具，罷浙閩總督大臣，設右僉都御史巡撫其地。

四十二年五月，復逮胡宗憲詣京。宗憲自殺。是時大計京官，復有言宗憲未盡法者，有旨逮治。宗憲至京，自殺。宗憲在浙中，與趙文華同事。文華選懦不敢前，宗憲輒自臨陣，戎服立矢石間督戰。方倭圍杭時，宗憲親登城臨視，俯身堞外。三司皆股慄，懼爲流矢所加。宗憲恬然視之。殲徐海、汪直，皆有功。然稍稍事文華，又握權太重。勳臣總兵者，由掖門通謁，庭拜。巡撫悉聽節制，如三邊例。宗憲才得展，而禍機亦萌此矣。上好玄修，宗憲進白鹿稱賀。大學士嵩比之，會嵩敗被逮時，歸安茅坤上書訟其冤。冬十月，倭犯福建，其自浙之温州來者，合福建連江賊登岸，攻陷壽甯、政和、寧德等縣。自廣之南島來者，合福清、長樂賊攻陷元鍾所。蔓延及於龍巖、松溪、大田、古田之境，無非賊者。初，浙江參將戚繼光旣連破賊於林墩等處，閩之宿寇盡平。繼光引兵還浙，遇倭自福清東營島登岸，麾兵擊之，首百八十級。遂行，而倭至者日衆。始犯邵武，殺指揮齊天祥，轉掠羅源、連江，殺游擊倪祿，遂攻元鍾所城。及甯德縣入之，乘勝直抵興化府城。

不克。乃合兵薄城下。圍之。且匝月。巡撫游震得以狀聞。請調義烏兵以繼光統之。起丁憂參政譚綸與都督劉顯。總兵俞大猷協力共濟。上從之。十一月。劉顯率兵援興化。顯大兵留江西勦廣寇。所提入閩卒不及七百人。且疲屢戰。倭新至。氛甚銳。顯知不敵。乃去。府城三十里。隔一江。按兵不進。欲掩逗留之罪。遣五卒賈文詣府。約欲率兵赴城禦敵。賊獲五卒殺之。用其職銜僞爲顯文。克期入城。約城中勿舉火作聲。恐賊驚覺。詐以五人爲劉卒賈入。至期。賊陽稱顯兵入城。人莫之疑。賊旣大入。猝起格殺。城中驚亂。參政翁時器。參將畢高倉皇縋城走。同知吳時亮被殺。賊遂據城中。三閱月。殺掠焚毀。顯卒乘亂攬之。參政王鳳靈妻竟爲顯掠去。賊旣飽欲。始如平海衛。欲掠舟泛海去。十二月。兵結巢崎頭城。與都指揮歐陽深相拒。久之不出。深望見兵少。輕之。直前挑戰。伏發。深與其下數百人皆戰死。賊乘勝陷平海衛。事聞。罷巡撫游得震。逮參政翁時器。參將畢高。劉顯坐觀望不救。立功自贖。倭引兵出海。把總許潮光以輕舟抄之。賊還屯平海衛。副總兵戚繼光督浙兵至福建。與劉顯。俞大猷合擊倭於平海衛。大破殲之。斬首二千二百級。墮崖溺水死者無算。福州以南諸寇悉平。

四十三年春二月。舊倭萬餘攻仙遊。圍之。二月。戚繼光引兵馳赴之。大戰城下。賊敗趨同安。繼光麾兵追至王倉坪。斬首數百。餘衆奔漳浦。繼光督各哨兵入賊巢。擒斬略盡。閩寇悉平。其得出者逸出境。至廣東潮州。俞大猷又截殺之。幾無遺類。初。倭旣自浙創歸。嘗一犯淮揚吳越。皆不利。遂巢閩中。首尾七八載。所破城十餘。掠子女財物數百萬。官軍吏民戰及俘死者不下十餘萬。雖時有勝負。而轉漕軍食天下騷動。至是倭患始息。

谷應泰曰。島夷卉服。首見禹貢。秦漢以來。罕被倭患。蓋以其俗愛鮮華。地多饒沃。五州七道。三島五百七十三郡。率皆樂土。環以大海。君臣自保。不愛慕中國也。若乃海王充物。居民仰食。雲帆所指。有無懋遷。則又彼此咸賴。高帝時。士誠友定。遣孽竄伏。北遼南粵。歲被創殘。已而通謀逆臣。伏兵市舶。帝乃閉關謝貢。示弗復通。然而創設市舶。互市不絕。計深遠也。後世識慮迂拘。放失舊典。初開橫海。旋棄珠崖。民競刀錐。吏鮮保障。秦關夜柝。楚吏晨疆。勇士蹈險。貪夫忘生。於是內地奸民。勾引潛深。海邦貴倖。藏匿不可勝計矣。貧民勢家。黷貨負直。窮彞困頓。進退趨起。逃生水國。求食波臣。邊吏戒心。搜捕始急。於是沿海不逞之徒。陳涉力耕。怨家日衆。黃巢下第。憤恚思兵。稍稍收聚倭裔。窺竊上國矣。朱紈下車。不畏彊禦。窮治黨與。少所報聞。夫廣漣索酷。先求魏相。李膺破柱。不避黃門。政求亂本。雖得河源。禍發朝堂。意悲虎尾。紈死而朝貴與海逋交相賀也。代臣畏禍。海禁復弛。浙東再亂。王忬出督。拔大猷於偏裨。出盧鏜於獄中。普陀一戰。幾殲渠帥。游魂四潰。旋掠江南。而忬隨處邀擊。頗多斬獲。括乃代頗。騎還易毅。大功不終。自古悲歎。此闕外有遙制之憂。中樞失內贊之力也。嗣是天寵握兵。乃棘門之兒戲。文華祀海。實天雄之誦經。倭患愈劇。張經再出。經以功在銅柱。因而偃蹇。凌轢度亦自大。匹夫耳。然視事一月。指揮羣帥。王江涇之捷。賊兵宵遁。史稱其兵驕將悍。或亦讒人之蜚語。獄吏之深文也。文華行譖。檻車入國。蓋左豐求賂。盧植徵還。張讓交通。王允下獄。自古未有小人同事。而得劓制成功者。胡宗憲曲意主撫。因勦成功。賄斬徐海。誘擒汪直。武安誘殺李廣。誅降長致恨於封侯。空悲冤於賜劍。憲雖引刃。應無顏見二賊於地下也。憲才望頗隆。氣節小貶。側身屬趙。卵翼成功。耿秉因竇憲勒勳。杜預事朝貴甚謹。封疆之吏。固應折節。乃爾耶。倭寇披



猖禍延三省。任環効命留都。俞大猷經營兩浙。戚繼光驅馳閩海。類皆大國干城。足以滅此朝食。而乃大戮亟行。更張不一。事權牽制。流毒生民。九閩無金城之任。分宜少裴度之忠。羣賢隕喪。國事凌彝。固其宜也。中丞張濂家居省會。身在圍城。訟言時事。涕淚交頤。觀其疏中所稱殘難民之首。以償縱寇之功。而督撫可知。移罰罪之典。爲賞功之命。而筦樞可知。軍法不重。人無死志。客兵掉臂。士無鬪心。而卒伍可知。嗚呼。鄭監陳圖。莫救當時之充耳。然而睢陽劍在。已成今日之爰書矣。

## 卷五十六

### 李福達之獄

世宗嘉靖五年秋七月。妖人李福達坐死。福達。山西代州崞縣人。一名午。初以妖賊王良謀反事。發戍山丹衛。逃還。改名五。竄居陝西洛川縣。與季父越同倡白社妖術。爲彌勒佛教誘愚民。嘯聚數千人。大掠鄜州。洛川諸處。殺掠無算。已而官兵追勦。捕得越。及其黨何蠻漢等。誅之。福達逃去。占籍徐溝縣。變姓名爲張寅。賄縣中大姓。以爲同宗。編立宗譜。塗人耳目。已又挾重資入京。竄入匠籍。輸粟爲山西太原衛指揮。其子大仁。大義。大禮。俱補匠役。以燒煉術往來武定侯郭勛。後仍往同戈鎮。其仇薛良首發之。福達懼。逸入京。官司捕其二子。按繫之。福達窘。乃自詣獄置對。先後鞫訊者。代州知州杜蕙。胡偉。證之者。李景全等。具獄上布政司李璋。按察司徐文華等。復上巡按御史張英。皆如訊。獨巡撫畢昭謂福達果張寅。爲仇家誣所致。反其獄。以居民戚廣等爲證。坐良罪獄。未竟。昭乞侍養去。會御史馬錄按山西。復窮治之。附爰書。

如前訊。勛爲遺書囑免錄。不從。擬福達謀反。妻子緣坐。飛章劾勛黨逆賊。并上其手書。帝下之都察院。席書亦助勛爲福達地。大理寺評事杜鸞上言劾勛及書。乞將二人先正國法。徐命多官集議福達之罪。不報。都察院覆奏。李福達罪狀。宜行山西撫按官移獄三司會鞫。先是御史馬錄咨於徐溝鄉紳給事中常泰。泰言寅爲福達不疑。又咨於讞獄郎中劉仕。仕。鄜人也。其言如泰。錄復檄取鄜。洛父老識福達者辨之。俱以爲真福達也。乃檄布政使李璋。按察使李珏。僉事章綸。都指揮使馬豸。雜鞫之。福達對簿無異辭。遂附爰書上錄。錄乃會巡撫都御史江潮上言。福達聚衆數千。殺人巨萬。雖潛蹤匿形。而罪跡漸露。變易姓氏。而惡貌仍前。論以極刑。尚有餘辜。武定侯勛納結匪人。請囑無忌。雖妖賊反狀。未必明知。而術客私干。不爲避拒。亦宜抵法。薄示懲艾。章復下都察院。冬十一月。左都御史聶賢等覆奏。李福達逆跡昭灼。律應磔死。帝從之。錮獄待決。因詰責郭勛。令自輸罪。勛懼乞恩。因爲福達代辨。帝置不問。勛又令福達子大仁具奏求雪父冤。章下。聶賢與原訊御史高世魁知爲勛指。奏寢其議。勛謂大仁曰。苟弗解。爾曹姑亡命。勿蹈叢戮也。於是給事中劉琦。程輅。王科。沈漢。秦祐。鄭白璧。御史高世魁。鄭一鵬。南京御史姚鳴鳳。潘壯。戚雄各劾勛交通逆賊。明受賄賂。福達旣應伏誅。勛無可赦之理。給事中常泰亦上言。勛以輸罪爲名。實代福達求理。論以知情何辭。勛爲福達居閒。晝令大仁等事急亡命。論以故縱何辭。給事中張達等亦上言。凡謀反大逆。宜服上刑。知情故縱。亦從重典。今勛移書請託。黨護叛逆。不宜輕貸。聶賢亦奏勛當連坐。帝不從。勛亦累自訴。具以議禮觸衆怒爲言。帝信之。尋命錦衣千戶戴偉移取福達獄詞及囚佐下鎮撫司羈候。會鞫。給事中常泰。秦祐。御史任孚。邵齒。郎中劉仕復交章劾勛。江潮。馬錄仍會疏極言福達不枉。

乞問如律。勛乃與張璠、桂萼等合謀爲蜚語。謂廷臣內外交結。借事陷勛。漸及議禮諸臣。逞志自快。帝深信其說。而外廷不知也。帝命速取福達至京鞫問。刑部尚書顏頤壽、侍郎王啓、劉玉、左都御史聶賢、副都御史張閏、劉文莊、大理寺卿湯沐、少卿徐文華、顧佖、寺丞毛伯溫、汪淵及錦衣衛鎮撫司各官會鞫福達於京畿道。對簿無異辭。奏請論磔。帝不從。命會九卿大臣鞫於闕廷。時告者薛良、衆證李景全等共指福達。福達語塞。畢昭引證薛良之誣者戚廣也。訊之。復云。我曩未就吏訊。安得此言。頤壽等以其詞上。上心益疑。命俟齋祀畢。朕親臨鞫問。大學士楊一清上言。庶獄無足煩聖慮者。乞仍屬諸勘官會訊。刑部主事唐樞言。福達罪狀甚明。擬死不枉。上怒。黜爲民。頤壽等懼。乃雜引前後讞詞。指爲疑獄。帝切責頤壽等。六年夏四月。遣錦衣官劉泰等逮馬錄赴京。下鎮撫司獄待鞫。仍取原勘各官李璋、李珏、章綸、馬豸詣京。卽訊。顏頤壽上言。福達反狀甚明。法難輕縱。况彼以神奸妖術。蠱惑人心。臣等若不能執一。或縱舍。異時復有洛川之禍。臣雖伏斧質。何抵欺罔之罪。帝怒。謂頤壽職司邦刑。朋奸肆誣。令戴罪辦事。顏頤壽等復請會訊。從之。乃出錄與福達對鞫。情無反異。頤壽等復以上請。帝謂頤壽等朋比罔上。乃逮繫頤壽及侍郎劉玉、王啓、左都御史聶賢、副都御史劉文莊、大理寺卿湯沐、少卿徐文華、顧佖於詔獄。其原鞫郎中御史寺正等官俱逮繫待罪。八月。帝命桂萼攝刑部事。張璠攝都察院。方獻夫攝大理寺。雜治之。太僕卿汪元錫與光祿少卿余才忽偶語曰。福達獄已得情。何更多事。乃爾。訶者有白璠等奏聞。帝命逮繫元錫。才於詔獄。并掠之。大學士賈詠與馬錄俱河南人。錄被逮。詠遺書慰之。鎮撫司以聞。復搜得都御史張仲賢、工部侍郎閔楷、大理寺丞汪淵、御史張英私書。上責狀。詠引罪。得致仕去。而逮仲賢等。九月。張璠、桂

尊方獻夫逢合帝意。復鞫錄等於闕廷。榜掠備至。錄不勝五毒。乃誣服挾私故入人罪。璫等以聞。遂釋福達。帝怒錄欲坐以死。璫營解之得免。乃論戍編伍南丹衛子孫世及焉。帝以羣臣皆抗疏劾助。朋姦陷正。命逮繫給事中劉琦、常泰、張達、程輅、王科、沈漢、秦祐、鄭鵬等。御史姚鳳鳴、潘壯、高世魁、戚雄等。刑部郎中劉仕、大理評事杜鸞等。詔獄死。箠楚狴犴者十餘人。餘戍邊削籍。流毒至四十餘人。謫大理少卿徐文華、顧佖、戍邊。初顏頤壽等既逮。治備嘗五毒。聞者慘之。已而皆奪官罷歸。獨文華、佖論戍邊。二人皆與璫等廷爭大禮者。江湖李璋、李珏、章綸、馬豸等俱奪官。韓良相及其佐證俱論遣。璫等自謂平反有功。請編欽明大獄錄。頒示內外諸臣。以明頤壽等之欺罔。從之。四十五年。四川妖寇蔡伯貫反。已而就擒。鞫得以山西李同爲師。四川撫按官移文山西。捕同下獄。自吐爲李午孫。大禮之子。世習白社妖教。假稱唐裔。當出馭世。惑民倡亂。與大獄錄姓名無異。撫按官論同坐斬。奉旨誅之。都御史龐尙鵬上言。據李同之獄。福達之罪益彰。而當時流毒縉紳至四十餘人。衣冠之禍。可謂烈矣。郭助世受國恩。乃黨逆寇。陷縉紳而樞要之人悉頤指氣使。一至於此。萬一陰蓄異謀。人人聽命。爲禍可忍言哉。乞將助等官爵追奪。以垂鑑戒焉。錄等特加優異。以伸忠良之氣。穆宗從之。凡當時死事謫戍者皆得敘錄。是獄始明。

谷應泰曰。永嘉安仁是舉也。果爲平定冤獄乎哉。亦黨武定。讐諸臺諫爾。當其議大禮時。禮官嘗要助同疏攻永嘉。助後竊語永嘉曰。吾嘗謂汪俊此事關係甚大。宜折中。不可偏執。俊與吾力辨。至大詬而止。竟署吾名疏中。非吾意也。永嘉信之。收其語於大典中。且曰。助竟以是構怒於衆云。及後再議考獻皇帝。徐文華等與璫力辨。助遽曰。祖訓如是。古禮如是。璫等言當更何議。於是璫等與助同上議。當考獻皇。伯孝

宗而助益見悅於永嘉矣。游言一唱，鼓簧宸聽，則帝亦以助爲心膂臣矣。及福達獄起，而臺諫諸臣乃力攻助，必欲置之連坐，此其所以反覆追讞，必翻釋而後已也。永嘉等主之，必永嘉等成之，非爲福達爲武定耳。武定獲伸，則諸臣之竄削有弗恤矣。甚哉永嘉之舉也。然則臺諫豈盡無過乎？夫武定之主福達，罪固有在，而必欲連坐，則甚矣。當福達叛亂時，武定豈與其謀耶？及福以方術見，助亦以方術遇之耳。而豈知前日之爲叛賊也。迨其事露，特不宜與之請囑耳。而嗾使陳白，則未知其果有與否也。故待福達獄定之後，治其請囑之罪，亦足矣。而何故必欲其連坐哉？况知情藏匿，故縱之律，本與助事不相似，而必引此繩之，欲置重典，此其所以激成翻釋之紛紛也。福達之獄前已奉命監決矣，使當時諸臣稍存寬緩，待福達伏誅之後，羣攻武定，則助亦百口莫解，雖欲再鞫福達以自爲地，何可得耶？惜乎諸臣慮不及此，而使法司大臣、藩臬諸司俱罹其禍也。悲哉。

### 卷五十七

#### 大同叛卒

世宗嘉靖三年秋七月，大同正堡軍叛，殺巡撫張文錦，參將賈鑑。大同、古雲中地，北距塞地，平漫不甚阨險。巡撫都御史張文錦議鎮城北九十里，築五堡，將成，欲徙鎮卒二千五百家往戍之。堡五百家，爲大同藩籬。諸鎮卒竊相謂：去城下二十里，猶苦抄掠無甯日。今五堡孤懸幾百里，敵至，誰復相應援者？卽死不願徙也。訴之文錦，文錦不許，嚴令趣之。又所遣董役參將賈鑑望風白文錦，杖其隊長，且罪之。諸鎮卒遂

變有郭鑑、柳忠暨諸驍悍者倡亂，殺賈鑑，裂其屍。時二十二日也。遂嘯聚塞下焦山，文錦恐與寇連，招撫之入城，卽索治首亂者。二十七日，郭鑑、柳忠脅諸卒焚大同府門，劫獄囚，又焚都察院門，文錦倉卒踰垣避匿。宗室博野王所諸亂卒掠其家，脅博野出，文錦殺之，亦裂其屍。遂發府庫兵仗，盡甲而馳，欲殺鎮守王某不果。又欲殺總兵官江桓，走免，掠其家，乃出逮繫。故總兵官朱振於獄，脅令主之，振知不免，乃告曰：「吾與衆約三事，勿犯宗室，勿掠倉庫，勿縱火殺人。能從我則可不從，甯死無與。」諸亂卒曰：「唯命。」衆稍戢，遂脅鎮巡爲奏乞赦宥。八月，代王出居宣府。時廷議遣兵部侍郎李昆宣敕赦諭之，復命太監武忠鎮守都督桂勇爲總兵官，擢按察使蔡天祐爲巡撫。先是，撫臣旣遇害，諸亂卒肆行劫掠。天祐至，乃會武忠、桂勇集亂卒，宣諭朝廷恩威，反覆開諭，諸亂卒稽首謝，暫解散。然皆恐不安，又奸盜多乘隙亂，亂卒劫掠居民。桂勇稍督兵捶殺五十餘人，乃笞郭鑑、柳忠諸亂首，餘釋之。而人情洶洶，相傳必盡殺大同人，無何，妄報京營暨諸鎮兵已駐近地，勦大同矣。適戶部遣進士李枝轉餉至鎮，諸亂卒謂密旨也。衆夜集擊李枝，門訊故，枝自門隙出，公移示之，始信。然衆已集，有謂知縣王文昌曾白巡撫欲誅衆卒者，遂往執文昌殺之。又縱火延燒居民百餘家，亂復大作。明日，逼脅代府，謂其請兵也。且素府賄，代王曲應之，解去。王懼陷害，率子弟數人潛出居宣府。天祐委曲撫諭不定，以狀聞。九月，命戶部侍郎胡瓚、都督魯綱帥師討大同叛卒。制曰：「誅首惡，脅從不問也。」冬十一月，大同叛卒執總兵桂勇、胡瓚至陽和，密檄桂勇督城中兵計擒首惡。文移日下數十，於是城中大懼，衆白天祐求自全。天祐傳制諭之曰：「兵來惟誅首惡，脅從不問也。汝輩勿助惡，卽良民無事矣。以是首惡者煽惑衆多不從，桂勇遂率苗登諸將計擒郭鑑、柳忠等十一

人皆斬之。鑑父郭疤子糾胡雄、黃臣、徐氈兒等復倡亂報復。逼脅諸亂卒盡甲閉城門。夜圍桂勇第，掠其資，殺家衆數人，磔屍於坊。有啖其肉者，遂擁桂勇至葉總兵宅。天祐暨太監武忠亟馳至諭之。反覆譬曉，衆復少定，勇得不遇害。衆詣天祐泣訴求止兵。天祐曰：汝等自作孽至此，奈何？若今能擒首惡，吾爲若轉達。兵猶庶可止也。諸亂卒乃復擒徐氈兒等首惡四人以獻。天祐斬之。函首詣瓚。郭疤子暨諸首惡皆逃匿。瓚聞之，欲提兵而西。城中士人數十輩詣瓚請緩師，不聽。天祐乃疏請班師，復以書止瓚，謂首惡旣誅，餘黨釜魚耳，易處也。疏上，命瓚旋師。瓚還，御史蕭一中給事鄭一鵬等劾瓚討叛無功，逆黨未盡得，乃師不臨城，歸冒功賞，請治欺罔罪。別遣大臣督兵討亂，疏寢不報。惟敕天祐等擒捕餘黨，仍宥脅從弗治。復遣使諭慰代王還國。

四年春二月，巡撫蔡天祐諭鎮城兵民各安業，所劫軍器令首官衆稍甯。郭疤子、胡雄旣潛入城，度終不自容，復誘聚餘黨數十人，夜焚總兵王振第。諸卒奔告天祐。天祐曰：曉當治之。明日集諸卒，諭以朝廷班師不屠城之意。且詰亂故。衆曰：夜倡亂者皆知，請閉諸門戶索之。得首惡郭疤子、胡雄等四十人，斬之。人皆稱快。事聞，優詔答之。賞賚有差。天祐厚賚間諜，因事捕誅逆黨近數百人。大同始定數年，天祐遷兵部侍郎。言者追論其費財，竟罷去。多枉之。張文錦妻李氏上疏請卹。上怒，執抱疏者治之。廷臣屢以爲言，不許。江西巡撫陳洪謨疏言文錦邊圉重臣，致滋大患，誠宜譴責。第事在朝廷，雖誅僂之可也。若假手士卒，又懲慝之，臣恐羣小藉口，寢生陵替之階。其於國家紀綱所損不小。書奏，上切責之。萬曆中，贈文錦右都御史，諡莊愨。

十二年冬十月。大同戍卒叛。殺總兵李瑾。先是七月。套部渡河將入寇。巡撫大同都御史潘倣以聞。兵部尚書王憲曰。非設總制重臣不可。乃請以兵部侍郎劉源清爲總制。都督卻永總兵禦之。舊鎮大同總兵李瑾議於天城之左濬濠四十里以遏突騎。源清從之。期三日事竣。瑾素嚴。馭士卒少恩。及承源清令。益爲捶楚。鎮卒李富子。王寶等倡亂。從者六七十人。脅朱振攝指揮使。遂殺瑾。還圍巡撫潘倣。倣踰垣避匿。亡其符敕。諸卒搜得之。倣爲奏。鎮將用法苛刻。兵悉變。請置勿問。源清曰。卽兵悉變。法不可廢。請討之。事下兵部議。尚書憲曰。兵未必悉變。脅從宥弗治。渠魁必殲。降璽書責總制巡撫相機撫勦之。倣督僉事孫允中等計擒首惡十餘人。縛以獻。時源清駐陽和。乃榜示大同城中曰。五堡之變。朝廷處太寬。乃今稔惡戕主帥。天討所必加者。五堡遺孽見榜示。輒偶語不自安。謂追理甲申事也。允中檻諸囚詣軍門。請沮師。稍徐圖之。逆黨可盡得。又五堡事朝廷已處分。願勿以爲言。源清曰。甲申之役。胡公以兵不臨城。致言者紛紛。吾不可更襲前轍。乃以囚屬御史蘇祐訊。而遣參將趙剛等率甲士三百人捕亂黨。倣驗所捕名多擒賊有功。爲諸囚所仇誣者。乃止捕無功八十餘人。比晚。諸鎮卒皆變。拒巷不納捕者。源清遣允中入城諭意。令明日釋甲迎王師。至夜。城中益譁言兵來屠城矣。遂羣起爲亂。倣命允中暨諸裨將擒斬二十餘人。餘解散。源清爲書召朱振。振至。切責之。振飲藥死。明日。源清師至城下。斬關入。大肆殺掠。城外橫屍枕藉。五堡遺孽遂變。悍橫不可制。閉城門弗啓。擁指揮馬昇。楊麟爲渠帥。亡何。卻永師亦至。整隊及城。亂兵開門迎敵。殺參將一人。倣允中亟馳往諭之。衆曰。城外屍塞道矣。尙給我反覆諭不聽。倣與允中謂曰。亂不可遏矣。乃列將士貪功妄殺激變。鎮兵狀閒道上之。源清亦疏奏巡撫諸臣黨逆卒。致抗王師。言官劾



傲罷去。源清次聚落驛。允中往見之。言將士妄殺故。源清曰。毋爲賊說。允中遂留居懷仁。時禮部侍郎顧鼎臣、黃綰皆言用兵之非。綰言尤力。忤輔臣張孚敬意。吏部以他事謫參政。出綰。發憤上疏自列。且指言用兵失。上悟。命復其官。十一月。兵部尙書王憲謂大同之變非大發兵誅之不可。張孚敬主其議。乃以江桓總兵擢參政。樊繼祖爲大同巡撫。繼祖至陽和。與劉源清議大忤。遂上疏請假金牌單騎入城諭之。可立下。且云。恐賊計無復之。且北走胡。貽患非小也。疏入。不報。源清於諸關設邏卒。遏城中。章疏。又連疏奏宗室諸文武悉已從賊。實天欲棄此城矣。兵部是其議。有旨命趣攻之。源清乃百道攻城。令郎中李文芝主事楚馨穴城。決水灌之。諸叛卒堅守不下。

十三年春正月。小王子寇大同塞。初。大同叛卒大掠城中。潛出漠北。誘小王子數萬人。大舉入寇。卻永帥師禦之。失利。殺傷甚衆。城中叛卒鼓譟以應之。其渠長數十人入城。諸叛卒指代府曰。兵退。以此謝。小王子留精兵相持。餘衆分掠渾。應朔懷諸郡邑。數月乃去。羽檄達京師。中外洶洶。二月。劉源清罷。源清畏北騎猖獗。再請設總制分禦之。而已專事攻城。張孚敬請從之。上納夏言議不許。下御劄謂叛卒殺主將。法毋赦。然非舉城所爲。卻永、劉源清貪功。引水灌城。大同北門鎖鑰。源清必欲城破人誅。縱使成功。何由興復。其罪二臣。別遣大臣禦之。密擒逆賊之魁。庶免師老財匱。劄下。中外始知用兵非朝廷意。源清聞之。乃詣城下索首惡。時郎中詹榮都指揮紀振游擊戴廉俱陷賊中。相與謀曰。總制誠索首惡。當謀爲內應。指揮馬昇者爲賊所擁戴。威令行於城中。榮等激以大義。昇委心焉。遂歃血盟。令鎮撫王掌出告樊繼祖。繼祖深加獎慰。告源清。源清陽許之。令人穴城詐給票。汲水灌之。穴者死焉。昇大恚恨。將不利於榮等事。

遂已。源清知不可爲，乃謝病乞解任。上大怒，罷斥之。以戶部侍郎張瓚代源清總制。瓚入軍，下令曰：毋攻城。吾將有請也。因遣騎招孫允中於懷仁與議。時允中已被劾落職矣。又密遣使諭城中主事楚書觀兵城下。城中登陴請曰：吾輩非殺將者，畏死自全耳。請書入。書遂入。慰諭之。且言用兵非朝廷意，衆皆望闕呼萬歲。書仍進馬昇等陳朝廷威德，曉以禍福，令獻首惡。是夜，斬倡亂黃鎮等二十四級，獻軍門。於是繼祖亦馳入城，以鎮撫人心。卻永猶沮撓，倡言繼祖伏兵爲內應，衆果夜驚。繼祖堅臥不起，乃安。瓚復遣允中入城宣諭之。繼祖乃榜諭城中，大發倉粟賑濟，稍稍繩以法，無賴縱恣者，搃殺一二人以徇。衆稍甯。瓚遂馳至城下，退諸路兵二舍外。諸將領以次上謁。次日，張鼓吹與御史蘇佑自南門入，置酒高會，賞賚將士。城中乃大定。小王子聞之，亦遠遁。瓚還居上谷，遙制之事。聞上大悅。降璽書遣禮部侍郎黃綰往核功罪，定賞罰。永猶欲沮敗事，綰先疏罷永，始抵鎮。宣御劄璽書，慰宗室傷殘，掩骸骼，賑窮乏，命守臣捕誅遺惡。雪誣罔，乃核激變之由，正欺蔽之罪，差別諸將士功賞。疏上久之，徵劉源清、卻永下獄。源清削籍去。永降級立功贖罪。潘傲、孫允中復原職致仕。張瓚、樊繼祖等各賞賚有差。

谷應泰曰：大同南蔽太原，西阻榆林，東連上谷，蓋屹然重鎮矣。更得一二賢明將吏，分甘絕少，噢咻士卒，號令嚴明，勇氣百倍，則李牧守郡，匹馬不窺，郅都在邊，幕庭遠徙，斯蓋外攘之重寄，甯有內潰之猝患哉。乃嘉靖三年，巡撫張文錦議以去城百里增築五堡，堡各列戍，徙卒實之，藩籬固而後明堂尊，屏障列而後天府重。文錦之策，未爲謬也。但當出車以遣新軍，采薇以勞還戍，拊循有素，踐更有法，信而後勞，誰敢違者。奈何澤門興役，鞭笞賈怨，秦法送徒，後期皆斬，而郭鑑、柳忠一呼倡亂，文錦、賈鑑裂尸並亡，嗟乎！楊

炎建城而涇原兵叛。宏靖刻糧而盧龍軍反。事勢相激。無足怪者。此時便當擇智勇之臣。秉節鉞之重。或  
恩義久敷。或雅量素蓄。聲罪渠魁。撫輯餘醜。收元振之黨。以戮叛人。燒王郎之書。以安反側。則戍卒雖譁。  
可一鼓而定也。無如下多獷悍。叛服不常。上鮮方略。勦撫均失。以故鑑忠授首。郭庖復起。羶兒旣斃。季富  
又興。脫巾相尋。勢若蝟毛。此固不可以勦也。又若泣訴天祐。更焚王振。縛獻胡雄。旋殺李瑾。磨牙相向。狀  
同瘕狗。此又不可以撫也。逮至劉源清斬關大殺。李文芝決水灌城。而後獸不走險。鹿不擇音。非馬穎厚  
結元海。卽懷恩外誘吐蕃。許河西以賂秦師。指金帛以酬回紇。邊關重險。幾於拱而授之矣。所幸樊繼祖  
單騎直入。張瓚麾退王師。發粟賑饑。鼓吹高宴。亂卒憂危自茲釋矣。譬之子儀入河中。而一府無譁。秀實  
入軍門而衆皆解甲。無他。開誠布公。推以赤心而已。然則亂延十紀。變凡七起者。非真豺豕性成。威惠兩  
絀也。特以上下相蒙。弓影之疑。蓄於中。恩信不著。投杼之說動於外也。所可恨者。劉源清之主勦也。王憲  
和之於內。張孚敬持之於上。而繼祖疏入。不報便宜濟事。卒之樊獲璽書。劉繫廷尉。奸臣在內。大將立功。  
賴肅帝之心開爾。

## 卷五十八

### 議復河套

英宗天順六年春正月。毛里孩等入河套。是時孛來稍衰。其大部毛里孩、阿羅出、少師猛可與孛來相仇  
殺。而立脫思爲可汗。脫思故小王子從兄也。於是毛里孩、阿羅出、孛羅忽三部始入河套。然以爭水草不

相下不能深入爲寇。時遣人買馬，頗通朵顏諸衛，擾塞下。河套周圍三面阻黃河，土肥饒可耕桑，密邇陝西榆林堡，東至山西偏頭關，西至寧夏鎮，東西可二千里，南至邊牆，北至黃河，遠者八九百里，近者二三百里，卽周之朔方，秦之河南地，漢之定襄郡，赫連勃勃、趙元昊之所據以爲國者也。唐三受降城在河套北，黃河之外，元東勝州在受降城之東。國初諸部遁河外，居漠北，延綏無事。正統以後，王驥等兵次甘肅，申明號令，河套以甯。然間亦渡河，繼而守將都督王禎始築榆林城，創沿邊一帶營堡墩臺，累增至二十四所。歲調延安、綏德、慶陽三衛官軍分戍，而河南、陝西客兵助之。列營積糧，以遏要衝。景泰初，犯延慶，不敢深入。至是，阿羅出掠邊人，以爲嚮導。因知河套所在，不時出沒，遂爲邊境門庭之害。

憲宗成化元年冬十月，毛里孩寇陝西。都御史項忠及彰武伯楊信禦之，遁去。

二年春三月，延綏紀功兵部郎中楊琚奏河套寇屢爲邊患，近有百戶朱長年七十餘，自幼熟遊河套，親與臣言套內地廣田腴，亦有鹽池、海子、葭州等，民多墩外種食。正統閒有甯夏副總兵黃鑑奏欲偏頭關、東勝關、黃河西岸地名一顆樹起，至榆溝、速迷都、六鎮、沙河、海子山、火石腦兒、鹹石海子、回回墓、紅鹽池、百眼井、甜水井、黃河溝至甯夏黑山、觜馬營等處，共立十三城堡，七十三墩臺，東西七百餘里，實與偏頭關、甯夏相接，惟隔一黃河耳。當時議者以爲地土平漫難據，已之後總兵官石亨又奏欲將延綏一帶營堡移徙直道，實爲萬世防邊之長策也。帝曰：楊琚所奏移堡防邊，具有證據，其言有理。兵部卽會官議處以聞。六月，大學士李賢等奏河套與延綏接境，原非敵人巢穴。今毛里孩居處其中，出沒不常，苟欲安邊，必須大舉而後可。乞令兵部會官博議，進兵搜勦，務在盡絕。其總制將官與凡出兵事宜，俱預處請畫。

又秋禾方熟。彼必入掠。而延綏、鄜慶、環縣一帶。宜推選武將一人。統步騎精兵萬人守禦。庶幾有備無患。於是兵部尚書王復同、孫繼宗等集議。以大同總兵楊信舊鎮延綏。稔知地利。宜召還京。面受成算。其陝西、甯夏、延綏、甘涼、大同、宣府鎮巡諸官。亦宜勅令整飭兵備。候期調發。帝允所擬。遂召信還。以修武伯沈煜代之。乃敕陝西巡撫項忠、太監裴當、總兵楊信協謀征勦河套。

三年春正月。毛里孩乞通貢。制曰。無約而請和者。謀也。其令各邊僅備之。毛里孩不得貢。渡河東侵大同。廷議楊信兵少。不足制之。於是撫甯伯朱永爲大將軍。率京兵往。都督劉聚、鮑政副之。會毛里孩再上書求貢。許之。二月。毛里孩入大同界。帝命原調大同、宣府、偏頭關等處搜勦。河套官軍仍留各城守禦。四年春二月。虬加思蘭殺阿羅出。併其衆。而結元孽滿魯都入河套。

六年。李羅忽等據河套。邊人大擾。乃敕都御史王越總關中軍務。議搜河套。復東勝。越等奏言。河套水草甘肥。易於駐劄。腹裏之地。道路曠遠。難於守禦。陝西李羅忽、虬加思蘭等糾率醜類。居套分掠。出入數年。雖嘗阻於我師。然未經挫衄。終不肯退。近日據我河曲。擾我延綏。甯夏深入我平鞏。固原近又覘我大同。逼我萬全。乞命廷臣共議。得一爵位。崇重威望。素著者。統制諸軍。往圖大舉。朝廷從其義。以武定侯趙輔充總兵官。總制各路軍馬。搜河套。尋以疾還。遂不復舉。

七年春二月。朱永以何套寇未退。議戰守二策。事下兵部。白圭等以馬方瘦損。供餉不敷。勢難進勦。請命諸將慎爲守禦。以圖萬全。帝從之。命吏部右侍郎葉盛行視河套。時議增兵設險。或請大舉驅之出河外。沿河築城堡。抵東勝。徙民耕守其中。盛往上言。搜河套。復東勝。未可輕議。唯增兵守險。可爲遠圖。帝從之。

九年秋九月。滿魯都與孛羅忽并寇韋州。總督王越偵知其老弱盡行。巢於紅鹽池。可取也。乃與總兵許甯、游擊周玉等率輕騎晝夜馳三百餘里。襲擊之。擒斬三百餘級。獲雜畜器械甚衆。盡燒其廬帳而還。自據河套以來。無歲不深入。殺掠人畜至數千百萬。邊將擁兵莫敢誰何。徼所遺老弱及殺平民以上功冒陞賞。三遣大將朱永、趙輔、劉聚出師。亦多效邊將故習。以是益橫內地且危。廷臣日議搜套。聚兵八萬。糜資儲無算。而師竟不出。至是捷。賊內失其孥。相與悲泣。渡河北去。患少弭。

孝宗宏治八年。北部復擁衆入河套住牧。

十三年冬十二月。火箭入河套。火箭等渡河而東。焦家坪、娘娘灘、羊圈子等處爲衝。其要在偏頭關。三受降城。受降城者。唐所築。禦寇於河外者也。中城南直朔方。西城南直靈武。東城南直榆林。相距各四百餘里。花馬池要地。成化前。患在河西。據套而河東爲其衝。花馬池居其中。都御史徐廷璋、楊一清、王瓊新舊城效力甚堅。花馬池西至興武營一百二十里。又西至橫城堡一百四十里。一漫沙漠。寇路拆牆頗易。入靈韋。掠環慶。犯平固。則清水營、鐵柱泉、小鹽池一帶爲捷徑。自大廣武渡河而下。至靈韋亦易。

武宗正德元年春正月。總制三邊楊一清上言。受降據三面之險。當千里之蔽。正統以來。舍受降而衛東勝。已失一面之險。又輟東勝以就延綏。則以一面之地遮千餘里之衝。遂使河套沃壤爲寇甌脫。巢穴其中。而盡失外險。反備南河。此陝西邊患所以相尋而莫之解也。茲欲復守東勝。因河爲固。東按大同。西接甯夏。使河套千里之地歸我耕牧。開屯田數百里。用省內運。則陝西猶可息肩也。又上六事。其一。修築定邊營。迤東邊牆。其二。修復甯遠基邊。迤西北堡。其三。增設花馬池及興武營衛所。其四。防禦靈州上達。其

五整飭韋州官軍。其六、增修黑山鎮遠關墩臺。多中機宜。帝可其奏。刻期奏績。以忤劉瑾乞休。工亦罷。僅築四十餘里。屹然巨嶂也。初宏治末。朝廷清明。諸大臣協和。盡心休國。爲經久計。以故議復河套。會孝宗崩。瑾既專政。一清復得罪去。遂無敢言及河套者。我邊日減。敵日進矣。

嘉靖元年。套騎二萬自井兒堡撒牆入固原。平涼。涇州。殺指揮楊洪。千戶劉瑞。先是。正德間。小王子三子。長阿爾倫。次阿著。次滿官噴。太師亦不刺殺阿爾倫。遁入河西。西海之有寇。自亦不刺始也。阿爾倫二子。長卜赤。次七明。皆幼。阿著稱小王子。未幾死。衆立卜赤。稱亦克罕。大營五。曰好陳察罕兒。曰召阿兒。曰把郎阿兒。曰克失旦。曰卜爾報。可五萬人。卜赤居中屯牧。五營環之。又東有岡笛罕哈爾填三部。岡笛部營三。其渠滿會王罕哈部營三。其渠猛可不郎爾填部營一。其渠可都笛三部共六萬人。居沙漠東。偏與朵顏爲鄰。西有應紹不。阿爾禿斯。滿官噴三部。應紹不部營十。曰阿速。曰哈喇噴。曰舍奴郎。曰孛來。曰當刺兒罕。曰夫保噴。曰叭兒廩。曰荒花旦。曰奴母噴。曰哈不乃麻。故屬亦不刺。亦不刺遁西海去。遂分散無幾。惟哈刺一營僅全。阿爾禿斯部營七。故亦屬。亦不刺後從吉囊。合爲四營。曰噶合斯。曰偶甚。曰叭哈斯納。曰打郎。衆可七萬。滿官噴部營八。故屬火篩。後從俺答。合爲六營。曰多羅。曰土悶畏吾兒。曰兀甚。曰叭要。曰兀魯。曰土吉刺。三部衆可四萬。吉囊俺答皆出入河套。阿著子也。諸種中獨強。時寇延甯。宣大。南有哈刺噴。哈連二部。哈刺噴部營一。渠把答罕柰。衆可三萬。哈連部營一。渠失刺台吉。衆可二萬。居宣府。大同塞外。北有兀良罕營一。故小王子北部也。因隙叛去。至今相攻。又西爲瓦刺。可五萬人。世與土魯番爲讐。諸部雖逐水草。遷徙不定。然營省有分地。不相亂。十二月。寇固原環衛閒。殺傷以萬計。

十七年冬十一月。巡按山西御史何贊疏言。河套爲吉囊所據。外連西海。內構大同。宜急勦除。其策有二。一曰計以破之。二曰勢以走之。而其要在於久任撫臣以責成效。興復屯法以裕邊儲。議寢不行。

二十四年春正月。巡按山西御史陳豪疏言。北寇三犯山西。殺傷百萬。此不可以常寇日之計。費帑金六百萬。而戰守無尺寸功。諸臣建議。動稱屯守。不知賊衆內侵。不由諸隘口。皆猿攀絕壁。蟻附懸崖。邊垣又何足恃。况諸鎮烽卒皆媒寇。日爲生計。多囊針刀。過偵者賂求不殺。彼此譯語。互爲和同。待其深入。然後舉燧發礮。降堠轉走。蓋不止一日一處爲爾。且邇來之寇。類多我民亡命爲彼向導。故連歲非時。倏至冒險深入。如履故途。乞下廷臣集議萬全之策。期於必戰。盡復套地。庶可弭其內擾之患。而邊境無虞矣。章下兵部議行。

二十五年秋八月。套騎三萬餘入犯延安府。至三原。涇陽。殺掠人畜無算。總督三邊侍郎曾銑講復河套。條爲八議。一曰定廟謨。二曰立綱紀。三曰審機宜。四曰選將材。五曰任賢能。六曰足芻餉。七曰明賞罰。八曰修長技。計萬餘言。指據明悉。下兵部議行。冬十二月。總督曾銑。巡撫謝蘭。張問行等奏。延綏密與套寇爲鄰。自定邊營至黃甫川。連年入寇。率由是道。所當急爲修繕。分地定工。次第修舉。起自定邊營。東至龍州堡。計長四百四十餘里。爲中段。自雙山堡而東。至黃甫川。計長五百九十餘里。爲下段。歲修一段。期以三年竣事。乞發帑銀如宣。大山西故事。疏下部議。銑復言。套賊不除。中國之禍未可量也。今日之計。宜用練兵六萬人。益以山東槍手二千。多備矢石。每當秋夏之交。攜五十日之餉。水陸並進。乘其無備。直擣巢穴。材官騶發礮火雷擊。則彼不能支。歲歲爲之。每出益勵。彼勢必折。將遁而出。套之恐後矣。俟其遠出。然



後因祖宗之故疆，并河爲塞，修築墩隍，建置衛所，處分戍卒，講求屯政，以省全陝之轉輸，壯中國之形勢。此中與之大烈也。願陛下斷自聖心，亟定大計。夫臣方議築邊，又議復套者，以築邊不過數十年計耳，復套則驅斥兇殘，臨河作陣，乃國家萬年久遠之計。唯陛下裁之。疏下，兵部議行。謂築邊復套，兩俱不易，相較則復套又難。夫欲率數萬之衆，費五十日之糧，深入險遠艱阻之域，以驅數十年盤據之兵，談何容易。故不若修牆築邊，爲計完而成功可期也。但延綏一帶地勢延漫，土雜沙礫，居民隔遠，最爲荒涼。若欲一千五百里之地而責成於三年之功，恐未易集。縱使能成，亦難爲守。宜仍行銑等計議。以聞。帝曰：寇據河套，爲中國患久矣。連歲關隘橫被荼毒，朕宵旰念之。而邊臣無分主憂者。今銑能倡復套之謀，甚見壯猷。本兵乃久之始覆，迄無定見，何也？其令銑更與諸邊臣悉心圖議，務求長算。若邊境千里沙漠，與宣大地異，但可就要害修築。兵部其發銀三千萬兩與銑，聽其修邊餉兵造器，便宜調度支用。備明年防禦計。二十六年夏五月，總督曾銑出塞襲套部，勝之。初春時，衆督兵出塞掩擊，敗還，不以聞。至是復襲之。寇覺銑，搜選銳卒督之戰，馘斬二十六人，生擒一人，脫脫虎斃於矢石者甚衆，獲馬牛駝橐九百有五十，械器八百五十三。以捷聞。敵移帳漸北，閒以輕騎出掠。銑復督諸軍驅之，遂遠遁，不敢近塞。銑旣以捷聞，更列上諸臣功罪。帝以套寇連年深入，如蹈無人之境，大損國威。銑能率兵出塞，擒斬有功，命增俸，賜白金紵幣有差。十一月，總督曾銑會同陝西巡撫謝蘭、延綏巡撫楊守謙、甯夏巡撫王邦瑞及三鎮總兵議復套方略，乃條列十八事：曰恢復河套，修築邊牆，選擇將材，選練士卒，買補馬羸，進兵機宜，轉運糧餉，申明賞罰，兼備舟車，多置火器，招降用間，審度時勢，防守河套，營田儲蓄，及明職守，息訛言，寬文法，處孽畜，又

上營陣八圖曰立營總圖。及遇敵駐戰、選鋒車戰、騎兵迎戰、步兵搏戰、行營進攻、變營長驅、獲功收兵各圖。帝覽而嘉之。奏下兵部、尚書王以旂會廷臣集議。言曾銑先後章疏俱可施行。帝曰：寇據河套，爲國家患，朕軫宵旰有年，念無任事之臣。今銑前後所上方略，卿等旣已詳酌，卽會同多官協忠抒謀，以圖廓清。其定策以聞。

二十七年春正月，大學士夏言罷。初，河套之議，言力主之。嚴嵩積憾言，且欲躡其首輔。於是因災異疏陳缺失，謂曾銑開邊啓釁，誤國大計所致。夏言表裏雷同，淆亂國事，當罪。遂罷言。逮銑詣京，出兵部尚書王以旂總督軍務。廷臣議罪，凡與議復套者悉奪俸，并罰言官廷杖有差。於是復套事宜悉爲停止。會俺答蹈冰踰河入套，將謀犯延甯，聲勢甚張。巡撫延綏楊守謙以聞。嵩激上怒，謂俺答合衆入套，皆曾銑開邊啓釁所致。於是兵部侍郎萬鎮等參曾銑罔上貪功之罪。甘肅總兵咸甯侯仇鸞初被銑劾，奏逮京，亦上疏訐銑。嵩主之，棄銑市。銑有機略，初爲御史巡按遼東，會遼陽廣甯撫順兵變，銑密運方略，悉捕首惡，誅之。全遼大定，時論以爲才。比視西師，乃倡復套議。夏言好邊功，遂力主持之。時敵勢方熾，而我兵積弱，銑疏下部議。久之未覆。上亦危疑之，密以訊嚴嵩。嵩素與言不相能，欲因是陷言。銑、銑竟論死。家無餘資，妻子狼狽遠徙。後九月，復寇宣府，上曰：寇以言、銑收河套，故報復。至此遂并斬言。天下並冤之。自言：銑死，竟無一人議復河套者。

谷應泰曰：邊備所爭者二，地勢坦衍，敵騎四入，列守不足，追哨難及。蘇子所謂大梁四戰之衝，汪立信所謂長江隨處可入是也。地或險阨，山谷林薄，寒饒不耕，沙鹵乏水，耿弇弟言五溪水險，縋糧而食，馬文升

言西域道旱。因雪爲泉是也。若河套三面憑河。荷戈守禦。險踰長城。地又肥饒。耕桑自給。然則河套屯守。歲省租稅數十萬。障塞之卒亦十餘萬。東距偏頭。西抵甯夏。二千里中。晝乏旌旗。夜罕鼓柝矣。周城朔方。漢開河西。有自來也。邊備久虛。縱敵深入。畜牧既久。樂不思去。伏蒿之雉。不復畏鷹。噉穴之鼠。不復畏貓。而邊將又坐視養癰。莫敢深入。憲宗時。楊琚請建一十三城堡。七十四墩臺。李文達又以中筦力贊。乃三帥授劍。或輿疾徵還。或遷延不出。惟王越深入紅鹽池。焚其廬帳。劫其器甲。賊喪失妻孥。相顧慟哭。而大帥不繼。虎牢一關。卒爲楚有。河西數郡。折爲秦臣。武宗時。楊一清又請力圖受降。旋以璫瑾去位。夫仁愿且爭險於黃河之外。而扼受降。今人乃斂兵於河套之內。僅守延綏。開門延寇。角勝堂奧。三方被敵。秦晉騷然。世宗之世。延安。涇陽。皆供蹂躪矣。曾銑毅然請行。願以數萬之衆。持五十日之糧。水陸星馳。矢礮電發。燔燒積聚。驅掠馬牛。往來出沒。歲無甯晷。食道旣窮。項王亦欲踐鴻溝之約。將士思歸。關羽不能救荊州之潰。世宗屢降璽書。特頒文綺。展圖嘉歎。刻期廓清。而夏言又力主銑議。樞臣俱先後奏行。辟之充國。旣有孝宣。復煩魏相。魏尙已逢文帝。更遇馮唐。君臣將相。千載一時。而乃急殺大臣。以當星變。先誅渠帥。以謝兵端。道濟誅而長城自壞。得臣死而晉毒已亡。予所怪者。反禍爲福。難於轉石。化成爲敗。疾又轉圜。九重廟算。倏智倏愚。幕府平章。忽功忽罪。匣中之劍。竟斬曹彬。拜將之壇。并收相國。世宗之英察。何如也。



萬 有 文 庫

第一集一千種

王雲五主編

明史紀事本末

(九)

谷應泰著

商務印書館發行

萬有文庫

第一集一千種



商務印書館發行

明史紀事本末

(九)

谷應泰著



國學基本叢書

中央圖書館藏書



3421—9



# 明史紀事本末

## 卷五十九

### 庚戌之變

嘉靖二十九年夏六月。俺答寇大同境。潰牆入。悉精兵伏溝壑中。而以老弱百騎往來爲餌。偵騎信之。報總兵張達。達素以果銳。敢入至大將。意輕之。合兵。兵未合。而遽率麾下馳擊之。伏發。圍達數匝。馬蹶。遂見殺。副帥林椿聞達被圍。不介馬而馳救。達不克。亦死之。達、椿皆驍勇善戰。俺答得二將首。輒引去。事聞。逮總督侍郎郭宗皋。巡撫都御史陳耀下獄。耀杖死。宗皋謫戍遼左。贈達左都督。椿都督同知。賜祀立祠。春秋祀之。八月。俺答入薊州塞。初。張達敗沒。乃起復翁萬達代郭宗皋總督。趙錦代陳耀巡撫。以仇鸞爲宣大總兵。萬達家居未至。命侍郎蘇佑攝其事。佑抵鎮。卽上疏請益兵食。未報。而俺答狼台吉復擁衆窺大同。初。仇鸞坐廢。居京師邸。以賄嚴世蕃得總兵宣大。至是。惶懼無策。廝養時義侯榮者說鸞曰。主勿憂。吾爲主解之。乃爲鸞持重賂賂俺答。令移寇他塞。勿犯大同。俺答受貨幣。遺之箭蠶以爲信。而與之盟。遂東去。諜者復白敵中語。欲寇宣府東。遼左西。兵部尙書丁汝夔謂帝厭警報不悉。以聞。但申飭薊州撫鎮使嚴備。已而警報漸甚。乃發諸邊兵萬二千騎。京營兵二萬四千騎。分布宣薊諸關隘。邊兵取符驗期會。未卽至。而京兵悉市井傭保子。識者知其必敗。秋八月乙亥。俺答帥部下至古北口。以數千騎攻牆。都御史王汝孝悉衆出火礮。矢石下攻之。俺答乃佯督兵綴薊師。而別遣精騎從間道黃榆溝潰牆出師。後

京兵大驚潰。爭棄甲及馬。竄山谷林莽中。寇遂大殺掠。懷柔、順義吏士無算。長驅入內地。巡按順天御史王忬聞報。度兵弱無能禦者。夜草疏言敵兵慄悍若風雨。而古北口距京師僅十舍。漫衍無衛戍。瞭望神京。陵寢萬一蕩搖。事係非小。請速集廷臣議戰守策。而身出駐通州。召吏民給仗聽約束。收漕舟艤潞河西。勿使爲敵用。甫畢。而夜半敵兵果至。營河東二十里孤山。汝口諸處。忬復爲疏緹城。使使來京師請援。京師震恐。急集諸營兵。城守少壯者已悉出邊堠。敗喪僅餘四五萬人。而老弱半之。又半役總兵提督太監家。不令出伍。倉卒從武庫索甲仗。武庫闕。又援例需價。不時發。久之不能軍。丁汝夔乃以聞。帝大驚。詔吏部左侍郎王邦瑞、定西侯蔣傅、提督九門文武大臣各十三人守一門。又別遣都御史商大節督科道官募民間材力者蒼頭義軍垂四萬。及坊甲保伍分置諸門。睥睨間集天下應武試者千餘人。分從諸大臣策應。檄召諸鎮兵勤王。時寇騎逼通州數日。前阻水未能渡。王忬日夜乘城守。不能支。連告急。詔遣都御史王儀往援。己卯。咸甯侯仇鸞得勤王檄。以大同兵二萬入援。先是寇旣東行。時義侯榮謂鸞曰。賊騎東。公宜自請入。可以爲功。而上結於天子。鸞悅。卽佯奏臣偵賊東犯薊鎮。誠恐京師震驚。請以便宜應援。或隨賊搏戰。或徑趨居庸爲防守。帝壯之。詔留駐居庸關。聞警入援。而俺答果由薊鎮攻古北口。入犯京師。帝益信鸞。詔入援。鸞與副總兵徐珏、游擊張騰等率兵馳至。陳通州河西。帝大喜。時保定都御史楊守謙以五千騎至。延綏副將朱楫以三千騎至。人心稍安。已而河間、宣府、山西、遼陽諸將各以兵先後至。凡七鎮。五萬餘人。帝內視稍彊。各賜璽書褒獎。予金帛。令躡賊。而拜咸甯侯仇鸞爲大將軍。諸道兵悉屬焉。賜襲衣。玉帶。上尊及千金。又賜封記。文曰。朕所重。唯卿一人。得密啓奏。進以楊守謙爲兵部左侍郎。總

督各路戎務衛京師。都督陸炳提督皇城諸門。譏察不虞。都御史商大節督巡五城。防內釁。太子太保禮部尚書徐階奏釋故參將戴綸。歐陽安等繫。令從軍自效。分遣京營諸將營於城內外各巷陌間。京營兵素未見敵。驅之出。不敢前。城外及近地居民擁入。連日夜不絕。多被血淋漓至者。都督陸炳請出太倉米減直濟流徙老弱。俱報可。時變起倉卒。諸務未備。勤王師各輕騎馳至。未費糗糧。制下犒師牛酒。諸費皆不知所出。戶部文移往復二三日。軍士始得數餅餌。開庾發粟。則囊釜甌皆無所需。故士卒饑疲。都督陸炳言戶部臣失預計。軍興糧餽不支。士多餒死。帝怒。奪尚書李士翱以下諸官職。戴罪辦事。俺答兵自白河東渡潞水西北行。大掠村落居民。焚燒廬舍。火日夜不絕。郊民扶傷集門下。門閉不得入。號痛之聲徹於西內。帝命啓而納之。是日俺答掠婦女大飲演武堂上。遊騎往返六門外。仇鸞率勤王諸兵不敢擊。時遣義榮與之通。許貢市以自安。辛巳至東直門。執御廐內八人以去。不殺縛之。見俺答踞坐氈帳中。謂曰。若歸見天子。好爲我致書。自解送歸。見帝。啓書多嫚語。求入貢。壬午。帝召大學士嚴嵩。李本。尚書徐階。對於西苑。出書示之。曰。何以應之。嵩曰。此禮部事。階曰。事雖在臣。唯上主之。帝曰。正宜商議。階曰。寇駐兵近郊。而我戰守之策一無所有。宜權許以款。第恐將來要求無厭耳。帝曰。苟利社稷。皮幣珠玉皆非所愛。階曰。止於皮幣珠玉則可。萬一有不能從。將奈何。帝竦然曰。卿可謂遠慮。階因請以計款之。言其書皆漢文難信。且無臨城脅貢之禮。可令退出大邊外。別遣使齎番文。因大同守臣爲奏。事乃可從。往返間四方援兵計皆可至。我之戰守有備矣。帝曰。卿言是。命出集廷臣議。日午羣臣畢集。階出俺答書。言欲以三千人入貢。許之則緩兵。否則益兵破京師。羣臣相顧莫敢發。因陳筆劄。令各書所見。奏請上裁。國子司業趙

貞吉抗言曰。此不必問。問則奸邪之臣必有以和說進者。萬一許貢。則彼必入城。三千之衆。恐烏蠻驛中莫之客也。且彼肆深入。內外夾攻。何以禦之。不幾震驚宮闕乎。不務驅逐。而畏其恐喝。迫而許之。何異城下盟。檢討毛起。謂時事孔棘。宜暫許之。邀使出塞。而後拒之。貞吉力叱起。羣臣俱難之。奏入。乃止。是夕。火光燭天。德勝。安定。門北人居皆燬。上在西內。大震懼。聞中官稍稍道貞吉語。乃馳使召入對。給筆札。命疏所欲言。貞吉上言。陛下宜御奉天門。下詔罪己。追獎故都督周尙文之功。以勵邊帥。釋給事沈束於獄。以開言路。輕損軍之令。重賞功之格。飭文武百司共爲城守。遣官宣諭諸營兵。使力戰。且士不力戰。以主將多冒首功。今誠得首功一。卽予金百。捐金不十萬。賊且盡矣。帝壯之。擢貞吉爲左春坊左諭德。兼河南道監察御史。稱詔齎五萬金。宣諭行營將士。通政使樊深條禦寇七事。中言仇鸞未聞一戰。非士不用命。卽主將養寇要功。乞密遣近侍詰狀。書奏。上大怒。黜爲民。癸未。寇由鞏華城犯諸陵。轉掠西山良鄉以西。保定皆震。時帝久不視朝。吏部尙書夏邦謨疏言人情洶洶。非上躬御正朝。廷見廷臣。不足以塞天下望。振威武。許之。是日。文武大臣具服待命闕下。晡時。帝始出御奉天殿。降敕切責諸大臣。還宮。羣臣就午門跪聽宣敕。皆惴慄計有處分。迨散。門且下鍵矣。乃敕遣官校逮繫駐守通州都御史王儀。巡撫薊遼都御史王汝孝。及薊州總兵羅希韓。詣京卽訊。已而儀至下獄。以畏懦不戰。削籍去。汝孝以道梗不及逮。初。儀至通州。命營兵屯戍城外。而身閉閣臥城中。會仇鸞引兵至。敵少卻。鸞兵往掠食諸村落。儀發兵捕執下獄。死者十數人。鸞兵大譁。欲甘心儀。時巡廩御史上其狀。帝怒。故逮治之。尋以巡按御史王忬爲僉都御史。代儀守通州。甲午。執兵部尙書丁汝夔。及左侍郎楊守謙。下詔獄。初。寇逼通州。汝夔聞警。束手無措。

遣募哨敵虛實者出城。不十數里。道遇扶傷者。輒奔還。妄言見敵某所。城中輒震。已而言不信。汝夔不加罰。復募他卒偵之。如故。城中數震。而成國公朱希忠理京營。兵多役占。行伍不足。恐兵少見且獲罪。乃東西調掣爲掩飾計。士疲不得息。多出恚語。而莫曉誰調。爭詈汝夔。欲魚肉之。語稍聞禁中。時宣府延綏遼陽山西援兵悉集。廩餉不能給。兵饑怨望。仇鸞大同軍尤無律。往往椎髻劫掠村落中。時被逋獲。或自詭爲遼陽軍。遼陽軍者。朵顏諸部也。先是有傳賊中語。遼陽實導我來者。故京師訛言遼陽軍叛。而鸞方被寵遇。雖獲大同行掠者。有司不敢置之理。必以聞。帝謂大同軍首入援。行掠亦出饑疲。令付鸞自處。鸞復置不聞。汝夔不得已。乃下令勿捕大同軍。大同軍益無忌。民苦之甚於賊。大同軍旣自詭爲遼陽。民間不知。遂謂汝夔山東人。以鄉曲故。庇遼陽叛軍。及寇薄城下。汝夔益惶急。恐喪師。令諸將勿輕戰。諸軍故惟怯不敢戰。皆諉言汝夔禁不發。民間益歸罪汝夔。而鸞機譎。謀於大學士嵩。嵩謂敗於邊可隱。敗於郊不可隱。飽將自去。惟堅壁爲上策。鸞數稱率兵往擊賊。賊實在城下。顧遠屯郊垆外。不敢近。城中莫知鸞擊與否。鸞得死賊首六級。奪馬十餘。詐謂戰得之。守謙被命屯城下。又以兵少。故不敢一擊賊。帝聞之。益謂鸞遠出禦敵。而守謙畏懦不出師。與汝夔并切責之。諸中貴園墅在城外。又多所殘毀。爭泣訴帝前。謂守謙汝夔貳於賊。帝時從高望城外。火已心恚。諸治兵者聞是。益奮怒。不誅一大臣。亡以懲。乃捕汝夔下詔獄。就廷訊。使使自軍前逮守謙入。下法司議罪。以聞。命王邦瑞攝兵部。艾希淳代將守謙兵。於是刑部侍郎彭黯。左都御史屠喬。大理寺少卿沈良才等論汝夔守謙罪當斬。而爰書冗長。錄不速竟。帝坐齋宮。趣獄具不得。謂黯等比周。將有所規免。俱逮繫獄。各廷杖有差。汝夔守謙俱棄市。流其妻三千里外。子戍鐵

嶺衛。謫左諭德趙貞吉荔浦縣典史。初貞吉廷議罷。盛氣謁嚴嵩於西苑直房。嵩不見。貞吉怒叱門者。通政趙文華趨入。顧曰。公休矣。天下事當徐議之。貞吉怒曰。權門犬何知天下事。嵩聞大恨。乃佯薦貞吉出城。賈銀勞軍。方北騎充斥。徵發旁午。戶工二部官皆得罪。犒銀不時發。諸軍分屯城外。貞吉僦民車致銀。仇鸞所鸞不受。敵騎已稍遠。貞吉計無所出。賈敕巡城外。徧給諸營。而還復命。嵩謂貞吉狂誕。追論其申理周尙文。沈束非是。下獄杖九十。有是謫。己卯。俺答引而西。前後所掠男女羸畜金帛財物既滿。志捆載去。欲西奪白羊口。出塞而留餘衆京師外。以爲疑兵。諸道兵悉屬大將軍。凡十餘萬騎。相視莫敢前發一矢。俺答至白羊口。守將阨險禦。不得出。稍棄牛羊婦女等。復擁衆東南行。至昌平北。猝與鸞兵遇。鸞出不意。倉卒不能軍。敵縱騎蹂陣而入。殺傷千餘人。幾獲鸞。以裨將戴綸。徐仁力救。僅以身免。乃更取平民首上之。自以爲功。寇騎遂長驅至天壽山。總兵趙國忠列陣紅門前。不敢入。奪道循潮河川。由古北口故道出。京師戒嚴。九月辛卯朔。俺答悉衆出塞。疲甚。又顧戀輜重不能軍。諸將故怯。兼白羊之敗。愈不敢逼。徐尾其後。至石匣城及張家古北等口外而還。其前後禦敵有功者。大同游擊王祿戰懷來。斬十七級。獲馬十二匹。山西游擊柴縉戰昌平。奪還男婦二百四十二人。都督仇聚戰海店。生擒四人。旣而鸞報功八十餘級。以捷聞。帝優詔慰鸞。加太保。賜金幣。遣戶部侍郎駱顒賑撫被寇諸郡縣。掩骼埋骸。慰集瘡痍。罷京營提督太監高忠。成國公朱希忠。遂安伯陳鏞。改十二團營爲三大營。曰五軍。曰神樞。曰神機。總三營。曰戎政府。以咸甯侯仇鸞入理之。爲製印章。重其任。以王邦瑞協理戎政。爲鸞副。邦瑞奏用兵部主事二人。給事中。御史各一人。議論多悟鸞。主事申燧復持法不爲屈。疏京營弊政。乞釐革之。鸞怒。密

陷燧出補外。乃言京營用給事中、御史不便，皆革之。置薊遼總督大臣，以薊州、保定、遼東一鎮隸焉。改孫檜爲兵部侍郎，總督薊遼。未幾，以何棟代之。冬十月，募諸道兵入衛京師。山東、山西、河南諸府歲集京師，練備秋防。秋後復散去，以是爲常。如踐更卒例。復選各邊鎮銳卒入衛京師，以京營將分練邊兵。從咸甯侯鸞之請也。兵部覆言：二鎮京師之門戶，禦寇者不於門戶，而與之格鬪於堂奧之間，鮮不危矣。帝不聽。第免二鎮卒不預徵。於是各邊共選六萬八千餘人，班上京師，與京營兵雜練之。塞上有警，邊將不得徵集，而京師在邊者不任邊責，恣意朘削，自營人人自危矣。仇鸞請駐師宣大間，整飭兵甲。俟冬月大舉，以紓華夏之氣。乃班師入衛，以備秋防。帝嘉之，命兵部會官集議。兵部左侍郎史道、戶部尚書孫應奎、工部尚書胡松等上議曰：俺答犯順，深入郊圻，震驚陵寢，荼毒元元，罪在不赦。皇上深懷大計，欲興問罪之師，而復有敵愾禦侮如鸞者，身任其事。臣等僉謀，俱如鸞議。卽今整齊士馬，臣道等之職，預儲軍餉。臣應奎等之職，利精器械。臣松等之職，帝悅從之。十一月，仇鸞請易置三輔重臣，以大同總兵徐珏駐易州，以徐仁代守大同，而宣府薊鎮總兵李鳳鳴成勳互易其地。帝命兵部從之。於是王邦瑞上言：予奪者，朝廷之大權。命將者，天子之重柄。祖宗時，總兵正副官皆兵部會同府部大臣集議。每上一人，恭候裁定。所以慎重防杜其漸，示臣下不敢專也。今鸞坐名擬任，更易四將，則九邊握兵柄者，有不日屬心向，妄生覬覦者乎？皇上聖明，推心賢帥，何所不可。臣愚以爲國家典制，關係非輕。聖人舉動，萬世作則。臣待罪本兵，不敢不言。帝曰：戎政初修，忠賢是託。况朕有密咨，非鸞專權。爾兵部若隨事效忠，用無不當。不待更易，矧勞朕心邪？一籌未發，而攻毀之。謀國之忠，固若是乎？復諭廷臣曰：昔吾太祖兵柄多委任諸大將，未

有作謗者。邦瑞以敵退未受加擢。故爲是言。是翟鵬之怨上也。夫破格舉事。而盡忠者乃不能容。倘敵再至。其效汝夔之誤國乎。邦瑞聞諭。莫知所措。仇鸞帥諸鎮兵出宣大。聲言擣巢。歷久不擊。乃稍出近塞。夜襲敵營。斬老弱數級而還。鸞自劾無功。上不問。乃復請廣集兵糧。以明年大舉北征。命戶部遣使盡括南都及各省布政司貯積。且督歷年逋賦。時鸞恃寵作威福。所上疏。旣自內批行之。不下兵部議。王邦瑞屢疏辯之。鸞擠之。遂落職去。禮部尙書徐階極言北征事難以成功。且後患有不可測。議乃稍寢。谷應泰曰。明制內立京營。外列邊戍。邊卒屯守要害。藩衛神京。京營羽翼王室。鎮撫中夏。有事不相徵調。無事不忘訓習。制甚周也。嘉靖時。坐營大帥半出勳臣。教以耳貴。括讀奢書。兼以勃鞞制閫。魚朝觀軍戎伍。貔貅入侯門之廝養。羽林組練。參中貴之蒼頭。游手市閭。不操寸刃。廁身兵籍。濫食數丁。於是京營一制。幾同贅瘤矣。庚戌之事。主邊兵者仇鸞。主京兵者丁汝夔也。逆鸞私盟俺答。賄路避兵。鄭牛私犒。用伐秦謀。晉馬入陳。故假虞道。韋弦苟息。果如是乎。汝夔選懦。素不知兵。驟聞邊警。悉遣禁卒。倉皇就道。莫知適從。而敵騎已蹂躪內地。王師外潰於潼關。烽火內達於甘泉矣。然後索虎旅於空營。求兵仗於武庫。楚軍不戰。皆化蟲沙。晉國先聲。愈搖風鶴。傳檄召募。命曰義軍。編列市人。驅之城堡。京營至此。尙可問乎。至於邊軍雲集九門。敵騎長驅都下。便當四面合擊。隻輪不反。而乃懷光便橋。屯兵不進。宏淵靈壁。搖扇清涼。楚兵皆屬冠軍。邯鄲全恃晉鄙。長戟不施。長鑕不刺。邊軍亦復至此。國家武備。眞無可恃矣。乃始親御午門。召問百官。時無樊噲。僅有終生。急散陳平之金。親叩亞夫之壘。宋義堅不渡河。魏將虛名救趙。惟有亟斬丁公。先除元振。柰何守謙無兵而使戰。仇鸞不戰而陳俘。賞加元惡。戮出無名。當時俺答實無志中。



國縱掠而歸。不然。幸則奉天。梁州。變且晉愍。宋欽矣。前車旣覆。後軫方逾。汝夔出京兵以防邊。仇鸞召邊卒以實京。揚水之卒。圻父以卒召當誅。涇陽之兵。德宗又以未雨失算。殛罪酬功。國是全非。焦頭曲突。人謀兩誤。嗟乎。已無澶淵之智。尙思衛霍之功。上表出師。鸞欲誰欺乎。百官明知其詐。謬爲陳請。以道上譴。蓋世宗所惡者直言。而不必其忠。所喜者殺戮。而不必其當。朝有直言。則損其明。朝有殺戮。則損其威。究之。嵩本賄敗當禡。鸞已家居失職。必欲強予將相之位。成其亂賊之名。身誅族滅。爲世指笑。吾故曰。嚴嵩。仇鸞。亦無死道。其死也。世宗殺之也。

## 卷六十

### 俺答封貢

世宗嘉靖八年冬十月。吉囊俺答寇榆林。甯夏塞。總督王瓊率兵禦卻之。初。小王子有三子。長阿爾倫。次阿著。次滿官。噴。阿爾倫旣死。二子皆幼。阿著稱小王子。未幾死。衆立阿爾倫子卜赤。而阿著子二。曰吉囊。曰俺答。強甚。小王子雖稱君長。不相統攝也。吉囊分地河套。當關中。地肥饒。俺答分開原上都。最貧。以故最喜爲寇。其後漸強盛。有騎十餘萬。遂雄於諸部。滿官。噴等八營皆服屬之。時時入寇。瓊乃請修沿邊垣。墉。起蘭。洮。盡榆林。三千餘里。十月。俺答寇大同。掠井坪。應朔。九年夏五月。俺答犯甯夏。時。俺答與小王子吉囊諸部。或合或分。時時犯塞。至是。入甯夏。六月。入宣府。十年春三月。入大同塞。秋九月。犯陝西。冬十月。犯大同。旋出松潘。犯西川西境。自是無歲不入寇。前後殺略。

吏民、剽人畜以億萬計。

十九年七月，俺答諸部大舉犯宣府。先是，大同歸正人王九子言北部哈刺噴、糾俺答、兀祿、吉囊、青台吉、赤台吉等共十餘部，禱旗、晾馬，負十日糗糈入塞。比報至，俺答已過聖順川，抵尉州。所過盡破關隘，殺人盈野。總兵白爵禦之，戰於水兒亭，敗績。總兵雲冒又敗績於連雲堡。俺答留宣府境內兩月，始出塞。八月，朵顏、革蘭台結吉囊、俺答分道入大同，大掠太原諸處。初，大同之變，諸叛卒多亡出塞，北走俺答諸部。俺答擇其黠桀者，多與牛羊帳幕，令爲僧道、丐人，偵諸邊，或入京師。凡中國虛實盡走告俺答。其有材智者，李天章、高懷智等，皆署爲長。至是，俺答率諸部入塞，大同鎮卒陰遣人與約，勿掠我人畜。我亦不闌汝。俺答諸部喜，與折箭而去。乃竟越大同，由井坪、朔州抵雁門，破靈武關，入崑嵐、興縣、交城、汾州、文水、清源諸處，殺掠人畜萬計。遇大同卒，以所掠輜重遺之，求假道焉。巡撫大同史道、總兵王陞若不聞。宣府總兵白爵調赴應援，亦觀望不戰。巡撫山西都御史陳講告急，事下兵部。尙書張瓚曰：寇且退矣，何事張皇？俺答、吉囊縱掠既飽，乃旋出塞。十二月，俺答、吉囊寇大同。

二十年九月，吉囊入大同塞，大掠太原等處。又越而南，殺掠人畜數萬。京師戒嚴。已而吉囊出關，未及塞。俺答復入，又越太原而南，至石州，殺掠甚衆。上命宣大總督樊繼祖發兵應援。繼祖竟不應援。俺答縱掠而去。

二十一年夏六月，俺答入大同，大掠太原而南。時吉囊掠忻代，倡伎縱淫樂不休，病髓竭死。諸子不相屬，分居套中。而俺答日強盛，有子曰黃台吉，臂偏短，善用兵，其衆畏之。用命過於父。俺答乃糾青台吉、呪刺

哈哈刺漢及叛人高懷智、李天章等，各擁衆數萬入大同塞。其精兵戴鐵浮圖，馬具鎧刀矢鉞利，望之若冰雪。然不輕與我戰，卽餘騎足扼我矣。至是經朔州，破雁門關，掠太原而南。京師戒嚴。秋七月，廷議懸賞格，斬俺答頭與千金，官不次。其下偏裨三百金，官三級。無有應者。俺答乃擁衆越太原，列營汾水東西，掠潞安、平陽諸州縣。上命翟鵬提督宣大，偏保山東、河南諸軍務。未至，諸軍連營不相統攝，皆觀望不戰。縱寇深入，俺答大衆駐平遙，介休間。散騎入山落中，殺掠人畜輜重，迺遷就大營。諸將竟無肯乘險邀擊者。已而俺答大得利，整衆且歸。副總兵張世忠自侯城村起營，約誓諸將躡寇力戰。諸將皆閉營不救。俺答見世忠軍壯，戰又力，呼集精騎三千，蹙世忠圍之。世忠傷矢，裹創下馬步戰。俺答衆亦窘，曾矢及火藥俱盡。俺答益衆蹙之。世忠憤呼曰：「我軍被圍戰苦，諸將竟不相援，國憲天刑甯汝追邪！」復上馬，督短兵接戰。自己至酉，兵死傷殆盡。諸軍卒無援者。世忠力竭，腦中二矢墜，馬死。部將張宣、張臣痛世忠死，亦力戰死之。俺答旣勝，復分掠定襄、五臺、孟縣。又自代州出繁峙、靈邱、廣昌，殺掠人畜十餘萬。乃從廣武出關，安行出大同左衛及陽和塞而去。俺答自六月丁酉入塞，至七月庚午始出。凡掠十衛三十八州縣，殺僇男女二十餘萬，牛馬羊豕二百萬，衣縷金錢稱是。焚公私廬舍八萬區，蹂田禾數十萬頃。詔贈世忠右都督，立祠祀之。

二十三年秋九月，俺答入大同塞。總督尙書翟鵬禦卻之。冬十月，俺答破宣府塞，入紫荆關。時以巡撫朱方請撤防秋兵太早，致俺答深入。翟鵬不能禦，俱逮繫下獄。鵬削籍，方杖死闕下。二十四年，加總兵咸甯侯仇鸞太子太保，鸞甯夏人。祖鉞以襲寘鐸功封伯。己平河北盜，進封侯。鸞粗悍。

敢大言。朝臣俱薦之。襲封守甯夏。先是吉囊寇甘肅。鸞與總督侍郎張珩、巡撫張錦禦卻之。遂上言督兵禦寇。追至朵蘭地。及之大戰。一日凡五捷。斬首百餘級。及斬吉囊子狼台吉。而竄其昆季。廝養卒姓名於籍中。稱有功。疏上。兵科劾鸞奏捷辭多虛構。意涉誇張。往歲黑山墩之捷。謂馘吉囊子太不孩。竟成空言。今復以衣鎧鮮華。謂爲狼台吉。濫引勤王之語。妄覬封侯之勳。宜行勘覈。帝曰。勦獲旣多。厥功可嘉。其加鸞宮保。任一子所鎮撫。

二十六年夏四月。總督宣大侍郎翁萬達上言。俺答請求入貢。乞參酌其可否。巡按御史黃汝桂奏。北邊自火篩爲梗。貢禮寢廢。迄今四十餘年。自嘉靖辛丑。北邊諸部懷叵測之謀。石天爵倡入貢之請。去歲至今。又復踵行前詐。豈可輕信。墮其計中。蓋諸寇自庚子以來。連年蹂大同。深入潞澤。宣府抵紫荆。西掠延綏。東寇遼陽。塗炭我疆宇。殺掠我人民。凡我臣工。皆思翦此以雪憤。但時未可乘。勢當徐圖耳。故貢亦寇不貢。亦寇者。外寇之故習也。貢亦備。不貢亦備者。邊臣之至計也。事機貴乎先圖。軍令重於申命。乞嚴勅總督、鎮巡等官。加防禦。上曰。逆寇連歲爲患。詭言求貢。勿得聽從。其各嚴邊兵防禦。如有執異。處以極典。二十七年春正月。俺答入河套。三月。總督宣大翁萬達上言。俺答復投譯書求貢。帝命拒之。五月。俺答寇偏頭關。七月。寇大同。九月。俺答入宣府塞。寇居庸諸處。嚴嵩言於帝曰。俺答諸部以夏言。曾銑收河套。故報復至此。帝於是益怒。言不可解。銑與言先後皆棄市。詳議復河套二十八春二月。俺答大舉入寇。略大同。直抵懷來。指揮江瀚、董暘迎擊之。斬獲頗多。力竭無援。死之。總兵周尙文帥兵萬人。追至曹家莊。及俺答兵大戰。總督翁萬達親率銳卒繼之。俺答敗走。斬首五十五。獲

其器鎧無算。俺答兵傷痍甚衆。乃馳出塞。議者謂數十年間無此戰功。捷聞。諸臣陞賞有差。八月。俺答入宣府。大同塞。備禦官張景福。百戶成策。李松力戰死之。

二十九年秋八月。俺答越宣府。走薊州塞。入古北口。圍順義。長驅直入。戊寅。逼迪州。大掠密雲。三河。昌平諸處。辛巳。進犯京師。壬午。俺答求人貢。命廷臣集議之。癸未。俺答犯諸陵。轉掠西山。良鄉以西。遂東去。京

師戒嚴。詳庚戌之變

三十年春三月。與俺答通馬市。初。咸甯侯仇鸞倡大舉北伐之議。內實畏怯。乃密遣時義結俺答義子脫脫。使俺答以貢馬互市爲請。俺答利中國貨幣。投譯書宣大總督蘇佑求通市。佑以聞。帝命羣臣集議。鸞力主之。羣臣弗敢異。上從之。乃以兵部侍郎史道往大同總理互市。兵部員外楊繼盛上疏力言不可。略曰。互市市馬者。和親別名。俺答蹂躪我陵寢。虔劉我赤子。而先之曰和。忘天下之大讐。其不可一。北伐之詔下。天下曉然知聖意。日夜輸兵食以助京師。而忽更之曰和。失天下之大信。其不可二。以堂堂天朝。而下與邊臣互市。冠履倒置。損國家之重威。其不可三。天下豪傑。日夜磨礪其長技。以待試。而甘心於和款。謂國家厭兵。無所用之。隳豪傑效用之心。其不可四。庚戌之變。頗講兵事。無故言和。使邊鎮美衣媮食。而自肆。懈天下飭武之志。其不可五。往者邊臣私通外寇。吏猶得以法裁之。今導之使通。其不勾結而危社稷者幾希。開邊方交通之門。其不可六。伏羌之莽。在在有之。往者厭國威。不敢肆。今謂縣官懼而議和。啓內地不靖之漸。其不可七。俺答深入時。我雖不敢逆一矢。然彼知我有備也。備之已半歲。而互市終之。彼謂我尚有人乎。長俺答輕中國之心。其不可八。俺答狡詐。出沒叵測。我竭財力而輦之邊。彼負約不至。未

可知也。或因互市而伏兵。若吐蕃清水之盟。未可知也。或互市畢。卽入寇。入寇矣。而駕誘他部。未可知也。或以下馬索上價。或責我以他賞。或望我以苛禮。未可知也。墮俺答狡詐之謀。其不可九。大約歲帛數十萬。得馬數萬匹。十年之後。彼馬少而我帛亦不計。將何以善其後。不爲國家深長之策。其不可十。凡爲謬說者有五。不過曰吾外假馬市以羈縻之。而內寬吾以修武備。夫俺答至無厭也。至無恥也。吾安能一一而應之。是終兆釁也。且吾果欲修武備。而何所藉於羈縻。此一謬也。曰互市之馬。吾藉此以資吾軍。則又非也。旣和矣。無事戰矣。得馬將焉用之。且彼亦安肯捐其壯馬而予我。此二謬也。曰互市不已。彼且朝貢。夫至於朝貢。而中國之捐資以奉寇益大矣。此三謬也。曰彼旣利我。必不失信。又非也。夫中國之所開市者。能盡給其衆乎。不給。則不能無入掠。此四謬也。曰兵危道也。佳兵不祥。夫敵加於己。而應之。胡佳也。人身四肢皆癰疽。毒日內攻。而憚用藥石可乎。此五謬也。夫此十不可。五謬。匪唯公卿大臣知之。三尺童子皆知之。而敢有爲陛下主其事者。蓋其人內迫于國家之深恩。則圖倖目前之安。以見效。外懼俺答之重勢。則務中彼之欲。以求寬。然公卿大臣皆知。而莫爲一言止之者。止。則身任其責。而危。開。則人任其責。而安。陛下宜振獨斷。發明詔。悉按言。開市者。選將練兵。聲罪致討。不出十年。臣請得爲陛下勒燕然之績。懸俺答之首於藁街。以示天下。後世疏奏。帝連閱。頗然之。下內閣及禮兵部會大臣集議。嚴嵩等唯唯莫敢以爲是。鸞憤然曰。豎子目不識兵。宜其易之。乃密疏搆之。而帝意遂中變。下錦衣獄。拷訊。繼盛持論不變。獄具。謫狄道典史。

夏四月。宣大馬市成。史道主市事。每一馬償幣若干。俺答驅馬至城下。計直取償。事竣。俺答貢良馬九。乞

再爲市。仇鸞請敕厚賚之。賜衣幣甚渥。遣官宣諭朝廷恩威。仍敕嚴飭部落。勿得生事開邊釁。秋七月。俺答獻叛人蕭芹等。初。華人蕭芹、張扳隆、王得道、喬源、邱富等六十餘人潛出塞降俺答。俺答任用之。邱富每教以火食屋居。俺答竟不敢屋居也。爲築板升處之。至是馬市通。俺答頗利之。芹等弗肯。請仍謀入塞剽掠。俺答不悅。仇鸞遣時義昭俺答以利。諷令縛獻芹等。俺答以爲然。遂擒芹及扳隆、得道等三十餘人。械至大同塞下。納譯書於總督史道。道以聞。其邱富、喬源等三十五人俱走免。芹等伏誅。詔進仇鸞、史道官爵。餘各陞賞有差。十二月。俺答寇大同。初。史道主宣大市事。俺答以贏馬多索價直。弗予。輒大譁入大同市。寇宣府。宣府市寇大同。甚者朝市暮寇。幣未出境而警報隨至。併所得贏馬掠之去。俺答衆日往來大同城外。訊之。輒以貢市爲言。將士不敢拒。各邊垣及諸營堡俱壞。戍卒盡撤。俺答遊騎可長驅至城下矣。史道上言。俺答無馬者。許以牛羊入市。酬粟豆。科道交章阻之。俺答又請開市於遼東。巡撫遼東許宗魯移書兵部。反覆陳不可狀。事得寢。俺答知市利不博。是月三寇大同。巡按御史李逢時上言。數日之內。俺答三入寇。似與通市情實相左。乞敕邊臣多方備禦。仍遣使俺答宣示恩威。令其約束部落。勿啓邊釁。每歲六九月通市外。不許頻復求請。倘若服從。與通市如故。若面從心違。據實奏報。一意戰守可也。兵部尚書趙錦言。自古禦寇之道。戰守爲上。羈縻終非長策。乃開市甫畢而旋三入寇。防微杜漸。誠宜審處。上命督臣偵探備禦。并嚴私通之禁。

三十一年春正月。俺答寇大同。巡按御史李逢時上言。俺答敢於歲初擁衆入犯。可見馬市之羈縻難恃。今日之計。惟大集兵馬。一意討伐。宜行各邊臣合兵征勦。仍敕京營大將仇鸞訓練甲兵。專事征進。勿得

隱忍顧忌。釀成大患。帝曰。俺答非時擾攘。邊兵不能防禦。皆因平日專恃馬市。全不設備。故爾。今後一意戰守。如仍前觀望。重懲不貸。二月。俺答復入大同塞。時仇鸞佩大將軍印。偃蹇畏懦。不敢發兵征進。又恃通市。亦不嚴飭邊將防禦。而大同總兵徐仁復驕縱。聲言馬市既通。無庸戍守。恣意朘克。巡撫都御史何思亦以通市故。卽有警。輒匿不以聞。有拒殺零騎者。抵死。以故俺答衆出入關隘。無復顧忌。動以貢市爲名。往來官寺。有司廩餼。惟謹。稍拂意。輒大鬪。甚至直入堡城。姦辱婦女。莫敢誰何。至是。俺答衆萬餘入塞。直抵懷仁。大掠。徐仁等各擁兵觀望。不擊。游擊劉潭陰遣人結俺答。嚮路。獨中軍指揮王恭率所部禦之。戰於管家堡。力屈死之。俺答得利遁去。代府饒陽王上言其事。上命逮徐仁。劉潭等詣京。卽訊議處。何思削籍。王恭贈都督僉事。任一子祠祀。三月。罷馬市。時邊防久廢。言官屢以爲言。仇鸞亦慮禍及。密疏請止。乃罷市。召史道還。帝命復言開馬市者論死。著爲令。於是兵部上言。往歲宣大戍卒自足。戰守自簡。銳卒入衛京師。衆分勢散。致調各鎮兵赴援。奔命疲勞。餽餽繁費。數年以來。費百餘萬。後將何繼。不若以本鎮土著壯夫補足原額。庶供億可省。而戰守足恃。從之。初。總督翁萬達修築宣大邊垣千餘里。烽堠三百六十三所。頗完固。後以通市故。大半爲俺答衆所毀。兵部請敕邊臣修補。給事中李幼滋上言。敵壘卑小。宜於垣上增築高臺。營建房廬。以棲火器。俱從之。夏四月。大將軍仇鸞帥師出塞。襲俺答於威甯海。敗績而還。朵顏三衛導俺答衆數萬由遼東前屯衛撤去。邊垣七十餘里。掠至甯遠。備禦官王相力戰死之。詔贈相都督同知。時俺答數寇遼薊。皆朵顏導之。爲患益劇。秋七月。俺答寇薊州塞。先是。遼東報至。仇鸞請行邊。已而中止。至是。薊州報愈急。鸞當出禦。適疽發背。不能出師。然願戀大將軍印。不肯辭。又



無有敢言易將者。兵部尙書趙錦曰：事迫矣。乃上言大將軍病不能禦敵，而印在大將軍所。諸偏裨令不行，請暫假大將軍印，自將兵禦之。帝謂本兵不可出師，令收大將軍印綬上之。別遣將將兵。錦乃夜馳至鸞第，收鸞印綬，以總兵陳時代鸞佩大將軍印。鸞聞大恚，疾益劇，遂死。時上已心知鸞奸逆，未發。命都督陸炳密訪之。炳素惡鸞，常伺察其動靜，得其諸好事，欲即發。尙恐無案驗，會時義侯榮姚江皆冒功授錦衣衛指揮等官，知鸞死，事必敗，遂以八月十一日出奔居庸關。鞏華城諸處欲叛出塞，炳知之，使關吏及邏者執之以聞，詔下獄。炳乃盡發其前後交通納賄諸亂政狀。帝大怒，令諸司會鞠之。下制暴鸞罪惡，剖棺戮其屍，父母妻子及時義侯榮等皆斬，籍其家。下詔布告天下。俺答聞之，引去。趙錦亦以初附鸞，謫戍。於是帝諭更戎政，悉改鸞措置約束。冬十月，宣大總督蘇祐與巡撫侯鉞、總兵吳瑛奉詔出師北伐。鉞率數萬人出塞，襲擊俺答幕。俺答知之，會兵逆擊，殺把總劉欽等七人。士卒死者無算。瑛等急斂衆歸塞內。巡按御史蔡朴上言其狀，因劾祐、鉞。詔不問，仍命卹劉欽等。

三十二年閏三月，俺答寇大同。副總兵郭都出戰死之。詔逮巡撫侯鉞爲民。予都卹典。夏四月，巡撫宣府都御史劉璽上言修築邊垣，須用甄灰，以圖永久。山西一鎮，須用六十餘萬，請給發。御史秦朴亦言土沙易圯，費當不資，俱下兵部議。尙書聶豹言奏乞之數六十餘萬，則經營必須十年。財力既不辦，况曠日持久，無救目前。可姑爲旦夕防禦之計。日後別圖永世之利。從之。冬十月，朵顏糾俺答率衆二十萬薄古北口。烽火達京師。帝懲庚戌事，憂日旰忘食，遣使偵諸軍戰守狀。總督薊遼侍郎楊博躬擐甲乘城，督將士防禦甚力。俺答百道攻塞垣，博隨方拒擊，終不能入。使者以狀聞，帝大悅，卽軍中賜博衣一襲，發帑

金萬兩犒將士。博承命宣朝廷威德。諸將士人人喜。勇氣益倍。與俺答守八日。俺答不得利。乃引退。猶徘徊數舍外。不即去。博募敢死士。持火械。夜數入其營。擾之。寇衆倉皇宵遁去。

三十三年秋七月。俺答衆數萬入大同塞。官軍敗績。逮總督尙書蘇祐。巡撫齊宗道於獄。十二月。俺答寇大同。總督侍郎許論。巡撫都御史王忬徵兵擊走之。

三十六年秋八月。俺答衆二十萬入雁門塞。破應州四十餘堡。總督楊順縱兵殺避難兵民。上首功以自解。已而辛愛妾桃松寨私部目懼誅來降。順上其狀以爲功。辛愛俺答子。士馬雄諸部。且入寇。順懼。上言俺答叵測。欲脅朝廷歸之。敵故薄順等無能。且黠甚。詐言以叛人邱富來易。順信其言。予之。辛愛戮桃松寨。邱富竟不可得。順懼罪。賂巡按御史路楷隱其事。給事中吳時來聞之。上言桃松寨來降。不過寇中一亡婦耳。苟明於啓釁之媒。拒之勿納可也。始則張皇己功。既而輕墮敵計。乃行賂按臣。相爲欺蔽。然則朝廷邊餉之用。祇借順等潤家之資耳。疏入。上怒。逮順。楷下獄削籍。以兵部尙書許論比順。楷亦罷之。

三十七年春正月。俺答圍大同右衛。不克。四月。命兵部尙書楊博出督宣大軍務。時右衛圍久不解。議者以爲非博往不可。遂有是命。仍虛部中位以待之。博乃徵諸鎮兵。聲言出塞北伐。羽檄日數十下。俺答聞博至。乃引去。守將尙表拒守四閱月。誓志勵衆。死守不屈。博上其功。優敘之。王德戰死。奏立祠。加卹。參將周現潛通俺答。奏褫之。自是邊人俱砥礪。思自奮。博因陳善後二十餘事。築牛心諸堡。爲烽堠二千八百餘所。濬濠千餘里。五旬訖功。帝大悅。加博太子太保。

四十五年春正月。俺答寇宣府塞西陽河。先是。朵顏革蘭。影克。每歲引小王子諸部寇薊遼。四十二年。

由牆子嶺直犯通州。京師震動。而宣大諸邊頗安靖。至是復入寇宣府。旋引去。

穆宗隆慶元年夏五月。俺答犯大同。參將劉國引兵禦卻之。九月。俺答子黃台吉擁衆窺伺陵後南山。上命總督劉燾率兵防護陵寢。俺答寇山西石州。陷之。殺知州王亮。留壁石州。剽掠交汾等處。山西騷動。會有薊鎮之警。京師戒嚴。上命羣臣議防禦策。大學士徐階條十三事。時俺答入邊已二十餘日。勢甚橫。已雨潦連旬。馬多死。皆杖馬箠徒步還。所剽獲不能盡載。往往遺於道。甚衆。十餘日始盡出邊。而官軍無一人邀擊者。大同總兵申維岳、孫吳等覘俺答既去汾石。始約兵進戰。及俺答出岢嵐東北。孫吳以非己信地。引還大同。維岳等終不敢戰而還。十四日。俺答始悉去。諸將乃稍稍出。獲奸細明海等。及他老幼疲弱。掩襲得之以爲功。諸將獨方振一與俺答遇。九月。逐俺答於嵐縣。稍稱敢戰而已。事聞。詔奪督撫鎮諸臣官聽勘。而逮諸將至京鞠之。議功罪賞罰有差。時邊臣巽懦怠玩。掩罪冒功。積弊已久。故恣寇出入。動得利去。至是議罰將士始知畏法焉。

二年夏五月。兵部言山西一鎮。舊以大同爲藩籬。警備差少。自嘉靖壬寅失事之後。大同棄牆不守。遂與俺答爲鄰。三關邊隘皆俺答必犯之地矣。然鎮臣尚在內地。俺答必糾合諸部。乃敢深入。故在關內則憂大舉。傍老一帶逼近寇巢。居常則有遊騎出入之苦。遇冬則有套騎履冰之備。故在關外則慮零寇。今甯武在忻代偏岢之中。旣以總兵駐師。便於東西策應。而關外一帶宜增設防禦。請發太僕金。益募軍買馬以備之。上令施行。

四年冬十月癸卯。俺答孫把漢那吉率其屬阿力哥等十人來降。把漢那吉者。俺答第三子鐵皆台吉之

子也。幼孤，育於俺答妻一刻哈屯所，命僕阿力哥之妻乳焉。及長，那吉多智，有口辯。俺答娶塔比吉女爲之婦，不相能，復聘兔捨金的女，適俺答長女啞不害，有所生三娘子者，貌甚艷麗，已受襖兒都司聘。俺答奪取之，襖兒恚甚，將攻俺答，俺答無以解，卽以那吉所聘兔捨金的女償之。那吉怒，謂阿力哥曰：「我祖妻外孫，又奪孫婦與人，吾不能爲若孫，吾行矣。」遂與阿力哥同妻比吉女等十人南走，叩關請降。總督王崇古留之，邊吏譁曰：「此孤豎，無足重輕，宜勿留。」崇古曰：「此奇貨可居，俺答急，卽因而爲市，諭以執送叛人趙全等還我，乃優遣以慰其舐犢之愛，而制其命。若其弗急，則我因而撫納，如漢質子法，使招其故部居近塞，俺答老且死，其子黃台吉勢不能盡有其衆，然後以居者谷蠡，秩置塞外，其與黃台吉構，則兩利而俱存之，弗構，則以師助之，外以博興滅扶危之名，而實收其力。廷臣譁然以爲不可，御史葉夢熊爭尤力。」上曰：「寇慕義來降，宜加優撫，其以把漢那吉爲指揮使，阿力哥爲正千戶，各賞大紅紵絲衣一襲。」俺答婦恐中國戕其孫，日夜尤俺答，俺答尋亦悔，遂擁十萬衆壓境，崇古命百戶鮑崇德諭以存卹恩，而要其縛叛示信。俺答頗銜之，乃留崇德，隨遣騎覘之，則那吉方蟒衣貂帽，馳馬從容歸報。俺答與婦感，且愧曰：「漢乃肯全吾孫，吾且嚙臂盟，世服屬無貳，奚有於叛人。」遂定盟，通貢市馬，而諸部亦貪中國財物，咸從，與無聞言。十二月，俺答執叛人趙全等九人來獻，索那吉許之。先是，山西妖人呂明鎮以白蓮妖術謀不軌，全與邱富等從之，事覺，明鎮伏誅，富與全率黨李自馨、劉四、趙龍、呂老十、猛谷王之屬叛歸俺答，駐邊外古豐州，地名曰板升，已而我百戶張彥文游擊家丁劉天祺、邊民馬西川等二十八人悉往從之，衆至數萬，因尊俺答爲帝，富犯邊死，全等治第如王者，署其門曰開化府。至是，誘執之，至雲石堡待命。總督王崇

古受其獻。悉送闕下。誅之。遣使送歸那吉。那吉猶戀戀不欲行。崇古諭以朝廷恩意。許奉表通貢不絕。那吉感泣。誓不敢貳中國。攜其妻以歸。崇古以款俺答功。加少保。尚書。巡撫方逢年。兵部尚書郭乾。侍郎谷中虛。王遴各陞賞有差。又加恩輔臣李春芳。高拱。張居正。殷士儋及原任大學士趙貞吉等五人。五年三月己丑。封俺答爲順義王。及其子弟部落爲都督等官。俺答得孫後。遣使來謝。且乞表式。請封王。崇古疑吉囊。大把都未與盟。恐有詐。未許。蓋吉囊者。俺答兄。老把都兒。昆都力哈。俺答親弟也。吉囊死。子四。長曰吉能。皆爲俺答姪。而兀慎擺腰。永邵卜。哆囉土蠻等部。又多其支屬。俺答於諸部爲尊行。力能合之。必同心內附。始可假以王封。得比三衛例。崇古以此脅俺答。俺答以土蠻故主。力不能致爲辭。而崇古獨自計。老把都與土蠻善。且內親黃台吉。會黃台吉使來。乃令其約老把都以招土蠻與俺答會。同請封。因可以破三衛交構之私。至是。俺答始與老把都吉能。永邵卜諸部各遣使十八人。請通貢開市。以息邊氓。詔下羣臣廷議。定國公文壁。吏部侍郎張羅等二十二人爲可。英國公溶。戶部尚書張守直等十七人爲不可。工部尚書朱衡等五人以爲封貢便。互市不便。獨都御史李崇極言宜許。狀上。卒如崇古議。封俺答王號。貢期聽於三四月後一行。互市之數。先定馬數。其貢使不得至京。鐵鍋諸物不得闌出。賞大紅五綵紵絲蟒衣一襲。綵緞八表裏。五月。總督王崇古爲俺答陳乞四事。一請給王印如先朝忠順王例。二請許貢入京。比於三衛。各貢使貢馬三十四匹。三請給鐵鍋。議廣鍋十觔。煉鐵五觔。尙未可爲兵器。浴鍋生粗。每十觔。煉鐵三觔。宜可給與。以敝易新。四請撫賞部中親屬布段米豆。散所部窮丁塞上。仍許不時小市。六月。順義王俺答使恰台吉。打兒漢報趙全餘黨趙崇山。穆教清。張永保。孫大臣。及妖人李夢陽等

來獻。上嘉其誠順，賞白金三十兩，彩幣四表裏，恰台吉等各十兩，一表裏。御史劉良弼以封貢事畢，上疏陳六漸：一曰封疆弛守之漸，二曰屬部疑叛之漸，三曰將領推諉之漸，四曰塞下虛耗之漸，五曰勇士散逸之漸，六曰市地增加之漸。又言黃台吉嚮化不醇，他日必爲邊患。大學士高拱言：嘉靖十九年北寇求貢，當事憚於主計，斬使絕之三十餘年，邊民肝腦塗地，此往歲之明失。今其感恩慕義，直受而封錫之，猶非要領之圖，本意之所在也。及此閒暇，積我金，修我險，練我士，整我械，開我屯田，理我鹽法，皆得次第行之。彼若背約，遂興問罪之師，進退各有餘地，苟見一時，遂爾偷怠，良時不再得，邊備寢弛，難振矣。上嘉納施行。

六年九月，俺答貢馬二百五十四匹。時穆宗已崩，神宗卽位。十月，授俺答兄子永邵卜大成都督同知。十二月，遣俺答舊使火力赤、奴謀赤北還。嘉靖間，奉使六人，以俺答內犯下獄。二十年餘，俱物故。至是釋之。

神宗萬曆元年三月，頒順義王俺答番經，并給鍍金銀印。

二年十二月，順義王俺答子賓兔求河西互市，邀索刀仗。朝議絕之。兵部言：以一部啓各鎮拒絕之心，非計也。宜諭俺答，令其子改圖。遂令督撫臣諭之。

三年夏四月，賓兔駐牧西海，役屬兒革、白利等番，屢擾邊境。詔陝西總督諭俺答嚴戢賓兔。俺答言：賓兔因甘肅不許開市，苦甯遠途，遠巡撫甘肅都御史侯東萊，上言賓兔屢侵諸番，以報其掠馬。因圖請市，河西彫敝，開市爲難。苟可安邊，何惜甘肅一垣而不以糜之也。上從之。遂立大市於甘州，小市於莊浪。十

月。俺答乞佛像蟒段。且城市成。求賜名。賜城名福化。量給其請。是年黃台吉改貢市於新平堡。四年十二月。銀定台吉所屬嘗盜邊。絕其貢。俺答聞之。從彼法罰羊千。馬二百。駝二。詔宥之。已服罪。馬駝等不必進。

五年二月。順義王俺答執叛盟獻鶴等四人上。賜俺答幣。諭叛者如法。三月。俺答請開市茶馬。又求都督金印。朝議以請屬部並無金印。宜諭遣。上從之。九月。俺答上書甘肅巡撫。復求茶市。初。西番羶藏請納馬保塞。廷議勿受。巡茶御史李時成上言。羶藏生西番中。俗極遠。未嘗通貢市。一朝率衆來降。彼實畏我威靈。第以洮西極邊地。更得此族。不益厚固藩籬耶。矧今急須馬。何爲拒之。上從之。俺答以番人入漢久。且慢我。遣大都巴石虎啓幕府。請得比番開茶市。廷議且許之。李時成復奏言。俺答今求茶市。意不在茶。在得番人耳。夫洮西一帶。抵嘉峪金城。綿互數千里。番族星羅。西寇之不敢長驅而南。以番爲之蔽也。顧番人須茶最急。一日無茶。則病且死。是番人之命懸於中國。俾世受約束。藩我西土。脫以茶市假之。俺答逐利而專意於番。番求生而制命於俺答。彼此合一。其遺患可勝道哉。上是之。兵部謂茶市不可許。但俺答稱迎佛僧寺。必須用茶。量給數十筮示恩。報可。俺答復求開洮州茶市。進馬五百匹。諭止之。七年秋。俺答請寺額。詔名其寺曰宏慈。

八年秋八月。加順義王俺答次子不他失驃騎將軍。常漢我不良台吉等百戶。九年秋八月。順義王俺答上表貢馬。十二月。順義王俺答死。賜祭七壇。采幣十二雙。布百疋。其妻三娘子率其子黃台吉上謝表。貢馬。黃台吉者。俺答長子也。嘉靖時。有精騎萬餘。庶弟曰青台吉。精騎半之。俺

答老矣。娶二妾。棄其妻。黃台吉怨之。妾各子一人。俺答予萬騎自備。以故中自疑。不敢深入。黃台吉日夜振腕曰。老婢子有此兵而老死沙漠。可笑也。及俺答歸款。益老而厭兵。且佞佛。聽番僧言。戒殺掠。而朝廷威信亦足以服之。以故十餘年終保塞不敢南犯。先是王崇古入爲大司馬。繼崇古者方逢時。吳兌代爲總督。各部俱貢市無失期。而三娘子切切慕華。不時款塞。常詣兌。兌兒女畜之情甚暱。或三娘子致手書索金珠翠鈿。兌隨市給與。以敦和好。部落中間有梗化者。三娘子時時報聞。督府得預爲備。十年。總督鄭洛遣通事馬應時。伴爲趣貢事。陰以詞之。三娘子遣土骨赤請寬假。辭以無嗣。王表文空其印。

十一年閏二月。黃台吉襲封順義王。更名乞慶哈。黃台吉先配五蘭比妓。後受西僧給。納婦一百八人。以象數珠。俺答死。黃台吉將收三娘子。三娘子嫌其老病。將別屬。督臣鄭洛計曰。若三娘子別屬。我封此黃台吉何用。乃命人說三娘子曰。汝歸王。天朝以夫人封汝。不歸一婦耳。於是三娘子逼於利害。乃歸之。黃台吉襲封僅四年。三娘子佐之。貢市惟謹。

十四年二月。順義王黃台吉死。子摺力克襲位。初。把漢那吉歸。俺答命主板升。號曰大成台吉。妻曰大成比妓。兵馬雄諸部。癸未年死。三娘子欲令己子不他。失禮妻比妓。而俺答用事。臣恰台吉勿從。陰主摺力克以兵收比妓爲妻。三娘子名哈屯。別築城居。朝廷賜名歸化。至是。黃台吉死。摺力克當嗣。督臣鄭洛復諭摺力克曰。娘子三世歸順。汝能與娘子聚。則封不兩聚。封別有屬也。摺力克盡逐諸妾。乃以十月入三娘子帳中合婚。其部落牙答漢盜我助馬堡。洪賣盜我偏頭關。三娘子俱罰治如法。



十五年秋七月。封擄力克爲順義王。三娘子爲忠順夫人。

十八年。大學士王錫爵上言。古謀國之臣。無事則深憂。有事則不懼。自封款十九年。順義王擄力克以助。火落赤故罷市。賞兩年未與。忠順夫人三娘子捕叛人。史二致塞上。請復市賞。詔復。二年以三娘子兒不。他失禮爲都督。史二卽擄力克兄安兔壻也。仍寬假其罪。分列於龍門滴水崖。史二亦款服。二十年來。吏。恬卒玩。一旦封豕生心。舉朝惶怖。止辦叟叟。追尤首事。此一反也。武官襲下求安。專藉款關之利。文吏隙。中觀鬪。爭談出塞之功。此二反也。諸邊以彼此支吾爲熟套。以日月玩愒爲良謀。一遇緩急重難之事。則。隔垣內外。便分爾我。逃責於己。而嫁禍於人。此三反也。臣謬爲三反之論。而約以經營鎮定之一言。蓋欲。少省議論。使當事可以措手。暫寬文法。使文武貴於同心。詔可。

四十一年春二月。擄力克旣歿。卜失兔以長孫嗣封。而素囊阻之。越冬講乃成。於是總督涂宗濬以爵禮。請詔卜失兔襲封順義王。把漢比妓封忠義夫人。西僧哀乞蓋授都綱。遣官賫封敕至邊。各散去不受。御史李若星疏論卜失兔抗旨。回巢踰年。告款塞上。乃始受封。其部落多散失。遂不競。

## 卷六十一

### 江陵柄政

世宗嘉靖四十三年秋七月。以諭德張居正充裕王講官。

穆宗隆慶元年二月。加恩侍從藩邸諸臣。以禮部右侍郎張居正爲吏部左侍郎。兼東閣大學士。直內閣。

四月進禮部尚書武英殿大學士。

二年春正月進大學士張居正少保。

八月居正上疏陳大本急務六事。一曰省議論。凡事不貴無用之

虛詞。務求躬行之實效。欲爲一事。須審之於初。及計慮已審。卽斷而行之。如唐憲宗之討淮蔡。雖百方沮之。而不爲搖。欲用一人。須慎之於始。旣得其人。則信而任之。如魏文侯之用樂羊。雖謗書盈篋。然終不爲之動。一曰振紀綱。近年以來。綱紀不肅。猥以模稜兩可。謂之調停。以委曲遷就。謂之善處。伏望刑賞予奪。一歸公道。而不曲徇乎私情。政教號令。一斷宸衷。而勿紛更於浮議。一曰重詔令。近日以來。朝廷詔旨。多格廢不行。至十餘年未竟者。文卷委積。多致沈埋。年月旣遠。事多失真。遂使漏網終逃。國有不申之法。覆盆自苦。人懷不白之冤。是非何由而明。賞罰何由而當。伏乞敕下各司。嚴立限期。責令奏報。違者查參。一曰覈名實。器必試而後知其利鈍。馬必駕而後知其駑良。今用人則不然。官不久任。事不責成。更調太繁。遷轉太驟。資格太拘。毀譽失實。臣願皇上慎重名器。愛惜爵賞。用人必考其終。授人必求其當。仍敕吏部嚴考課之法。審名實之歸。一曰固邦本。今風俗侈靡。官民服舍。俱無定制。外之豪強兼併。賦役不均。花分詭寄。偏累小民。乞敕內外諸司。悉心清理。一曰飭武備。今議者皆曰。兵不多。食不足。將帥不得其人。臣以爲此三者皆不足患也。夫兵不患少而患弱。今軍位雖缺。而糧具存。若能按籍徵求。清查冒占。隨宜募補。從實訓練。何患無兵。捐無用不急之費。以撫養戰鬥之士。何患無財。懸重賞以勸有功。寬文法以伸將權。則忠勇之夫。孰不思鬪。又何患於無將。至於目前自守之策。莫要於選擇邊吏。團練鄉兵。併守墩堡。臣考前代及吾祖宗俱有大閱之禮。以習武事。而戒不虞。今京師內外。守備單弱。伏乞敕戎政大臣。申嚴軍政。

設法訓練。每歲農隙之時。恭請大閱。以試將帥之能否。軍士之勇怯。注意武備。整飭戎事。亦足以伐外寇之謀。銷未萌之患。疏入。上曰。覽卿奏。皆深切時務。具見謀國忠悃。所司詳議以聞。於是都御史王廷等覆振紀綱。重詔令二事。析爲八則。疏上。上允行之。兵部覆飭武備事宜。一議兵。一議將。一議團練鄉兵。一議守城堡。一議整飭京營。又奏大閱之禮。宣宗。英宗嘗行之。恭請親臨較閱。如閣臣所奏。上曰。大閱既有祖宗成憲。允宜修舉。其先期整飭。俟明年八月舉行。餘悉如議。戶部議固邦本。言財用之當經理者有十宜。嚴法整飭。上一允行之。十二月。廢遼王。大學士張居正故隸遼王尺籍。至憲薨。頗驕。多所凌轢。居正銜之。而又羨其府第壯麗。會告王謀反。刑部訊治。侍郎洪朝選案驗無謀反狀。僅坐以淫酗。憲薨。錮高牆。廢其府。居正攘以爲第。後復恚朝選不附反律。謀殺朝選。

三年九月。上大閱於京營教場。敕諭戎政官及諸吏卒。先是。給事中駱問禮言。大閱非今時所急。不必仰煩聖駕。居正力持其說。上遂行之。

四年十二月。大學士張居正秩滿。進兼太子太傅。吏部尚書。進少傅。兼建極殿大學士。

六年春正月。進大學士張居正少師。五月上。不豫。己酉。大漸。召閣臣高拱。張居正。高儀至乾清宮。受顧命。上倚坐御榻。皇后及皇貴妃咸侍。東宮立於左。上困甚。太監馮保宣顧命曰。朕嗣統方六年。今疾甚。殆不起。有負先帝付託。東宮幼沖。以屬卿等。宜協輔。遵守祖制。則社稷功也。拱等泣拜而出。翼日上崩。六月甲子。皇太子卽位。年始十歲。時太監馮保方居中用事。矯傳大行遺詔云。閣臣與司禮監同受顧命。廷臣聞之俱駭。一日。內使傳旨至閣。拱曰。旨出何人。上冲年。皆若曹所爲。吾且逐若曹矣。內臣還報。保失色。

謀逐拱。拱與居正俱負氣不相下。居正乃結保自固。時臺諫交劾保。必欲斥之。而高拱自以與居正及高儀同與憑几。每慷慨收宮府權。曰老臣謬膺託孤。不敢不竭股肱。凡內降命敕。府部章奏。自合公聽並觀。有傳奉中旨。所司按法覆奏。白老臣折衷之。以復百官總己之義。拱內慮馮保專恣。與居正儀謀去之。居正陰洩之保。乃與保謀去拱。六月既望。庚午昧爽。拱在直。居正引疾。召諸大臣於會極門。促居正至。拱以爲且逐保也。保傳皇后。皇貴妃。皇帝旨曰。告爾內閣。五府。六部諸臣。大行皇帝賓天先一日。召內閣三臣御榻前。同我母子三人。親受遺囑曰。東宮年少。賴爾輔導。大學士拱攬權擅政。奪威福自專。通不許皇帝主管我母子。日夕驚懼。便令回籍閒住。不許停留。爾等大臣受國厚恩。如何阿附權臣。蔑視幼主。自今宜洗滌忠報。有蹈往轍。典刑處之。拱卽日出朝門。得一牛車。立而附載。緹騎兵番踉蹌追逐。喪厥資斧。大臣去國。以爲異聞。拱去。居正爲乞馳驛。乃傳歸。而高儀未幾亦卒。以病死。居正褻然首輔矣。辛酉。上御平臺。召張居正慰勞之。曰。皇考屢稱先生忠臣。居正頓首泣謝曰。今國家要務。惟在遵守舊制。不必紛更。至於講學親賢。愛民節用。又君道所先。乞聖明留意。上曰善。隨賜酒饌銀幣。居正旣柄政。慨然以天下爲己任。中外想望丰采。一意尊主權。課吏實。嘗言高皇帝得聖之威者也。世宗能識其意。是以高臥深宮之中。朝委裘而不亂。今上世宗孫也。柰何不法祖。具詔草請於上。召羣臣廷飭之。百寮惕然。八月。張居正請開經筵。復請更定常朝日期。御門聽政。俱從之。上遂御文華殿日講。以爲常。十一月。太監崔敏請買金珠寶石。居正上言。前六月間。奉命停止。今忽有此舉。是前詔不信也。乞暫停之。以甦民力。因封還敏疏。遂報罷。十二月。張居正進帝鑑圖說。上見捧冊進。喜動顏色。遽起立。命左右展冊。居正從旁指陳大義。上

應如響。因卽宣付史館。賜居正銀幣。一日。上御文華殿講畢。覽至漢文帝勞軍細柳事。居正因言。皇上當留意武備。祖宗以武功定天下。承平日久。武備日弛。不可不及蚤講求也。上稱善。甲戌。張居正奏請明年正月上旬卽御殿日講。但先帝喪未期。勿設宴。并免元夕燈火。上曰。已蚤停止。每侍聖母膳。甚簡素。或逢節日。具果宴。不設樂。居正稱善。尋諭光祿卿免節閒供應七百餘金。戊寅。張居正上言。制敕宜尙簡嚴。近來過爲誇侈。臣諛其君。猶謂之佞。况以上諛下乎。乞戒代言諸臣。復古從實。毋壞制體。從之。神宗萬曆元年春正月辛卯。命成國公朱希忠。大學士張居正。知經筵事。上甚敬禮。居正每日御經筵。居正以詩書入。在文華殿後張小幄。造膝密語。一日。居正在直廬感病。上御煖閣。親調椒湯賜之。盛暑御講。上就居正立處。令內使搖扇。隆冬進講。以毡片鋪地。庚子。蚤朝。上出乾清宮。見一無鬚男子。僞作宦者狀。袖有佩刀。趨走惶遽。左右執之。馮保立鞫之曰。南兵王大臣。奚自。曰。自總兵戚繼光來。保使密報居正。而居正令附保耳。曰。戚公方握南北軍禁。無妄指。可借以除高氏。保故甘心陳內監洪。已逮洪。錮禁獄。令大臣供之矣。先是。大臣爲戚帥三屯營南兵不遂。流落都下。爲人巧捷便佞。一中貴。矚之。至是。令稱拱使。改籍武進縣。卽令廁卒辛儒衣大臣蟒袴。予二劍。劍首飾貓精異寶。送繫廠中。入以聞。請究主使人。居正亦上疏。如保意。上卽付保鞫。保令辛儒屏語大臣曰。第言高相君怨望。使汝來刺。願先首免罪。卽官汝錦衣。賞千金。不然。重撈掠死矣。因使儒畀大臣金。美飲食之。儒日與大臣狎款。卽令誣拱家人爲同謀。獄具。保飛發五校械拱僕。而居正前疏傳中外。口語籍籍。謂且逮拱。居正乃密謀於吏部尙書楊博。博曰。迫之。恐起大獄。抑上神聖英銳。持公平察。高公雖粗暴。天日在上。安得有此。居正面赤不懌。會大理少卿李幼

致者。居正鄉人。亦與疾。告居正曰。公柰何爲此。惡名污青史矣。居正強應曰。吾爲此事憂。不如死。何謂我爲。居正禁科道官不得有言。而御史鍾繼英上疏。不敢明言。暗指之。居正怒。擬旨詰問。左都御史葛守禮語楊博。過張公必諍之。博曰。向已告矣。守禮曰。輿望屬公。謂公能不殺人媚人耳。大獄將起。公柰何以已。告爲解。卽共過居正。居正曰。東廠獄具矣。同謀人至。卽疏處之耳。守禮曰。守禮敢附亂臣黨耶。願以百口保高公。居正默不應。博曰。願相公持公議。扶元氣。廠中甯有良心。倘株連者衆。事更有不可知者。居正堅不承。博與守禮因歷數先朝政府同心輔政。及貴溪分宜。華亭新鄭。遞相傾軋。相名坐損。可爲殷鑒。居正憤曰。二公意我甘心高公邪。奮入內。取廠中揭帖投博曰。是何與我。揭帖有居正竄改四字。曰。歷歷有據。而居正忘之。守禮識居正手。笑而納諸袖。居正覺曰。彼法理不諳。我爲易數字耳。守禮曰。機密重情。不卽上聞。先政府耶。吾兩人非謂相公甘心高公。以回天非相公不能。居正揖謝曰。苟可效。敢不任。第何以善後。博曰。相公患不任耳。任則何難。善後須得一有力世家與國休戚者。乃可委治。居正悟。始言上前度處之上。卽命馮保與左都御史葛守禮。都督朱希孝會審。而希孝懼。與其兄成國公希忠相對泣曰。誰畫此策也。以覆吾宗。急詣居正請命。居正曰。第見冢宰。大中丞。希孝泣謁博。博曰。欲借公全朝廷宰相體耳。何忍以身家陷公。願亦何難。公第使善詞。校尉入獄。訊刀劍口語所從來。雜高家僕稠衆中。令別識。且問見高公何所。今在何地。立辨矣。希孝如博言。使善詞。校尉密詢大臣何自來。則來自保所。語盡出保口。校尉卽告大臣入宮謀逆者法族。柰何甘此。若吐實。或免罪。大臣茫然哭曰。始給我主使者罪大辟。自首無恙。官且賞。豈知當實言。適高家僕逮至。希孝雜諸校中。令揚色。大臣不辨也。及會審。風霾大晦。尋雨雹不止。

東廠理刑白一清者謂保初問官二千戶曰。天意若此。可不畏乎。高相國顧命大臣。本無影響。強我誣之。我輩皆有身家。異日甯免誅僇耶。皆曰。馮公已爲具詞。固有陰持之者。柰何。一清曰。東廠機密重情。安得送閣改乎。頃之。天稍明。出大臣會問。故事。先雜治。大臣呼曰。故許我富貴。何雜治也。馮保卽問曰。誰主使者。大臣瞪目仰面曰。爾使我。乃問也。保氣奪。強再問。爾言高相國何也。曰。汝教我。我則豈識高相國。希孝復詰其蟒袴刀劍。曰。馮家僕辛儒所予。保益懼。希孝曰。爾欲污獄使耶。遂罷。保密飲大臣生漆酒瘖之。而內以拱行刺事上聞。有殷內監者年七十餘。奏上曰。高拱故忠臣。何爲有此。隨顧保曰。高鬚子是正直人。張居正故懷忌刻。必殺之。我輩內官。何須助彼。保大沮。而內監張宏亦力言不可。於是上下刑部擬罪。竟論大臣斬。拱被居正齟齬。杜門屏居。仕宦中州者不敢過新鄭。率枉道他去。六月。張居正上言稽劾章奏。隨事考成。有遷延隱蔽者卽舉劾。上從之。冬十月。上御文華殿。張居正進講。言及宋仁宗不喜珠飾。上曰。賢臣爲寶。珠玉何益。居正曰。明君貴五穀而賤珠玉。五穀養人。珠玉饑不可食。寒不可衣。上曰。然。宮人好冶粧。朕歲賜未嘗不節省。居正曰。皇上言及此。社稷生靈之福也。上又曰。秦始皇銷兵。挺可傷人。何銷兵爲。居正曰。人君布德修政。以結民心爲本。天下之患。每出所防之外。秦亡於戍卒。故天時不如地利。地利不如人和。上曰。然。人定真能勝天也。

二年春正月。大學士張居正請上引見廉能官。倣祖宗午朝之儀。從之。甲午。上御皇極門。引見朝覲清廉卓異浙江布政使謝鵬舉等二十五人。特加獎勵。各賜金幣。并宴。張居正進講章疏略曰。義理必時習而後能悅。學問必溫故而知新。臣今將今歲所進講章重復刪定。大學一冊。虞書一冊。通鑑四冊。進呈睿

覽。雖淺近之言。然亦行遠登高之一助。四川西南都蠻平。初隆慶時。都蠻作亂。張居正薦曾省吾往討之。省吾有偉略。而四川總兵劉顯以在閩事被彈。居正曰。臨敵易將。兵家所忌。倘蜀事不效。當并閩事逮治之。於是顯奮不顧身。受省吾方略。以平蠻自效。凡六越月。諸寨悉平。俘蠻長三十六人。拓地四百里。上御文華殿。講畢。問建文果出亡否。張居正曰。國史不載。但故老相傳。披緇雲遊。題詩於田州。有流落江湖四十秋之句。上太息。命錄詩進。居正曰。此亡國之事。不足觀也。請錄皇陵碑及高皇御製集以上。見創業之艱。聖謨之盛。明日。輔臣進皇陵碑。上覽畢。謂居正曰。朕覽碑。讀之數過。不覺感傷欲泣。居正曰。祖宗當日艱難。蓋以天心爲心。故能創制顯庸。皇上以聖祖之心爲心。乃能永保洪業。因述聖祖微時事。及卽位勤儉。上愴然曰。朕敢不黽勉法祖。然尙賴先生輔導也。秋九月辛巳。刑部請錄囚。慈聖太后欲停之。上問張居正。對曰。春生秋殺。天道之常。皇帝卽位以來。停刑者再矣。稂莠不除。反害嘉禾。凶惡不去。反害良民。上爲請。太后從之。十二月壬子。張居正率大臣上御屏。屏繪天下疆域及職官姓名。用浮帖以便更換。上命設於文華殿後。時加省覽。閏十二月丁亥。上御書弼予一人。永保天命。賜張居正。明日。居正侍進諫曰。帝王之學。當務其大。自堯舜至唐宋賢主。皆修德行政。治世安民。不以一藝。漢成帝知音律。能吹簫度曲。梁武帝。陳後主。隋煬帝。宋徽宗。皆能文善書畫。無救於亂亡。則君德之大。豈沾沾一藝哉。他日。上日講畢。問居正。元夕煙火。鰲山祖制乎。曰。非也。成化間。以奉母后。時多諫阻。今新政宜裁。上曰。然。居正曰。明年雖禫。繼此當大昏。又皇弟潞王出閣。諸公主釐降。所費甚煩。宜預節省。上曰。朕極知民窮。居正請減元日賜賚。上大然之。上又嘗語輔臣曰。昨日禁中花盛開。侍母后賞宴甚歡。蓋指慈甯也。居正奏曰。仁



聖太后處多時寂寞。惟皇上念之。起還宮。白慈聖。卽自駕往迎仁聖。過大內賞花。傳觴歡宴而罷。三年夏五月。大學士張居正上言。近郡縣入學太濫。宜敕學臣量加裁省。并敕吏部凡所在督學。臣非方正勿遣。遼東告警。上深以爲憂。張居正對曰。暑月非北騎狂逞之時。必無慮。旣而薊遼總兵戚繼光報稱諸部解散無警。居正因上疏論邊事曰。昨遼東撫臣張學顏報稱寇衆二十餘萬。謀犯遼東。前鋒已抵大甯。皇上面諭臣。臣已面奏。料其無事。今據總兵戚繼光報稱。寇久解散。臣又使人於宣府密偵。西人青把都動靜。則把都在巢駐牧。未嘗東行。遼東所報皆屬虛聲。臣等因此反切憂慮。夫兵家之要。必知彼己。審虛實而後可以待敵。取勝。今無端聽一訛言。倉皇失措。則是彼己虛實茫然不知。其與風聲鶴唳草木皆兵者何異。敵情狡詐。萬一彼常以虛聲恐我。使我驚惶疲於奔命。久之懈弛不備。然後卒然而至。措手不及。是在彼反得先聲後實。多方以誤之之策。而在我顧犯不知。彼己百戰百敗之道。他日邊臣失事。必由於此。故臣等不以寇之不來爲喜。而深以邊臣不知敵情爲慮也。兵部以居中調度爲職。猶貴審察機宜。沈謀果斷。乃能折衝樽俎。坐而制勝。今一聞奏報。便爾張皇。事已之後。又寂無語。徒使君父焦勞於上。以憂四方。豈僅以題覆公牘。謂已畢本兵兵事耶。乞傳諭兵部。詰以寇情虛實之由。使之知警。并請賑各邊饑卒。俱從之。八月。張居正請增閣臣。許之。卽日進吏部左侍郎張四維爲禮部尚書。入東閣。故事。入閣者止曰同某人辦事。至是。上手注隨元輔入閣辦事。四維恂恂若屬吏矣。十一月。張居正上郊祀圖考。爲書三册。首敘分合沿革之由。次具壇壝陳設。次列儀注樂章大意。遵高皇定制。歲一合祀。奉二祖並配上。褒答之。

四年春正月。御史劉臺劾大學士張居正專擅威福。如逐大學士高拱。私贈成國公朱希忠王爵。引用張四維。張瀚爲黨。斥逐言官余懋學。傅應禎。罔上行私。橫黷無厭。居正怒甚。見上辭政曰。臣之所處者危地也。言者以爲擅作威福。而臣之所行正威福也。將巽順以悅上耶。則負國竭公以事上耶。無以逃專擅之譏。伏地不肯起。上下御座。手掖之曰。先生起。朕當責臺以謝先生。詔下臺獄。杖之百。遠戍之。時議藉藉。居正不自安。復具疏爲解。免杖奪職爲民。然心終恨之。後竟置之死。三月戊戌。上御文華殿。言及唐玄宗於勤政樓宴安祿山。上曰。樓名勤政。而佚樂何也。張四維曰。玄宗開元之治。有三代風。至天寶荒佚。乃致播遷。居正曰。無論往代。我世宗皇帝初年。西苑建無逸殿。省耕勸農。末年崇尙玄修。不復臨幸。治平之業亦寢。故大寶箴云。民懷其始。未保其終。上嘉納之。五月辛酉。上視朝。張居正等請覽奏章。時閱聖祖所親批疏稿爲法。上曰。然。居正因簡內閣所藏聖祖手諭六十三道。御製四十四道。聖旨并帖共七十道上之。秋七月丁酉。張居正上言。致治之道。莫要於安民。安民之法。莫重於守令。守土牧民者。削下奉上。以希聲譽。奔走趨承。以求薦舉。徵發期會。以完簿書。苟且草率。以追罪責。其實心愛民者。未嘗概見。明春外計。考察舉錯。乃向背所係。惟以安靜宜民爲最。虛文矯飾。雖浮譽素隆。當列下考。居正又請行考成法。有司以徵解爲殿最。於是奉行者督責小民。不勝朴楚。相率爲怨言。然賦以時起。居正上言。近者仰賴皇上愛人節用。京通儲粟。足支八年。太倉銀庫。所積尙少。宜將明年漕糧量折十三。足國裕民。一舉兼得。上從之。時府庫充溢。太僕寺亦積金四百餘萬。冬十月丙子。進張居正左柱國。太傅。仍加伯爵。敕曰。先生親受先朝顧命。輔朕冲年。今四海昇平。實賴匡弼。精忠大勳。言不能殫。惟我祖宗列聖。祐爾子孫。與國咸休。

欽哉。居正固辭伯爵。許之。山東撫按劾昌邑知縣孫鳴鳳貪賄。上怒甚。欲遣逮。張居正曰：「貪人固當盡治。但故事俱下臺訊。」上曰：「然。鳴鳳之婪。乃出進士乎？」居正曰：「此人惟恃進士。故爾恣肆。若乙科明經。尚有畏忌。今後用人。但問功能。不可拘資格。」上深然之。十二月。上御文華殿。舉袍示輔臣曰：「此何色也？」居正以爲青。上曰：「紫也。」久而色渝。居正曰：「紫易渝。昔皇祖不尙祫服。御衣敝甚。始易。享國長久。未必不由此。願皇上以皇祖爲法。節一衣。民間有數十人得其煖者。輕一衣。民間有數十人受其寒者。不可不念也。」時左右亦言民窮。至鬻妻子應上供。上深然之。

五年春正月庚午。上御文華殿。大學士張居正言：「殿之東堂祀伏羲。以下數聖君。皇上所當法也。法古聖。惟在省覽。章奏日閱一二。講明國事。則他年躬攬。萬幾無難矣。」上嘉納之。五月戊申。諭修慈慶。慈甯兩宮。張居正言：「兩宮於萬曆二年落成。今壯麗如故。足以娛聖母。乃欲壞其已成。更加藻飾。非所急也。請輟工從之。」嶺西羅旁平。羅旁據山海間。驚江急峽。巖壑險絕。諸獠窟穴其中。前代不入版籍。國初甫一定之。世宗朝。諸獠轉相寇掠。不可撲滅。督撫殷正茂既討平惠潮寇。上疏言：「羅旁當誅。廷議不能決。」居正毅然言：「當誅。」舉兵部尚書凌雲翼。請賜璽書。屬之討賊。雲翼瀕行。居正謂之曰：「雖鞭之長。不及馬腹。卽今兩廣諸獠。雖所在都有。然乘間竊發。要當審所緩急耳。」雲翼既至。部諸路兵號三十萬。八道並進。克木衣山。破諸峒五百六十有四。俘斬四萬二十有奇。拓地數百里。置郡縣。捷聞。賜賚有差。先是。四方多草竊。有司祕不以聞。張居正特嚴其禁。匿盜者雖循吏必黜。得盜卽報決。有司懷懼。盜亦衰止。閏八月丁亥。上視朝。張居正因言：「近因陰雨。朝講暫輟。恐中外不知。謂皇上勤學漸不如初。願日慎一日。非有他事及風。」

雨不得輟。上深然之。九月上諭停刑。蓋慈聖太后以大昏期近也。居正上言。春生秋殺。天道所以運行。雨露霜雪。萬物因之發育。明王奉若天道。刑賞予奪。皆奉天意以行事。若棄有德而不用。釋有罪而不誅。則刑賞失中。慘舒異用矣。且臣近詳閱所開諸犯。皆逆天悖理。其所戕害。含冤蓄憤。聖主明王不爲一泄。彼以其怨恨冤苦之氣。鬱而不散。或上蒸爲妖。沴氛禳之變。下或致凶。荒疫癘之疾。則其爲害又不止一人一家也。請俟明年吉典告成。然後概免一年。從之。己卯。張居正父喪訃至。上以手諭宣慰。視粥止哭。絡繹道路。又與三宮賻贈甚厚。然亦無意留之。所善同年李幼孜等。倡奪情之說。於是居正惑之。乃外乞守制。示意馮保。使勉留焉。冬十月。居正再上疏。乞終制不允。乃請在官守制。不造朝。許之。居正既父喪奪情。吉服視事。編修吳中行。檢討趙用賢。因星變陳言。刑部員外艾穆。主事沈思考。合疏言。居正忘親貪位。居正大怒。時大宗伯馬自強。曲爲營解。居正跪而以一手撚鬢曰。公饒我。公饒我。掌院學士王錫爵。徑造喪次。爲之解。居正曰。聖怒不可測。錫爵曰。卽聖怒亦爲公。語未訖。居正屈膝於地。舉手索刃。作刎頸狀曰。爾殺我。爾殺我。錫爵大驚趨出。十月二十二日。中行等四人同時受杖。中行用賢卽日驅出國門。人不敢候視。許文穆方以庶子充日講。鑄玉杯一曰。班班者何。卞生淚。英英者何。蘭生氣。追追琢琢。永成器。以贈中行。鑄犀杯一曰。文羊一角。其理沈黜。不惜刻心。寧辭碎首。黃流在中。爲君子壽。以贈用賢。穆思考復加鐐鎖。且禁獄。越三日。始僉解發戍。爲更慘毒。時鄒元標。觀政刑部。憤甚。視四人杖畢而疏上。越三日。受杖。謫戍貴州都勻衛。罷吏部尙書張瀚。先是瀚爲南京工部尙書。廷推吏部。瀚名第三。以居正言。上越次用之。居正以爲德。希瀚報奪情議起。遂邀中旨。屬瀚留居正。居正亦自爲牘。風之使留己。瀚若不喻其意。

者。謂政府奔喪。當以殊典卹之。宗伯事也。何關吏部。居正乃令所善客說瀚。瀚不聽。又不欲顯居其名。乃偕三尚書密晤居正。動以微言。居正大不悅。於是有詔切責瀚。謂瀚奉諭不復。無人臣禮。是時廷臣爭惴慄。各倡保留之議。瀚拊膺太息曰。三綱淪矣。居正益怒。嗾臺省劾之。以爲昏耄。勒令致仕。丙午。上戒諭羣臣曰。奸邪小人。藐朕冲年。忌憚元輔。乃借綱常之說。肆爲誣論。欲使朕孤立於上。得以任意自恣。茲已薄處。如或黨奸懷邪。必罪不宥。時言奪情者得罪。都人士皆憤怒。作謗書懸長安門。謂居正且反。上聞之。故宣諭於朝。謗議稍息。已而召居正於平臺。慰諭甚至。卽日入直。初。居正喪次。凡閣中事。令吏賈奏就擬處分。手詔稱元輔。稱太師。稱先生。皆盡古師臣之禮。十一月癸丑朔。以星變考察羣臣。始張居正自矯飾。雖或任情。而英敏善斷。中外羣譽之。居正亦自負不世出。迨劉臺論居正得罪。志意漸恣。至是益知天下不見與。思威權刦之矣。令天下度田。國初天下土田八百五十萬頃。至後漸減。歲久滋僞。豪民有田不賦。貧民曲輸爲累。民窮逃亡。故額頓減。張居正請科田。凡莊田民田職田蕩地牧地皆就疆理。無有隱其撓法者。下詔切責之。

六年春正月。將舉大昏。首輔張居正充納采問名副使。給事中李涑疏言。居正有服制。不宜與執事。乞改命。上不允。以聖母諭。居正遂從吉。三月甲寅。張居正乞歸治葬。許之。辭朝。上召見於平臺。勞諭之曰。朕不能捨先生。恐重傷先生懷。是以忍而允所請。雖然。國事至重。朕將焉依。居正奏言。皇上下大昏之後。宜擢節愛養。留心萬幾。因伏地而哭。上亦爲之哽咽墮淚曰。先生雖行。國事尚宜留心。乃賜銀印曰。帝賚忠良。令得密封言事。進辭兩宮。各賜贖金。慰諭有加。庚辰。遼東再奏大捷。上歸功張居正。使使馳諭。俾定

爵賞以聞。召趣還朝。居正以母老。俟秋上道。命錦衣歸馳趣之。六月乙未。張居正還朝。上召見於文華西室。問沿途所見稼穡何如。民生何如。邊事何如。居正對甚悉。上大悅。賜休沐十日。十二月。命纂宗藩要例書頒示諸王。先是世宗朝。公族繁盛。國用困竭。以故頗加損抑。至是居正等念諸藩裁削。非天子親親意。乃略舉事例未當者十一條。請敕禮官集議。著爲令。諸藩於是感激親上。而厚薄親疏有體矣。七年二月。上患疹。慈聖太后命僧於戒壇設法度衆。張居正上言。戒壇奉皇祖之命。禁止至今。以當時僧衆數萬。恐生變敗俗也。今豈宜又開此端。聖躬違豫。惟告謝郊廟社稷。斯名正言順。神人胥悅。何必開戒壇而後爲福哉。事遂寢。二月。河工成。先是淮安有水患。河決入淮。淮勢不敵。淮揚咸爲巨浸。直逼泗洲。患近陵寢。上以問張居正。因上言。故河道都御史潘季馴可使。乃降璽書卽其家。拜都御史。使持節治河。一切假以便宜。久任。帑藏不問出入。諸奉行不及事者。下詔獄鞫治之。於是當事者日夜焦勞。蓋踰年而堤成。轉漕無患。三月上疹愈。徵光祿寺十萬金。張居正上言。財賦有限。費用無窮。使積貯空虛。不幸有四方水旱之災。疆場意外之變。可爲寒心。此後望力加撙節。若再徵金。臣等不敢奉詔矣。時上漸備六官。太倉所儲屢有宣進。居正上戶部所進御覽錢糧數目。請置之坐隅。時賜省覽。量入爲出。因言。萬歷初年所入四百三十五萬有奇。六年所入僅三百五十五萬有奇。則已少八十餘萬矣。五年歲出四百四十九萬有奇。則已多四十餘萬矣。夫歲出則浮於前。歲入則損於前。此不可不留心也。王制。量入爲出。計三年之出。必有一年之餘。而後可。况財用止有此數。設法巧取。不能增多。惟意撙節。則用自足。上嘉納之。夏四月上。以內庫缺錢。賞賚不足。命部鑄大錢以進。張居正上言。先朝鑄錢呈式。非供上用也。萬歷二年。

進錢一千萬。其後歲半之。已非本意。若闕錢鑄進。是以外府之儲。取供內府。大失舊制矣。上從之。乃罷鑄錢。癸卯。張居正上肅離殿箴。命書於御屏。五月。封遼東總兵李成梁爲甯遠伯。張居正言。成梁屢立戰功。忠勇爲一時冠。加以顯秩。此鼓勵將士之法也。已而成梁使使餽以金。居正曰。而主以百戰得功勳。我受其金。是得罪高皇帝也。卻不受。七月甲子。給事顧九思。王道成等以江南水災。請罷浙直織造內臣。上以示張居正。居正奏。民重困。宜召還孫隆。上曰。彼織幣且完。當俟來春耳。居正曰。地方多一事。則有一事之擾。寬一分。則受一分之惠。災地疲民。不堪催督。暫去之。俟稍稔可復也。上從之。時給事中李涑請卹江南水災。并言四事。上怒其譏訕。居正曰。水災請卹。亦言官之常。雖或觸忤。恐傷聖度。上意乃解。冬十月。薊遼總督梁夢龍報土蠻大舉入寇。張居正奏言。臣諭邊臣。如敵騎入。勿輕戰。堅壁清野。野無所掠。彼將自阻。請令夢龍駐永平。戚繼光駐一片石。伺間邀擊。上善之。旣而土蠻以四萬騎犯前屯。梁夢龍。李成梁率兵禦卻之。十二月。張居正服闋。召見於平臺。

八年春正月己未。先是永豐梁汝元聚徒講學。吉水羅巽亦與之游。汝元揚言。張居正專政。當入都頌言逐之。居正微聞其語。授指有司捕治之。已。湖廣貴州界獲妖人曾光。竄入汝元。巽姓名。云謀不軌。汝元。巽俱先死。湖廣守臣具爰書下法司訊之。并曾光亦非真也。第據律論罪。三月。大學士張居正具疏乞休。再上。上慰留懇切。最後手書傳慈聖口諭。張先生受先帝付託。豈忍言去。俟輔爾至三十。卻再審處。讓後人非晚也。居正因復就職。甲子。賜進士張懋修等三百人及第。出身有差。懋修兄敬修亦成進士。得禮部主事。俱居正子。八月戊子。刑部侍郎劉一儒移書張居正曰。竊聞論治功者貴精明。論治體者尚渾

厚。自明公輔政。立省成之典。復久任之規。申考憲之條。嚴遲限之罰。大小臣工。鯁鯁奉職。治功既精明矣。愚所過慮者。政嚴則苛。法密則擾。今綜覈既詳。弊端剔盡。而督責復急。人情不堪。非所以培元氣而養敦渾之體也。昔皋陶以寬簡贊帝舜。姬公以惇大告成王。淪洽當代。矩矱後世。願明公法之。居正得書不懌。十一月戊寅。上以夜宴。惑於內侍孫海客等。撻二內使幾斃。慈聖太后聞之。切責上。令取霍光傳入覽。上悔悟。降孫海客等。明日上諭閣臣。朕在冲年。自多過愆。惟藉諸先生力諫。使朕爲堯舜之君。張居正因奏諸內臣老成廉慎者存之。諂佞放恣者汰之。皇上亦宜痛改。戒宴飲以重起居。專精神以廣繼嗣。節賞賚以省浮費。卻玩好以定心志。親萬幾以明庶政。勤講學以資治理。端趨向以肅士風。則聖德愈光矣。上深嘉納之。十二月甲辰。張居正請屬儒臣以累朝寶訓實錄。分四十餘則。曰創業艱難。曰勵精圖治。曰勤學。曰敬天。曰法祖。曰保民。曰謹祭祀。曰崇孝敬。曰端好尚。曰慎起居。曰戒遊佚。曰正宮闈。曰教儲貳。曰睦宗藩。曰親賢臣。曰去奸邪。曰納諫。曰守法。曰敬戒。曰務實。曰正紀綱。曰審官。曰久任。曰重守令。曰馭近習。曰待外戚。曰重農。曰興教化。曰明賞罰。曰信詔令。曰謹名分。曰卻貢獻。曰慎賞賚。曰甘節儉。曰慎刑獄。曰褒功德。曰屏異端。曰飭武備。曰禦寇盜。仍敕次第進呈。俟明年開講。其諸司章奏切要者。卽講畢面裁。時上留意翰墨。居正以爲筆札小技。非君德治道所係。故有是請。上嘉納之。九年春正月。大學士張居正請令翰林分番入直。應和文章。或令侍上清讌。質問經義。陳說治理。如唐宋故事。夏四月辛亥。上御文華殿。張居正以給事中傅作舟疏進覽云。今江北淮鳳及江南蘇松連被災。傷民多乏食。至以樹皮充饑。或相聚爲盜。大有可憂。上曰。淮鳳頻年告災。何也。居正對曰。此地從來多荒。



少熟。元末之亂皆起於此。今當破格賑之。上曰然。居正極言。今有司負職。如積穀一事。屢旨申飭。竟成虛文。上作色曰。有司忽民。宜重處之。居正曰。以後犯者當如聖諭。又曰。江南北旱。河南風災。畿內不雨。勢將蠲賑。惟皇上量入爲出。加意撙節。如宮費及服御可減者減之。賞賚可裁者裁之。至若施舍緇黃。不如予吾赤子也。上曰然。今宮費俱節。賞賚不溢。居正曰。皇上謂從舊亦近例耳。如今年暫行。明年卽爲例。非祖制也。臣不敢遠引。如皇祖用度最繁。然內帑尙有餘積。隆慶初。庫貯尙百餘萬。今歲入百二十萬。猶稱乏。惟皇上省察。上是之。十一月。張居正一品考滿。賜金幣及酒果甚厚。手敕褒諭。有精忠大勳。言不能盡。官不能酬之語。加上柱國。太師。支伯爵俸。居正固辭。允之。

十年二月丁酉。大學士張居正上言。安民之道。在察其疾苦。今尙有一事爲民害者。帶徵稅糧也。夫百姓財力有限。一歲之入。僅足供一歲。不幸歲歉。目前尙不能辨。豈復有餘力更完累歲積逋乎。有司避責。往往將今年所徵抵完舊逋。卽今歲所欠。又爲將來帶徵矣。況徵輸額緒繁多。年分淆雜。小民竭脂膏。胥吏飽溪壑。甚者不肖有司。因而漁獵。夫與其朘民以實奸貪之橐。孰若盡蠲以施曠蕩之恩。乞諭戶部覈萬歷七年以前積負。悉行蠲免。將見年正額責令盡完。在百姓易辦。在有司易徵。是官民兩利也。上從之。詔下。中外大悅。三月丁卯。張居正有疾。求私宅票擬從之。六月甲午。居正以疾再乞休。不允。上以細務委張四維。大事卽居正家平章。以遼左大捷。斬速把孩功。進張居正太師。甲辰。上遣司禮太監費手敕諭張居正曰。聞先生糜飲不進。朕心憂慮。國家大事當一一爲朕言之。居正力疾疏謝。并上密奏薦禮部尙書潘晟。吏部左侍郎余有丁。明日上卽命二人入閣。丙午。大學士張居正卒。上震悼。輟朝。遣司禮太監

張誠監護喪事。賜賻甚厚。兩宮太后及中宮俱賜金幣。賜祭十六壇。贈上柱國。諡文忠。居正性深沈。機警多智。數爲史官。時嘗潛求國家典故。及時務之切要者。剖晰之。遇人多所諮詢。及攬大政。登首輔。慨然有任天下之志。勸上力行祖宗法度。上亦悉心聽納。十年來海內肅清。用李成梁。戚繼光。委以北邊。攘地千里。荒外警服。南蠻累世負固者。次第遣將削平之。力籌富國。太倉粟可支十年。問寺積金至四百餘萬。成君德。抑近倖。嚴考成。覈名實。清郵傳。核地畝。一時治績炳然。惜其褊衷多忌。剛愎自用。初入政府。卽以私憾廢遼王。久直。信任奸佞。好諛成風。六曹之長咸唯唯聽命。至章疏不敢斥名。第稱元輔。始譽以伊周。漸進以五臣。且諛之舜禹。居正亦恬然居之。而中允高啓愚。至以舜亦以命禹。題試士。當時目爲勸進。居正卒。餘威尚在。言官奏事尙稱先太師。方奪情時。威權震主。上雖虛己以聽。而內顧不堪。身死未幾。遂遭削奪。并籍其家。子孫皆不保云。初。上在講筵。讀論語。色勃如也。誤讀作背字。居正忽從旁厲聲曰。當作勃字。上悚然而驚。同列皆失色。上由此憚之。及居正卒。後蒙禍。時比之霍氏之驂乘。御史郭維賢疏薦吳中行等降調。然上意已漸移。御史楊寅秋劾王國光罷之。發馮保南京閒住。吳中行。趙用賢。艾穆。沈思孝。王用汲。余懋學。朱鴻謨。趙應元。傅應禎。趙世卿。鄒元標俱復官。會潞王昏禮所需珠寶未備。太后間以爲言。上曰。辦此不難。年來廷臣無恥。盡獻張馮二家耳。太后曰。已抄沒矣。必可得。上曰。保黠猾。盡竊而逃。自此內中張先生。張太岳稱謂絕以爲諱。而籍沒之舉亦胎於此。十二年。上從遼府次妃王氏奏請。籍沒張居正家。其產不及嚴嵩二十分之一。株連頗多。荆川騷動。上曰。遼府廢革。旣奉先帝宸斷。又無應繼之人。着推舉親枝。以本爵奉祀。仍準王歸葬原封。抱養子述璽。準依。

親居住。給與庶糧二百石。本折中半支。王氏從厚。援徽府例贍養。張居正誣讎親藩。箝制言官。蔽塞朕聰。私占廢遼地畝。假以丈量。遮飾騷動海內。專權亂政。罔上負恩。謀國不忠。本當斲棺戮尸。念效勞有年。姑免盡法。伊屬張居易、張嗣修、張順、張書俱令煙瘴地面充軍。

谷應泰曰：聞之虞書良弼。義取協恭。秦誓：「个臣都無他技。」蓋下吏奉職。乃在才具。而端揆裁物。則在度量。卿貳奔奏。不越章程。而宰相坐論。必資道術也。矧承平之相。與創制異。冲人之相。與長君異。周公以惇大告成王。韓琦以才偏貶公著。凡以養蒙作聖。不專在於宣之綜核。明之察察耳。世稱張居正相業。譽者或許其幹略。毀者僅惡其專恣。然予以皆非事實。真知居正者也。考居正大節。特傾危峭刻。忘生背死之徒耳。而其他緣飾以儒術。眩曜以智數。譬之黃子艾牆高基下。陽處父華而不實。求其論思密勿之地。表帥百寮之間。此實難矣。方夫穆宗憑几。顯帝冲齡。居正拱儀。同受顧命。而內臣馮保竊叢於側。斯時逐刁之議未行。弔讓之謀潛固。賣交附璫。漏言市重。彼商鞅之因景監。相如之藉繆賢。揆之結主。固如是乎。卒之會極傳宣。新鄭被斥。而馮保以快己之怨者。卽以酬次輔之恩。居正以去保之疾者。還以固綸扉之寵。鬻權夸毗。若互市然。及乎九齡遠引。頤浩外徙。始乃宮府交通。更唱迭和。馮倚執政。則言路無憂。張恃中涓。卽主恩罔替。以故扇殿清暑。鋪氈禦寒。居正所蒙。壹皆媚璫之力也。至於犯蹕具獄。詞連拱奴。謀發宰臣。風生內侍。苟非天變見於上。公議格於下。則上官黠詐。立碎奉車。易之飛文。赤誅魏氏。居正之包藏禍心。傾危同列。真狗彘不食其餘矣。若夫父喪奪情。太阿不釋。李幼孜倡之於外。馮保應之於內。而居正貌乞持服。心冀慰留。無魯伯禽之東郊不啓。蹈翟方進之脫衰視事。語云：「求忠於孝。」又云：「移孝作忠。」居正其無

人心者乎。何相倍之戾也。矧乃三月歸葬。六月還朝。宰我之意。惟在短喪。曹瞞之心。恐失兵柄。而且吳中行、趙用賢俱以星變陳言。艾穆、沈思孝、鄒元標各以忘親入告。乃復橫被鎖鑰。咸加杖戍。又且論死劉臺、瘐懿士期。錫爵以刎頸驚奔。張瀚以拊膺被斥。雖王巨君之芟除忤恨。梁將軍之收拷太史。淫刑以逞。不是過也。又况懋修、敬修、非列巍科。則躋清秩。是豈向、歆之學冠於漢廷。抑亦京、僚之派相援宋室乎。蓋至身死踰年。遼妃訴闕。而東園祕器。甫賜泉門。緹騎金吾。旋圍府第。匪漢元虧師傅之恩。亦田蚡貽滅族之釁也。乃論者以居正之爲相也。進四書經解。而聖學修明。進皇陵碑。帝鑑圖。而治具克舉。請詞林入直。而清讌無荒。請宮費裁省。而國用以裕。任曾省吾。劉顯而都蠻悉平。用李成梁。戚繼光而邊陲坐拓。厥罪雖彰。功亦不泯焉。然予以居正救時似姚崇。編礪則似趙普。專政似霍光。剛鷲則類安石。假令天假之年。長轡獲騁。則吏道雜而多端。治術疵而不醇。斯豈貞觀之房、杜。而元祐之司馬乎。更可異者。自居正以錢穀爲考成。而神宗中葉。大啓礦稅。居正以名法爲科條。而神宗未造。叢脞萬幾。嗚呼。手實之禍。萌自催科。申商之後。流爲清靜。則猶居正之貽患也。

卷六十二

援朝鮮

神宗萬曆二十年五月。倭酋平秀吉寇朝鮮。平秀吉者。薩摩州人僕也。始以魚販臥樹下。有山城州倭渠名信長。居關白職位。出獵遇吉。欲殺之。吉善辨。信長收令養馬。名曰木下人。信長賜與田地。於是爲信長

畫策。遂奪二十餘州。會信長爲其參謀阿奇支刺殺。吉乃統信長兵誅阿奇支。遂居關白之位。因號關白。以誘劫降六十六州。朝鮮金山與日本對馬島相望。時有倭戶往來互市。通婚姻。時朝鮮王李昞湏於酒。弛備。吉乃分遣其渠行長。清正等率舟師數百艘。逼釜山鎮。五月。潛渡臨津。分陷豐德諸郡。時朝鮮承平。久怯不諳戰。皆望風潰。朝鮮王倉卒棄王京。令次子瑋攝國事。奔平壤。已復走義州。願內屬。倭遂渡大同江。繞出平壤界。是時倭已入王京。毀墳墓。劫王子。陪臣。剽府庫。蕩然一空。八道幾盡沒。且暮。且渡鴨綠。請援之使。絡繹於路。廷議以朝鮮屬國。爲我藩籬。必爭之地。遣行人薛潘諭其王。以匡復大義。揚言大兵十萬已擐甲至。賊抵平壤。朝鮮君臣勢益急。出避愛州。七月。游擊史儒等師至平壤。不諳地利。且霖雨。馬奔逸不止。儒戰死。副總兵祖承訓統兵三千餘。渡鴨綠江。援之。僅以身免。報至。朝議震動。以宋應昌爲經略。員外劉黃裳。主事袁黃贊。畫軍前。八月。倭入豐德等郡。我兵稍集。而行長等頗習兵。詐謂不敢與中國抗。以緩我師。兵部尙書石星亦謂諸將未得利。計無所出。議遣人探之。嘉興人沈惟敬應募。惟敬者。市中無賴也。是時。平秀吉次對馬島。據王京。分其將行長等各發兵守要害。爲聲援。惟敬至平壤。行長令牙將以肩輿迎之。時。平秀吉廢山城君。自號大閣王。惟敬至。執禮甚卑。行長詭曰。天朝幸按兵不動。我亦不久當還。當以大同江爲界。平壤以西盡歸朝鮮耳。惟敬既還。奏。廷議以倭多變詐。未可信。我師利速戰。乃趣應昌等統兵進擊。而石星頗惑之。以惟敬緩急可任。題假游擊赴軍前。且請金行間。八月。布衣程鵬舉請發暹羅兵自海道擣其巢穴。時以爲奇策。又朝議調播州楊應龍援朝鮮。十二月。以李如松爲東征提督。上憫東征將士寒苦。特發金十萬犒慰。且重懸賞格。先是。宋應昌抵山海關。士馬芻糧徵調未

集。而大將軍李如松甫平西夏。亦未至軍。因謬借惟敬糜倭西向。前所羽檄徵兵七萬餘。至者半。乃置三軍。以副將李如柏將左。張世爵將右。楊元將中軍。趨遼陽。至是。如松始至軍。而惟敬歸自倭。稱行長願退平壤。迤西。以大同江爲界。如松大會將吏。叱惟敬儉邪當斬。參軍李應試請問曰。藉惟敬給倭封而陰襲之。奇計也。應昌如松以爲然。乃置惟敬標營。二十五日。誓師東渡。如松將諸鎮士馬四萬餘。東由石門。度鳳凰山。馬皆汗血。臨鴨綠江。天水一色。望朝鮮萬峯出沒雲海。監軍劉黃裳慷慨誓曰。此汝曹封侯地也。二十一年正月。平壤大捷。初。沈惟敬三入平壤。約以正月七日。李提督齎封典過肅甯館。至是。初四日。我師抵肅甯。行長遣牙將二十人來迎。如松檄游擊李甯生縛之。倭猝起格鬪。僅獲三人。餘走還告行長。行長問惟敬曰。此必通事兩誤耳。行長令親信小西飛禪守籐隨惟敬謁如松。如松加撫遣歸。六日。抵平壤。行長竚風月樓候瞻龍節。倭俱花衣。夾道迎候。如松分布將士。整營入城。諸將逡巡未入。形已露。倭悉登陣拒守。如松度地形。東南竝臨江。西枕山陡立。惟迤北牡丹臺高聳最要。三倭列拒馬地。礮以待。遣南兵試其鋒。佯退。是夜。倭襲李如柏營。擊卻之。如松因部勒諸將。諭無割級。攻圍止缺東面。屬游擊吳惟忠攻牡丹峯。陰取西南。以倭易麗兵。令祖承訓等詭麗裝潛伏。八日黎明。鼓行抵城下。攻其東南。倭礮矢如雨。軍稍卻。松如手斬先退者以徇。募死士援梯鉤而上。殺數人。不退。倭悉力拒守。倭方輕南面爲麗兵。承訓等乃卸裝露明甲。倭急分兵拒堵。如松已督楊元等從小西門先登。李如柏等亦從大西門入。火藥並發。毒煙蔽空。方戰時。吳惟忠中鉛洞胸。猶奮呼督戰。而如松坐騎斃於礮。易馬馳墮塹。鼻出火。麾兵愈進。我師無不一當百。前隊質首。後勁已踵。突舞於堞。倭退保風月樓。夜半。行長提兵渡大同江。遁還龍山。是役。

凡得級千二百八十五餘。死於火及從城東跳溺無算。裨將李寧、查大受等率精兵三千潛伏江東僻路。獲級三百六十二。生擒二倭。乘勝追襲。十九日。李如柏進復開城。得倭級百六十五。朝鮮郡縣如黃海、平安、京畿、江源四道並復平。歸平壤。惟咸鏡道爲清正拒守。聞開城破。亦奔王京。王京爲朝鮮都會。咸鏡、忠清爲之掎角。頗據天險。而援師旣連勝。有輕敵心。二十七日。去王京七十里。朝鮮人以倭棄王京遁。告如松。信之。將輕騎趨碧蹄館。去王京三十里。馳至大石橋。馬蹶。傷額幾斃。倭猝至。圍之數重。將士殊死戰。自巳至午。彀中矢且盡。金甲酋前搏李將軍甚急。裨將李有昇以身蔽如松。刃數倭。竟中鈎墮。爲倭支解。李如柏、李甯乃益遮夾擊。李如梅箭中金甲倭。墜馬。會楊元援兵至。砍重圍入。遂潰。而我精銳亦多喪失。過橋者盡死。天且雨。近王京平地俱陷。畦冰解。泥深。騎不得騁。倭背山面水。連珠布營。城中廣樹飛樓。鳥銃自穴中出。應時斃我師。乃退駐開城。三月。經略宋應昌檄劉綎、陳璘水陸濟師。上益發帑金二十萬佐軍興。時諜者言王京倭二十萬。且聲言關白揚帆入犯。李如松分留李甯等駐開城。楊元等軍平壤。掘大同江接餉道。李如柏等軍寶山諸處爲聲援。查大受等軍臨津。而將銳卒東西策應。聞倭將平秀嘉據龍山。倉粟數十萬。從間道縱火盡焚之。倭乏食。東師議款。初我師捷平壤。鋒甚銳。轉戰開城。勢如破竹。及碧蹄之敗。久頓師絕域。氣益索。經略宋應昌急圖成功。於是惟敬之款始用。而倭芻糧並燼。行長亦懲平壤之敗。有歸志。因而封貢之議起。經略旣得請於朝。赦不窮追。且得倭報惟敬書。乃益令游擊周宏謨同惟敬往諭倭獻王京。返王子。如約縱歸。倭果於四月十八日棄王京遁。如松及應昌整衆入城。所餘米四萬餘。芻豆稱是。如松以兵臨漢江尾。倭後欲乘惰歸擊之。而倭步步爲營。用分番迭休法以退。別將劉綎

帥兵五千趨尙州鳥嶺。鳥嶺廣互七十餘里。懸崖鑿削。中通一道如線。灌木叢雜。騎不得成列。倭尙拒險。而別將查大受、祖承訓等由間道踰槐山出鳥嶺後。倭大驚。前移釜山浦。築居屯種。爲久戍計。我師乃張疑兵。分遣劉綎、祖承訓等屯大邱、忠州。檄調全羅水兵龜船分布釜山海口。時倭已棄王京。漢江以南千有餘里。朝鮮故土奄然還定。兵科給事中侯慶遠謂我與倭何讐。爲屬國勤數道之師。力爭平壤。收王京。挈兩都授之。存亡興滅。義聲振海外矣。全師而歸。所獲實多。上乃諭朝鮮王還都王京。整兵自守。我各鎮兵久疲海外。以次撤歸。應昌復疏稱釜山雖瀕南海。猶朝鮮境有。如倭覘我罷兵。突入再犯。朝鮮不支。前功盡棄。考輿圖朝鮮幅員東西二千里。南北四千里。從西北長白山發脈。南跨全羅界。向西南止日本對馬島。偏在東南。與釜山對。倭船止抵釜山鎮。不能越全羅至西海。蓋全羅地界直吐正南。迤西與中國對峙。而東保薊遼。與日本隔絕不通海道者。以有朝鮮也。關白之圖朝鮮。意實在中國。我救朝鮮。非止爲屬國也。朝鮮固則東保薊遼。京師鞏於泰山矣。今日撥兵協守爲第一策。卽議撤。宜少需時日。俟倭盡歸。量留防戍。部覆南兵暫留分布朝鮮。量簡精兵三千善後。餘盡撤如前議。六月。沈惟敬歸自釜山。同朝使小西飛禪守滕來請款。而倭隨犯咸安、晉州。逼全羅。聲復江漢以南。以王京、漢江爲界。李如松計全羅、沃饒、南原府尤其咽喉。乃命李平胡、查大受鎮南原。祖承訓、李甯移南陽。劉綎移陝川。已。倭果分犯我師。並有斬獲。兵科給事中張輔之謂倭聚釜山。原佯退誘我撤兵。圖漸逞。無故請貢。非人情。今猝犯晉州。情形已露。宜節制征剿。遼東都御史趙燿亦報款貢不可輕受。七月。倭從釜山移西生浦。送回王子陪臣。時我師久暴露。聞撤。勢難久羈。宋應昌乃請戍全羅。慶尙議留劉綎川兵五千。吳惟忠、駱尙志南兵二千六



百合薊遼共萬六千人。聽劉綎分布慶尙之大邱。而兵部尙書石星一意主款。謂留兵轉餉非策。應昌師老無成功。亦願弛責。然策倭多詐。恐兵撤變生。已而命沈惟敬復入倭營。促謝表。急圖竣役。乃并撤吳惟忠等兵。止留綎兵防守。諭朝鮮世子臨海君瑋居全慶。督師以顧養謙總督遼左。九月。兵部主事曾偉芳言。倭款亦去。不款亦來。不款亦來。不款亦來。蓋關白大衆已還。行長留待。知我兵未撤。不能以一矢相加遣也。欲歸報關白捲土重來。則風帆不利。正苦冬寒。故曰款亦去。不款亦來。沈惟敬前倭營講購咸安。晉州隨陷。而欲恃款冀來年不攻。則速之款者。速之來耳。故曰款亦來。不款亦來。爲今日計。宜令朝鮮自爲守。弔死問孤。練兵積粟。以圖自強。章下部。十月。總督顧養謙力主撤兵。許之。因疏請封貢。上命九卿科道會議。時御史楊紹程奏。臣考之太祖時。屢卻倭貢。慮至深遠。永樂閒。或一朝貢。漸不如約。自是稔窺內地。頻入寇掠。至嘉靖晚年。而東土受禍更烈。豈非封貢爲厲階耶。今關白謬爲恭謹。奉表請封。之後。我能閉關拒絕乎。中國之釁。必自此始矣。且關白弑主篡國。正天討之所必加。彼國之人。方欲食其肉而寢處其皮。特劫於威而未敢動耳。我中國以禮義統禦百蠻。而顧令此篡逆之輩。叨天朝之名號耶。宜急止封議。敕朝鮮練兵以守之。我兵撤還境上。以待之。關白可計日而敗也。是時。廷臣禮部郎中何喬遠。科道趙完璧。王德完。邊中立。徐觀瀾。顧龍。陳維芝。唐一鵬等。交章止封。而薊遼都御史韓取善亦疏倭情未定。請罷封貢。兵部尙書石星恐不能羈縻關白。甚張皇。終主封貢不已。

二十二年八月。總督顧養謙奏講貢之說。貢道宜定甯波。關白宜封爲日本王。請擇才力武臣爲使。諭行長部倭盡歸。與封貢如約。九月。朝鮮國王李昞疏請許貢保國。上乃切責羣臣阻撓封貢。追褫御史郭

實等詔小西飛入朝。時改總督侍郎孫鏞新受事。倭使抵京。石星優遇如王公。小西飛等殊揚揚。過闕不下。既集多官面譯。要以三事。一勒倭盡歸巢。一既封不與貢。一誓無犯朝鮮。倭俱聽從。以聞。上復諭於左闕。語加周復。大略如樞部意。十二月。封議定。命臨淮侯李宗城充正使。以都指揮楊方亨副之。同沈惟敬。往日本。時禮部議日本舊有王。未知存亡。關白或另擬二字。或卽以所居島封之。行長以下。量授指揮。銜上竟準日本王號。給金印。行長授都督僉事。適諜報熊川島倭船三十六號業起行歸。石星遂謂封事必可成矣。

二十三年春正月。遼東都御史李化龍疏倭六可疑。五可慮。謂倭不識漢字。恐中間兩相欺給。請從禮部量封秀吉。順化王。罷遣沈惟敬。增募水兵。而清正素不服關白。與行長不相能。可用魯連諭燕將計間之。時封使已發。竟不從。

二十四年春正月。先是。東封之使久懷觀望。至是始抵釜山。而沈惟敬詭云。演禮同行。長先渡海。私奉秀吉。蟒玉翼善冠及地圖武經。又驅壯馬三百。南戈厓騎從。陰獻秀吉。取阿里馬女。與倭合。李宗城執縶子。經行之營。所在索貨無厭。次對馬島。太守儀智夜飾美女二三人。更番納行帷中。宗城安之。倭酋數請渡海。不允。儀智妻。行長女也。宗城聞其美。併欲淫之。智怒不許。適謝周梓姪隆。與宗城爭道。宗城欲殺之。隆誅其左右。以倭將行刺。宗城懼。棄璽書夜遁。比明。失路。自縊於樹。追者解之。遂奔慶州。副使楊方亨聞於朝。上震怒。逮問宗城。議戰守。會方亨復揭倭情無變。正使自爲奸人誤耳。上以方亨充使。加惟敬神機營銜副之。廷臣交章請罷封。上切責。下御史曹學程於理。立限渡海。於是惟敬益舞智揣摩。玩大司馬股掌。

矣。三月。工部郎中岳元聲參石星力主封事有三辱、四恥、五恨、五難。疏入。謫爲民。九月。楊方亨、沈惟敬奉册如日本。平秀吉齋沐三日。郊迎節使。受封行五拜三叩頭。山呼禮禮畢。款使者備至。朝鮮王議遣光海君致賀。已而聽嬖臣李德馨言。使州判奉白土紬爲賀。秀吉怒。語惟敬曰。若不想二子三大臣三都八道悉遵天朝約付還。今以卑官微物來賀。辱小邦耶。辱天朝耶。惟敬慰諭之。秀吉曰。今留石曼子兵於彼。候天子處分。然後撤還。翼日。具貨物數百種奉貢。遣使齎表文二通隨册使渡海至朝鮮。廷議遣使於朝鮮取表文進驗。其一謝恩。其一乞天子處分朝鮮。廷議以爲飾說云。

二十五年春正月。石星請自往朝鮮諭兩國就盟罷兵。不許。二月。再議東征。時封事已壞。而楊方亨詭報去年從釜山渡海。倭於大版受封。卽回和泉州。然倭責朝鮮王子不往謝禮。又微仍留釜山如故。謝表後時不發。方亨徒手歸。至是。沈惟敬始投表文。案驗潦草。前折用豐臣圖書。不奉正朔。無人臣禮。而寬奠副總兵馬棟報。清正等擁二百艘屯機張營。方亨始直吐本末。委罪惟敬。并石星前後手書進呈御覽。上大怒。命逮石星。惟敬按問。以兵部尙書邢玠總督薊遼。改麻貴爲備倭大將軍。經理朝鮮。僉都御史楊鎬駐天津申警備。楊汝南丁應泰贊畫軍前。五月。邢玠至遼。行長建樓。清正布種。島倭害水。索朝鮮地圖。玠遂決意用兵。麻貴望鴨綠東發。所統兵僅萬七千人。請濟師。玠以朝鮮兵惟閑水戰。乃疏請募兵川浙。并調薊遼宣大山陝兵及福建吳淞水兵。劉綎督川漢兵六千七百聽剿。貴密報候宣大兵到。乘倭未備。竟掩釜山。則行長擒。清正走。玠以爲奇計。乃檄楊元屯南原。吳惟忠屯忠州。大學士張位請屯田開城。平壤。以資軍興。朝鮮恐中國吞併。以嶢嶼爲辭。議遂寢。六月。倭數千艘先後渡海。分泊釜山。加德安骨。

安窟。放丸如雨。殲朝鮮郡守安宏國。已復往來竹島。漸逼梁山、熊川。沈惟敬率營兵二百出入釜山。經略邢玠陽爲慰藉。檄楊元襲執之。縛至貴營。惟敬執而倭嚮導始絕。七月倭奪梁山、三浪。遂入慶州。侵閑山。夜襲恭山島。統制元均風靡。遂失閑山要害。閑山島在朝鮮西海口。右障南原。爲全羅外藩。一失守。則沿海無備。天津、登萊皆可揚帆而至。而我水兵三千甫抵旅順。閑山破。經略檄守王京西之漢江、大同江。扼倭西下。兼防運道。八月。清正圍南原。乘夜猝攻。守將楊元聞倭至。驚起帳中。乘城跣足而遁。遼人衛楊元西奔。時全州有陳愚衷。忠州有吳惟忠。各扼要。而全州去南原僅百里。相犄角。南原告急。愚衷懦不發兵。聞已破。州民爭棄城走。麻貴急遣游擊牛伯英赴援。與愚衷合兵屯公州。倭遂犯全羅。逼王京。王京爲朝鮮八道之中。東隘爲烏嶺。忠州。西隘爲南原。全州。道相通。自二城失。東西皆倭。我兵單弱。因退守王京。依險漢江。麻貴請於玠。欲棄王京。退守鴨綠江。海防使蕭應宮以爲不可。自平壤兼程趨王京。止之。麻貴發兵守稷山。朝鮮亦調都體察使李元翼由烏嶺出。忠清道遮賊鋒。玠旣身赴王京。人心始定。玠召參軍李應試問計。應試請問朝廷主畫云何。玠曰。陽戰陰和。陽勦陰撫。政府八字密畫。無泄也。應試曰。然則易耳。倭叛以處分絕望。其不敢殺楊元。猶望處分也。直使人諭之曰。沈惟敬不死。則退矣。因請使李大諫於行長。馮仲纓於清正。玠從之。下石星於法司。併沈惟敬俱坐大辟。九月。倭至漢江。楊鎬遣張貞明持惟敬手書往責其動兵有乖靜俟處分之實行長。正成亦尤清正輕舉。乃退屯井邑。離王京六百里。清正亦退屯慶尙。離王京四百里。貞明反至中途。爲人所刺死。麻貴遂報青山、稷山大捷。蕭應宮具揭上曰。倭以惟敬手書而退。青山、稷山並未接戰。何得言功。玠鎬怒。遂劾應宮。恇怯不親解。惟敬並逮。十一月。

總督邢玠徵兵大集。上發帑金犒軍。併賜玠尚方劍。而以御史陳效監其軍。玠大會諸將。分三協。左李如梅。右李芳春。中高策。並以副總兵分將。經理楊鎬。同麻貴。率左右協。自忠州。烏嶺。向東安。趨慶州。專攻清正。使李大諫通行長約。勿往援。復遣中協屯宣城。東援慶州。西扼全羅。以餘兵會朝鮮。合營由天安全州。南原而下。大張旗幟。詐攻順天等處。以牽制行長東援。十二月。會慶州麻貴。遣黃應暘。賄清正約和。而率大兵奄至其營。時倭屯尉山。尉山之南。烏山。俱不甚高。而城皆依山險。中一江通釜寨。其陸路由彥陽。通釜山。貴欲專攻尉山。恐釜倭由彥陽來援。令中協高重。吳惟忠等。扼梁山。左協董正誼等。赴南原。張疑兵。又遣右協盧繼忠。兵二千屯西江口。防水路援。二十三日。乃進攻尉山。游擊擺寨。以輕騎誘倭入伏。獲級四百餘。倭盡奔烏山。於前連築三寨。翼日。游擊茅國器。統浙兵先登。連破之。獲級六百六十一。倭堅壁不出。方力攻山寨時。裨將陳寅身先士卒。冒彈矢勇呼而上。砍柵兩重。清正白袍躍馬督倭拒守。至其第三柵。垂拔。楊鎬遽令國器竊割倭級。戰稍解。國器復以李如梅未至。不便首功。遂鳴金收軍。詰朝。如梅至。攻之不拔。烏山視尉山高。石城新築。堅甚。我師仰攻。多損傷。諸將乃議曰。倭艱水道。餉難繼。第坐困之。清正可不戰縛也。鎬等以爲然。分兵圍十日。夜。倭用礮者。從隙發。多命中。彈皆碎鐵爲之。中多疊傷。然倭亦饑甚。瞰我師稍息。僞約降。緩攻。而冀行長來援。行長亦慮我襲釜營。不敢輕進。乃選銳卒三千。虛張幟。蔽江上。朝鮮將李德馨。訛報海上倭船揚帆而來。鎬不及下令。策馬西奔。諸軍無統御。皆潰。清正縱兵逐北。我兵死者萬餘。游擊盧繼忠三千人殲焉。鎬貴奔星州。撤兵還王京。會同邢玠。露布言尉山大捷。諸營上簿。書士卒亡者二萬。鎬大怒。駁正。止稱百餘人。贊畫丁應泰。聞尉山之敗。慚惋。詣鎬問後計。鎬示以內閣。

張位。沈一貫手書。并所票。未下旨。揚揚功伐。應泰怒。驗進退情實。首論位。一貫交結邊臣。扶同欺蔽。鎬附勢煽禍。飾罪張功。及麻貴。李如梅。按律悉當斬。并鎬駁改陣亡兵馬卷冊。封進。上覽之震怒。欲付法。輔臣趙志皋力救。乃罷鎬聽勘。因遣給事中徐觀瀾查勘東征軍務。上怒張位。以其密揭薦鎬。削籍爲民。以天津巡撫萬世德代楊鎬經理遼左。

二十六年春正月。總督邢玠以前役乏水兵無功。乃益募江南水兵。精講海運。爲持久計。二月。督都陳璘以廣兵。劉繼以川兵。鄧子龍以浙直兵。先後至。邢玠分兵三協。爲水陸四路。路置大將。中路李如梅。東路麻貴。西路劉繼。水路陳璘。各守信地。相機行勦。時倭盤據朝鮮七年。沒海千餘里。亦分三窟。東路則清正。據尉山。自去冬攻圍。益增築。西生機張。在在屯兵。而恃釜山爲根本。西路則行長。據粟林。曳橋建砦。數重。憑順天城。與南海營相望。負山襟水。最據挖塞。中路則石曼子。據泗州。北恃晉江。南通大海。爲東西聲援。薩摩州兵剽悍。稱勁敵。而行長水師。番休濟餉。往來如駛。尤倭繫重。玠懲島山之失。特於三路外置水兵一路。約日並進。尋報遼陽警。李如松敗沒。詔李如梅還赴之。中路以董一元代。九月。東征將士分道進兵。劉繼進逼行長營。使吳宗道約行長爲好。會行長許以五十人往。繼喜。分布諸將。四面設伏。令部將詐爲繼。而繼詐爲卒。執壺觴侍。令軍中曰。視吾出帳。卽放礮圍倭。盡殲之。翼日。行長果率五十騎來。僞繼罄折迎於帳外。及席。行長顧執壺觴者曰。此人殊有福。繼驚愕。置壺觴出。司旗鼓者遽傳礮。行長騰躍上馬。從騎一字鴈列。風翦電掣。旋轉格殺。游擊王之翰。急率黔苗兵來援。倭已奪路而去。明日。行長遣人謝宴。繼亦遣官謝。謂昨登席放礮。敬客禮也。誤生疑心。行長唯唯。遣使遺繼以巾幘。繼進攻城。奪其橋。斬首

九十二。陳璘舟師協堵。擊毀倭船百餘。行長潛出千餘騎。扼之。縱不利退。璘亦棄舟走。麻貴至尉山。據險割其糧。稻頗有斬獲。倭僞退誘之。貴入其空壘。伏兵起。旗幟蔽空。遂敗。董一元進取晉州。乘勝渡江南。連燬永春。昆陽二寨。倭退保泗州老營。鏖戰下之。游擊盧得功。歿於陣前。逼新寨。寨三面臨江。一面通陸。引海爲濠。海艘泊寨下。千計築金海。固城爲左右翼。中通東陽倉。十月。董一元遣步兵游擊茅國器。彭信古。葉邦榮。前攻城。騎兵游擊郝三聘。馬呈文。師道立。柴登科。繼之。游擊藍方威。攻其東北水門。自辰至未。彭信古用火橫擊寨門。碎城堞數處。步兵競前拔柵。忽營中橫破。火藥發。煙漲天。倭乘勢衝殺。固城援倭亦至。郝三聘。馬呈文率騎兵先走。遂大潰。奔還晉州。勘科徐觀瀾奏。四路喪敗。旨下部。斬馬呈文。郝三聘以徇。一元等各戴罪立功。初。上見丁應泰疏。謂御極二十六年。未見忠直如此人者。書其名於御屏。沈一貫其一。會玉熙宮宦侍演東征劇。熒惑聖聽。上爲之霽顏。復召一貫入閣。福建都御史金學會報。平秀吉七月九日死。各倭俱有歸意。十一月十七夜。清正發舟先走。麻貴遂入島山西浦。劉綎攻奪曳橋。獲級百六十。石曼子引舟師救行長。陳璘統蒼曉船。邀擊之。得級二百二十四。副將鄧子龍。朝鮮統制使李舜衝。鋒沒於陣。子龍。曉將也。諸倭揚帆盡歸。經略萬世德。自六月受命。不敢前。比聞倭退。兼程馳至。會同邢玠奏捷。督學御史李堯民知之。因告廟獻俘。上言。諸臣欺誤狀。上艱然。抵疏於几而罷。丁應泰亦再疏。賂倭賣國。上念將士久勞苦。仍發帑金十萬兩犒師。特諭優敘。勘科徐觀瀾抗疏論。沈一貫。蕭大亨。邢玠。萬世德。黨和賣國。疏至京。戶部侍郎張養蒙。尼之不得上。時觀瀾方駐遼。造冊。身歷釜山。尉山。忠州。星州。南原。稷山。查獲各處敗狀。據實入冊。大亨危之。一貫簡觀瀾前疏。有抱痛語。票準回籍調理。改命給事中楊應

文代完勘事。

二十七年四月。征倭告捷。上御門受俘。梟磔平秀政。正成。傳首九邊。總督邢玠劾贊畫主事丁應泰落職。七月。給事中楊應文勘報東征攻次。四路擒斬首陳璘。次劉繼。又次麻貴。而董一元始破三寨。終掃諸巢。功亦難泯。晉邢玠太子太保。蔭一子錦衣世襲。萬世德陞右副都御史。蔭一子入監。陳璘。劉繼各加都督同知。麻貴右都督。董一元復職。再敘稷尉功。賜茅國器。陳寅。彭友德等金。楊鎬以原官敘用。御史陳效病死。蔭一子錦衣。棄師。楊元通倭。沈惟敬先後棄市。

谷應泰曰。關白本薩摩州人。倭部之稍黠者耳。非有奇才異能。武勇絕藝。特以李昞縱酒。朝鮮備弛。遂狡焉啓疆。思有吞噬之舉。方其陷王京。劫世子。剽府庫。毀墳墓。八道盡沒。進窺鴨綠。勢岌岌矣。而請援之使絡繹於路。救邢救衛。春秋之義也。况乎勢拱神京。地牽關海。薊遼之外藩。東江之咽喉。一或失守。重險撤焉。非如應龍之反播州。猓羅之陷西川。荒徼弄兵。有傷國體而已。然予以援之之法有三。命武健之將。選精銳之師。出其不意。急擊勿失。如陳湯。甘延壽之於康居。策之上也。其或因糧於敵。分兵斷道。坐而困之。窮蹙自斃。如趙充國之於金城。策之次也。又或始則震以兵威。繼則結以恩義。開誠布信。堅明約束。如諸葛武侯之於孟獲。策之又次也。乃剿旣不足以樹威。而撫又不能以著信。臨事周張。首尾銜決。不可謂非行間之乏謀。而中樞之失算矣。方李如松平壤大捷。李如柏進拓開城。四道復平。三倭生繫。廓清之功。可旦夕竣。而乃碧蹄輕進。兵氣破傷。功虧一簣。良足悼也。又若麻貴尉山之捷。三協度師。勢相掎角。砍柵拔寨。鋒銳莫當。而割級之令。解散軍威。僉都之肉。豈足食乎。况於沈惟敬以市井而銜皇命。李宗城以淫貪



而充正使。以至風月候節之給。壺觴好會之詐。邢玠飛捷之書。楊鎬冒功之舉。罔上行私。損威失重。煌煌天朝。舉動如此。毋怪荒裔之不賓也。向非關白貫惡病亡。諸倭揚帆解散。則七年之間。喪師十餘萬。糜金數千鎰。善後之策。茫無津涯。律之國憲。其何以辭。而乃貪天之功。倖邀爵賞。衣緋橫玉。任子贈官。不亦惡乎。乃馬棟、丁應泰之疏。能直伸於關白未死之前。而李堯民之章。反見抵於關白已死之後者。蓋以用兵之初。神宗怒白甚銳。怒則望其速濟。故必欲核其真。用兵既久。神宗憂白漸深。憂則幸其成功。故不欲明其僞。卒之忠言者落職。欺君者封爵。而所遭逢異矣。

### 卷六十三

#### 平哱拜

神宗萬歷二十年二月。甯夏哱拜亂。拜故韃靼種也。嘉靖中。拜得罪其酋長。父兄皆見殺。拜伏水草中。得免。來投守備鄭印。隸麾下。驍勇屢立戰功。歷陞都指揮。拜妻施氏孕將產。拜夢空中大響。天裂出火焰。一妖物如虎入施脅下。不見。拜急手劍之。驚覺。遂產子。狼貌。鼻啼。名曰承恩。萬歷十七年。拜加副總兵。致仕。子承恩襲。十九年。洮河告警。上遣科臣巡九邊。尚寶丞周宏禴以御史往甯夏。舉承恩及指揮王文秀。併拜義子。哱雲等拜雖請老。居恆多畜蒼頭軍。聲稱報國。會經略鄭洛檄夏鎮調發。巡撫黨馨奉檄。遣文秀率千騎西援。拜驚曰。文秀雖經戰陣。恐不能獨將。乃詣洛轅門。願以所部三千人與子承恩從征。洛壯而許之。馨惡其自薦。馬羸者不與。易有餘馬。亦不給。拜快快去。至金城。見諸鎮兵皆出其下。賊平。馳還。取

徑塞外。戎騎辟易不敢逼。遂有輕中外心态。睢驕橫。黨馨每裁抑之。且欲覈拜冒糧罪。而承恩以強娶民女爲妾。箠之二十。哱雲、文秀又以陞授事怨馨。會鎮戍請冬衣布花月糧。久勿給。坐營江廷輔請給前銀以安衆心。馨曰：此有挾而求。漸不可長。彼不畏族乎？軍鋒劉東陽拔撫署前鹿角作忿狀。拜嗾之曰：若等任爲之。遂羣哄不可制。東陽者靖鹵衛人。素梟桀。有異志。於是糾黨晨入帥府白事。總兵張維忠素鮮威望。爲衆所輕。見衆驚懼不能彈壓。衆露刃。執副使石繼芳擁入軍門。黨馨急匿水洞。索得劫至書院。同繼芳僂之時。二月十八日事也。遂縱火焚公署。收符印釋囚。掠城中。劫張維忠以侵糧。激變報時。河東僉事隨府通政穆來輔適抵鎮。賊并劫之。請招安以緩師。二十日。總督尙書魏學會行部花馬池。聞變遣標下張雲、郜寵諭降。二十三日。哱雲、王文秀統兵五百自中衛互市歸。合叛卒殺游擊梁琦。守備馬承光。二十五日。索敕印。維忠與之自縊死。東陽遂自稱總兵。聽拜主謀。據城刑牲而盟。授承恩許朝左右副總兵王文秀、哱雲左右參將。挾慶王代請贖罪。承恩乃勅兵分遣王虎、何安等據城堡。會張雲等至。東陽曰：必欲我降。依我所自署授官。世守甯夏不者。與套騎馳潼關也。承恩徇玉泉營游擊傅垣拒守。千戶陳繼武執垣降。徇中衛。徇廣武。參將熊國臣棄城匿。河西望風靡。惟王文秀徇平鹵。參將蕭如薰堅守不下。如薰妻楊氏。總督尙書兆之女也。謂如薰曰：若爲忠臣。妾何難爲忠臣婦。盡出簪珥勞軍士妻。帥之守城。賊攻圍數月。竟不能克。賊又率兵過河。欲取靈州。齎金帛誘套部著力兔等。許以花馬池一帶聽其駐牧。勢大猖獗。全陝震動。三月四日。副總兵李昫奉總督魏學會檄攝總兵進勦。統游擊吳顯趨靈州。別遣游擊趙武趨鳴沙州。張奇兵沿河扼賊南渡。轉戰獲賊于正等八人。舟十八艘。賊鋒少挫。總督駐下馬關徵調時。

靈州裨將吳世顯黨逆。約是月九日與賊應。參將來保誓死守。賊齎書詐門。拒卻之。洵聞急與吳顯兼程馳赴。逆謀始折。翼日調延綏。蘭靖兵稍集。洵乃分遣渡河收復營堡。廣武僞游擊張天紀。大壩僞守備高天爵俱遁。十五日復棗園堡。靖鹵參將吳繼祖擣中衛。擒賊黨王虎。石空寺堡亦下。獲僞守備何安。二十日套部千騎薄邵剛堡。千總汪汝漢發三矢殺三人。乃解去。進復玉泉營。凡先後收還營堡四十七。河西唯鎮城爲賊據。後三日總督移師小鹽池。拜聞套部且至。屬王文秀許朝分馳迎之。二十五日著力兔打正等引控弦三千騎馳金貴堡。二十七日移鎮河堡。入屯演武場。賊益掠城中子女媚之。奉河東西地圖。套人聲言已與噶王子爲一家。拜文秀並易服。合兵攻玉泉急。二十九日噶雲引著力兔攻平鹵堡。參將蕭如薰伏兵南關。佯敗誘之入。伏射雲死。併傷驍賊吳敖霸。套部遁出塞。因掠糧道。聲犯花馬池諸處。趙武駐玉泉被困急。李昫馳赴之。圍亦解。昫會原任總兵牛秉忠督六路兵。翼日抵鎮城下。時總兵已擢董一奎。李蕢副之。官兵抵城下。賊東北二門各出精騎二千搏戰。步卒列火車爲營。四月五日我師衝鋒奪火車百餘輛。追奔入河。溺死賊無算。延綏副總兵王通戰尤力。其家丁高益等三人乘勝先登。殺入北門。招榆林諸帥兵爲後繼。不至被殺。通亦傷額。榆林游擊俞尙德戰死。翼日許朝王文秀脅慶王至東城上樓乞暫罷兵。願縛首惡獻。劉川白金等謾語支吾。願投誥救城下。示無所畏。拜妻施氏時諫不聽。又翟珮而立。謂拜曰。此何來。悖德不祥。奈何自取奇禍。承恩推跌去之。登南城遙謂都司李鯤曰。吾父出萬死爲國捍邊。蒙恩至上將。撫臣腴削激變。自取滅亡。吾父子勒部曲待命。當事不察。反以爲罪。今首惡具在。乃不罪倡亂罪戢亂者。吾甯保此完城。結塞北自全耳。會官軍糗糧乏。遂假此休士近堡。總督日夜促芻餉。

調延綏莊浪兵。乃以二十一日進攻。復抵城下。濠塹豎雲梯夾攻。賊迎敵多殺傷。承恩與東陽勒精騎潛伏。從延渠掠我糧餉二百餘車。先是衆議以李蕢非衝邊才。乃調麻貴自戍所代之。貴素以勇聞。且多蒼頭軍。至是軍亦至。二十九日夜。貴等乘風縱火。復以雲梯攻城。賊豫治滾木礮石待。擲火然燒我兵千數。賊日恣淫虐。城中婦女寶貨已經搜括。尙根索不已。死者甚衆。至迫脅慶府甚急。妃方氏懼辱。拔劍將自刎。保母抱持。并世子匿土窖中。以被服置井上環哭。賊見信爲溺。盡取金帛及他宮人去。比發窖。妃已死矣。總督凡用兵兩月無成功。憂之。或謂招劉許。陰授意殺哮拜父子。立功贖罪。無不應者。督府然其謀。遣家丁葉得新往見時。四人方約共死生不可閒。暴其謀。執得新折脛下獄。命李如松總甯夏兵。浙江道御史梅國楨監其軍。時言者謂李氏握重兵。不宜拒虎進狼。而國楨力保如松忠勇可任。故有是命。巡撫甯夏已推朱正色。甘肅都御史葉夢熊上書願討賊。詔協力赴之。五月。巡撫朱正色渡河督戰。以上命頒將士賞。一軍踴躍。賊聞詭請降。以張傑嘗總甯夏兵。與拜交善。遣入城招安。傑單騎往。切責之。許朝乃述葉得新用間謀殺語。傑未信。卽昇至使吐實。得新大罵曰。死狗賊。計不得行。命也。天旦夕磔汝。何喋喋爲。朝怒。攢刀殺之。傑亦被繫。時頓兵數月。未能卽下。乃重懸賞格。購哮拜等。上特賜總督魏學會劍。違者立斬。六月。都御史葉夢熊至靈州。從甘州攜神礮火器四百車至。更約法。益徵苗兵。會浙江巡撫常居敬募浙江千人。糗糧自辦。詔嘉其忠。調赴甯夏。於是分爲五軍。董一奎攻其南。牛秉忠攻其東。李昫攻其西。劉承嗣攻其北。而麻貴率遊兵策應。二十日。並逼城下。哮拜自北門出戰。意欲自往。勾套部麻貴率參將馬孔英先登赴敵。遂拜入城。擒斬百十七。先是拜與套部深相結。日夜從著力兔帳中。便調度。至是入

城不得出。套部不得拜。亦不敢復渡河深入。二十二日。御史梅國楨。提督李如松。統遼東。宣大。山西兵。麇集。軍聲大振。賊嬰城自守。國楨樹受降旗於城南。賊因索面陳歸順。許之。東陽。許朝等。梯城而下。劍戟鱗次。刃芒矐目。城上皆控弦注矢以待。國楨策騎直前。朝大驚。不覺膝之屈也。然賊實給我無降意。自此盡力攻城矣。二十五日。我師用布袋三萬。盛土填集。登城爲礮石擊卻。都司李如樟。夜半以雲梯上南城。翼日。游擊龔子敬。提苗兵攻南關。如松乘勢欲擁入城。皆爲礮箭擊卻。我兵會食。賊卽縋下奪梯牌。益縱火焚攻具。是夜。指揮趙承光。葛臣。戚欽。武生張遐齡。百戶姚欽。約爲內閒。夜半。四面並舉烽火。城下兵趨上。而樵樓火蚤發。南火弗起。城中果鼓譟大呼殺賊。欽使遐齡縋城召外兵。行未中道。欽復亟跳城下呼救。而賊蚤覺。已盡縛趙承光。戚欽等殲之。許朝因欲開小南門逸。以外兵整不敢出。自是城中糧且盡。銳氣益喪矣。七月。給事中許子偉。劾總督尙書魏學會。惑於招撫。罷秩。命葉夢熊代之。賜劍如故。七月二日。許朝等至南關。請總兵董一奎款語。僉事隨府乘閒同家人抱關防從城躍下。傷肱不能起。賊復縋執繫獄。翌日。定議水攻。甯夏城西北卑下。且與金波。三塔諸湖之水相近。東南逼觀音湖。新渠紅花渠。形如釜底。遂遠城築堤。十七日。堤成長千七百丈。決水以灌。先是。哮拜遣養子克力蓋往著力兔求援。松詞知狀。命裨將李甯追斬之。并其從騎二十九級。獲符令箭。居有頃。套部莊禿賴與卜失兔合部落三萬。先使土昧。緝糾雷等犯定邊小鹽池。而打正以萬騎從花馬池西沙湃入。總督檄麻貴偵擊。以牽打正。別遣董一元乘虛出塞。擣其穴。麻貴進戰石溝旁。敵稍卻。分趨下馬關及鳴沙州。總督遣游擊龔子敬。提苗兵八百堵沙湃口。東趨定邊。與董一元合。亡何。一元報擣土昧巢。斬獲三千餘級。套部驚引去。而打正還至沙湃。

苗兵直前掘之。衆寡不敵。被圍十餘匝。子敬力戰死。然套部竟以擣巢解散。賊援絕。我師益決大壩水。八月朔。城外水深八九尺。是夜。賊小舟挖堤洩水。官兵擒斬十六級。生得一人。爲言城中乏穀。士盡食馬。馬餘五百匹。民食樹皮。死亡相屬。翼日。城東西崩百餘丈。都司吳世顯參將來保所一堤亦各崩二十丈。水頓減。總督斬吳世顯以徇。來保用靈州功免。仍悉力補堤。賊數出兵來擾。多被斬獲。城中飢民擁賊求招安。十二日。御史梅國楨檄賊以飢民故。爲治錢穀。檄到三日。開關迎大兵入賑。賊不報。時套部數闖入堡來救。二十一日。著力兔以八百騎入鎮比堡。又擁衆萬餘入李剛堡。分部渡河。總兵李如松遣裨將李甯等馳赴黃硤口擊之。以勁卒千餘身往策應。行至張亮堡。遇敵搏戰。自卯至巳。敵銳甚。如松劍斬縮臍二人。會麻貴、李如樟等亦至。張左右翼夾擊。李甯手殪二人。敵遂卻。進奔至賀蘭山。盡走出塞。我師捕斬百二十餘級。獲駝馬無算。乃移級示賊。賊爲之奪氣。九月三日。參將楊文提浙兵至。巳苗兵、莊浪兵俱至。大治臨衝船筏。刻日攻城。總督葉夢熊布告軍中。有能先登以城下者。予萬金。後五日。水浸北關。城崩南關。蔣永壽等約內應。我師陽調舟筏擊北關。承恩許朝果趨北關應戰。李如松、蕭如薰潛以銳卒掩南關。總兵牛秉忠年七十。賈勇先登。梅國楨呼諸將曰。老將軍登城矣。餘何怯也。遂畢登。夢熊入城。勞苦百姓。承恩等見南關下。則盡氣奪。乃急縋張傑下城。懇貸死。夢熊陽許諾。益治攻具。先遣王機密以蠟書行間。時承恩雖求撫。堦門斷塹。守益固。有賣油李登者。跛而眇。負罌木歌於市曰。癰之不決。而狃於瘡。危巢不覆。而令梟止。監軍梅國楨問之曰。是可使也。召登授三劄。縛木渡東門。見承恩曰。監軍以啁氏有安塞功。今與鼠輩駢首并誅。深用惜之。軍中非乏所使。以登殘民不駭視。有密記授將軍。將軍幸有意聽登。則殺

劉許自贖。卽不聽。願死麾下。毋留登。承恩猶豫。許之。登趨而出。間道詣東陽朝。亦各致劄曰。將軍故漢臣。而首亂在時氏。何橫身與人嬰禍。鎮卒幾何。能當都督軍。此無異驅乳雀而鬪羣鶻。所恃不過套援。將軍不記演武臺上。彼親士。時目中豈有將軍哉。所爲貴智者。以能度時審勢。轉禍爲福也。東陽朝亦心動。自是互相猜疑。十六日。圍愈迫。東陽頓足歎曰。遂至此耶。佯爲風疾。殺王文秀曰。好頭頸。毋令他人砍之。先是鎮民郭坤有妾美。坤死。賊黨周國柱以繭帨一雙聘焉。許朝亦往議。妾曰。受周家聘矣。朝以問柱曰。誠有之。朝怒其不相讓。銜之。會承恩聞李登之說。方惶惑。召所親石棟問計。棟曰。周國柱見事審而決。雖東陽臣。然與朝有隙。盍呼之。國柱至。承恩與謀。欲召東陽朝飲。醉誅之。國柱曰。兩家前後皆戈鉞之士。以一制二。恐非萬全。將軍當計誅朝城南。柱乘間取東陽也。承恩然之。遲明。承恩過呼朝。時朝正坐考訊。承恩急呼曰。將軍何暇問此。有密事。登樓議之。麾衆下曰。將軍知周國柱有異心乎。吾將與將軍斷其首。語未竟。承恩家卒世富。大宣遽曰。外營瞰向樓。無宜久駐此。承恩疾下。朝跋後從。大宣掖之。梯半。世富抽佩劍砍之。首隕梯下。因縛其從騎盡斬之。國柱見塵。遽起。有兵劍聲。知事濟。乃披鎧登樓。佯謂東陽曰。官軍已入南城矣。東陽驚起。憑軒望。國柱自後斬之。不死。走入廁房。支戶。國柱引足破戶。梟其首出。衆譁曰。國柱柰何。殺將軍。柱叱曰。若不避死走。官軍盡斬汝。誅一逆賊。何譁也。衆盡散。承恩旣殺東陽朝及文秀。懸首城上。於是李如松。楊文先。登蕭如薰。麻貴。劉承嗣。繼之。大城悉定。北樓火起。李如樟馳往。搜獲甯夏巡撫關防。并征西將軍印各一。時時氏尙擁蒼頭軍。總督葉夢熊在靈州聞之。亟令詰。且不滅。時氏者。服尙方。十七日晨。承恩方馳南門。謁監軍梅國楨。出參將楊文執之。李如松急提兵圍時拜家。拜方與牛秉忠飯。

聞承恩擒秉忠趨出。衆欲拒敵。如松給箭令卸甲。拜倉皇縊。闔室自焚。李如樟部卒何世恩從火中斬拜首。生得拜中子承寵。養子噶洪大。王文德。何應時。陳雷。白鸞。陳繼武等。總督葉夢熊。巡撫朱正色。御史梅國楨。隨入城。問慰宗室士庶。甯夏平。捷奏。上御門受賀。已復輿致承恩獻俘。十一月。詔磔噶承恩。噶承寵。噶洪大。王文德等。俱駢斬長安市。頒示天下。及四裔。君長。下詔慰慶王。復甯夏田租。王妃方氏不屈死。特賜褒異。大賞甯夏功臣。葉夢熊。朱正色。梅國楨。各蔭世官。武臣李如松功第一。加宮保。蕭如薰次之。麻貴。劉承嗣。李如樟。楊文。牛秉忠等。加恩有差。如薰妻楊氏守平鹵有功。制敕旌賞。贈死事龔子敬。都督僉事。給事中曹大成。劾穆來輔。隨府依違。緹騎逮治。遣戍邊。魏學會以原官致仕。谷應泰曰。噶拜以嘉靖中亡。抵朔方。屢立戰功。萬歷中。備位副將。其子承恩襲爵。乃拜雖請老。而多蓄蒼頭軍。聲言報國。蓋不無異志焉。方其嬰鑠。請纓挾其子從三千人而西也。毋亦觀諸鎮之虛實。結套部爲腹心。潛伏陰謀。待時而動。豈真有廉頗之壯志。文淵之據鞍哉。乃以不給壯馬。侵剋片糧爲黨。馨罪。此特噶氏之權譎。借爲兵端者耳。以故劉東陽之變。則拜嗾之。噶雲。文秀之怨。則拜陰中之揣。拜之意。不過恃套爲長城。緩則倚之爲外援。急則引之爲內助。夫是以立於有勝而無敗。敢於倡亂而輕於爲叛逆也。若然。則善勦者不當勦拜。而當勦套。不在挫套。拜之鋒銳。而在隔套。拜之聲援。套絕。則拜者孤雛腐鼠。取之如寄者耳。想其初拜。套聲言聯爲一家。即可驗其情狀。而東陽之恐喝。則曰。與套馳潼關。著力兔之入寇。則曰。畀以花馬池。克力蓋之求援。則能遠致莊克賴。如是。卽拜之恃套相倚爲命者也。善乎葉夢熊爲帥。而五路分兵。扼守甯夏。拜不得出城。套不敢渡河。而噶氏之計窮蹙極矣。迨至打正驚奔。賀蘭遠遁。拜雖



游魂可坐而縛也。尤有幸者。文秀見殺於東陽。東陽蒙誅於國柱。許朝鄭命於承恩。始則虎狼之殘。物以類聚。繼而昆蟲之噬。還相爲攻。倘所謂天道是耶非耶。比神宗受賀承恩俘馘。雖師武諸臣協謀有力。而葉夢熊聲請討賊。自辦糗糧。梅國楨仗劍從軍。力保李氏。蕭如薰之妻楊氏。簪珥犒軍。羣婦墨守。則尤犖犖者也。

## 卷六十四

### 平楊應龍

神宗萬曆十七年。四川播州宣慰司使楊應龍反。按播州夜郎且蘭地。漢屬牂牁郡。唐貞觀初。分牂牁北界置郎州。領六縣。已改播州。乾符三年。南詔寇陷太原。楊端應募決策。馳白錦出奇兵定之。授武略將軍。值唐亂。留據長子孫。歷宋附屬稱臣。大觀中。楊文貴納土。置遵義軍。元世祖授楊邦憲宣慰使。賜子漢英名賽因不花。封播國公。國初。楊鑑內附。改播州宣慰司使。隸四川。其域廣袤千里。介川湖貴竹間。西北塹山爲關。東南附江爲池。蒙茸鑿削。居然奧區。領黃平草塘二安撫。眞播白泥餘慶重安容山六長官司。統田、張、袁、盧、譚、羅、吳七姓。世爲目把。嘉靖初。楊相寵庶子煦。欲奪嫡。嫡妻張與子烈擁兵逐相。走水西。客死水西。宣慰安萬銓挾奏。索水煙天旺地聽還葬。烈卽應龍父也。自烈仇殺。長官相攻剽垂十年。總督侍郎馮岳討平之。應龍生而雄猜。尤阻兵嗜殺。隆慶六年。襲職。以從征喇麻諸番九絲膩乃楊柳溝等。多卻敵先登。斬獲無算。先後賜金幣。萬曆十二年。進大木六十本助工。上特給大紅飛魚服。加職級。應龍窺蜀兵

弱。每征討。止調土司。而蜀將或從借給。漸驕蹇。輕縱法。所居僭飾龍鳳。擅用闔寺。嬖小妻田雌鳳。疑嫡妻張姦淫。出之。已飲田氏兄所乘醉。封刃取張并其母首。屠其家。應龍在州。專酷殺樹威。益結關外生苗爲翼。肆行劫掠。於是妻叔張時照與所部何恩。宋世臣等上飛文告龍反。巡撫貴州葉夢熊疏請發兵勦之。而蜀中士大夫率謂蜀三面鄰播。屬裔以十百數。皆其彈壓。且兵驍勇。數赴征調有功。翦除未爲長策。以故蜀撫按並主撫。朝議行西省會勘。應龍願赴蜀不赴黔。

二十年十二月。逮楊應龍詣重慶。對簿繫論。法當斬。請以二萬金贖。御史張鶴鳴方駁問。會倭大入朝鮮。羽檄徵天下兵。應龍因愬辨。願自將五千兵征倭報效。詔可。釋之。兵已啓行。尋報罷。巡撫都御史王繼光至。嚴提勘結。遂抗不復出。而張時照等復詣奏闕下。王繼光乃一意主勦。

二十一年春正月。撫臣王繼光馳至重慶。與總兵劉承嗣參將郭成等議。分三軍。各道並進。時軍至婁山等關。屯白石口。應龍佯令其黨穆炤等約降。因統苗兵據關衝殺。都司王之翰軍覆。殺傷大半。會繼光論罷。卽撤兵。委棄輜重。略盡。黔師協勦亦無功。以譚希思爲四川巡撫。與總兵劉承嗣會同貴州撫鎮相機征勦。時王繼光旣罷。御史薛繼茂乃旋主撫。應龍亦上書自白。御史吳禮嘉劾郭成等失律。令戴罪立功。尋劉承嗣以疾乞骸骨。兩省議久不決。應龍遣其黨攜金入京行閒。執原奏何恩詣綦江縣。

二十二年三月。以兵部侍郎邢玠總督貴州。車駕郎中張國璽主事劉一相贊畫軍前。

二十三年春正月。總督邢玠乘傳至蜀。察永甯。西陽。暨馬千斛。皆應龍姻媾。而黃平。白泥。諸司久爲仇讐。計先翦其枝黨。以檄曉譬應龍。大略稱引咎。劉事謂龍來當待以不死。不者。國家懸萬金購而頭。若蚤爲

計吾不而欺也。會水西宣慰安疆臣請父國亨卹典。兵部尚書石星手札示疆臣。趣應龍就吏。得貫罪。疆臣亦奉札至番招龍。當是時。七姓惟恐龍出得除罪。而四方亡命竄匿其閒。又幸龍反。因以爲利。院道文移輒從中阻。四月。重慶太守王士琦奉總督邢玠檄。詣綦江縣。趣應龍安穩聽勘。士琦屬綦江令前往宣諭。應龍使弟兆龍至安穩。治郵傳儲糧。郊迎叩頭。致饋資餼。牽如禮。曰。應龍久縛渠魁。待罪松坎。所不敢至安穩者。以安穩多仇民。伏兵伺殺。往有明鑑。誠恐中計。故不敢出。使君幸枉車騎。臨貺松坎。敬布腹心。綦江令具言太守。太守曰。松坎亦曩奏勘地也。卽以五月八日單騎往松坎。應龍果面縛道旁。泣請死罪。膝行前席。叩頭流血。請治公館。執罪人及罰金獻廷中。得自比安國亨。國亨者曩亦被訐。懼罪不出界。故應龍引之。太守爲請總督。乃遣贊畫張國璽。劉一相及道府詣安穩。應龍囚服蒲伏郊迎。縛獻黃元。阿羔。阿苗等十二人案驗。抵應龍斬。以其族得論贖。輸四萬金。助採木。仍革職。子朝棟。以土舍受事。次子可棟。羈府追贖。黃元等梟斬重慶市。總督以聞。是時倭氛未靖。大司馬欲緩應龍。專事東方。天子亦以應龍向有積勞。可其奏。總督議設撫彝同知治松坎。從之。論功加邢玠右都御史。還朝。以重慶太守王士琦爲川東兵備使。彈治之。應龍再及寬政。益怙終不悛。而次子可棟尋死重慶。則心益痛。促取屍棺。以勘報未完。不肯發。趣其完贖。大言曰。吾子活。銀卽至矣。擁兵驅千餘僧招魂而去。分遣土目置關據險。僭立巡警。搜戮軍民。劫掠屯堡。殆無虛日。厚撫諸苗。用以摧鋒。名硬手。州人稍殷厚者沒其家。以養苗。由是諸苗人願爲之出死力矣。

二十四年七月。楊應龍肆逆。劈餘慶土吏毛承雲棺。磔其屍。已。又掠大阡都壩。焚劫餘慶。草堂二司。徧及

興隆、偏鎮、都勻各衛遣弟兆龍引兵圍黃平。戮重安司長官張熹家。勢復大熾。

二十五年三月，楊應龍流劫江津縣及南川。十二月，楊應龍臨合江，索其仇袁子升縋城下，縶割之。

石砭宣撫司土舍馬千駟入播。先是，千駟母覃與應龍私，覃寵千駟，謀奪長子千乘爵。於是聘應龍次女爲聲援。

二十六年十一月，兵備副使王士琦調征倭。楊應龍益統苗兵，大掠貴州洪頭、高坪、新村諸屯。已，又侵湖廣四十八屯，阻塞鐸站。詞原奏仇民宋世臣父鑾及羅承恩等挈家匿偏橋衛城，襲執指揮陳天寵等。大索城中，得鑾、承恩及子女，慘戮以徇。令諸苗對父奸女，面夫淫妻，或裸體坐木叢射笑樂，或燒蛇從陰入腹。人蛇俱斃。又掘墳墓焚屍，灰飛蔽天。巡撫四川都御史譚希思請於合江、綦江各置游擊一員。合江募兵千二百人，扼岡門。綦江募兵二千，人扼安穩。

二十七年二月，貴州巡撫江東之令都司楊國柱指揮李廷棟部兵三千勦楊應龍。龍遣子朝棟、弟兆龍、何漢良等迎敵於飛練堡。我師奪三百落，賊佯走天邦固，誘我師殲之。楊國柱罵賊不屈，與經歷潘汝資等俱死。於是江東之坐浪戰罷。以郭子章代之。起前都御史李化龍兼兵部侍郎，節制川、湖、貴三省兵事。決意進勦，謂東征諸將南征。劉繼督川兵先發。麻貴、陳璘、董一元相繼回兵。五月，總督馳至蜀，卽請設標兵，益調募浙、閩、滇、粵將士。檄總兵萬鏊自松潘移重慶，并調集鎮雄、永甯各漢土兵設防。六月，楊應龍乘我師未集，大勒兵犯綦江。分屯趕水、貓兒岡、婁國等，以偏師一犯南川，一犯江津。其子朝棟守沙溪，緝麻山。防永甯。宣撫與貴州十七日，游擊張良賢遇賊舊東溪，頗有斬獲。二十一日，應龍督苗兵圍綦江。

城數匝。游擊房嘉寵誤熱火輒反傷城上兵。賊乘勢登城。嘉寵帥師巷戰。蜀兵爭譟走水上。嘉寵乃殺其妻與良賢赴敵死。應龍因劫令縱囚焚掠。出綦江庫犒師。依倉就食。盡取資財子女去。老弱者殺之。投屍蔽江而下。水爲赤。退屯三溪。以綦江之三溪毋渡。南川之東鄉壩立石爲播界。號宣慰官莊。聲言江津合江皆播故土。總督郭子章日夜徵調漢土各兵守渝城。分戍南川合江瀘州。軍聲漸振。賊遷延不進。初賊本無意竟反。徒以安忍猖狂。旣覆我師。飛練則騎虎勢不終下。益結九股生苗及紅黑脚等苗。負險弄兵。然猶冀我如往事。曲宥未敢鼓行深入。止言爭界給葬。并索奸民。而總督因我援師未集。蜀人畏賊如虎。時時移文詰責。示無遽絕意。計以緩賊。賊果具文求撫。不復西向。總督亦謬爲好語縻之。止駐會城調度。示賊無張皇已上聞。破綦江。追褫兩省撫臣譚希思江東之各爲民緹騎。逮兵備使王貽德。賜劍懸賞。嚴旨進勦。總督益調各路兵專俟大舉。十月。命總督李化龍駐重慶。調度川貴湖廣兵。總兵劉綎兵亦至。綎素有威名。其家丁良馬皆可決勝。然夙與應龍昵。人皆疑之。於是總督延入臥內。輸心腹。且以危言激之。引其父顯九絲功爲比。綎大慟。願誓死報效。總督乃騰書於朝。遂委綎專制。而總督治軍益有次第。十一月。楊應龍屯官壩。聲窺蜀。已遂焚東坡爛橋。楚黔路梗。黃平龍泉所在告急。賊復據偏橋出掠興隆。鎮遠。總督議置勁兵萬餘據要害。通楚黔道。黔帥童元鎮擁兵銅仁不前。革職立功。以李應祥代。命僉都御史江鐸巡撫偏沅。監總兵陳璘之師。

二十八年春正月。楊應龍勒兵數萬。五道並出。攻龍泉司。守備楊惟忠擁兵二千。以勢不敵。先期託臺謁走思南鸚鵡溪。土官安民志率步卒五百拒守。死之。吏目劉玉鑾偕妻子並死於賊。副總兵陳良玘託守

偏橋不之援。石柱宣撫司馬千乘軍鄧坎。賊乘夜掩襲。我軍堅壁。詰旦奮擊。連破金竹、青岡、觜、虎跳關等七寨。酉陽宣撫司冉御龍進攻官壩。斬關直上。復擒斬三百有奇。初賊既下龍泉。方移兵攻婺州。聞敗。撤兵遁。徵兵大集。延甯四鎮、河南、山東、天津、滇、浙、粵西兵至者踵背相屬。各土司亦用命。總督李化龍分兵八路。川師分四路。總兵劉綎從綦江入。以參將麻鎮等隸。參政張文耀監之。總兵馬孔英從南川入。以參將周國柱、宣撫冉御龍等隸。僉事徐仲佳監之。總兵吳廣從合江入。以游擊徐世威等隸。參議劉一相監之。副將曹希彬受吳廣節制。從永寧入。以參將吳文傑、宣撫奢世續等隸。參議史旌賢監之。而中軍率標下游兵策應。黔師分三路。總兵童元鎮統土知府瀧澄、知州岑紹勳等由烏江。參將朱鶴齡受元鎮節制。統宣慰安疆臣等由沙溪。總兵李應祥統宣慰彭元瑞等由興隆。參議張存意、按察司楊寅秋監之。湖廣偏橋一路分兩翼。總兵陳璘統宣慰彭養正等由白泥。副總兵陳良玘受璘節制。統宣撫單宜等由龍泉。副使胡桂芳、參議魏養蒙監之。以偏橋江外爲四牌。江內爲七牌。五司遺種及九股惡苗盤據故也。其黔撫郭子章駐貴陽。楚撫支可大移沅州。部署既定。大會文武於重慶。登壇誓師。二月十二日。分道並發。每路兵約三萬人。官兵三之。土司七之。苗見驚曰。今番真天兵。與昔不同。總督諭諸將以抵婁山等關爲期。移鎮重慶節制。且曰。關外且戰且招降。多不可勝誅也。關內疾戰勿受降。師不可久。老賊詐不可信也。先是蜀玉壘山忽裂。僉謂昔年平九絲地數動。殆播平前兆云。十五日。劉綎進兵綦江。連戰破三峒。綦江自東溪入播。並峻嶺茂箐。構木山羊。簡臺三峒。素號奇險。賊首穆炤等盤據。綎力戰克之。三月。楊朝棟統苗兵數萬分道迎敵。鋒甚銳。我師夾擊。綎身自陷陣。苗大驚曰。劉大刀至矣。棟潰圍走。幾爲我獲。初。綦江

諸苗自分屠城慘戮罪不赦。又應龍憚縶威名，冀首挫其鋒。屬朝棟悉勁兵，間道相角。曰：爾破綦江，馳南川，盡焚積聚，餘無能爲也。及朝棟僅以身免，賊膽落，益爲守禦計。諸軍分道並捷，南川則西陽、石碛二司先登，初八日遂克桑木關，烏江則壩陽、永順兵先登，十一日遂克烏江關。翼日克河渡關，陳璘及副將陳寅擊四牌，賊各披靡，遂奪天都、三百落諸囤。賊連敗，乃乘隙出奇兵突犯烏江，詐稱水西。瀧澄會哨誘永順兵，斷橋淹死我師無算。參將楊顯守備陳雲龍、阮上奇、白明達指揮楊續芝等死之。事聞，逮總兵童元鎮下於理。時有飛語水西佐賊者，總督檄詰水西不自安，會賊殺其頭目澄大眼。二十六日賊託田氏修好賄澄，澄戮其使，擊斬僞將楊惟棟等。安疆臣亦執賊二十餘人，以示不背。二十九日劉綎戰九盤，入婁山關，關爲賊前門，萬峯插天，中通一線。我師從間道攀藤魚貫毀柵入。四月朔屯白石，應龍身率各苗決死戰，陰令楊珠等抄後山奪關，四面合圍。都司王芬中流矢死，劉綎親勒騎衝堅，以游擊周敦吉守備周以德分兩翼夾擊，敗之。追奔至養馬城，與南川、永甯路合，連破龍爪、海雲險囤。壓海龍囤而壘，海龍囤賊所倚天險，飛鳥騰援不能踰者。時偏沅巡撫都御史江鐸已抵任視師，陳將軍璘帥師急攻，以十三日破青蛇囤。安疆臣亦以十六日奪落濛關，至大水田，焚桃溪莊。賊見勢急，父子相抱哭，上囤死守，每路投降文，緩我師。總督檄賊詭降，卽斬，使焚書毋爲所給。虞縶與應龍舊，檄無通賊，縶械其人自明，而吳廣以朔三日入厓門關，營水牛塘，與賊力戰三日，卻之。賊詭令婦人於囤上拜表痛哭，云田氏且降，復詐爲應龍仰藥死報廣。廣輕信，按兵不動。已覘知田氏詐降，緩攻，而所云應龍死，乃川兵攻囤以火礮擊死，所謂楊珠也。珠驍勇善戰，旣死，賊痛如失左右手。廣覺詐，益厲兵協攻，燒二關，奪三山，絕賊樵汲，八路兵大集。

海龍圍下。五月十八日始築長圍。更番迭攻。自是賊坐困窮。厓知兵在頸矣。會總督李化龍聞父喪。詔以縗墨視師。化龍跌而草檄。益治軍。念賊圍前陡絕。勢難飛越。令馬孔英率勁兵壁其閒。餘併力攻後圍。時天苦雨。將士馳淖中苦戰。六月四日天忽開朗。五日劉繼身先士卒進克土城。應龍益迫。夜散數千金募死士拒戰。諸苗皆駭散無應者。起提刀自巡壘。見四面火光燭天。徬徨長歎。泣語妻子曰。吾不能復顧若矣。詰朝我師遂登圍。破大城入。應龍倉皇同愛妾二闔室縊。且自焚。吳廣獲其子朝棟及妾田雌鳳。急覓屍出焰中。廣中火毒失聲幾絕。頃而甦。計出師至滅賊百十有四日。八路共斬級二萬餘。生獲朝棟、兆龍等百餘人。播賊平。總督露布以聞。劉將軍繼爲軍功冠。十二月獻俘闕下。劉楊應龍尸磔。楊朝棟、兆龍等於市。分播地爲二。屬蜀者曰遵義。屬黔者曰平越。

谷應泰曰。楊應龍播州土司官也。其地屬漢牂牁郡。唐乾符中楊端應募。長子孫焉。歷宋元皆授世官。明室因之。應龍生而雄猜。尤阻兵嗜殺。然其資叛不一。荒忽無常。亦土司之風類然也。應龍之初從征喇麻。進貢大木。亦嘗效忠順。膺賞賚矣。乃以嬖小妻田雌鳳屠妻張氏之家。而何恩。宋世臣連章告變。黃牛白泥諸司久爲仇讐。於是七姓諸豪咸喜龍之得罪。不欲其就徵對簿。而五司遺種。九股頑苗。及輕剽好作亂之徒。又鼓動其間。同惡相濟。龍雖狼子野心。亦所謂生長蠻鄉。無與爲善者也。所幸援兵大集。調度多方。督臣李化龍發蹤之才。總戎劉繼軍功之冠。於時八路分兵。四月告捷。卒之應龍戮尸。朝棟棄市。威震遐荒。功業爛焉。然而重慶之會。登壇誓師。海龍之圍。剋期並到。兵法曰。兵貴有謀。又曰。以多算勝。固先定其規模。非漫嘗於一擊也。若應龍者。倔強偏陲。不知漢大。宗嗣蕩滅。取世戮笑。尤足爲憑險負固之戒。悲。



夫。

卷六十五

礦稅之弊

神宗萬曆二年二月。太監張誠等求領眞定木稅。工部執論不許。

七年七月。給事中顧九思。王道成請撤浙直織造內臣。上以示大學士張居正。居正曰。地方多一事。則有一事之擾。寬一分。則受一分之惠。災地疲民不堪催督。撤之便。上從之。十一月。命浙直織造添織七萬三千。張居正言添織之費不下四五十萬金。在庫藏則竭。在小民則疲。浙直水災蒙恩蠲濟。方撤織監。又復加派。非聖意所以愛養元元也。上命減其半。

八年九月。太監王效稱缺歲額銀硃等料。戶部尙書張學顏奏登極一詔盡損不急之務。宜諒停罷。上從之。

十年四月。順天府尹張國彥請豁房稅。不報。

十一年正月。戶部請停買金珠。不報。

十二年六月。四川巡撫雜遵奏採木之害。八月。房山人史錦請開礦。命下撫按。

十四年四月。南京工部尙書陰武卿乞減免織造。燒造瓷器。停解花梨杉枏。不聽。九月。戶部侍郎張國彥言蘇杭之織造。江西之盜器。公主之廣求現寶。得無與漢文百金之費相類乎。不聽。

十六年十一月。遣內臣禱祠五臺山。還奏言紫荊關外昌靈邑可定礦砂作銀冶。奸民張守清擅其利。一日上視朝畢。召大學士申時行等於皇極殿。語及之。時行等請敕部行撫按查問禁戢。上是之。命逮守清伏法。閉塞礦洞。

十八年九月。易州民周言請開礦玉田。豐潤民復以請。部未報。上遣文書官至閣速之。輔臣因言開礦之害。御史邵以仁亦力言其不可。

二十四年六月。府軍前衛副千戶仲春請開礦助大工。從之。命戶部錦衣衛各一同仲春開採。給事中程紹工。楊應文言嘉靖二十五年七月命採礦。自十月至三十六年。委官四十餘。防兵千一百八十人。約費三萬餘金。得礦銀二萬八千五百。得不償失。不聽。七月。錦衣衛百戶陸松。鴻臚寺隨堂官許龍。順天府教授馮時行。經歷趙鳳等各言開礦助大工。從之。戶部尚書楊俊民言真保。薊易。永平開礦恐妨天壽山龍脈。上謂距陵遠。且皇祖嘗開之。不聽。命戶部郎中戴紹科。錦衣僉書楊宗吾開礦汝南。八月。詹

事府錄事會長慶。錦衣衛百戶吳應騏請山西夏邑開礦。府軍後衛指揮王中允請青沂等開礦。從之。

招礦盜開採。仍編富民爲礦頭。從太監王虎請也。錦衣衛百戶汪文通言沂州礦。指揮郝承爵言費縣

礦。指揮劉鑑言棲霞。招遠等礦。指揮馬清言文登縣礦。千戶趙良將言沂水。蒙陰。臨朐礦。命太監陳增同

府軍指揮曾守約開採。九月。巡撫山西魏允貞請停開礦。不報。太監王虎論保定巡撫李盛春阻撓開

採。下旨切責。十一月。戶部郎中戴紹科進礦砂銀。自後進者踵至。十二月。遣太監張忠往山西。曹金

往兩浙。趙欽往陝西。各開礦。輔臣沈一貫言留守中衛王一清請稅煤炭。爲民害。不報。先是。奸人王君

錫奏開易州礦。旨下戶部議。尚書林材執奏。且上言山冶之害。小則爭掠。大則嘯聚。盜之囹。寇之藪也。遂幡然從之。逐君錫。令勿潛住。生奸計。至是。新建張位秉政。以爲利出於天地之自然。可益國。無病民。採之便。上遂從其言。

二十五年春正月。御史況上進。給事中楊應文言。建昌採木之害。人夫渡瀘。觸瘴。死者被野。吏胥假公行私。毒流百姓。不報。戶科程紹言。開礦事變多端。疏凡五上。俱不報。二月。給督徵天津等處店租。內官關防。三月。浙江巡按王業宏言。礦稅不便者六。乞停罷。不報。四月。刑部侍郎呂坤言。洮蘭之絨。山西之紬。浙直之段。絹積於無用。若服有定期。歲用千匹。而江南山陝之人心收。採木之害。饑渴瘴疫。死者亡論。乃一木初臥。千夫難移。遭險蹉跌。死嘗百人。倘減其尺寸。少其數目。而川貴湖廣之人心收。礦稅無利。勒民間納銀。民不能支。括庫銀代。豈開礦之初意哉。誠敕各省使臣。嚴禁散砂。不許借解。而各省之人心收。自趙承勛造四千之說。而皇店開。朝廷有內官之遣。而事權重。且馮保八店爲屋幾何。而歲四千金。不奪市民。將安取乎。誠撤各店之內官。而畿內之人心收。不報。九月。太監陳增劾福山知縣韋國賢阻撓開採。逮下獄。巡撫萬象春奪俸。山西巡撫魏允貞奏言。巨璫出。領礦稅。爲民鑿齒窳窳。而礦爲尤甚。璫亦反噬。以激上怒。允貞又上書言。朝廷得失。譏切宰臣。不能輔導。致使刑餘之人。播惡。上切責之。二十六年六月。命內監李敬採珠廣東。七月。神武衛千戶朱仁等奏。湖口船稅可萬餘金。鴻臚寺主簿田應璧言。兩淮沒官餘鹽。命內監李道督稅湖口。魯保經理淮鹽。俱許節制。有司戶科給事包見捷上言。開礦之害。陛下謂徒取諸山澤。在礦使實奪取之閭閻。搥擊入山者十二載。虎狼出柙者半天下。科臣趙

完璧、郝敬、道臣許聞造、姚思仁交章言之不報。奪保定巡撫李盛春等俸。以天津店稅銀解進遲延故罰。八月太常寺少卿傅好禮言近郊假官抽稅不報。越三日好禮伏文華門求面對。上怒降廣昌典史。大理寺卿吳定疏救削籍。而假官二十八人下鎮撫司。惜薪司柴炭歲兵工二部二十餘萬。至是求益。給事賈維春言歲進物料上用什之二三。餘盡入溪壑。今復求益不已。豈真爲國家計盈縮哉。不報。九月益都知縣吳宗堯奏礦務太監陳增罔上營私。益都有鉛砂無銀礦。增強之入銀業。非法矣。復強採者代納。稍緩逮及吏民。陛下所得十一。而增私橐十九。山東巡撫尹應元參增罪狀二十餘條。忤旨奪俸。宗堯下鎮撫司削籍。十月下雲南大理採石。二十七年春正月分遣御馬監高竊權京口供用庫官暨祿權儀真。二月百戶張宗仁請復浙江市舶。命太監劉成權稅浙江。千戶陳保請權珠。命內監李鳳採珠廣州。兼徵市舶司稅課。設福建市舶司。命御馬監高竊兼礦務。命內監楊榮開採雲南。陳奉徵荊州店稅。陳增徵山東店稅。孫隆帶徵蘇杭等處稅課。魯坤帶徵河南。孫朝帶徵山西。時奸弁馮綱等望風言利。皆朝奏夕遣。湖口稅監李道參南康知府吳寶秀。星子知縣吳一元。僨侵國稅。命緹騎逮下理。寶秀至任纔十六日。初任大理廉平有聲。至是忤道。被逮。妻陳氏自縊檻車旁。內監邱乘雲徵稅四川。兼礦務。梁永徵稅陝西。各以原奏千戶翟應泰、樂綱等往。御馬監潘相督理江西盜廠。前珠池太監李敬兼廣東礦稅。輔臣沈一貫言中使衙門皆創設。竝無舊緒。可因大抵中使一員。其從可百人。分遣官不下十人。此十人各須百人。則千人矣。此千人每家十口爲率。則萬人矣。萬人日給千金。歲須四十餘萬。及得纔數萬。徒歛怨耳。今分遣二十處。歲糜八百萬。

聖思偶未之及也。乞盡撤之。不報。尋諸省皆併稅於礦使。三月內監王忠徵稅密雲。張燁徵稅蘆溝橋。

太監陳增、馬堂爭稅。命堂稅臨清。增稅東昌。命錦衣衛千戶韋夢麒同御馬監奉御陳奉徵收湖廣

等處店稅。徵銀六萬有奇。上以湖廣荊州原有辛效忠店房。曾經遼藩竊據。後張居正私意革免。命撫按奏明。巡撫支可大奏湖楚內錯江湖。故稱澤國。物產非有縑繡綺繡之奇也。厥貢非有瓊琳琅玕之珍也。比歲採木重役。焚林竭澤。十室九空。舊有各項稅課。如荊州遼府張居正店房已經沒入。變價解京。盡屬民間之業。今僅於沙市徵收稅銀。及各府原設有稅課司。有門攤商稅。有茶鹽油布雜稅。內以給解京濟邊之用。外以充宗藩吉凶之資。大之供官軍俸錢科舉兵餉之需。小之作紙劄公費工食衣糧之數。紀載甚明。今若併前項收入內帑。則百用乏絕矣。若迫於用。詘復議加派。則下民怨咨矣。此猶以在官言之也。至其在民行貨有稅矣。而算及舟車。居貨有稅矣。而算及廬舍。米麥菽粟。饔餐也。而稅。鷄豚肉食也。而稅。耕牛羸驢。一畜產也。而稅。搜刮於十五郡之中。遍及於一百十六州縣之內。一歲之中。驛遞錢糧動以千計。雖欲不擾地方。不可得矣。楚故獷悍。又以橫政驅之。有莫知其所底止者。不報。戶科給事包見捷疏論礦店滋蔓。又疏論臨清稅使擾民。必致生變。又疏遼左阡危。礦市爲患尤烈。一月三疏。指數內使切直。時論踴之。謫貴州布政司都事。未幾。臨清百姓變。毆稅使馬堂幾死。見捷言若左券。歙縣監生吳養晦投稅監魯保言。大父守禮。逋鹽課工十五萬。乞追入給。占產從之。左春坊左庶子葉向高請罷礦使。不報。大學士趙志皋病篤。特疏請停礦稅。不報。四月。河南礦監魯坤言。礦砂羸縮不一。請均派官民從之。十月。南京守備太監郝隆。劉朝用採甯國池州等礦。戶科給事李應策、姚文蔚以播警乞停中官

礦稅不報。八月，錦衣衛總旗申敏奏湖廣興國州礦洞丹砂，命陳奉開採。逮荊州府推官華鈺、黃州府經歷車任重、降荊州知府李商耕、黃州知府趙文煒、荊門知州高則巽各一級，以稅監陳奉誣劾也。初，奉由武昌抵荊州，商民鼓譟者數千人，飛輒擊石，勢莫可禦。道府諸臣身犯其衝，殫力防護，獨華鈺以公事至夷陵，奉疑之，又惡其禁革差官冠帶，阻截司役書算，故受誣尤烈。又稅課襄陽，商人聚徒鼓譟，知府李商耕治其參隨，開鎮荊門，增設稅課，而荊門故非巨鎮，往來商船頗少，誣知州高則巽阻撓，俱降調。雲南稅監李榮虐諸生見詬，榮劾巡撫陳用賓，命下諸生於理。九月，戶部進大珠龍涎香。十月，驍騎衛百戶請徵湖廣郡縣積貯羨銀，又興國州人漆有光報徐鼎等掘古墓得黃金巨萬，命陳奉同撫按查解。十二月，命應天府取帘屏龍旂龍簾諸上供物，府丞徐申上疏言費將巨萬，弊不可言，必不得已，請增爐鼓鑄以濟急，報可。武功衛百戶韓應桂奏土民夏國瑚報湖廣京山具有真礦鉛砂大青等物，是時興國麻城開採，止得鉛砂，得不償失，卽陳奉亦經營勞瘁，苦於奉行，巡撫支可大疏參應桂欺罔，請置法，上免其罪，撤回。雲南道御史葉永盛奏差璫播虐，請誅首禍，不報。

二十八年春正月，武昌漢陽民千餘集撫按門，陳稅監陳奉之毒，撫按不敢理，民情益憤。貴州巡按宋興祖請停採木，專力討播。逮西安府同知宋言，稅監梁永劾其激衆倡亂也。二月己卯，命太監暨祿兼徵鳳陽、安慶、徽、廬、常、鎮稅，前止徵應天、太平、甯國、淮揚，至是從羽林千戶王承德、金吾百戶王鎮請也。南京守備太監邢隆稅沿江洲田。辛巳，內監魯坤開彰德、衛輝、懷慶、開封等礦洞，以武驥衛百戶張欽請也。戊子，錦衣衛百戶王體仁奏徵長江船稅，從之。三月戊申，四川貢扇不至，左布政使程正誼

等五人俱降調。庚戌，兩淮鹽務少監魯保參稅監陳增，委官程守訓假武英殿中書舍人恣虐，不報。廣洋衛鎮撫戴君恩奏廣東遺鹽及名馬、天鵝絨、鎮伏西錦、珠寶皆土產，上卽命徵收。總督戴耀極言之，不聽。四月甲申，雲南礦稅寶井內監楊榮參雲南知府蔡如川、趙州知州甘學書等。乙酉，珠池市舶稅務內監李鳳激變新會縣，因參鄉官吳應鴻等，命逮治。鳳陽巡撫李三才請停礦稅曰：自礦稅繁興，萬民失業，陛下爲斯民主，不惟不衣之，且併其衣而奪之；不惟不食之，且併其食而奪之。征權之使，急於星火，搜括之令，密如牛毛。今日某礦得銀若干，明日又加銀若干；今日某處稅若干，明日又加稅若干。今日某官阻撓礦稅，解明日某官怠玩礦稅，罷職。上下相爭，惟利是聞。如臣境內抽稅，徐州則陳增、儀真則暨祿、理鹽揚州則魯保、蘆政沿江則邢隆，千里之區，中使四布，加以無賴亡命，附翼虎狼。如中書程守訓尤爲無忌，假旨詐財，動以萬數。昨運同陶允明自楚來云：彼中內使沿途掘墳，得財方止。聖心安乎？不安乎？且一人之心，千萬人之心也。皇上愛珠玉，人亦愛溫飽，皇上愛萬世，人亦戀妻孥。柰何皇上欲黃金高於北斗，而不使百姓有糠粃升斗之儲；皇上欲爲子孫千萬年，而不使百姓有一朝一夕。試觀往籍，朝廷有如此政令，天下有如此景象，而不亂者哉？不報。辛未，三才復奏數月以來，章奏但繫礦稅，卽東高閣。臣前疏非泛常，國脈民命之所關，天心祖德之所在也。人主能爲萬姓之主，然後奔走禦侮，若休戚不關，威力是憑，劫奪之已耳。斬刈之已耳。孤人之子，寡人之妻，折人之產，掘人之墓，卽在敵國讎人，猶所不忍。况吾衽席之赤子哉？窮困無聊，遂生窺竊。如徐州趙古元之類是已。夫天下非小弱也，草澤之人至廣且衆也。欲爲古元者何限，獨以朝廷處置得宜，欲乘之而無釁，故俛首降心，從教從令耳。今乃驅之使亂，臣

懼萬姓不肯爲朝廷屈也。南京守備太監下廬州問六安州礦有無狀。知府具地圖上言六安有礦。高皇帝恐人盜採。有傷皇陵來脈。故六安衛特重巡山之任。不敢妄議開取。詔止之。六月戊戌。礦監趙欽劾富平知縣王正志。逮訊。七月。稅監王虎劾通州同知邵光庭。香河知縣焦光卿。降調。戊申。稅監陳奉訐江防參政沈孟化。蘄州知州鄭夢楨。降調。戊午。巡按御史王立賢奏稅監陳奉貪暴激變。不報。時陳奉道承天之金花灘。勒居民黃金。拷及婦人。并拘鍾祥知縣鄒堯弼。遠近大震。八月。把總韓應龍奏四川成都龍安產鹽。茶重慶馬湖產名木。命內監邱乘雲往徵。十二月辛丑。湖廣稅監陳奉遣荊州衛王指揮開礦穀城。不獲。責貸主簿脅庫金若干。邑人大懼。羣擊之。指揮走免。餘俱溺江中。二十九年二月。天津稅監馬堂進大西洋利瑪竇方物。禮部言大西洋不載會典。真僞不可知。且所貢天主女圖。旣屬不經。而囊有神仙骨等物。夫仙則飛昇。安得有骨。韓愈謂凶穢之餘。不宜令入宮禁。宜量給冠帶令還。勿潛住京師。不報。己丑。武昌兵備馮應京參陳奉大逆十罪。逮至京。下司理削籍。奉欲開礦青山。棗陽知縣王之翰以近顯陵拒之。因誣及襄陽通判邸宅。推官何棟如。俱削籍。逮下獄。之翰尋斃。三月。武昌民變。逐陳奉。奉列兵殺二人。匿楚府中。命甲騎三百餘射死數人。傷二十餘人。奉踰月不敢出。衆執奉左右六人投之江。奉自焚公署門。事聞。謫知府王禹聲。知縣鄒堯弼爲民。沈一貫論陳奉激變。不報。四月。督理直隸儀真等稅御馬監暨祿言臣徵廬鳳徽安遺稅。并沿江船稅。各撫按皆云重疊不敷。題請寬處。臣未敢憑。二項共二十萬金。今徵不滿萬。始信撫按爲可據。而原奏人無憑也。乞軫念民瘼。以實徵解上。毋拘原奏人揣摩之數。上從之。時權使奇暴。獨暨祿請寬卹。凡五上。六月己巳。太監孫隆採



稅浙直。駐蘇州。激變市人殺其參隨黃建節等數人。撫按詰亂民。有葛成獨引服。不及其餘。下獄論死。直隸巡按御史劉曰梧行部徽州。見程守訓豎坊曰特旨。下書咸有一德。卽收之。守訓訐奏曰梧短不報。七月。陝西撫按奏歲貢羊絨四千匹。奉命改織盤陵。又降柘黃暗花二則。每匹長五丈八尺。日織一寸七分。半年得匹。豈能如額。乞悉改織。不報。九月。起禮部尚書沈鯉大學士入閣辦事。鯉陛見。具疏望上以言致治。又極陳礦稅之害。尋值長至節。上使太監陳矩宴之。語及開礦事。鯉言洩山川靈氣。傷陵脈。關係聖躬。與聖子神孫不細。上頷之。禮部侍郎郭正域上言。世宗朝罷內臣鎮守及珠池貢物擾驛遞。濫奏帶開銀場者。按問譴戍不貸。備在實錄寶訓。幸罷諸中使。以杜亂萌。不報。十月。以內監魯保司兩淮鹽政。兼浙直織造。請專敕與關防。禮部侍郎郭正域持不可。往白內閣。朱廣曰。敕去矣。敕中多勸戒語。正域曰。今文武臣奉敕者。孰無勸戒。能一一奉行否。何望於閣。退而具疏力爭。關防得無給。三十年二月己卯。上偶不豫。急召輔臣。沈一貫入。諭以勉輔太子。併及罷礦稅。起廢。釋禁諸事。翌日。上安。諸事遂寢。停稅諭已出。上悔。急令追之。太監田義諫曰。諭已頒行。不可反汗。上怒。幾欲手刃義。義不爲動。一貫恐。亟繳前諭。義唾之。始。吏部尚書李戴。左都御史溫純。約卽日奉行。且頌天下。刑部謂弛獄須再請。亡何而旨格矣。饒州景德鎮民變。稅監潘相舍人激之。相誣劾通判陳奇。逮下獄。三月。雲南稅監楊榮肆虐激變。滇人不勝憤。火廠房。殺委官張安民。撫按以聞。上怒。持其章不下。大學士沈鯉揭言。定亂宜速。久且生變。又具列榮罪狀。得毋株及。五月戊辰。太監劉成徵稅蘇松常鎮。激變。江西稅監潘相掠諸生及輔國將軍謀。託各宗大閔。挾門入。相走免。誣劾上。饒知縣李鴻報怨。鴻除名。禮部侍郎馮琦上言。礦稅之

害。滇以張安民故。火廠房矣。粵以李鳳釀禍。欲刺刃其腹矣。陝以委官迫死縣令。民洶洶不安矣。兩淮以激變地方。劫燬官舍錢糧矣。遼左以余東翥故。碎屍抄家矣。土崩瓦解。亂在旦夕。皇上能無動心乎。不報。應天大風。拔富家樹成穴。魯保誣以盜礦。府尹徐申力白富家冤。而盛言帝京王氣不可鑿。保不能奪。九月。揚州富民吳時修獻銀十四萬兩。詔授其子弟各中書舍人。

三十一年九月。雲南稅監楊榮責麗江土官木增退地聽開採。巡按御史宋興祖上言麗江古荒服也。木氏世知府。守石門以絕西域。守鐵橋以斷土番。不宜自撤其藩。貽誤封疆。不報。

三十二年三月。都御史溫造言礦稅毒虐。乞逮廣東稅使李鳳。撤陝西稅使梁永。雲南稅使楊榮。不報。八月丙午。武驥百戶陳起鳳請採大木。以覬利除名。盡逐其黨。時大雨。都城奔壞。戶部尚書趙世卿言蒼生糜爛已極。天心示警可畏。礦稅貂璫掘墳墓。奸子女。皇上嘗曰朕心仁愛。自有停止之日。今將索元元於枯魚之肆矣。不報。九月戊申。翰林檢討蔡毅中上皇明祖訓。節略內關礦稅者為註疏二十二卷。不報。

三十三年春正月壬辰。廣東撫按戴耀。林秉漢奏稅監李鳳憾潮州推官姚會。嘉遮辱於廣州。不報。二月丙午。巡按廣西楊芳國言稅監沈永壽以土產金銀鉛錫派有司包解。永康。思恩等州原無礦洞。亦派多金。宜免。不報。八月。禮部侍郎馮琦上言礦使出。而天下苦更甚於兵。稅使出。而天下苦更甚於礦。皇上欲通商。而彼專欲困商。皇上欲愛民。而彼必欲害民。皇上戒以勿信撥置。而撥置愈多。皇上責以不許。釋騷。而釋騷更甚。皇上之心。但欲裕國。不欲病民。羣小之心。必自瘠民。方能肥己。疏留中。十二月壬寅。詔

罷採礦。以稅務歸有司。釋礦稅在獄承天諸生沈機等十二人。

三十四年春正月癸巳。逮咸陽知縣宋時隆下獄。時命停礦稅。監梁永堅執咸陽。潼關委官不宜罷。益樹黨布虐。巡撫顧其志捕惡黨置之法。永大恨之。永又檄時隆取絨氈千五百。時隆不予。遂誣時隆劫稅。閣臣揭沮不報。二月己未。南京內官監丞徐壽偽造印牒。稱中旨徵南工部杉枋三千。部報詳詐窮。下守備太監劉朝用訊之。三月己巳朔。大學士沈鯉、朱廣言奏人恨梁永甚。宜撤不報。乙亥。江西礦務太監潘相以停稅。移景德鎮。請專陶從之。丁丑。仍以江西湖口稅務歸稅監李道。己卯。雲南礦務太監楊榮被殺。榮久於滇。恣行威福。杖斃數千人。榜掠指揮樊高明等。盡捕六衛官。人人自危。指揮賀世勳、韓光大遂倡衆焚其署。徙黨輜重皆燼。事聞。上怒不食。曰。榮不足惜。何紀綱頓至此。罪其首事。罷中使不遣。以稅課歸四川稅使邱乘雲。世勳下獄死。光大戍邊。五月。巡撫鳳陽李三才言。恩詔中格。流傳二說。一新政原非聖意。故旋開旋閉。一沈一貫恐沈鯉、朱廣妨位。恥事不出己計。傾左右。致善事不終。上怒。奪俸三月。一貫奏辯不問。

三十五年七月壬辰。撤陝西稅監梁永還京。初。巡按陝西御史王基洪劾稅監梁永陳兵殺傷吏民。巡撫顧其志奏至。平甚。上疑之。梁永遂訐奏咸陽知縣滿朝薦承御史意。伏兵渭南劫貢。上怒。命逮朝薦。廷臣論救不聽。時緹騎止灞上。宗室士民毋慮數萬人。圍永署。朝薦間道就檻車。藍田知縣王邦才亦發奸剔蠹。與永相左。并爲永誣逮。至是中旨撤永還。十一月。巡撫福建徐學聚。戶科給事中江灝劾稅監高案不法。不報。初。案肆虐閩中。舊撫袁一驥捕其爪牙置之法。案造樓船餘艘。治戎器。招集亡命。徵集百貨。將

出與諸番市。閩人集其門，詬之。案所殺傷百餘人，焚民居無算。一驥力輯之，乃定。已，又招紅裔入市，殺僂商漁，漸窺內地，故學聚奏之。

三十六年五月甲寅，遼東稅監高淮激變錦州。淮恃寵恣橫，吏民小拂意，父子老弱，係累相屬於道。徵稅私賦倍之，每開市，奪其善馬，鴛者強勒堡軍，以重價購償。自疏調度兵將，詡其功伐。總督蹇達劾奏內臣不得豫政典兵，不報。至是，索賄錦州軍戶，軍戶殺其使，激衆千人圍之。淮倉皇逃入山海關，吏部左侍郎楊時喬、戎政尚書李化龍力言遼東重困，危在旦夕，皆高淮擾民激變，以資禍患。上命撤淮還京。

四十一年六月初，廣東珠池自萬歷三十二年停採，至是，金吾右衛指揮倪英上章請開刑科給事中郭尚賓論開採之害，不報。

四十二年二月，命各省稅課減三分之一。

四十三年八月，命內官呂貴暫提督浙江織造。江西稅監潘相檄催福建、廣東稅課，閣臣言之不聽。九月丁丑，江西湖口稅廨火。大學士吳道南請罷湖口商稅，不報。 九

四十四年四月丙午，雷火焚通州稅監張燁樓居。御史金汝諧以聞，請罷稅使，不報。 八月，萬壽節加稅

監河南胡江、江西潘相、通灣張燁、天津馬堂、四川邱乘雲、南京劉朝用歲祿，賜呂貴飛魚服。

四十七年五月，吏部候選儒士蔣定國奏採山西夏縣等礦，疏不由通政司。通政使姚思仁糾之。時遼東三路敗，兵餉告急，歙人曹致廉等奏乞同內監搜江南富家借餉數百萬，思仁復疏爭之。

四十八年七月，上崩，遺詔罷一切礦稅，并新增織造、燒造等項，建言廢棄及礦稅註誤諸臣酌量起用，奉

皇太子令旨盡行停止。稅監張燁、馬堂、胡濱、潘相、邱乘雲等撤還京。

谷應泰曰：聞之銀鏤金品，列之禹貢，甘人璣貝，載在周禮。國有常經，非可以無藝征之也。况王者藏富於閭閻，天子不下求金車，良以多慾者仁義難施，黷貨者亂源斯伏。有天下者，不可以不致謹也。神宗奕葉昇平，邊圉封貢，海內乂安，家給人足，而乃苞桑之憂，不繫於慮，日中之昃，弗虞於懷。遠賢士大夫，親宦官宮妾，女謁苞苴，陰性吝嗇，孳孳所談，利之所萌耳。逮至萬曆二十四年，張位主謀，仲春建策，而礦稅始起。於是命張忠往山西，曹金往兩浙，趙欽往陝西，陳增駐山東，高案領福建，楊榮辦雲南，邱乘雲駐四川，李敬攝廣東，郝隆、劉朝用采池州，陳奉領湖廣，魯坤開彰德，衛輝、大璫雜出，諸道紛然。而民生其間，富者編爲礦頭，貧者驅之墾采，繹騷凋敝。若草菅然，又不特此也。礦務之外，天津有店租，廣州有珠權，兩淮有餘鹽，京口有供用，浙江有市舶，成都有鹽茶，重慶有名木，湖口長江有船稅，荊州有店稅，又有門攤商稅，油布雜稅，莫不設璫分職，橫肆誅求。有司得罪，立繫檻車，百姓奉行，若驅駝馬。雖漢室牢盆，桑孔乘傳，熙豐手實，隳豚悉空，曾未若斯之酷也。至乃國法恣睢，人懷痛憤，反爾之誠，覆舟之禍，亦間有之。以故高淮激變遼東，梁永激變陝西，陳奉激變江夏，李鳳激變新會，孫隆激變蘇州，楊榮激變雲南，劉成激變常鎮，潘相激變江西，當斯時也，瓦解土崩，民流政散，其不亡者幸耳。而深宮不省，疏入留中，其始因礦稅而設璫者，繼則璫熒而託命在礦稅，其始因璫媚而迎合在礦稅者，繼則璫肥而交結在宮闈，植根深固，未易卒拔故也。善乎侍郎馮琦之疏曰：皇上之心，但欲裕國，不欲病民，羣小之心，必自瘠民，方能肥己。逮至三十年，而稅歸有司，礦使停罷，輪臺之悔，不亦晚乎。然且兩載以還，稅監不革，七年之後，珠池復開，比之衛

武飲酒之悔。秦穆臨河之誓。抑何習與性成也。



萬 有 文 庫

第一集一千種

王雲五主編

明史紀事本末

(十)

谷應泰著

商務印書館發行

萬有文庫

第一集一千種



總編纂者  
王雲五

商務印書館發行



明史紀事本末

(十)

谷應泰著



國立學基本叢書



星3421—10

# 明史紀事本末

## 卷六十六

### 東林黨議

神宗萬曆二十一年二月，京察竣。三月己未，刑科給事中劉道隆論吏部稽勛司員外郎虞淳熙、兵部職方郎中揚于庭、臺省交謫，而吏部曲爲解，僅議一職。方主事袁黃非體，上責吏部回奏。尚書孫鑰言淳熙臣鄉人，安貧好學，非有先容之助，于庭任西事有功，尚書石星亦言之。臣不忍以功爲罪，且旣命議，覆自有異同，惟各原其心，求歸於當。若知其無罪，以科道之言而去之，昧心欺君，臣不能爲。上以不引罪奪俸。三月，考功郎中趙南星鑄三秋調外，淳熙等並罷。劉道隆以不指名亦奪俸。鑰乞休，不許。鑰復奏曰：人臣之罪莫大於專權，國家之禍莫烈於朋黨。夫權者人主之操柄，人臣所司，謂之職掌。吏部以用人爲職，進退去留屬焉。然必請旨而後行，則權固有在，不可得專也。今以留二庶僚爲專權，則無往非專矣。以留二京職爲結黨，則無往非黨矣。臣任使不效，徒潔身而去，俾專權結黨之說終不明於世。將來者且以臣爲口實，又大罪也。因請乞骸骨歸。先是內計去留，先白閣臣。鑰及南星力矯之。王錫爵不悅，鑰旣被譴，都察院左僉都御史王汝訓、通政使魏允貞、大理寺少卿曾乾亨、禮部郎中于孔兼、員外郎陳泰來、主事顧允成、張納陛、賈巖、國子助教薛敷教俱論救。禮部郎中何喬遠、主事洪啓睿復合疏言之。孔兼、允成、敷教俱謫外。甲子，禮部員外郎陳泰來疏曰：臣通籍十七年，四歷京察部權。自高拱、張居正以來，尚書惟張瀚、嚴

清選。郎惟孫鑰、陳有年頗能自立。餘則唯唯。訥訥。濫觴於楊巍。而掃地於劉希孟。謝廷案。今復借拾遺。熒惑聖怒。卽去時之故智。將來必挈權以阿閣臣。而後爲不專權。必植黨以附閣臣。而後爲不結黨。上怒。降泰來。癸未。左都御史李世達請宥泰來等。不聽。南星、淳熙于廷、黃各削籍。四月辛丑。吏部尙書孫鑰罷。九月。吏部右侍郎趙用賢罷。先是用賢爲檢討。生女三月。中書舍人吳之佳約以幣。及用賢諫。張居正奪情削籍。之佳爲御史。過吳門。用賢往餞。不爲禮。因反幣。終字女蔣氏。之佳子鎮亦他娶。不相及也。用賢負氣節。素不爲王錫爵所善。鎮訟之。罷用賢。之佳亦降戶部郎中。楊應宿議趙用賢絕婚。非是。行人高攀龍申救得罪諸臣。語侵閣臣。指應宿爲諂。應宿遂訐攀龍。并及吏部文選郎劉四科、趙南星、顧憲成等。錫爵封應宿疏上。閏十一月甲午。行人高攀龍上言。大臣則孫鑰、李世達、趙用賢去。小臣則趙南星、陳泰來、顧允成、薛敷教、張納陛、于孔兼、賈巖斥。近李楨、曾乾亨復乞歸。選司孟化鯉又削籍矣。中外不曰輔臣不附己。則曰近侍不利用正人。果謂出於聖怒。則諸臣自化鯉而外。未見忤旨。何以皆至罷斥也。皇上去邪之果斷。而左右反得行其媚嫉之私。皇上有容言之盛心。而臣下反遺以拒諫之誚。爲聖德累不小。丙申。都察院左都御史孫丕揚覈楊應宿激而嫚罵。高攀龍疎而易言。命降應宿。湖廣按察司經歷攀龍揭陽縣典史。仍諭建言諸臣。時事艱難。不求理財。足兵實政。乃誣造是非。部院公論所出。今後務持平覈實。

二十二年五月丁亥。吏部推閣臣王家屏、沈鯉、陳有年、沈一貫、左都御史孫丕揚、吏部右侍郎鄧以讚、少詹事馮琦。不允。初。閣臣王家屏以諫冊儲罷歸。至是。上諭有不拘資品堪任閣臣語。吏部遂以家屏等名

上上覽不懌。下旨詰責。以宰相奉特簡。不得專擅。吏部尚書陳有年爭之。以爲冢宰總憲廷推。自有故事。王家屏爲相有名。若宰相不廷推。將來恐開捷徑。因乞骸骨。上命馳驛還籍。以孫丕揚代之。辛卯。以沈一貫、陳于陞爲禮部尚書兼東閣大學士。直文淵閣。調文選郎中顧憲成。給事中盧明陔。遂中立。先後疏救。上益怒。憲成削籍。謫明陔。中立按察司知事。甲午。禮部郎中何喬遠奏救憲成。謫廣西布政司經歷。先是。國本論起。言者皆以蚤建元良爲請。政府惟王家屏與言者合力。請不允。放歸。申時行、王錫爵皆婉轉調護。而心亦以言者爲多事。錫爵嘗語憲成曰。當今所最怪者。廟堂之是非。天下必欲反之。憲成曰。吾見天下之是非。廟堂必欲反之耳。遂不合。然時行性寬平。所斥必旋加拔擢。一貫旣入相。以才自許。不爲人下。憲成旣謫歸。講學於東林。故楊時書院也。孫丕揚、鄒元標、趙南星之流。蹇諤自負。與政府每相持。附一貫者。科道亦有人。而憲成講學。天下趨之。一貫持權求勝。受黜者身去而名益高。此東林浙黨所自始也。其後更相傾軋。垂五十年。

二十三年秋七月己卯。巡按直隸御史趙文炳劾吏部文選郎中蔣時馨倖進鬻爵。下廷議。尚書孫丕揚代時馨辨。丙戌。時馨削籍。時馨貪黷。初知新喻。調嘉魚。遷南京大理寺評事。故爲敝衣冠。從鄒元標講學。歷考功。文選二司。及被劾。請廷質。且曰。戎政兵部左侍郎沈思孝庇浙江海道丁此呂。避察不得。又求少宰不得。遂同諭德劉應秋、大理右少卿江東之等。詆李三才。授趙文炳冀陷太宰而代之上。怒其瀆辨。甲午。逮故浙江海道副使丁此呂。蔣時馨旣斥。孫丕揚爲釁。由此呂。沈思孝以此呂建言不宜察。丕揚遂上此呂訪單。貪婪贓跡。雖建言無倖脫理。命逮下獄。對簿之日。承服硃砂牀具等。纍纍。丕揚遂與思孝交惡。

矣。八月，沈思孝言孫丕揚庇屬負國，丕揚乞休，不允。十一月丁丑，工部員外郎岳元聲言言官攻言官，大臣攻大臣，不若俱罷之。

二十四年八月癸亥，學士張位乞罷，不許。時吏部尚書孫丕揚乞休，疏二十上，言權官坐謀，鷹犬效力，義難再留，以位黨丁此呂，沈思孝也。上責丕揚無大臣體，宜協恭，毋相牴牾。閏八月，吏部尚書孫丕揚、右都御史兼兵部侍郎沈思孝罷。

二十七年五月丁巳，以光祿寺卿李三才爲都察院右僉都御史，巡撫鳳陽。

二十九年九月戊午，禮部尚書兼翰林院學士沈鯉、朱賡兼東閣大學士、直文淵閣。時廷推九人，上已點朱國祚、馮琦，而沈一貫密揭二臣年未及艾，曷少需之。先爰立老成者，賡得入，鯉先任禮部，與申時行左請告，上不許。吏科鄒給事中陳與郊因疏劾鯉，鯉求去，益力。上私語曰：沈尚書不曉我意，遂有是命。

三十一年夏四月，楚王華奎與宗人華越等相訐，章下禮部。初，楚恭王隆慶初廢，薨，遺腹宮人胡氏孿生子華奎、華璧，或云內官郭綸以族人如絳奴產子壽兒及弟如言，妾子尤金梅所出，並入宮，長爲華奎。次華璧，儀賓汪若泉嘗訐奏，事下撫按。王妃堅持之，乃寢。華奎既嗣楚，華璧封宣化王，華越素強禦，忤王。越妻又如言女，知其詳，越遂盟宗人二十九人入奏，楚先王風痺不能御內，乃令宮婢胡氏詐爲身，臨蓐時抱妃兄王如言子爲華奎，又抱妃族王如絳舍人王玉子爲華璧，皆出於妻恭人王氏口。王氏如言女，故知之。二孽皆不宜冒爵，章入，通政司沈子木持未上。六月，楚王劾宗人疏亦至，事下部。禮部右侍郎郭正域曰：王奏華越事易竟，華越奏王非恭王子，亂皇家世系，事難竟。楚王襲封二十年，何至今始發，而又

發於女子骨肉之間。王論華越一人。而二十九人同攻王。果有真見出真情否。王假。則華越當別論。王真。則華越罪不勝誅。沈一貫以親王不當勘。但當體訪。正域曰。正域江夏人。一有偏徇。禍且不測。非勘。則楚王跡不白。各宗罪不定。王跡勘。各宗罪不勘。人於何服。時正域右宗人。而輔臣沈鯉又右正域。戶部尚書趙世卿、倉場尚書謝杰、祭酒黃汝良皆謂王非假。一時閣部互相齟齬。給事中姚文蔚劾郭正域。故王護衛中人修怨謀陷王。都察院左都御史溫純劾御史于永清。給事姚文蔚刺及沈一貫。九月己巳。刑科都給事中楊應文、給事中錢夢皋各劾郭正域。夢皋并及次輔沈鯉。俱不報。上卒以王爲真。而正域罷去。尋楚府東女王英燧、武岡王華增、江夏王華燿等請復勘假王。不聽。時票楚事皆朱賡。二沈引嫌不出。十一月。妖書事起。沈一貫疑郭正域爲之。錢夢皋遂直指正域。且及輔臣沈鯉。陝西道御史康丕揚將例轉內監賈忠貞語。丕揚乘妖書可免。丕揚遂起而佐之。後歸獄。皦生光得解。詳爭國本

三十三年春正月。考察京官。時主察當屬吏部左侍郎楊時喬。輔臣沈一貫憚其方嚴。請以兵部尚書蕭大亨主筆。疏上。上以時喬廉直。竟屬之。時喬與都御史溫純力持公道。疏上。留中。三月辛巳。吏部趨計疏。中旨留被察給事中錢夢皋。御史錢一鯨等。復論京察科道不稱職者甚衆。豈皆不肖。必有私意。朕不得無疑。蓋以一貫私人被詰責也。時喬純言察處科道萬歷二十一年科七人。道七人。二十七年科五人。道九人。今議處科四人。道七人。皆參衆矢公。而聖諭嚴切。臣等無狀。宜能上不問。南京總督糧儲尚書王基以拾遺自辨。上特留之。夏四月。刑科給事中錢夢皋復論楚事。請削前侍郎郭正域籍。并言左都御史溫純黨庇工科結事中鍾兆斗例轉。亦誣奏純。純乞休。大理少卿徐宗濬、吏科都給事中侯慶遠、御史孔貞

一等皆論夢泉違禁妄辨吏部左侍郎楊時喬亦言之俱不報五月候補職方郎中劉元珍劾沈一貫徧置私人蒙上箝下錢夢泉妄奏求容士林不齒一貫夢泉皆疏辨夢泉謂元珍爲溫純鷹犬降一級調極邊六月吏部員外郎賀燦然言被察科道與溫純皆當去南京吏科給事中陳良訓御史蕭如松朱吾弼各論王基錢夢泉鍾兆斗必不可留沈一貫結近侍陽施陰設秋七月兵部主事龐時雍直攻沈一貫欺罔誤國於是太子太保都察院左都御史溫純致仕錢夢泉鍾兆斗各避疾京察始得奏尋謫賀燦然龐時雍奪朱吾弼俸拾遺南京戶部尚書王基免時有布衣在一貫坐夢泉戲之曰昔之山人山中之人今之山人山外之人布衣應聲曰昔之給事給黃門事今之給事給相門事識者噱之三十四年夏六月吏科給事中陳良訓御史孫居相劾沈一貫奸貪大學士沈一貫沈鯉並致仕一貫連歲乞休疏八十上始允鯉居位四載嘗列天戒民窮十事書之於牌每入閣則拜祝之或譏鯉爲咀咒上命取觀之曰此非詛咒語也妖書事起危甚賴上知其心得無恙及放歸得旨不如一貫之優各賜金幣鯉半之出都日猶有譏其衣紅袍閱邊者中官陳矩爲解乃已孫居相奪歲俸陳良訓鑄三級調外三十五年五月以禮部左侍郎李廷機南京禮部右侍郎葉向高爲禮部尚書兼東閣大學士直文淵閣又諭朱廣召舊輔王錫爵時顧憲成移書向高言近日輔相以模稜爲工賢否溷淆引張禹胡廣爲戒廷機故出沈一貫門人多疑之給事中王元翰胡忻曹于汴宋一韓御史陳宗契等交章劾廷機廷機故清介而攻之者詆爲輦金奧援御史葉永盛極辨之廷機伏闕辭不允上下旨切責元翰等秋七月總督漕運李三才請補大僚選科道用廢棄其論廢棄曰諸臣祇以議論意見一觸當路永棄不收總之於皇



上無忤。今乃假主威以錮諸臣。又借忤主之名以飾主過。負國負君。莫此爲甚。參政姜士昌賈表入京。奏別遺奸。錄遺逸。遺奸指王錫爵。沈一貫。朱廣。又曰。古今稱廉相。必稱唐楊綰。杜黃裳。然二賢皆推賢好士。惟恐不及。而王安石用之。驅逐諸賢。竟以禍宋。時李廷機有清名。故士昌規及之。廣。廷機上疏辨。降士昌廣西僉事。御史宋燾論救。謫平定州判。加謫士昌興安典史。

三十六年五月。禮部主事鄭振先劾輔臣朱廣。李廷機大罪十有二。指一貫。廣。廷機爲過去。現在。未來。三身。布置接受。從風而靡。上以其誣詆。謫普安州判。九月。先是。王錫爵辭召。手疏言。皇上於章奏。一概留中。特鄙棄之。如禽鳥之音。不以入耳。然下以此愈囂。臣謂君父至尊。必自立於無過之地。請幡然降旨。盡除關稅。召還內差。散內庫之有餘。濟邊儲之不足。天下必歡呼踴躍。以頌聖德。留中章疏。亦自有緩急。如推補九卿。以吏部。都察院爲先。庶官以科道爲急。科道考選久停。與其故裁抑。留不肖。以塞賢者之塗。孰若稍疏通。簡新進。以決舊日之壅。此今日攬權上策也。時疏甚密。而都御史李三才鈎得之。泄言於衆。謂錫爵以臺省爲禽獸。於是南京戶科給事中段然首論錫爵與朱廣密揭擅權亂政。不報。起孫丕揚太子少保。吏部尚書。十月壬戌。起吏部文選郎中顧憲成爲南京光祿少卿。辭不至。丙寅。工科給事中何士晉劾錦衣衛左都督王之楨爲輔臣爪牙心腹。亟宜顯斥。禮科給事中張鳳彩。刑科都給事中蕭近高。給事中張國儒。交章糾王錫爵。朱廣。國儒言。臺省五十餘人。共糾朱廣奸狀。而尚書趙世卿曲媚之。俱不報。十一月壬子。朱廣卒於官。廣性澹謹。同鄉沈一貫當國。善調護。故妖書楚獄。其禍不蔓。廣卒。廷機當首揆。言路益攻之。廷機決計不出。葉向高獨相。而攻廷機者未已也。遂移居演象所之真武廟。乞放凡五

年至萬歷四十年始得請。寒暑閉門。無履跡。

三十七年春二月丙寅。御史鄭繼芳劾工科右給事中王元翰貪婪不法。元翰亦奏辨繼芳爲王錫爵。申時行吐氣。初給事中王紹徽善湯賓尹。營入閣甚急。嘗語元翰曰。公語言妙天下。卽一札揚湯君。湯君且爲公死。世間如湯君可恃也。元翰辭焉。紹徽銜之。因嗾繼芳撫元翰。夏四月。吏科糾擅去諸臣。初工科給事中孫善繼拜疏。竟去。劉道隆繼之。王元翰。顧天峻。李騰芳。陳治則各先後去。命削善繼籍。道隆等各降秩。時南北科道互相攻詆。至不可問。戶科給事劉文炳請召鄒元標。不報。十二月乙丑。工部主事邵輔忠論總督漕運李三才結黨徧天下。前圖枚卜。今圖總憲。四岳薦鯨。漢臣諛莽。天下之大可憂也。時三才需次內臺。輔忠首劾之。繼以御史徐兆魁。三才奏辨。工科給事中馬從龍。御史董兆舒。彭端吾。南京工科給事中金在衡。交章爲三才辨。俱不報。三才負才名。初爲山東藩臬。有聲。民歌思之。撫淮十年。方稅璫橫甚。獨能捕其爪牙。以尺箠斃大盜。三才多取多與。收採物情。用財如流水。顧憲成之左右譽言日至。憲成信之。亦爲游揚。三才嘗宴憲成。止蔬三四色。厥明盛陳百味。憲成訝而問之。三才曰。此偶然耳。昨偶乏。卽寥寥。今偶有。故羅列。憲成以此不疑其綺靡。至是挾縱橫之術。與言者爲難。公論絀之。

三十八年五月壬子。吏部主事王三善乞勘李三才。不報。前吏部郎中顧憲成遺書葉向高。謂三才至廉。至淡漠。勤學力行。爲古醅儒。當行勘以服諸臣心。時給事中金士衡段然力保三才。給事中劉時俊。兵部郎中錢案爭之。紛如聚訟。

三十九年二月戊子。總督漕運李三才免。三月。吏部尙書孫丕揚糾御史金明時倡言要挾逃察。命下

都察院議處。初，明時巡闕，劾寶坻知縣王淑汴。吏部右侍郎王圖子也。及臨京，察知不免，遂先發攻王圖。御史史記事論之。明時奏辨，主事秦聚奎言：明時論王圖在去年十二月，丕揚論明時在今考察先一日而卒之。明時撓察之疏，杳乎無聞。大臣結黨欺君，天下大勢趨附秦人，今之丕揚，非復昔之丕揚矣。於是吏科都給事中曹于汴、御史湯兆京、喬允升俱以撓察論聚奎，丕揚奏參聚奎，并以湯賓尹等七人訪單送內閣。閣臣葉向高疏如丕揚指，金明時以不謹免，尋以辨疏犯御諱削籍。四月庚辰，計疏下，命秦聚奎閑住，南京國子監祭酒湯賓尹、郎中張嘉言、主事徐大化、御史劉國縉、王紹徽、喬應甲、岳和聲降調有差。五月，給事中朱一桂、御史徐兆魁疏稱：顧憲成講學東林，遙執朝政，結淮撫李三才，傾動一時。孫丕揚、湯兆京、丁元薦、角勝附和，京察盡歸黨人，不報。翰林院修撰韓敬疾去，敬先師事湯賓尹，在禮闈，越房拔爲第一，敬有時名，而好縱橫之學，恣色貨之好。時攻賓尹，因及敬。

四十年二月癸未，吏部尚書孫丕揚掛冠出都。

四十一年二月辛丑，御史劉廷元劾光祿寺少卿于玉立依附東林，風波翻覆，宜顯斥，不報。十月，禮科

給事中元詩教言：今日之爭始於門戶，門戶始於東林，東林倡於顧憲成，刑部郎中于玉立附焉。憲成自賢，玉立自奸，賢奸各遠其人，而奔競招搖，羽翼置之言路，爪牙列在諸曹，關通大內，操縱朝權，顧憲成而在，甯願見之哉。末刺及葉向高、向高奏辨。

四十二年八月癸卯，大學士葉向高致仕。十一月，御史劉廷元參李三才占廠盜皇木，結交內侍，起官御史劉光復，給事中官應震等交章論之，命給事中吳亮嗣往勘，亮嗣報其實，下三才舍人於理，三才尋

削籍。

四十五年三月。京察革刑部主事王之竊職爲民。竇子稱。陸大受皆被斥。時葉向高旣去。方從哲獨相。庸無所短長。吏部尚書鄭繼之主察。徐紹吉。韓浚佐之。之竊初爭挺擊。爲韓浚所糾。部處坐以貪汚。子稱大受有清操。持論與之竊合。亦被逐。時上於奏疏俱留中。無所處分。惟言路一糾。其人自罷去。不待旨也。於是臺省之勢積重不返。有齊楚浙三方鼎峙之名。齊爲元詩教。韓浚。周永春。楚爲官應震。吳亮嗣。浙爲劉廷元。姚宗文。勢張甚。湯賓尹輩陰爲之主。賓尹負才名而淫汚。辛亥。京察被斥。至是。察典竣。韓浚以問鄉人給事中張華東。華東曰。王之竊論甚正。何爲重處之。浚驚愕不語。

四十六年十二月。主事鄒之麟奪職閑住。之麟負才名。附給事中元詩教。韓浚求轉吏部不得。遂訐奏詩教。浚又擅離任。被斥。

四十七年十二月。會推閣員。禮部左侍郎何宗彥以吏科給事中張延登不署名。不得預。御史薛敷教。蕭毅中。左光斗。李徵儀。倪應春。彭際遇。張新詔等交章惜之。而禮科都給事中元詩教。兵科薛鳳翔又屢駁。具如延登指。各歸責於輔臣。方從哲從。哲奏辨俱不報。先是國本之論起。廟堂益相水火。上頗厭惡之。斥逐相繼。持論者愈堅。乃一切置之高閣。方從哲獨相七年。上喜其無能而安之。山東趙煥爲冢宰。詩教又從哲門人。故其勢尤張。已而鄒之麟倡言張鳳翔爲選君。必以年例處姚宗文。劉廷元。齊浙遂離。之麟旣被黜。其友夏嘉遇。魏光國。尹嘉賓。鍾惺皆有才名。俱改用。而嘉遇素潔清。亦與衆共擯。趙興邦爲兵垣。仍入禮闈。之麟嘉遇遂糾之。并及詩教。言路合疏。糾嘉遇。興邦。遼陞京卿。御史唐世濟助嘉遇。攻興邦。而元

趙之勢衰時。廷議所喧持者。唯禁道學一事。吏治邊防俱置不理。

泰昌元年。卽萬曆四十八年也。八月己酉。起鄒元標爲大理寺卿。科臣惠世揚上言。君子小人之進退。關係國家之治亂。然小人不退。則君子不進。吏部尙書周嘉謨奏列建言得罪諸臣。王德完等三十三人。於是王德完、孟養浩、鍾羽正、滿朝薦等悉起。部寺諸官壬戌。以侍讀學士劉一燝、韓爌爲禮部尙書。兼東閣大學士。直文淵閣。仍諭內閣。特召舊輔葉向高、初光宗踐祚。踰月崩。未及用。向高等。熹宗旣卽位。乃遣行人徵之。十一月。給事中惠世揚遇災陳言。因參大學士孫如游、薦高攀龍、劉宗周、孫居相、劉策、王之寀、陸大受等。十二月。大學士方從哲致仕。從哲以紅丸移宮二案臺省交章論之。至是歸。

熹宗天啓元年春正月。兵科給事中楊漣予告回籍。漣以移宮一案御史賈繼春侵之。漣因乞歸。案詳三御

史馬逢皋上言。楊漣何罪。無罪卽功。功在安社稷。罪在攻大璫。罪璫未誅。而發璫罪者先作楚囚之悲。君子退則小人進矣。二月。御史周宗建上言。國家之治亂由於議論之公私。皇祖戊申以後。沈一貫未敗之時。在朝者豈無君子。而一雜以小人。則沈鯉可逐。郭正域可芟。察典可壞。大獄可興。時則有錢夢皋、康丕揚爲之首。庚戌辛亥之交。在朝者豈無君子。而一雜以小人。則大貪之淮撫可保。極險之銓佐可阿。直節可摧。清流可放。時則有史記事、徐縉芳等爲之首。壬子癸丑之交。在朝者豈無君子。而一雜以小人。則學差可擯。考選可排。吏兵之諸事可日試。以爲嘗。考察之把持可一網。以爲阱。時則有元詩教、趙興邦爲之首。有如今日三咨並下。君子進庸矣。而臣竊爲先事之慮者。以用人言之。如所引董應舉、高攀龍、史孟麟、李邦華、熊明遇、魏雲中等二十餘人。類皆磊落奇才。如必借此相引。積橫之貪邪。亦思梯架於月旦。窮

兇之醜類。尚留春夢於餘灰。將朝廷大公之盛舉。翻作臣子市德之私緣。臣之所謂不得不慮也。以移官言之。如方震孺、毛士龍等十有餘章。闡發既明。在科臣楊漣。潔志遠嫌。不難聽召用於他日。臺臣賈繼春。質心愛主。何妨付定論於國人。若復侈談羽翼。追憶几筵。欲掃疑端。愈增滋蔓。又臣之所謂不得不慮也。臣請約言之。銓除在真品。毋容夾雜。以同升朝論。在輿評。毋輕出言。以佐鬪。國家要以邊事爲首務。毋自起室內之戈。今日終以君德爲大本。毋徒爲將順之節。三月起劉宗周禮部主事。王之寀刑部主事。高攀龍光祿寺丞。八月給奉聖夫人客氏地。以陵工成。命敍錄魏進忠。御史王心一。馬鳴起。吏科給事侯震陽。倪思輝。朱欽相等先後糾之。降調有差。詳魏忠賢亂政二年春正月。起吏部郎中趙南星爲太常寺卿。三月禮科惠世揚疏參輔臣沈灌借募兵之名。爲護身之術。陰使其黨晏日華潛入大內。誘劉朝等練兵。再見江彬之事。外戚鄭養性厚募死士。有違祖制。不聽御史侯震陽亦以劾灌調外。六月刑部尚書王紀奏劾輔臣沈灌巧能移人主之視聽。力足倒天下之是非。交結權黨。誅鋤正士。黃臺瓜詞已賦。同文館獄將興。又曰。臣指其蔡京。而灌不肯受試。取惠世揚。周朝瑞。魏大中。董羽宸等疏一一讀之。則京之爲京。隱括於此矣。上以煩言責之。灌尋予告回籍。紀革職爲民。八月以楊漣爲太常寺少卿。兵科給事朱童蒙疏劾都御史鄒元標。副都御史馮從吾建壇講學。釀金立院之非。標等上疏自理。上優詔答之。工科給事郭興治復劾。內有比擬妖賊諸語。上責其狂悖。奪俸。於是元標從吾五疏乞休。元標卽移家出城。遂予告馳驛去。翰林修撰文震孟上言勤政講學之實。留中。庶吉士鄭鄮疏促之。俱降調。詳魏忠賢亂政太僕少卿滿朝薦上言國事顛倒。成於陛下者十之一二。成於

當事大臣者十之八九。疏入，除籍爲民。十一月，以趙南星爲都察院左都御史。十二月，以顧秉謙、魏廣微爲大學士，入閣辦事。

三年二月，奪御史周宗建俸。南京御史徐世業劾宗建保舉熊廷弼，宗建疏辨。詞連郭鞏，有結交宮闈、獻媚進忠之語。中旨切責。冬十月，以楊漣爲右僉都御史，協理院事。

四年二月，推南京吏部尚書鄒元標。中旨以衰老罷之。夏四月，吏部尚書趙南星上言：吏部四司惟稽勛司一人，餘司皆二人，以稽勛事寡也。然今日之稽勛皆儲爲文選考功之用，宜就近推補司官，不拘資格。一省不妨二人，引陸光祖調吏部，呂坤黃克念等同邑同司之例爲言。上從之。於是南星調職，方司郎中鄒維連爲稽勛主外察。維連與原任主事吳羽文皆江西人，羽文遂拘舊事求去。維連亦不敢履任。刑科傅繼疏侵之，羽文求去益堅。維連亦上疏力辭。繼復疏以僉都御史左光斗、吏科都給事魏大中交通故內監王安、中書汪文言，詔下文言於獄，嚴訊之。光斗上疏自理，大略謂繼之意不利於稽勛，有鄒維連銓司有程國祥，吏垣有魏大中，故欲一網去之。且指其冒東廠理刑，傅繼教爲兄弟，布置窟穴。大中亦上疏辨，得旨命大中赴任供職。御史袁化中給事中甄淑相繼爲光斗辨。大學士葉向高請骸骨，疏曰：臣十八疏乞歸，皇上謂時艱主憂，臣卽去何安？願臣罪戾多矣。卽如科臣傅繼所論汪文言，實臣具題。左光斗、魏大中之善文言，尙屬曖昧，而臣之用文言，則事跡甚明。臣取罪之故，當聽公論，不敢妄辨，以滋紛紜。耿耿愚忠，竊謂言官之訐奏，豈不可開？駕帖之拏人，漸不可長。惟皇上罪臣一人，而稍寬其他，於以釋宮府之嫌，消縉紳之禍，上慰諭留之，已而大中旣蒞任，復傳旨詰責大中，繼情事未明，何得赴任？繼乃上言明

旨不宜二三。中旨恐開旁竊。糾近臣以自解。七月。大學士葉向高予告回籍。向高再入相。政移忠賢。同事者更希意阿旨。向高動卽掣肘。楊漣二十四罪疏上。忠賢恨刺骨。御史林汝翥忤璫。羣璫圍向高第。索之。向高知時不可爲。發憤決去。疏三十三上。後得請。左都御史高攀龍糾劾貪污御史崔呈秀落職。回籍。呈秀巡按淮陽。有狼藉聲。吏科都給事魏大中發其餽遺。攀龍因回道考察。劾罷之。已而呈秀以魏璫義子起用。冬十月朔。有事太廟。輔臣魏廣微不至。魏大中糾其無禮。指稱惟奢安不拜。正朔。廣微深銜之。上疏自辨。御史李應昇復疏糾之。謂廣微不可見。乃父於地下。廣微見疏。恚甚。廣微父魏允貞也。嘗爲諫官。得罪。閣臣去。降吏科都給事魏大中。吏部員外夏嘉遇。御史陳九疇。三級調外。吏部尙書趙南星。左都御史高攀龍。乞罷。許之。給事中沈惟炳疏救。不允。亦調外。時推山西巡撫南星。以太常卿謝應祥。沈靜有爲。欲以處之。言於員外夏嘉遇。嘉遇述其意於河南道御史袁化中。化中深然之。及化中途逢大中。告以故。先是。應祥令嘉善。大中知其才守。遂會推焉。陳九疇有私恨。遂論應祥昏耄。大中以門牆私之。互相奏辨。有旨會勘。吏部坐臺。臣論人失實上。中旨以比周切責之。降大中等。於是南星、攀龍皆引罪去。大學士韓爌力救。不聽。引疾歸。已而刑部尙書喬允升。吏部侍郎陳于庭。都御史楊漣。左光斗。太常卿謝應祥。部屬張光前。鄒維連。科道袁化中。許譽卿等。一時盡黜。部署皆空。戶科給事中陶崇道。上言諸臣各執成見。不無異同。尤望皇上盡入陶鎔。化其畛域。而天語頻煩。責以朋比。彼此之互異。旣章。水火之情形。立見。虞廷黜陟。不過賢奸。唐宋末流。可爲殷鑒。疏入。降調。十二月。起徐兆魁爲吏部左侍郎。朱童蒙。郭允厚。李春燁。太僕寺少卿。徐大化。呂雲鵬。孫杰。大理寺寺丞。霍維華。郭興治。楊維垣等。皆科道。以御史梁夢



環追論。復逮汪文言。自是羅織靡已。楊漣、魏大中相繼斃於獄。詳魏忠賢亂政御史李蕃疏劾輔臣朱國禎。時韓爌既去。魏廣微未得爲首輔。嗾蕃劾之。

五年秋八月。御史張訥請廢天下書院。殺熊廷弼。初。楊左事起。以移宮爲案。但屬楊左。與顧大章等無

與也。已復改爲封疆。周朝瑞曾疏薦廷弼。而顧大章與楊維垣相疏辨。與楊左又無與也。乃以封疆牽入

移宮。於是一網盡矣。詳魏忠賢亂政

七年八月。上崩。無嗣。遺命以信王入繼大統。誅魏忠賢客氏。其黨相繼伏法。詳魏忠賢亂政冬十月。吏科都給

事中陳爾翼上言。東林餘孽徧布長安。每欲因事起釁。憂不在小。乞敕下廠衛嚴緝禁之。上曰。羣臣流品

先帝澄汰已分。朕初御極。嘉與士大夫臻平康之理。毋事揣摩形影。以滋爭競。十一月。戶部員外王守

履劾崔呈秀薦舊輔韓爌。上以韓爌清忠有執。下所司知之。

懷宗崇禎元年春正月。翰林院編修倪元璐上言。臣入都。邸抄凡攻崔、魏者。必引東林爲並案。一則曰邪

黨。再則曰邪黨。夫崔、魏而旣邪黨矣。向之劾忠賢。論呈秀者。又邪黨乎。虛中言之。東林則亦天下之才藪

也。其所宗主者。大都秉清挺之標。而或繩人過刻。樹高明之幟。而或持論太深。此之謂非中行則可。謂之

非狂狷則不可。且天下之議論甯涉假借。而必不可不歸於名義。士人之行已甯任矯激。而必不可不準

諸廉隅。自以假借矯激深。咎前人而彪虎之徒。公然毀裂廉隅。背叛名教矣。連篇頌德。而地生祠。夫頌德

不已。必將勸進。生祠不已。必且嵩呼。而人猶寬之曰。無可奈何。嗟乎。充一無可奈何之心。又將何所不至

哉。議者能以忠厚之心。曲原此輩。而獨持已甚之論。苛責吾徒。亦所謂悖也。今大獄之後。湯火僅存。恩綸

酌用。乃任事諸臣，猶以道學封疆四字持爲鐵案。深防報復。臣竊以爲過計也。水落石出，正人相見。總屬崔、魏之異己，即可化牛。李爲同己，况年來借東林以媚崔、魏者，其人自敗，不須東林報復。若其不附崔、魏，又能攻而去之者，其人既已喬嶽矣。雖百東林，烏能報復哉。臣所謂方隅未化也。與楊維垣互出疏相往復。上是其言。時元路屢言事。大學士來宗道常曰：渠何事多言。吾詞林故事，惟香茗耳。時謂宗道清客宰相。五月，御史袁宏勳劾大學士劉鴻訓，一入黃扉，揚揚自得。浹旬之間，革職閑住，無虛日。最可異者，楊所修賈繼春、楊維垣夾攻表裏之奸，有功無罪，而誅鋤禁錮。自三臣始，且軍國大事未暇平章，惟亟毀要典，謂水火元黃是書爲祟。今燬矣。水火元黃，息耶戰耶。未燬以前，崔、魏借之以空善類。既燬以後，鴻訓文借之以殛忠良。以暴易暴，長此安窮。鎮撫司僉書張道濬亦訐攻鴻訓。工科給事中顏繼祖爭之，且言道濬出位亂政，非重創不止。御史史堃、高捷相繼彈鴻訓。鴻訓尋以事罷歸。十一月庚申，會推閣員吏部侍郎成基命、禮部侍郎錢謙益等。禮部尙書溫體仁訐謙益。天啓初主試浙江，賄中錢千秋，不宜枚卜。上召廷臣及體仁，謙益於文華殿質辨良久。上曰：體仁所參神奸結黨，誰也。曰：謙益黨與甚衆，臣不敢盡言。卽枚卜之典，俱自謙益主持。吏科給事中章允儒曰：體仁資深望輕，如糾謙益，何不先於枚卜也。體仁曰：前猶冷局，今卜相事大，不得不爲皇上慎用人耳。允儒曰：朋黨之說，小人以陷君子，先朝可鑒。上叱之下。錦衣衛獄削籍。禮部以錢千秋試卷呈，上責謙益引罪而出。旋回籍，除名爲民。下千秋於刑部。周延儒曰：自來會推會議，皆故事。僅一二人主持，餘無所言。卽言出而禍隨之矣。上大稱善，遂停枚卜。卒用延儒。延儒力援體仁。明年亦入政府。初延儒以召對稱旨，至是枚卜，謙益必欲得之，而慮以延儒同推，勢必用延

儒遂力扼止之。不知上果意在延儒。不推迴滋上疑耳。於是黨同之疑中於上者深。體仁發難。而延儒助之。謙益不知也。忽蒙召對。謙益自爲枚卜。定於此日。及入見。方知有體仁疏。體仁與謙益廷辨。體仁言如湧泉。而謙益出不意。頗屈。

二年春正月。定逆案。召廷臣於文華殿。先是。御史毛九華劾禮部尚書溫體仁有媚璫詩刊本。上問體仁。體仁謂出自錢謙益誣論。又出御史任贊化參體仁疏。其語褻。上不懌。謫贊化於外。御史吳甦言因溫體仁前削章允儒。降房可壯。瞿式耜。今又斥任贊化。班行無色。乞召還言官。不聽。

三年五月。左諭德文震孟上言。呂純如羅織諸賢。今藉輿援。思借邊才起用。吏部尚書王永光假竊威柄。年例變亂祖制。考選擯斥清才。疏入。命指實具奏。永光有清執東林以其異己。給事中張國維。御史毛羽健等交劾之。俱不問。至是。震孟再糾之。

四年春正月。翰林院編修黃道周疏救錢龍錫。調外。初。定魏。崔逆案。輔臣錢龍錫主之。袁崇煥之獄。御史史堇力謀借崇煥以報龍錫。因龍錫以羅及諸臣。周延儒。溫體仁主之。欲發自兵部。而尚書梁廷棟不敢任。又上英察。不能遽起大獄也。道周疏上。延儒意稍解。時大學士韓爌亦被劾歸。二月。給事中葛應斗糾御史袁宏勳。錦衣衛都督同知張道濬。通賂竊權。命下理。宏勳受參將胡宗明。主事趙建極賄。囑於兵部尚書梁廷棟。史部尚書王永光。宏勳。道濬皆永光所任也。俱論戍。刑科給事中吳執御論永光誨貪崇墨。永光罷。五月。釋故大學士錢龍錫獄。戍定海衛。龍錫出獄。周延儒卽過之。極言上怒甚。挽回殊難。龍錫深德之。未幾。溫體仁至。龍錫因述延儒語。體仁曰。上固不甚怒也。於是聞者謂體仁質直。而延儒虛僞。

然亦體仁之巧於擠延儒也。嘉善錢士升爲龍錫門生，聞體仁語，頗多之，而輕延儒。體仁遂與相結。五年春正月，刑科給事中吳執御奏薦黃克纘、劉宗周等，御史吳彥芳奏薦李瑾、李邦華等。上以其朋比惡之下彥芳，執御於理，坐上書不以實律杖爲城旦。

六年三月，刑科都給事陳贊化劾大學士周延儒招權納賄，遊客李元功借叢威人，延儒嘗語去輔李標事云：上先久放，余封還原疏，上卽改留，頗有回天之力。今上，羲皇上人也。此是何語，豈徒小人之輕泄乎？至指借停刑以岡賄利，此固通國所共聞也。且引刑科給事李世祺爲證，世祺亦奏延儒有此言，不問戶科給事中朱文煥亦劾延儒重荷國恩，毫無補救。六月，大學士周延儒罷，始溫體仁與延儒深相結納，延儒力援之以進。至是，體仁將奪其位，太監王坤疏攻延儒，體仁無一語相助。於是陳贊化屢糾延儒，卽羲皇上人一語窮究不已。體仁知上意，凡與延儒爲難者，必陰助之，而助延儒者皆誣。延儒放歸。

七年三月，召大學士何如寵入朝，在道屢引疾，不許。刑科給事中黃紹杰奏言：從來君子小人不能並立，如寵徘徊瞻顧，則次輔溫體仁當知所自處矣。自體仁爲相，水旱薦臻，盜賊滿路，變理固如是乎？秉政旣久，窺旨必熟，中外諸臣承奉其意，用一人則曰此與體仁不合也，行一事則曰此體仁所不樂也。凡此皆召變之由，乞命體仁引咎辭位，以回天心，慰民望，上責其率妄，調外。八月甲戌，召廷臣於平臺，問誰堪冢宰總憲者，令各給條對。吏部左侍郎張捷曰：臣之所舉與衆不同，上許之。助戚在殿西室，文臣在殿東室，捷旁皇四顧，大學士王應熊目屬之。諸臣覺其異，及問所薦，則前兵部呂純如也。時諸臣或舉鄭三俊，勳戚亦如之。或舉唐世濟，捷曰：總憲世濟可，冢宰非純如不可。俄入奏，力言純如之長，諸臣以純如列逆。

案不可。刑科給事中姜應甲言之尤力。捷失色。上問溫體仁。對曰。謝陞可。上是之。應熊故善周延儒。而純如又與延儒善者。故體仁陰持之。給事中范淑秦。吳其來交章劾王應熊。張捷同謀黨附。計翻逆案。乙亥。召南京吏部尚書謝陞爲吏部尚書。以唐世濟爲左都御史。

八年夏六月。刑部主事吳江。給事中何楷。宋學顯。御史張纘。曾各劾大學士溫體仁。并及王應熊。初。流盜陷中都。巡撫楊一鵬。巡按吳振纓被劾。而振纓體仁鄉人。曲庇之。時何吾騶亦與應熊不合。錢士升力劑其閒。得解。秋七月。進少詹事。文震孟爲禮部左侍郎。兼東閣大學士。震孟講春秋稱旨。既而以疾告。不允。溫體仁語之曰。行相君矣。何避也。至是出特簡入政府。十一月。大學士何吾騶。文震孟罷。初。吾騶。震

孟在直。欲以工科給事許譽卿補南京太常卿。溫體仁與吏部尚書謝陞難之。陞遂疏糾譽卿。震孟自恃特簡。於體仁無所依附。嘗與體仁論庶吉士鄭鄮當遷除。大拂體仁意。至是。稟陞疏止。欲奪譽卿俸。體仁不肯。震孟作色擲筆曰。卽削籍無害。體仁夕揭上。而吾騶。震孟朝罷矣。譽卿擊璫有直聲。沈淪諫垣。十年不調。至是。削籍。震孟有時望。入相。僅三月。而齟齬同官。不竟其用。逮庶吉士鄭鄮。鄮繼母大學士吳宗

達女弟也。鄮薄於宗達。宗達嘗揭其杖母烝妾。震孟旣忤體仁。體仁併恨鄭鄮。卽以宗達所揭入告。下獄。九年二月。吏部尚書謝陞疏救陳子壯。不聽。先是。子壯以論宗秩事下獄。詳崇禎治亂巡按蘇松常鎮御史

王一鶚奏薦周延儒等。以濫及廢籍責之。夏四月。大學士錢士升罷。初。溫體仁深結士升。其入相也。體

仁凡有所爲。必力推之。如用冢宰謝陞。總憲唐世濟。皆體仁意。而士升成之。體仁逐文震孟。頗引士升爲證。士升亦助體仁。至是。體仁并欲去士升。因福建右衛經歷吳鯤化訐奏。士升弟士晉。卽擬嚴旨。仍囑林

鈇毋泄言。欲借弟以逐其兄也。士升遂引歸。五月，逮滋陽知縣成德，下錦衣獄。德性剛激，入前大學士文震孟之門。至是，連章攻溫體仁，凡十上，盡發其奸狀。母張氏伺體仁與出，輒道詬之。德移獄刑部。戊辰，綏。秋七月，國子祭酒倪元璐免。元璐與同邑左庶子丁進不合，嗾誠意伯劉孔昭訐奏也。十一月，下左都御史唐世濟於獄。世濟以邊才薦，故兵部尚書霍維華上謂維華逆案，世濟蒙蔽，下刑部獄。明年正月，霍維華戌沒。

十年春正月，常熟章從儒訐奏前禮部右侍郎錢謙益科臣瞿式耜疏上，溫體仁修郅逮之下刑部獄。幾殆。謙益嘗作故太監王安祠記，曹化淳出王安門，憤其冤，發從儒陰謀，立枷死。謙益等尋得釋。二月，逮巡按山西御史張孫振。初，提學僉事袁繼咸守官奉公，自書卷外無長物。孫振貪穢不職，誣奏之。貢士衛周祚等訟其冤，命并孫振逮訊。三月，陸文聲陳風俗之弊，皆原於士子。太倉庶吉士張溥前臨川知縣，張采倡復社以亂天下，命南直提學御史倪元珙覈奏。元珙因極言文聲之妄，上責其蒙飾，降光祿寺錄事溥。采爲古學以相砥礪，天下靡然嚮風，不爲政府所悅。故朝論多苛及之。時蘇州推官周之夔亦訐奏溥等樹黨挾持。夏四月，兵科給事中宋學顯、貴州道御史張盛美俱例轉湖廣河南參議，撫甯侯朱國弼劾溫體仁私左都御史唐世濟，逐學顯。盛美上不聽。又劾體仁受霍維華賂，令唐世濟發端。上慰諭體仁，奪國弼侯爵。世濟亦戌邊。六月，大學士溫體仁引疾免，賜金幣。遣行人吳本泰護歸。體仁在事，諸臣攻者無虛日。體仁與舉朝爲仇，其庇私黨排異己，未嘗有跡。但因事圖之，使若發自上者。而主柄陰爲所假，上竟不之疑。八月，以薛國觀爲禮部左侍郎，兼東閣大學士。十月，定東宮官，屬右諭德項煜編修。

楊廷麟讓左諭德黃道周。閣臣以道周意見偏。上疏有不如鄭鄆之語。寢之。刑科給事中馮元飈言道周忠足以動聖鑒。而不能得執政之心。恐天下後世有以議閣臣之得失也。不聽。已而道周疏劾楊嗣昌奪情。謫外。詳崇禎治亂

十一年八月。南京戶科給事張焜芳論前巡鹽兩淮御史史堃侵帑三十餘萬。命逮堃下刑部。先是巡鹽御史張錫命憂去。遺課二十一萬。堃攝事。盡入其家。檢討楊士聰攻之。堃諉囊錫命。時錫命前卒。子沆奏辨。大學士錢士升擬旨罪堃。王應熊曰。史太僕大有才。未易撻也。擬上。上果不聽。至是。堃復奏辨。又發張焜芳朋黨狀。焜芳奪官。

十二年六月。以左懋第、袁愷、陰潤、蘭剛中、范士髦爲給事中。詹時雨、李近右、汪承詔、張緒論、楊四重爲試監察御史。吳昌時等並各部主事。昌時首選吏部。疏上。上自手定先後。示不測。昌時謂薛國觀所爲。恨之。八月。故庶吉士鄭鄆磔於市。先是中書舍人許曦訐奏鄆不孝。濱倫與溫體仁疏合法司定罪。擬辟。上命加等。鄆初選庶吉士。有直諫聲。文震孟、黃道周皆與之遊。當時欲借鄆以傾震孟。道周讞駁逾重。而鄆居鄉多不法。遂罹慘禍。

十三年夏四月。巡撫江西右僉都御史解學龍薦舉布政司都事黃道周。上以道周黨邪亂政。學龍徇私。俱逮下理。廷杖論戍。戶部主事葉廷秀請寬之。併杖削籍。監生涂仲吉上言。黃道周通籍二十載。半居墳廬。稽古著書。一生學力。止知君親。雖言嘗都憲。而志實忠純。今喘息僅存。猶讀書不倦。此臣不爲道周惜。而爲皇上天。下萬世惜也。昔唐太宗恨魏徵之面拆。至欲殺而終不果。漢武帝惡汲黯之直諫。雖遠出而

實優容。皇上欲遠法堯舜，奈何出漢唐主下，斷不宜以黨人輕議學行才品之臣也。通政司格之不上，仲吉并劾通政使施邦曜，遏抑言路，再救道周，上怒，下獄杖之。論戍。六月，大學士薛國觀免。初，國觀以溫體仁援得入閣，同官六人皆罷，獨國觀秉政。至首輔，上頗向用之。至是因擬諭失旨，下五府九卿議處。致仕。刑科給事中袁愷再疏劾之，言國觀納賄有據，并及尚書傅永淳、侍郎蔡奕琛等，遂下鎮撫司訊。初，上召國觀語及朝士婪賄，對曰：「使廠衛得人，朝士何敢黷貨。」東廠太監王化民在側，汗出浹背。於是專偵其陰事，以及於敗。國觀既削籍，吏部尚書傅永淳、南京吏部尚書朱繼祚並免。下左副都御史葉有聲於獄，以通賄國觀也。時株連頗衆。十二月，國觀奏辨不聽，命入京卽訊。

十四年春正月，故大學士薛國觀奏辨刑科給事中袁愷誣劾出於禮部主事吳昌時之意，上不聽。夏四月，召前大學士周延儒、張至發、賀逢聖入朝。至發辭不出，逢聖不久以病歸。初，延儒既罷，丹陽監生賀順、虞城侯氏共斂金屬太監曹化淳等營復相。至是得召用。主事吳昌時之力居多。延儒德之。六月，故刑部右侍郎蔡奕琛在繫，上言去夏六月，同邑諸生倪襄贄於庶吉士張溥之門，歸語知縣丁煌，誇溥大力可立致人禍福，因言及臣旦夕必逮，未幾而王陸彥果劾臣矣。一里居庶常，結黨招權，陰握黜陟之柄，豈不異者。上令丁煌指證，卜倪襄於獄。既而奕琛亦劾張溥，并及故禮部侍郎錢謙益。八月辛亥，故大學士薛國觀賜死，誅中書舍人王陸彥，各籍其家。初，國觀以王陸彥通賂免官，命伺其邸，則王陸彥至，執下獄。陸彥爲吳昌時甥，臨刑呼曰：「此舅氏所作，我若有言，卽累名教矣。」時國觀事發於東廠，僉云昌時實啓其機。十二月甲子，戊黃道周解學龍。初，刑部尚書劉澤深擬道周瘴戍，再奏不允。因上言道周之罪。



前兩疏已嚴矣。至此惟有論死。死生之際。臣不敢不慎也。自來論死諸臣。非封疆則貪酷。未有以建言誅者。今以此加道周。道周無封疆。貪酷之失。而有建言蒙戮之名。於道周得矣。非我皇上覆載之量也。且皇上所疑者黨耳。黨者見諸行事。道周具疏空言。一二臣工始未嘗不相與也。今且短之。繼而斥之。烏有所謂黨。而煩朝廷之大法耶。去年行刑時。忽奉旨停免。今皇上豈有積恨於道周。萬一轉圜動念。而臣已論定。噬臍何及。敢仍以原擬上。上從之。

十五年夏四月。宥馬士英起兵部左侍郎兼右僉都御史提督鳳陽。士英初撫宣大。以總監王坤論罪。至是。故太常少卿阮大鍼爲營救。得起用。八月。召還黃道周。仍任少詹事。時周延儒承上眷最深。凡上怒。莫能回。延儒能談言微中。先是。道周在獄。人謂必不可救。延儒以微詞解之。得減放。至是。上偶言及岳飛事。嘆曰。安得將如岳飛者而用之。延儒曰。岳飛自是名將。然其破金人事。史或多溢辭。卽如黃道周之爲人。傳之史冊。不免曰。其不用也。天下惜之。上默然。甫還宮。卽傳旨復官。

十六年三月。改禮部儀制主事吳昌時爲吏部文選主事。署郎中事。昌時好結納。通司禮太監王化民等。欲轉銓司。吏部尙書鄭三俊嘗以問鄉人徐石麒。答曰。君子也。石麒遂薦於上。蓋石麒畏昌時機深。故譽之。而三俊不知。例轉給事中。范士髦等四人。卻史陳蓋等六人。故事例轉科一道二。文選主事吳昌時特廣其數。意脅臺省爲驅除地也。夏四月。河南道御史祁彪佳劾吳昌時。紊制弄權。山東道御史徐殿臣賀登選各疏參之。五月。吏部尙書鄭三俊以薦吳昌時引咎罷。大學士周延儒放歸。給事中郝綱復劾吏部郎中吳昌時。禮部郎中周仲連竊權附勢。納賄行私。內閣票擬機密。每事先知。總之。延儒天下之

罪人而昌時仲連又延儒之罪人御史蔣拱宸何綸交劾之七月乙卯上自訊昌時於中左門拷掠至折脛乃止徵延儒聽勘延儒先薦大學士王應熊途中密語令先抵京上遣緹騎趨延儒入偵知之罷應熊尋誅昌時賜延儒死初延儒再召時庶吉士張溥馬世奇以公論感動之故其所舉措盡反前事向之所排更援而進之上亦虛己以聽溥既沒世奇遠權勢不入都延儒左右皆昌時輩以至於敗倪元璐曰自神祖中葉以來三四十年間朝廷之局凡三變其始天子靜攝聽臣工羣類之自戰而不爲之理所謂鼠鬪穴中將勇者勝耳故其時其血玄黃時勝時敗其旣閣寺擅權宵人處必勝之地正人亦戢心搏志而甘處不勝不敢復言戰宵人亦不曰戰直曰禽馘之耳然其時正人雖嬰禍患其心愈益喜曰吾君子也其後魁柄已振握照虛公百爾臣工皆休然不敢窮戰而陰制以謀故其時氣戰者敗謀戰者勝謀陽者敗謀陰者勝凡明主所箝撻以繩貪人者宵人皆借之以寀正人其正人旣禍敗卽無可自解曰吾君子其宵人亦不靳歸名君子而但使其無救於禍敗宵人正人皆以不敢言黨而黨愈熾黨愈熾而國是不可問矣究之指以朋比斥爲僞學竄逐禁錮殆無虛日予以世患無眞品望不患無眞經濟耳所謂道德事功垂之竹帛貞之珉石蓋概乎未有睹也嗟乎此後世之所以衰也

卷六十七

爭國本

神宗萬曆十年八月丙申皇元子生頒詔赦天下

十四年正月。皇第三子生。進其母鄭氏爲貴妃。二月。輔臣申時行等請冊立東宮。疏曰。蚤建太子。所以尊宗廟。重社稷也。自元子誕生。五年於茲矣。卽今麟趾螽斯。方興未艾。正名定分。宜在於茲。祖宗朝立皇太子。英宗以二歲。孝宗以六歲。武宗以一歲。成憲具在。惟陛下以今春月吉日。敕下禮部。蚤建儲位。以慰億兆人之望。上曰。元子嬰弱。少俟二三年舉行。戶科給事中姜應麟。吏部員外沈璟。上言。貴妃雖賢。所生爲次子。而恭妃誕育元子。主鬯承祧。顧反令居下耶。乞收回成命。首進恭妃。次及貴妃。上怒。謫應麟。廣昌典史。璟亦調外。上諭閣臣曰。降處非爲冊封。惡彼疑朕廢長立幼。先揣摩上意耳。我朝立儲。自有成憲。朕豈敢以私意壞公論耶。刑部主事孫如法。上言。恭妃誕育元嗣。五年未聞有進封之典。貴妃鄭氏。一生子。卽有皇貴妃之封。貴妃能得之於皇子之生之日。而恭妃不能得之五年敬奉之久。此天下不能無疑也。上怒。謫朝陽典史。御史孫維城。楊紹程。請定儲位。俱奪俸。禮部侍郎沈鯉。奏宜竝封恭妃王氏。上諭待元子冊立行。皇貴妃鄭氏。父鄭承憲。爲其父請卹典。援中宮永年伯王禕例。禮部疏駁。上命予墳價五百兩。

十五年春正月。禮科都給事王三餘。御史何倬。鍾化民。王慎德。各奏建儲。不報。輔臣請建儲封王。令候旨行。十六年六月。山西道御史陳登雲。請冊立東宮。且罪鄭承憲驕橫之狀。不報。十八年春正月朔。上御毓德宮。召輔臣申時行。許國。王錫爵。王家屏。於西室。以冊立東宮。係宗社計。請上曰。朕知之。朕無嫡子。長幼自有定序。鄭妃亦再三陳請。恐外間有疑。但長子猶弱。欲俟其壯。大使出。輔臣

復請曰。皇長子年已九齡。蒙養豫教。正在今日。上頷之。時行等出。上遽令司禮監追止之。云。已令人宣皇子來與先生一見。輔臣還至宮門內。有頃。皇長子。皇三子俱至。引至御榻前。皇長子在御榻右。上手攜之。向明正立。輔臣等注視良久。因奏曰。皇長子龍姿鳳表。岐嶷非凡。仰見皇上昌後之仁。上欣然曰。此祖宗德澤。聖母恩庇。朕何敢當。輔臣奏。皇長子春秋長。宜讀書。且云。皇上正位東宮。時方六齡。卽已讀書。皇長子讀書已晚矣。上曰。朕五歲卽能讀書。復指皇三子云。是兒亦五歲。尙不能離乳母。遂手引長子至膝前。撫摩歎惜。輔臣叩頭奏曰。有此美玉。何不蚤加琢磨。使之成器。上曰。朕知之。時行等叩頭出。十月。吏部尙書宋纁。禮部尙書于慎行。率羣臣合疏請冊立東宮。上怒。下旨奪俸。輔臣申時行引疾乞休。王家屏居中調之。上意稍解。以鄭國泰請冊立疏示羣臣。傳論建儲之禮。當於明年傳立。廷臣無復奏擾。如有復請。直踰十五歲。

十九年冬十月。閣部大臣合疏請建東宮。先是。建儲事旣奉上旨。申時行與同官約遵守稍需一歲。每諸司接見。亦以此告之。故辛卯歲。自春及秋。曾無言及者。至是。工部主事張有德請備東宮儀仗。時行方在告。次輔許國乃曰。小臣尙以建儲請。吾輩不一言可乎。倉卒具疏。首列時行名以上。時行聞之大愕。別具揭云。臣已在告。同官疏列臣名。臣不知也。故事。閣臣密揭皆留中。而是疏與諸疏同發。禮科羅大紘遂上疏論時行迎合上意以固位。武英中書黃正賓繼之。上怒。杖正賓。削大紘籍。十二月。輔臣王家屏乞明春建儲。以塞道路揣摩之口。銷牆幃牽制之私。不報。二十年春正月。禮科都給事李獻可疏請豫教削籍。大學士王家屏具揭申救。封還御批。上怒。給事鍾羽

正舒宏緒、陳尙象、李固策、丁懋遜、吳之佳、楊其休、葉初春、御史錢一本、鄒德泳、賈名儒、陳禹謨、主事董嗣成交章申救、削籍降調有差。科臣孟養浩疏最後上，加杖一百，家屏三疏乞歸，許之。吏部主事顧憲成、章嘉禎等廷推家屏忠愛，不宜發置，請召還。上怒，憲成削籍，嘉禎謫羅定州州判。十一月，禮部尙書李長春屢請冊立，疏十有四，不報，尋罷去。

二十一年春月正，輔臣王錫爵歸省還朝，密疏請建東宮曰：前者冊典垂行，而輒爲小臣激聒所阻，皇上親發大信，定以二十一年舉行。於是羣囂寂然，蓋皆知成命在上，有所恃而無虞也。倘春令過期，外廷之臣必曰：昔以激聒而改遲，今復何名而又緩？伏乞降諭舉行，使盛美皆歸之獨斷，而天功無與於人謀。上報云：朕雖有今春冊立之旨，昨讀皇明祖訓立嫡不立庶，皇后年尙少，倘復有出，是二儲也。今將三皇子並封王，數年後皇后無出，再行冊立。錫爵復疏曰：昔漢明帝取宮人賈氏子，命馬皇后養之；唐玄宗取楊良媛子，命王皇后養之；宋眞宗劉皇后取李宸妃之子爲子，與其曠日遲久，待將來未定之天，孰若酌古準今，成目下兩全之美？臣謹遵諭，並擬傳帖二道，以憑採擇。然尙望皇上三思。臣言俯從後議，以全恩義，服人心。上竟用前諭。工部郎中岳元聲謂科臣張貞觀、史孟麟曰：此舉何如？貞觀曰：此乃錫爵密進者。元聲復詣禮部郎中陳大來家，兵科給事許宏綱、禮部郎中于孔兼皆在。宏綱以屬元聲，元聲曰：我方論錫爵若言，謂有成心反敗乃事，其以元聲爲後勁可也。宏綱不允。元聲遂歸草疏，適禮部郎中顧允成、張納陛至，遂聯名上。大約言皇上正位東宮之日，仁聖亦青年，莊皇帝不設爲未然事，以語大計。疏入，刑科王如堅、光祿丞朱維京疏繼上曰：皇上念及中宮良厚，顧中宮春秋方盛，前星一耀，則所冊元子自當避位。

何嫌何疑。今以將來末期之事。格見在已成之命。恐中宮聞之。亦有不安者。皇上以手札咨之錫爵。錫爵不能如李泌之委曲叩請。如旨擬敕。難以厭中外之人心。光祿少卿徐傑。署丞王學會。郎中陳泰來。于孔兼疏繼上。上怒如堅。維京謫戍傑。學會等爲民。而元聲允成。納陛得寬旨。然並封旨。竟如故。元聲與允成。納陛泰來。孔兼暨李啓美。曾鳳儀。鍾化民。項德禎。面詰錫爵於朝房。錫爵色甚厲。元聲曰。閣下柰何誤引親王入繼之文。爲儲宮待嫡之例。鳳儀語稍遜。元聲厲聲呵之曰。會員外不知祖訓。錫爵容霽。衆欲出。元聲曰。大事未定。柰何出。錫爵曰。然則如何。元聲曰。當以廷臣相迫告之。皇上。錫爵曰。書諸公之名以進。何如。元聲曰。請卽以元聲爲首。杖戍惟命。錫爵唯唯。庶吉士李騰芳上書錫爵曰。聖明在上。議者俱爲杞憂。以公苦心。疑爲集菀。此皆妄也。但聞古賢豪將與立權謀之事。必度其身能作之。身能收之。則不難晦其迹於一時。而終可皎然於天下。公欲暫承上意。巧借王封。轉作冊立。然以公之明。試度事機。急則旦夕。緩則一二年。竟公在朝之日。可以遂公之志否。恐王封既定。大典愈遲。他日繼公之後者。精誠智力。稍不如公。容或壞公事。隳公功。而罪公爲尸謀。公何辭以解。此不獨宗社之憂。亦公子孫之禍也。錫爵讀訖。爽然曰。諸公詈我。我無以自明。如子言。我受教。但我每揭皆手書。祕跡甚明也。騰芳曰。揭帖手書。人何由知。異日能使天子出公手書傳示天下乎。錫爵默然良久。復曰。古人留侯。鄴侯。皆以權勝。騰芳曰。鄴侯不欲以建甯爲元帥。而咏摘瓜詩以衛廣平。此經也。非權也。但與肅宗私議家事。恐上皇不安。而遲廣平爲太子。別是一則。然建寧之死胎此矣。若子房以強諫爲無益。而招致四皓。有似行權。然未嘗請太子與趙王並封。且行權必大智人。委曲宛轉。或立語而移。或默然而定。若需之數年。更以他手。雖聖人不能保矣。語次。

錫爵不覺泣下。翌日。上疏自劾三誤不允。二月。輔臣王錫爵復疏冊立。上命三皇子俱停封。錫爵復疏爭之。略曰。皇上旋止封王之命。再訂二三年冊立之期。真古聖王從善轉圜之盛德。願臣私憂過計。去年之命。既改於今年。則焉知今年之命。不改於他日。夫人情惟無疑則已。疑心一生。則將究及宮闈之隱情。慮及千萬世之流禍。復曰。皇長子年近加冠。未就外傅。從來所未聞。皇上縱欲少緩冊立之期。豈可不先行豫教之禮。上不允。尋降陳泰來。薛敷教。于孔兼。顧允成於外。削禮科張貞觀籍爲民。八月。王錫爵以星變言。天以皇上爲子。皇太子之象。帝星。太子之象。前星。方今禳彗第一議。莫如冊立。上慰答之。十一月。上御煖閣。召輔臣王錫爵。錫爵叩頭力請建儲。上允。明年出閣聽講。尋又傳諭皇長子皇三子齡歲相等。欲一併行出閣禮。錫爵復奏。皇上有子而均愛之。均教之。固慈父一體之念。然自外廷而觀。皇長子明年十三歲。皇三子明年九歲。大抵皇子生十歲而入學。以皇長子之太遲。形皇三子之太蚤。先後緩急之間。一不慎。而聖心又晦矣。十二月。輔臣王錫爵等請皇長子先行冠禮。上報云。東宮與王袞冕皮弁二服。冠則皆同。其服則異。今冠禮將何從。宜暫著常服出講。

二十二年二月。皇長子出閣講學。禮部侍郎馮琦進儀注。上以未冊立。免侍衛儀仗。

二十六年五月。吏科給事戴士衡。全椒知縣樊玉衡。削籍謫戍。先是庚寅。山西按察使呂坤輯閩範圖誌。鄭國秦重刻之。增刊后妃首漢明德皇后。終鄭貴妃。科臣戴士衡指其書上言。謂呂坤逢迎掖庭。苑枯之形已分。語侵貴妃。樊玉衡前疏皇長子冊立中。亦有皇上不慈。皇長子不孝。皇貴妃不智等語。貴妃聞之。泣訴於上。會有援引歷代嫡庶廢立之事。著爲一書。內刺張養蒙。劉道亨。魏允貞。鄭承恩。鄧光祚。洪其道。

程紹白所知。薛亨、呂坤等名曰憂危竝議者。戚黨疑其書出士衡手。張位教之鄭承恩。遂上疏力辯。并奏士衡假造偽書。中傷善類。目爲二衡以激聖怒。欲併殺張位。上怒甚。二臣謫戍。六月。御史趙之翰以憂危竝議爲戴士衡僞造。主於張位。預謀者徐作、劉楚先、劉應秋、楊廷蘭、萬建崑也。中旨禮部右侍郎劉楚先、都察院右都御史徐作罷。國子祭酒劉應秋降調。吏科左給事楊廷蘭、禮部主事萬建崑俱謫典史。張位先以密薦楊鎬東征失利罷去。命值赦不宥。

二十八年春正月。禮部尚書余繼登請先皇長子冊立。而後冠禮可致祝。昏禮可致醮。大學士沈一貫請皇長子冠昏不報。三月。南京禮部侍郎葉向高等乞行皇長子三禮。不報。己巳。移皇長子慈慶宮。再諭內閣冊立有期。羣臣不得瀆擾。夏四月。刑部主事謝廷讚請冊立。謫貴州布政司照磨。戊寅。沈一貫密揭請撰敕。上報曰。謝廷讚狂妄。少待之。俾天下臣民曉然知出自朕心。秋七月癸卯。諭皇長子清弱。大禮稍俟之。百官毋沾名煩聒。冬十月乙酉。諭內閣來春冊儲。庚子。工科都給事王德完言。臣入京數月。道路相傳。中宮役使止數人。憂鬱致疾。阽危不保。臣竊謂不然。第臣得風聞言事。若如所傳。則宗社隱憂。臣羨袁盎卻坐之事。祈皇上眷顧中宮。止輦虛受。臣死且不朽。上震怒。下錦衣衛獄訊其由。吏部尚書李戴、御史周盤等論救。俱切責之。十一月。戚臣鄭國泰疏請皇子先冠昏。後冊立。科臣王士昌糾之。署禮部朱國祚以國泰顛倒其詞。與明旨有背。恐釀無窮之禍。不報。皇長子出閣講學。時嚴寒。皇長子噤甚。講官郭正域大言天寒如此。殿下當珍重。喝班役取火禦寒。時中官圍爐密室。聞正域言出之。上聞亦不罪。二十九年五月丙午。戚臣鄭國泰請冊儲冠昏。奪俸。戊申。禮科右給事楊天民、王士昌等請立儲。俱謫貴



州典史御史周盤等疏救奪俸。八月甲午。沈一貫上言。詩既醉之篇。臣祝其君曰。君子萬年。介爾景福。繼曰。君子萬年。永錫祚胤。則願其子孫之多。又曰。釐爾士女。從以孫子。願酬淑媛而生賢子孫也。斯千之篇曰。築室百堵。西南其戶。爰居爰處。爰笑爰語。美新宮也。繼曰。吉夢維何。維熊維羆。男子之祥。言吉祥善事。當生聖子神孫無窮也。今稱觴萬壽。兩宮落成。在廷同祝。而啓天之祥。實自聖心始。皇上下昏及時。故得聖子蚤。今皇長子大禮必備其儀。推念真情。不如蚤諧伉儷之爲適。皇上孝奉聖母。朝夕起居。不如蚤遂含飴弄曾孫之爲樂。乞今年先皇長子大禮。明春後遞與諸皇子禮。子復生子。孫復生孫。坐見本支之盛。享令名。集完福矣。上心動。諭俟卽日行之。冬十月乙亥。上以典禮未備。欲改期册立。沈一貫封還聖諭。力言不可。十五日己卯。册立皇長子爲皇太子。暨册封福王、瑞王、惠王、桂王。詔告天下。上特諭在籍輔臣申時行、王錫爵知之。壬辰。皇太子加冠。福、瑞諸王俱冠。

三十年春正月丁巳。增東宮官屬。己未。福王暫講武英殿西廡。二月丙子。册皇太子妃郭氏。上引疾免賀。三十一年十一月丁卯。有蜚語曰。續憂危竝議。凡三百餘言。謂東宮不得已立之。而從官不備。寓後日改易之意。其特用朱賡。賡者更也。內外官附庸者。文則戎政尙書王世揚、巡撫孫瑋、總督李汝、御史張養志。武則錦衣都督王之禎、都督僉事陳汝忠、錦衣千戶王名世、王承恩、錦衣指揮僉事鄭國賢。又有陳矩朝夕帝前。以爲之主。沈一貫右鄭左。王規福避禍。他日必有靖難勤王之事。吏科都給事中項應祥撰。四川道監察御史喬應甲刊其書。一夕間。自宮門迄於衢巷。皆遍厥明。舉朝失色。莫敢言。大學士朱賡得於私宅。以聞。請緝其人。乞歸。不允。上大怒。令廠衛搜緝。務得造書主名。責項應祥。喬應甲回奏。沈一貫請嚴跡。

之。偵校塞路。購賞格五千金。官指揮僉事。或曰。妖書似出清流之口。將似傾沈一貫者。或曰。此奸人作之。以陷郭正域。正域時有清流領袖之目。見忌一貫。已喬應申。項應祥各回奏。奸書謗人無自名理。不問。召皇太子慰安之。太子泣。上亦泣。隨令內豎以慰安太子語諭內閣。時一貫方以楚宗事恨郭正域。正域輔臣沈鯉門生也。鯉素蹻蹻。尤負望。供天啓聖聰牌於閣。入則禮之。時開告密。鯉語人曰。此事何必張皇也。一貫大不懌。正域放歸。待凍潞河之楊村。聞問不絕。一貫益側目。十二月壬午。給事錢夢皋直指正域。併及沈鯉。御史康丕揚佐之。初。僑醫吳江沈令譽多貴遊。丕揚巡城跡捕之。搜得楚王揭華越副封及刑部主事于玉立所致吏部郎中王士騏書。以玉立起官士騏與正域左右之。又前漢中府同知荆門胡化。首渠縣訓導阮明卿撰妖書。廉問無據。而明卿爲夢皋姻。故夢皋首攻正域。疏中稱沈令譽郭氏之食客。胡化同鄉之年友。當亟訊奸黨。治正域罪。次輔沈鯉屢爲奸人緩頰。舉朝曰。大變。彼曰。小事。舉朝曰。當捕。彼曰。可容。所上揭有震動人心。虧損聖德等語。回互隱伏。意欲何爲。疏入。中外大駭。於是發卒圍正域舟。捕其僕隸乳媪十三人。巡捕都督陳汝忠又獲正域舍人毛尙文。江夏布衣王忠。巡城御史康丕揚捕僧達觀。琴士鍾澄。百戶劉相等。同沈令譽下詔獄。考訊無所得。邏校且環逼鯉邸。迫脅不堪。皇太子遣閹人語閣臣曰。先生輩容我乞。全郭侍郎。會都察院溫純上書訟之。唐文獻陶望齡先後詣沈一貫爲解。陳矩亦力持之。鯉得安。王士騏于玉立以詞連落職。錦衣都督王之禎。千戶王名世等首錦衣都督周嘉慶下東廠會鞫。闔門慘掠。嘉慶亦不承。吏部尙書李戴爲嘉慶外父。拷訊時。不忍慘視。起入中堂。上聞而惡之。罷戴歸。命錦衣嚴鞫妖書。沈一貫朱賡請寬疑獄。沈鯉亦上章引咎。且乞歸。不聽。最後錦衣百戶崔德緝

順天黜生。曠生光，并其子其篇、婦趙氏、陳氏鞠之。生光性險賊，善脅人金，坐譴戍大同，赦歸。終不悛，猶脅鄭國、秦家。方廷訊時，丕揚等皆欲坐郭正域。御史牛應元指天爲誓，沈裕厲聲折生光，從重論，恐株連多人，無所歸獄。生光自誣服，歎曰：「朝廷得我結案，如一移口，諸君何處求生活乎？」刑部尚書蕭大亨必欲窮究之。禮部侍郎李廷機、趙世卿告輔臣，廣謂卽此可以具獄。廣以語一貫，事得稍解。

三十二年夏四月乙酉，提督東廠司禮太監陳矩上妖書獄，移曠生光刑部論斬。上欲加等，以謀危社稷，律論磔。矩素清直，妖書事保全善類爲多。壬寅，曠生光磔於市，妻子戍邊。妖書非生光也，第其人可死，故人不甚憐之。或謂妖書出武英殿中書舍人永嘉趙士禎，後士禎疾篤，自言之，肉碎落如磔。

三十九年九月己酉，皇貴妃王氏薨。妃雖生皇太子，失寵，目眚比疾篤。太子始知之，亟至宮門，尚閉，抉鑰而入。妃手太子衣而泣曰：「兒長大如此，我死何憾！」太子慟，左右皆泣，莫能仰視，須臾薨。

四十年冬十月，閣臣葉向高請福王之國，報明年春舉行。

四十一年春正月，禮部請東宮開講，福王就國，不報。四月，兵部尚書王象乾復請之，上曰：「親王之國，祖

制在春，今踰期矣。其明年春舉行。」五月辛未，葉向高言福王之國奉旨明春舉行，頃復以莊田四萬頃

責撫按，如田頃足而後行，則之國何日？聖諭明春舉行，亦甯可必哉。福王奏稱祖制謂祖訓有之乎？會典有之乎？累朝之功，令有之乎？王所引祖制抑何指也？如援景府，則自景府而前，莊田並未出數千頃外，獨景府踰制。皇祖一時失聽，至今追咎，王柰何尤而效之？自古開國承家，必循理安分爲可久。鄭莊愛太叔段，爲請大邑，漢竇后愛梁孝王，封以大國，皆及身而敗。臣不勝忠愛之念，不得不明言之。六月己丑，錦

衣衛百戶王日乾訐奏奸人孔學與皇貴妃宮中內侍姜龐劉諸人請妖人王子詔詛呪皇太子刊木像聖母皇上釘其目又約趙思聖在東宮侍衛帶刀行刺語多涉鄭貴妃福王葉向高語通政使其參疏與日乾奏同上之向高密揭日乾孔學皆京師無賴壽張至此此大類往年妖書但妖書匿名難詰今兩造俱在法司其情立見皇上第靜俟勿爲所動動則滋擾上初覽日乾疏震怒及見揭意解遂不問東宮遣取閣揭向高曰皇上既不問則殿下亦無庸更覽太子深然之尋御史以他事參日乾下之獄踰年而挺擊之獄興詳三案

四十二年三月丙子福王常洵之國

四十三年二月南京御史汪有功言福府內侍李進忠擅祭告孝陵不報秋七月太常寺少卿史孟麟

請冊立皇太孫謫兩淮鹽運判官

四十四年八月壬寅皇太子出閣講學蓋曠期十二年

四十八年夏四月皇后王氏崩后賢而多病國本之論起上堅操立嫡不立長之語羣疑上意在后病不可知貴妃即可爲國母舉朝皇皇及上年高后以賢見重而東宮益安至是崩中宮虛位數月貴妃竟不進位上不豫石諭德張鼎上言皇上起居靜攝皇太子執禮之暇時親左右皇長孫少成之氣娛樂庭除旣足寬懷亦稱聚順臣竊見士民之家或慈母見背嚴父孤單惟兒孫繞膝可開眉宇雖天子不同民間而骨肉應無二理七月時上寢疾久皇太子希得召見御史左光斗等詣方從哲請候安從哲曰上諱疾卽入門左右不敢傳兵科給事中楊漣曰昔宋文潞公問仁宗疾內侍不肯言潞公曰天子起居汝

曹不令宰相知。將無他志。下中書省行法。今誠日三問。不必見。亦不必上知。第令內臣知。大臣在門。且公當宿閣中。從哲曰。非故事。曰。潞公不訶史志。驄乎。此何時。尚問故事。二十一日丙申。上疾大漸。召輔臣。方從哲等入宏德殿。尋出。日已旰。皇太子尚徬徨寢門外。不得入。漣光斗遣人語東宮內侍王安曰。上疾甚。不召太子。非上意。太子當力請入侍。以備非常。卽夜毋輕出。安故守正。力擁佑太子。卽日上崩。遺命封貴妃鄭氏爲皇后。

泰昌元年。卽萬歷四十八年也。八月。光宗旣踐祚。遵遺命封皇貴妃。命禮部查例行。尚書孫如游爭之。曰。祖宗朝。其以配而后者。乃敵體之經。其以妃而后者。則從子之義。故累朝非無抱衾之愛。終引割席之嫌者。則以例所不載也。皇貴妃事先帝有年。不聞倡議於生前。而願遺詔於逝後。豈先帝彌留之際。遂不及致詳耶。且王貴妃誕育殿下。豈非先帝所留意者。乃恩典尙爾有待。而欲令不屬毛離裏者。得子其母。恐九原亦不無怨恫也。鄭貴妃賢而習於禮。處以非分。必非其心之所樂。書之史冊。傳之後季。將爲盛代典禮之累。且昭先帝之失言。非所以爲孝也。中庸稱達孝爲善繼。善述義可行。則以遵命爲孝。義不可行。則以遵禮爲孝。臣不敢奉命從之。

谷應泰曰。光宗本恭妃所產。神皇之元子也。恭妃無寵。擅寵者貴妃耳。乃自萬歷十四年。輔臣申時行以建儲爲請。至二十九年。而儲位始定。自古父子之間。未有受命若斯之難也。語云。貴夫人愛孺子。又云。母愛者子抱。其時枯菀之勢旣形。金玦之寒斯劇。羽翼孝惠者少。樹功舒王者多。而青宮一席。尙忍言哉。乃首以爭國本獲譴者。禮垣羅大紘。中書黃正賓也。又給事李獻可。尙書李長春輩。或杖或戍。一鳴輒斥。甚

至九臣面詰。政府十四官同時降削。而神宗動加激擾之名。冀箝天下之口。不特不欲建儲也。因儲禮之不舉。而昏冠愆期。曠不豫教。其後乃令三王竝封。又欲二王竝講。女戎伏妖。蓋若是其忍乎。夫易稱長子主器。記美一人元良。重光重潤。自古榮之。而神宗乃以正天倫之語爲不入目之言。深相怨毒。酷罰示威。則有物以蔽之也。究之前星之耀漸朗。摘瓜之謀不行。論者以諸臣靜聽。則蚤且觀成。予則以諸臣力爭。故久而克定也。方鄭妃盛年。神宗固嘗許以立愛矣。而言者紛紜。格不得發。始則譴諍。臣以快宮闈。終亦未必不援朝論以謝嬖倖。始則欲以神器之重。籌晏私之愛。究亦不能以房闈之曠。廢天下之公。如是則王家屏之封還御批。李騰芳之上書執政。斷當以口舌爭之者也。已而妖術反間。詛呪橫行。緹校勾攝。紛然四出。與漢治巫蠱何異。嗚呼。王之禎猶江充也。四明猶公孫賀也。卽不株累東宮。而含沙射人。甯有幸乎。幸生光誣服。得弛羅織。設事更蔓延。魚網之設。鴻則離之。都人士甯得安枕臥耶。比太子旣建。而禁不出閣者。又十二年至。史孟麟請冊皇太孫。猶加降謫焉。蓋神宗怒未息已。

卷六十八

三案

神宗萬曆四十三年五月己酉。有不知姓名男子。持棗木棍。撞入慈慶宮。打傷守門內官李鑑。直至前殿簷下。內官韓本用等執縛。付東華門守衛指揮朱雄等收之。次日。皇太子奏聞。命法司提問。庚戌。巡視皇城御史劉廷元奏人犯供名張差。係蘇州井兒峪民。語言顛倒。形似風狂。臣再三考訊。本犯呶呶稱喫齋。

討封等語。話非情實。詞無倫次。按其迹若涉風魔。稽其貌的係黠猾。情境叵測。不可不詳鞫重擬者。乙卯。刑部郎中胡士相、岳駿聲等審張差。供被李目強、李萬倉燒差柴草。氣憤於四月內來京。要赴朝聲冤。從東進。不識門徑。往西走。適路遇男子二人。給曰。爾無憑據。如何進。爾拏槓子一條來。便可當作冤狀等語。差日夜氣忿。失志顛狂。遂於五月初四日。手拏棗木棍一條。仍復進城。從東華門。直至慈慶宮門首。打傷守門官。走入前殿下。被擒。擬依宮殿前射箭放彈。投甄石傷人律。斬決不待時。戊午。刑部提牢主事王之案言。本月十一日。散飯獄中。未至新犯張差。見其年壯力強。非風顛人。初招告狀。著死。撞進。復招打死罷。臣問實招與飯。不招當饑死。卽置飯差前。差見飯低頭。已而云。不敢說。臣乃麾吏書令去。止留二役扶問之。招稱張差。小名張五兒。父張義。病故。有馬三舅。李外父。叫我跟。不知姓名。老公說事成。與爾幾畝地。種老公騎馬。小的跟走。初三歇燕角鋪。初四到京。問何人收留。復云。到不知街道大宅子。一老公與我飯。說你先衝一遭。撞著一箇。打殺一箇。打殺了。我們救得你。遂與我棗棍。領我由厚載門進。到宮門上。守門阻我。我擊之墮地。已而老公多。遂被縛。小爺福大。又招有柏木棍、琉璃棍。棍多人衆等情。其各犯名。至死不招。臣看此犯不顛不狂。有心有膽。懼之以刑罰。不招。要之以神明。不招。啜之以飲食。始欲默欲語。中多疑似。願皇上縛兇犯於文華殿前朝審。或敕九卿科道三法司會問。則其情立見矣。辛酉。戶部郎中陸大受言。青宮何地。男子何人。而橫肆手棍。幾驚儲蹕。此乾坤何等時耶。北人好利輕生。有金錢以結其心。則輕爲人死。至大奸之奔走死士也。或出其技之庸庸者。姑試之於死地。以探其機。而後繼之以驍桀。用其死力於忽不經意之處。有臣子所不忍言者。張差業招一內官。何以不言其名。明說一街道。何以不知其處。

彼三老三太互爲表裏。而霸州武舉高順甯等今竟匿於何所。變豈無因。警甚非小。乞皇上大振乾綱。務在首惡必得。邪謀永銷。明肆凶人於朝市。以謝天下。疏中有奸戚二字。上惡之。與之案疏俱不報。御史過庭訓爲移文蘇州蹤跡之。知州戚延齡具言其致顛始末。諸臣據爲口實。以風顛二字定爲鐵案矣。乙丑。刑部司官胡士相、陸夢龍、鄒紹光、曾曰唯、趙會楨、勞永嘉、王之案、吳養源、曾之可、柯文、羅光鼎、曾道唯、劉繼禮、吳孟登、岳駿聲、唐嗣美、馬德澧、朱瑞鳳等再審張差。供稱馬三舅名三道。李外父名守才。同在井兒峪居住。又有姐夫孔道住本州城內。不知姓名。老公乃修鐵瓦殿之龐保。不知街道大宅子。乃住朝外大宅之劉成。三舅外父常往龐保處送灰。龐劉在玉皇殿商量。和我三舅外父逼著我來說。打上宮中。撞一箇打一箇。打小爺喫也。有著也。劉成跟我來領進去。又說你打了。我救得你。又有三舅送紅票封我爲真人等語。刑部行蘇州道提解馬三道等。疏請法司提龐保。劉成對鞠。給事中何士晉上言。頃者張差持挺突入慈慶宮。事關宗社安危。皇上宜何如震怒。三事大臣宜何如計安。乃旬日以來。似猶泄泄。豈刑部主事王之案一疏。果無故而發大難之端耶。雖事涉宮闈。百宜慎重。然謀未成。機未露。猶可從容曲處。今形見勢逼。業已至此。所謂亂臣賊子。人人得而誅之。明主可與忠言。此事甯無結局。疏留中。閣臣促之上諭曰。朕自聖母升遐。奉襄大典。追思慈恩罔極。哀慕不勝。方在靜攝中。突有風顛奸徒張差。持挺闖入青宮。震驚皇太子。致朕驚懼。身心不安。朕思太子乃國根本。豈不深愛。已傳內宮添人守門關防。不時衛護。連日覽卿等所奏。姦宄叵測。行徑隱微。既有主使之。人卽著三法司會同擬罪具奏。是日刑部據戚知州回文以上。壬申。上再諭法司嚴刑鞠審。速正典刑。時語多涉戚臣鄭國泰。國泰出揭目白。給事中何士晉



復奏。陸大受疏內雖有身犯奸畹兇鋒等語。特借此發端。以明杞憂之果驗。而語及張差。原止欲追究內官姓名。大宅下落。並未直指國泰主謀。此時張差之口供未具。刑曹之勘疏未成。國泰豈不能從容少待。輒爾具揭張皇。人遂不能無疑。若欲釋疑。計惟明告宮中。力求皇上速將張差所供龐保、劉成立送法司考訊。如供有國泰主謀。是大逆罪人。臣等執法討賊。不但宮中不能庇。卽皇上亦不能庇。設與國泰無干。臣請與國泰約。命國泰自具一疏。告之皇上。嗣後凡皇太子、皇長孫一切起居。俱係鄭國泰保護。稍有疏虞。卽便坐罪。則人心帖服。永無他言。若今日畏各犯招舉。一惟熒惑聖聰。久稽廷訊。或潛散黨與。使遠遁。或陰斃張差。使口滅。則疑復生。疑將成實事。惟有審處以消後禍。不報癸酉。駕幸慈甯宮。召見百官。從御史劉光復請也。輔臣方從哲、吳道南暨文武諸臣先後至。內侍引至聖母靈次。行一拜三叩頭禮。時上西向。倚左門柱。設低座。俯石欄。百官復至御前。叩頭。上連呼曰。前來。羣臣稍膝而前。去御座不數武。上練冠練袍。皇太子冠翼善元冠。素袍侍御座右。三皇孫鴈行立左階下。上宣諭曰。朕自聖母升遐。哀痛無已。今春以來。足膝無力。然每過節。次朔望忌辰。必身到慈甯宮聖母座前行禮。不敢懈怠。昨忽有風癩。張差闖入東宮傷人。外庭有許多閒說。爾等誰無父子。乃欲離開我耶。適見刑部郎中趙會楨所問招情。止將本內有名人犯張差、龐保、劉成卽時凌遲處死。其餘不許波及無辜一人。以傷天和。以驚聖母神位。尋執東宮手示羣臣曰。此兒極孝。我極愛惜。御史劉光復跪於班後。大言曰。皇上甚慈愛。皇太子甚仁孝。其意固將順也。上不甚悉。詰問爲誰。中使以御史劉光復對。光復猶大言不止。上斥之。至再。光復不聞。仍申前說。上色頓改。連呼錦衣何在者三。無應者。遂令中涓縛之。梃杖交下。上戒無亂毆。但押令朝房候旨。方從哲

等叩頭言小臣無知妄言。望霽天威。怒稍解。乃以手約皇太子體曰。彼從六尺孤養至今。成丈夫矣。使我有別意。何不於彼時更置。今又何疑。且福王既已至國。去此數千里。自非宣召。彼能飛至乎。因命內侍傳呼三皇孫至石級上。命諸臣熟視。諭曰。朕諸孫俱已長成。更有何說。顧問皇太子爾有何語。與諸臣悉言無隱。皇太子曰。似此風癩之人。決了便罷。不必株連。又曰。我父子何等親愛。外廷有許多議論。爾輩爲無君之臣。使我爲不孝之子。上因謂羣臣曰。爾等聽皇太子語否。又述東宮言。連聲重申之。羣臣跪聽未起。上屢顧問者。令續到官。皆放進無阻。以故後來者踵趾相錯。班行稍右。與帝座遠。上又持皇太子面向右。問曰。爾等俱見否。衆俯伏謝。乃命諸臣同出。甲戌。決張差於市。乙亥。上命司禮監曾九卿三法司於文華門前鞠審龐保、劉成。保原名鄭進。成原名劉登雲。其與差飯及木棍引進等語。俱轉展不招。方審問。東宮傳諭曰。張差持棍闖宮。至大殿簷下。當時就擒。竝無別物。其情實係風癩。誤入宮闈。打倒內寺。罪所不赦。後招出龐保、劉成。本宮反覆參詳。保成身係內宮。雖欲謀害本宮。於保成何益。此必保成素曾凌虐於差。故肆行報覆之謀。誣以主使。本宮念人命至重。造逆大事。何可輕信。連日奏求父皇。速決張差。以安人心。其誣舉龐保、劉成。若一概治罪。恐傷天和。况姓名不同。當以讐誣干連。從輕擬罪。奏請定奪。則刑獄平。本宮陰隲亦全矣。六月戊子。刑部審馬三道、李守才、孔道。以左道從律論。應流。李自強、李萬倉。應笞。從之。尋斃龐保、劉成於內庭。王之案爲科臣徐紹吉、臺臣韓浚所糾。部處閑住。中旨特黜爲民。補何士晉於外。著刑部重擬劉光復罪。奪刑部侍郎張問達俸。既而釋光復於獄。

熹宗天啓元年閏二月。御史魏光縉上言。父母之仇不共戴天。忠臣事君。有死無二。先皇帝以長君當主。

何嫌何疑。而無端燕啄王孫。瓜抱空蔓。奸人構煽。每思爲所欲爲。海內正人君子。一有指斥。輒以東林。淮上爲阱。驅除旣盡。釀禍遂烈。並封妖書之事。張差挺擊之謀。九廟有靈。旋即撲滅。而招據黃花山。圍聚之。逆謀三十六都頭。內外多人之布列。棗木柏木棍之兇器。打死小爺之逆詞。洞心駭目。此時稍有人心。謂宜請劍殺賊。乃諸臣精神不用。以護青宮。而偏用之以庇奸黨。不用之以伸法令。而偏用之以難問官。首捏風癩。以爲張本。司官望風承旨。曲意偏護。改黨內爲教內。都頭爲香頭。許地三十五畝。已載入招。又復割去。致張差以首搶地。謂同謀做事。事敗獨死。竟付之不問也。主事王之案。懼爲赤族之誅。明言入告。而諸奸恨不附己。巧借察典。追奪誥命。主事李俸。聲言處分。勒令致仕。郎中陸大受。張廷上疏告變。張廷卒以憂死。而大受又以大計黜去。嗟嗟。逆君者有罪。發奸者何罪。借風癩漏獄詞者有罪。抒公憤捐身命者何罪。是非不兩立之案。非則張差是矣。之案當罪。則張差當賞矣。况此一事也。拏賊奏聞者先帝。請下法司者先帝。皇祖曾不以先帝之請爲非。而爲之決張差。殲奸監。凡十年不御之朝堂。一旦召見羣臣。面行撫慰。然則皇祖之於此事。亦曉然明白。特諸臣以風癩二字無所歸著。故甯寬賊徒而罪之案耳。聖明在御。恩及林藪。建言受杖之人。先後光明。而三臣去國孤蹤。不蒙昭雪。此忠臣義士所以感憤而不平也。伏乞皇上立賜擢用。以爲忘身殉國之勸。若傍撓有人。終從禁錮。亦須明白此案於天地間。使人知三臣心事。亦曾有人議之者。卽三臣終老巖穴無恨。若區區一官。三臣自誓之日。業已棄擲。而今日乃欲以腐鼠嚇之乎。嗟嗟。之案本無罪。而諸臣強名之曰罪。楊漣本無功。而諸臣強名之曰功。有罪者去。有功者亦去。則爲今之臣。必當何如而後可乎。臣願與天下萬世共質之。上可其奏。

二年二月，刑部主事王之竊上言：乙卯之變，先帝安危在於呼吸，鄭國泰私結劉廷元、劉光復、姚宗文等，無復忌憚，遂欲睥睨神器，化家爲國，國泰雖死，法應開棺斷尸，僇其族，赅其宮，以爲人臣大逆不道之戒。總之用藥之方，卽通問之術，通問之術，卽挺擊之謀。向使張差事發，窮究根株，今日之盧受、崔文昇敢復爾哉！長安公論有曰：風癩二字欲抹殺亂臣賊子，就廷元評廷元也，奇貨無功四字欲抹殺忠臣義士，就光復評光復也。擊不中而假之謀，勢緩而促之藥，是昇之藥慘於差之棍，是受之書烈於哲之書也。張差之前從無張差，劉成之後豈無劉成，亂賊接踵而皇上孤立於朝矣。又言郎中胡士相等主風癩者也，堂官張問達調停風癩者也，寺臣王士昌疏忠而心佞，評無隻字，頌多溢詞，堂官張問達語轉而意圓，先允風癩，後寬奸宄，勞永加、岳駿聲等同惡相濟，張差招有三十六頭兒，則胡士相關筆，招有東邊一起幹事，則岳駿聲言波及無辜，招有紅封票高真人，則勞永加言不及究紅封教，今高一奎見監薊州，係鎮朔衛人，蓋高一奎主持紅封教者也，馬三遺營給紅票者也，龐保、劉成供給紅封教，多人撒棍者也，諸奸亦有人心者，以堂官對衆手單而改之，以十八人會審公單而增減之，大逆不道，非止大不敬也。疏入，上不問。五月，御史馬逢皋、給事中張鵬雲交章劾劉廷元，吏部尙書張問達覆奏，廷元倡論保奸，降調。五年春正月，御史楊維垣劾張差一案，王之竊倖功躡躡，誣皇祖，負先帝，不惟無功，抑且有罪。又曰：從來君臣父子之間，聞以理喻，未聞以勢激也。投鼠者旣不忌器，則騎虎者豈復擇音。彼中夜之泣，何求不獲。是先帝之危不危於張差之一挺，而危於之竊之一激也。卽碎之竊之骨，豈足贖哉。疏入，削之。案籍。五月，原任刑部郎中岳駿聲復申挺擊始末，疏入，起用王之竊。案逮訊追贓之竊，竟以重譴死。

夏允彝曰。梃擊之事。王之案所詢張差。其言甚悉。刑部各司官會鞫。時亦多相合。訊是舉朝喧然。以爲國戚有專諸之意。貴妃亦危懼。訴於上。上命自白之。太子貴妃見太子。辨甚力。貴妃拜。太子亦拜。且拜且泣。上亦掩泣。爲斃二璫以解。而攻東林者言。上於貴妃盛時。曾許以立愛。晚而媿言之不符也。因勸貴妃廣修佛事。且助其費。上發銀十萬建祠。二璫以爲甄瓦甚多。不若置窖自造。利甚奢。居民多鬻薪於璫者。張差賣田買薪。亦往市於璫。土人忌之。焚其薪。差訟土人於璫。璫復嚴責差。差以產破薪焚。訟又不勝。憤憤持梃入宮。欲告御狀。不意闖入東宮。事亦不可知。然東宮雖侍衛蕭條。何至使外人闖入。諸臣危言之。使東宮免意外之虞。國戚懷惕若之慮。斷斷不可少。顧事關宮禁。勢難結案。若必誅外戚。廢親藩。度能得之於神宗乎。從古有明行之法。有必不可明行之法。則田叔燒梁獄詞。亦調停不得已之術。何者。光宗固無恙。尚可以全骨肉也。乃彼劉廷元、韓浚輩。必斥逐執法者而後已。是何心與。

神宗萬曆四十八年八月丙午朔。光宗踐祚。先是七月。光宗遵遺命。封皇貴妃鄭氏爲皇后。命禮部查例。鄭貴妃進美女四人。乙卯。上不豫。召醫官陳璽等診視。丁巳。上力疾御門視事。聖容頓減。己未。內醫崔文昇下通利藥。上一晝夜。三四十起。支離牀褥。閒辛酉。上不視朝。輔臣方從哲等赴宮門候安。有數夜不得睡。日食粥不滿盂。頭目眩暈。身體疲軟。不能動履之旨。乙丑。鄭養性請收還皇貴妃封后成命。允之。刑部主事孫朝肅、徐儀世、御史鄭宗周上書。方從哲責以用藥乖方之故。給事中楊漣上言。賊臣崔文昇不知醫。不宜以宗社神人託重之。身妄爲嘗試。如其知醫。則醫家有餘者泄之。不足者補之。皇上哀毀之餘。一日萬幾。於法正宜清補。文昇反投相代之劑。然則流言籍籍。所謂興居之無節。侍御之蠱惑。必文昇藉口。

以蓋其誤藥之奸。冀掩外庭攻摘也。如文昇者，既益聖躬之疾，又損聖明之名。文昇之肉，其足食乎。臣聞文昇調護府第有年，不聞用藥，謬誤皇上一用文昇，倒置若此，有心之誤耶。無心之誤耶。有心則蠶粉不足償，無心則一誤豈可再誤。皇上柰何置賊臣肘腋閒哉。丁卯，傳錦衣官宣兵科楊漣，并召輔臣方從哲、劉一璟、韓爌、英國公張維賢、尚書周嘉謨、李汝華、孫如游、黃嘉善、黃克纘、都御史張問達、給事中范濟世、御史顧慥等。時廷臣疑上且杖漣，既入，上目視漣久之，各諭以國家事重，卿等盡心。朕自加意調理，辛未再召見羣臣於乾清宮。上御東煖閣，倚榻憑几，皇長子侍立。上命諸臣前，漣諭曰：「朕見卿等甚喜，從哲等請皇長子移宮。」上曰：「令他別處去不得，情慎醫藥。」上曰：「十餘日不進矣，久之又諭册封李選侍，諸臣退。二十九日甲戌，上再召諸臣等於乾清宮，仍諭册立皇貴妃。從哲等以册儲原旨期宜改近，蚤竣吉典，以慰聖懷。」上因顧皇太子諭曰：「卿等輔佐爲堯舜。」又語及壽宮，輔臣以皇考山陵對，則自指曰：「是朕壽宮。」輔臣言聖壽無疆，何遽及此。上仍諭要緊者再。因問有鴻臚寺官進藥何在，從哲奏鴻臚寺丞李可灼自云仙丹。臣等未敢輕信，上卽命中使宣可灼至診視，具言病源及治法。上喜，命趨和藥進。上飲湯輒喘，藥進乃受。上喜稱忠臣者再。諸臣出宮門外，埃少頃，中使傳聖體用藥後煖潤舒暢，思進飲膳。諸臣歡躍而退，可灼及御醫各官留。時日已午，比未申，可灼出，輔臣迎訊之。可灼具言上恐藥力竭，復進一丸，亟問復何狀。可灼以如前對。五鼓內，宣急召諸臣趨進，而龍馭以卯刻上賓矣。時九月乙亥朔也。中外藉藉，以李可灼誤下劫劑，恐有情弊。而方從哲擬旨賞可灼銀五十兩，御史王安舜首爭之，疏曰：「醫不三世，不服其藥，先帝之脈，雄壯浮大，此三焦火動，面唇赤紫，滿面火升，食粥煩燥，此滿腹火結，宜清不宜助明矣。紅鉛乃婦

人經水。陰中之陽。純火之精也。而以投於虛火燥熱之疹。幾何不速之逝乎。然醫有不精。猶可藉口。臣獨恨其膽之大也。以中外危疑之日。而敢以無方無製之藥。駕言金丹。輕亦當治以庸醫殺人之條。乃蒙殿下頒以賞格。臣謂不過借此一舉。塞外廷之議論也。夫輕用藥之罪。固大而輕薦庸醫之罪。亦不小。不知其爲謬。猶可言也。以其爲善而薦之。不可言也。疏入。乃改票罰俸一年。而議者益起矣。御史鄭宗周上言。往歲張差之變。操椎禁門。幾釀不測之禍。祇以皇祖優容。未盡厥罪。故文昇尤而效之。臣請寸斬文昇。以謝几廟。臣非謂誅一文昇。遂足以申國憲。而消逆萌。第恐張差之後。因有文昇。今文昇復置不問。奸人得志。何所憚而不爲也。從。哲擬旨。下司禮監。於是御史郭如楚。主事呂維祺。交章論崔文昇。李可灼。壬午。給事中惠世揚。劾奏輔臣方從哲。言鄭貴妃包藏禍心。先帝隱忍而不敢言。封后之舉。滿朝倡義執爭。從哲兩可其間。是徇平日之交通。而忘宗社之隱禍也。無君當誅者一。李選侍原爲鄭氏私人。麗色藏劍。且以因緣近侍之故。欺抗先聖母。從哲獨非人臣乎。及受劉遜。李進忠盜藏美味。夜半密約封妃。不得佔居乾清。是視登極爲兒戲。而天子不如宮嬪也。無君當誅者二。崔文昇輕用剝伐之藥。廷臣交章言之。從哲何心。必加曲庇。律之趙盾。許世子。何辭弑君之罪。無君當誅者三。癸巳。南京太常寺少卿曹珍請究醫藥奸黨。

熹宗天啓元年春正月。御史焦源溥請誅崔文昇。十月丁卯。御史傅宗龍。馬逢皋。李希孔。交章請誅崔文昇。

二年夏四月。光祿少卿高攀龍上言。崔文昇故用泄藥。元氣不可復收。是明以藥弑也。在律故違本方。殺

平人者死。况至尊乎。陛下不卽誅僂。僅止斥逐。今文昇復潛住京師。意欲何爲。往者張差謀逆。實係鄭國。秦主謀。劉保謀逆。實係盧受主謀。受鄭氏人。不可掩也。文昇素爲鄭氏腹心。特當時失刑。不及拷訊。其罪豈在張差劉保下乎。不聽。禮部尙書孫慎行上言。皇考賓天。雖係夙疾。實緣醫人進藥不審。邸報有鴻臚寺官李可灼進紅藥兩丸。乃原任大學士方從哲所進。凡進御藥。太醫院官呈方簡明。恐致失誤。可灼非用藥官也。丸不知何藥物。而乃敢突以進。春秋許世子進藥於父。父卒。世子自傷與弑。不食死。春秋尙不少假借。直書許世子弑君。然則從哲宜何如處焉。速劍自裁。以謝皇考。義之上也。闔門席藁。以待司寇。次也。而乃晏然支辨。至滿朝攻可灼。僅票回籍調理。豈以己實薦灼。恐與同罪。夫己與可灼可愛。而皇考可忍乎。臣謂縱無弑之心。卻有弑之事。欲辭弑之名。難免弑之實。卽忠愛深心。欲爲君父隱諱。不敢不直書云。方從哲連進紅藥兩丸。須臾帝崩。恐百口無能爲天下萬世解矣。且從哲所不能解者。非獨此也。先是則有傳皇貴妃欲立皇后事。夫祖制未有以妃爲后者。亦未有帝崩立后者。貴妃寵幸數十年。皇祖英明。不聞有楚歌楚舞唏噓之態。卽彌留之際。尙不能因緣徼幸。而突傳此旨。觀禮部疏云。輔臣方從哲傳其言可思。若非禮部執爭。諸科道力責。貴戚上章請免。幾何不誤立皇后。貽社稷憂。此從哲不能爲天下萬世解者一也。又有議上尊諡稱恭皇帝。夫宋之恭。端將亡衰主。晉主降宋。隋主降唐。周主降宋。俱爲恭帝。皇祖四十八年平倭。平播。平甯夏。豈無他懿美可稱。而比降王逋裔。若非言官預糾。便應如議。詛咒君國。等於弁髦。此從哲不能爲天下萬世解者二也。又有選侍垂簾聽政事。夫選侍宮中。何知前代有垂簾事。卽劉遜。李進忠。小豎何遂。膽大揚言。言者以爲從哲實教之。從哲卽未肯承。然以顧命元臣。曾不聞慊



慨一言。任婦寺之縱橫。忍冲主之杌隳。此從哲不能爲天下萬世解者三也。以此三事例彼進藥。相臣所宜急擔當之事。一切苟且泄沓。相臣所宜極慎重之事。反覺勇猛直前。春秋無將。漢法不道。真無以過。伏乞皇上大奮乾綱。赫然震怒。毋訪近習。近習其攀援也。毋畏忌諱。忌諱其布置也。如臣言有當。乞將從哲大正肆放之罰。速嚴兩觀之誅。併將李可灼嚴加拷問。置之極刑。如臣言無當。卽以重典治臣。亦所甘受矣。奉旨會議具奏。左都御史鄒元標上言。臣聞乾坤所以不毀者。恃此綱常。而綱常所以植立者。恃此信史。臣舟過南中。諸士縉爭言先帝卒然而崩。大事未明。難以傳信。臣謂先帝无妄之藥。迹或有之。而以誅心之法例之。臣未忍聞。旣入都門。聞諸臣曰。說到先帝大事。令人閣筆。說到壬辰以後諸相事。令人閣筆。誰敢領此。臣益復致疑。近讀孫慎行一疏。令人神骨爲悚。卽未必有是心。當時依違其間。不申討賊之義。反行賞奸之典。無以解人之疑。方從哲秉政七年。未聞輔相何道。但聞一日馬上三書催戰。將祖宗櫛風沐雨一片東方。盡致淪沒。試問誰秉國均。而使先帝震驚。使張差闖宮。使豺狼當道。使宵人亂政。使潛鱗骸浪。將何辭以對。從哲近在肘腋。羣陰密布。臣投林一世。恥言人過。豈敢過求從哲。惟是臣身爲風憲之官。名在會議之列。畏禍緘口。勢所不能。君臣大義。今日不明。再無有明之日。臣官不言。再無有言之人。臣亦知陛下隆禮舊輔。未必能毅然立斷。諸輔同籍同官。未必能捐情立剖。易曰。益之用凶事。凶事政所以益之也。臣讀學士公鼐疏曰。六七年間。以言及東宮者爲小人。不言東宮者爲君子。此何等景象。是誰使之。又云。盡除天下之清流。陰翦元良之羽翼。此真實錄。真使筆也。從來亂臣賊子有所懲戒者。全在青史。臣不知忌諱。爲先帝計。爲陛下萬壽無疆計。爲天下萬世君臣計。爲寒將來奸臣賊子之膽。塞將來奸臣

賊子之謀計。疏入。方從哲上疏辨。自請削奪。投諸四裔。以禦魑魅。時九卿科道會奏久延。給事魏大中速之曰。禮臣孫慎行痛先帝崩殂。討舊輔。方從哲以春秋之法。皇上命諸臣據實回報。何以迄今未奏也。蓋先帝之棄羣臣。在庚申九月之朔日。而率士忠義之驚心者。已在乙卯五月之四日。自前日之槌不中。而圖所以中者百端。至藏醜毒於女謁。俟元精耗損。憊不可支。而蕩以暴下之劑。爍以純火之鉛。先帝彌留而不起矣。然則張差。崔文昇。諸人先帝之賊也。自乙卯以迄庚申。其時執政者誰。討賊者誰。何以迄今未奏也。且非獨不討而已。酬可灼以賞賜。獎可灼以忠愛。寬可灼以罰俸。優可灼以養病。而崔文昇者。代爲委之於先帝之宿疾。至一至再。夫以數十年忠肝義膽。所羽翼之賢良。數十日深山窮徼。所謳吟之堯舜。一旦戕於二賊之手。從哲不能討。反從而護之。從哲真無人心者。何以迄今未奏也。春秋之法。誅賊必誅。夫賊之所恃。今造意者何所恃。黨賊者何所恃。恃從哲也。不必紅鉛之進出。從哲之意。而從哲已爲罪之魁也。何以迄今未奏也。李可灼之藥不合。崔文昇不備。崔文昇之逆不遡。張差不明。鄭國泰。鄭養性。方從哲之罪不參之三案不定。不悉崔文昇之情。罪不下張差。而李可灼次之。如是而朝廷所以處從哲。與從哲之所以自處者。可以權衡其間矣。何以迄今未奏也。時先後彈者。主事王之案。劉宗周。給事中周希令。彭汝南。傅櫬。御史吳牲。薛文周。沈應時。方有度。安伸。溫皋謨。江日彩。張慎言。會議駁正者。尚書王紀。汪應蛟。王永光。侍郎楊東明。陳大道。李宗延。張經世。陳邦瞻。太僕卿蕭近高。張五典。少卿申用懋。于倫。李之藻。歸子顧。劉策。孫居相。周起元。田生金。柯昶。滿朝薦。熊明遇。黃龍光。太常少卿高

攀龍、給事中劉宏化、霍守典、御史蔣允儀、劉徽、李元等。於是吏部尚書張問、達會戶部尚書汪應蛟等公奏略曰：禮臣孫慎行首論李可灼進紅丸事。可灼先見內閣臣等初未知。至奉皇考宣召於乾清宮。輔臣與臣等乃共言可灼進藥多言不可進。或言可進。俱慎重未敢決。又宣臣等進宮內。跪御榻前。諭臣等輔皇上爲堯舜。隨問寺宮李可灼何在。可灼至。視疾進紅丸。少頃。又進一九。至申。聞聖體服藥後微汗。身覺溫熱就寢。此進藥之始末。臣等所共見聞者。是時輔臣視皇考之疾。急迫倉皇。悽然共切。弑逆二字何忍輕言。但以我皇上之身。可灼輕進嘗試。從哲未能力止。九卿與輔臣并候於宮門內。亦未能力止。諸臣均有罪焉。至於可灼之處分。中外共痛之。憾之。乃臺臣王安舜疏上。力爭先票罰俸。繼票養病去。則失之輕。失之輕。故卽按其輕而罪其不盡法處也。不重處可灼。何以慰皇考。服中外。而正大法。輔臣於辨疏後。自請削奪以釋中外之疑。臣等謂應如輔臣之請。爲法任咎。是亦大臣引罪之道。所宜爾。至於選侍欲垂簾聽政。吏部九卿公疏請移宮。科道專疏請移宮。皇上允其奏。諸臣共快之。然其心猶以輔臣之奏不毅然爲諸臣倡也。倘其時非諸臣共扶大義。乾清何地。令其竊靈威福。又將如我皇上登極還宮何哉。夫李可灼非醫官也。非知脈知醫者也。一旦以紅丸進。希圖非望之福。而龍馭上昇。攀號無及。可灼罪勝誅乎。應卽敕行法司究問。以正刑章。崔文昇當皇考哀感傷寒之時。進大黃涼藥。可灼輕進紅丸。不加詳察。罪又在可灼上矣。法應逮文昇於法司。從重究擬。以三尺除二惡。肅綱紀而洩公憤。庶中外之心可以釋。輔臣之心可以明。議上。李可灼法司究問。崔文昇仍發遣南京。是時與從哲合者刑部尚書黃克纘、詹事公館御史王志道、徐景濂、給事中汪慶百。十月。李可灼遣戍。

五年四月免李可灼戊。十一月尚寶司少卿劉志選劾原任禮部尚書孫慎行倡不嘗藥之說忘疑先帝不得正其終更附不討賊之論輕詆皇上不得正其始并侵及葉向高張問達命宣付史館。

懷宗崇禎元年三月太監崔文昇下獄戊南京初魏忠賢擅權復以文昇督漕運至是敗。

谷應泰曰光宗方諒閣鞠凶哀勞毀瘁而宮中巧相蠱惑更進女尤於是罷免常朝輒脚致疾一月之內玉几再憑梓宮兩哭嗚呼斯亦皇家之不幸也考其時提督御藥房橫加攻泄者內侍崔文昇也洎乎疾漸彌留氣息纔屬而玉腕初調金甌不御者李可灼也然而光宗之疾無文昇或猶可以倖生而卻可灼亦難免於必死者補文昇之調護在初而可灼之援救已劇也善乎吳牲之言曰文昇故投泄藥可灼誤進紅丸故以藥之補泄相較則太黃之剋過於紅鉛而以事之早晚相衡則文昇之辜浮於可灼此時爲政府者宜援憲宗柳泌之事純皇李致省之獄論坐文昇薄譴可灼伸嗣主之叫號慰域之中哀痛則其法平矣而柰何文昇保全可灼蒙賚掩罪爲功一至此乎夫庸醫殺人律應永錮拙工誤治俗舊老拳何嘗疑其別有主使內叢酖毒而情有所激法不得貸獨柰何宮車晚出銀幣蚤膺崇德報功義於胡有執筆者不學無術甚愚鮮量矣宜諸臣之起而攻之也夫諸臣以攀髯之忠矢批鱗之奏小雅傷時幾於誹怨嬰兒哭母失其常聲過於騷激無足怪者至若以文昇可灼之不慎而卽比之王莽之椒酒梁冀之羹餅則深文周内不無傷於好盡矣語云吾黨兩分其過可也。

光宗泰昌元年八月乙卯上不豫傳諭禮部曰選侍李氏侍朕勤勞皇長子生母薨逝後奉先帝旨委託撫育視如親子厥功懋焉其封爲皇貴妃欽天監擇九月初六日行乙丑主事孫朝肅徐儀世御史鄭宗

周上書輔臣方從哲請册立皇太子且移居慈慶宮庚午上召閣部九卿至榻前諭曰選侍數產不育止存一女隨傳皇長子出見上又言皇五子亦無母亦是選侍撫育傳皇五子出見辛未上召諸臣於乾清宮又諭速封選侍禮臣孫如游奏臣部前奉聖諭上孝端顯皇后孝靖皇太后尊諡加封郭元妃王才人爲皇后皆未告竣宜俟四大禮舉行之後若論儲皇保護功則選侍之封惟恐不蚤卽從該監之請未爲不可上命如前期甲戌上再召諸臣於乾清官仍諭封皇貴妃語未旣選侍披幃立呼皇長子入咄咄語復趨之出皇長子向上曰要封皇后上不語九月乙亥朔上崩給事中楊漣語周嘉謨李汝華曰宗社事大李選侍非可託少主者急宜請見嗣主呼萬歲以定危疑隨擁出宮移住慈慶爲是二臣然之以語方從哲漣遂先諸臣排闥入闈豎梃亂下漣厲聲曰皇帝召我等至此今晏駕嗣主幼小汝等阻門不容入臨意欲何爲闈者卻諸臣乃入哭臨畢請見皇長子皇長子爲選侍阻於媛閣不得出青宮舊侍王安給選侍抱持以出諸臣卽叩頭呼萬歲皇長子曰不敢當羣臣共請詣文華殿王安擁之行閣臣劉一燝掖左勳臣張維賢掖右內侍李進忠傳選侍命召還皇長子者三喝諸臣曰汝輩挾之何往漣叱之共擁皇長子登輿至文華殿皇長子西向坐羣臣禮見畢請卽日登極不允諭初六日卽位復擁入慈慶宮一燝奏曰今乾清宮未淨殿下請暫居此嘉謨曰今日殿下之身是社稷神人託重之身不可輕易卽詣乾清宮哭臨須臣等到乃發皇長子首肯漣語中官曰外事緩急在諸大臣調護聖躬在諸內臣責有所歸王安等踴躍稱諾諸臣退諸臣有議卽日正位者令中官再傳不允衆皆朝服待命少卿徐養量御史左光斗唾漣不宜阻今日卽位漣恐語錦衣帥駱思恭嚴緹騎內外防護內子尙書周嘉謨等合疏請選侍移

宮。左光斗上言內廷之有乾清宮。猶外廷之有宮極殿也。惟皇上御天居之。惟皇后配天得共居之。其餘嬪妃雖以次進御。遇有大故。卽當移置別殿。非但避嫌。亦以別尊卑也。今大行皇帝賓天。選侍旣非嫡母。又非生母。儼然居正宮。而殿下乃居慈慶。不得守几筵。行大禮。名分倒置。臣竊惑之。且殿下春秋十六齡矣。內輔以忠直老成。外輔以公孤卿貳。何慮乏人。尙須乳哺而襁負之哉。卽貴妃之請。許於先皇。彌留之際。其意可知。且行於先皇。則俯錫之名。猶可行於殿下。則尊聞之稱。有斷斷不可者。倘及今不蚤斷。借撫養之名。行專制之實。武后之禍。將見於今。上諭移宮已有旨。冊封事旣云尊卑難稱。著禮部再議。給事中暴謙貞抄參曰。大寶將登。上有百靈呵護。下有羣工擁戴。亦何用此婦人女子爲。且聞選侍非忠誠愛國者。萬一封典得行。事權或假。則滋蔓難圖。慎終慮始。事屬可已。抄出寢之。戊寅。選侍用李進忠。謀邀皇長子同宮。王安忿然。宣言且逮楊。左。楊漣遇進忠於宮門。問選侍移宮何日。進忠搖手曰。李娘娘怒甚。今母子一宮。正欲究左御史武氏之說。漣咤曰。誤矣。幸遇我。皇長子今非昨比。選侍移宮。異日封號自在。且皇長子年長矣。若屬得無懼乎。進忠默然去。科道惠世揚。張潑從東宮門來。駭傳今日選侍垂簾。逮光斗。漣曰。無之。己卯。選侍尙無移宮意。楊漣上言。先帝升遐。人心危疑。咸謂選侍外託保護之名。陰圖專擅之實。故力請殿下暫居慈慶。欲先撥別宮而遷之。然後奉駕還宮。蓋祖宗之宗社爲重。宮幃之恩寵爲輕。此臣等之私願也。今登極已在明日矣。豈有天子偏處東宮之禮。先帝聖明。同符堯舜。徒以鄭貴妃保護爲名。病體之所以沈錮。醫藥之所以亂投。人言籍籍。至今抱痛。安得不爲寒心。此移宮一事。臣言之在。今日殿下行之亦必在。今日閣部大臣從中贊決。毋容泄泄。以負先帝憑几輔殿下之託。亦在。今日。疏上。漣復

往趣方從哲。從哲曰：待初九、十二亦未晚。漣曰：天子無復返東宮理。選侍今不移，亦未有移之日。此不可頃刻緩者。內侍曰：獨不念先帝舊寵乎？漣怒曰：國家事大，豈容姑息！且汝輩何敢如是！聲徹大內。皇長子使人諭漣出。命司禮監按盜藏諸侍，收李進忠、劉遜等。選侍移居仁壽殿。己亥，御史賈繼春上書輔臣曰：天地之大德曰生，聖人之至德曰孝。先帝命諸臣輔皇上爲堯舜，夫堯舜之道，孝弟而已矣。父有愛妾，其子終身敬之不忘。先帝之於鄭貴妃，三十餘年，天下側目之隙，但以篤念皇祖，渙然冰釋，何不輔皇上取法而乃作法於涼？縱云選侍原非淑德，夙有舊恨，此亦婦人女子之常態。先帝彌留之日，親向諸臣諭以選侍產有幼女，歔歔情事，草木感傷，而况我輩臣子乎？伏願閣下委曲調護，令李選侍得終天年。皇幼女不慮意外。辛丑，御史左光斗上言：選侍既移宮之後，自當存大體，捐其小過。若復株連蔓引，使宮闈不安，是與國體不便，亦大非臣等建言初心。伏乞皇上宣召閣部九卿科道面諭，以當日避宮何故。今日調御何方，不得憑中使口傳聖旨。正劉遜、李進忠法。其餘槩從寬政。庶幾燒梁獄之詞者，正以寢淮南之謀，疏入上傳諭內閣。朕幼冲時，選侍氣陵聖母，成疾崩逝，使朕抱終天之恨。皇考病篤，選侍威挾朕躬，傳封皇后。朕心不自安，暫居慈慶。選侍復差李進忠、劉遜等，命每日章奏文書先奏選侍，方與朕覽。朕思祖宗家法甚嚴，從來有此規制否？朕今奉養選侍於嘯鸞宮，仰遵皇考遺愛，無不體悉。其李進忠、田詔等盜庫首犯事干憲典，原非株連，卿可傳示遵行。輔臣方從哲讀諭驚愕，具揭封進。言：皇上既仰體先帝遺愛，不宜暴其過惡，傳之外庭。上再諭發抄。南京御史王允臣糾從哲曰：陛下移宮後發一聖諭，不過如常人表明心迹之意，而宰相輒自封還。司馬昭之心，路人知之。十月丁卯，嘯鸞宮災。上諭選侍皇妹俱無恙。十

一月丁亥。給事中周朝瑞以賈繼春之揭謂其喜樹旌旗。妄生題目。繼春復揭曰。保全選侍。蓋亦人偷天理。布帛菽粟之言。非旌旗題目也。朝瑞揭駁之曰。安選侍者。猶謂之是。安宗社者。顧謂之非乎。繼春再揭曰。主上父子相繼。宗社何嘗不安。而必待傾選侍以安之。卽移宮原是正理。豈必移時驅逐。革其已進儀注之貴妃。困其無端羅織之老父。零丁之皇八妹入井。誰憐孀寡之未亡人。雉經莫訴。朝瑞又揭謂繼春操戈於解忿平爭者。繼春又揭職非操戈乃止戈也。聖德無損。爲臣子者同心爲國。有何不解之忿。不平之爭。而煩左右袒之費詞乎。刑部尙書黃克纘執奏鄭穩山。劉尙禮。姜昇。劉遜四人罪名當從末減。不允。克纘執奏如初。因言父母並尊。事有出於念母之誠。迹似涉於忘父之過。必委曲周旋。使渾然無跡。方爲大孝。因力求罷。十二月乙卯。都給事楊漣疏曰。前選侍移宮一事。護駕諸臣知之外廷未必盡知。及今不一昭明。將以今日之疑端成他時之實事。臣蒙先帝召見。目擊當日情形。敢不一語。憶先帝憑几之言。間及選侍。而再四丁甯。則曰輔皇上要緊。選侍忽從門幔中手挽皇上而入。復推而出。隨有要封皇后之言。諸臣相顧錯愕。夫君臣正相引痛之時。忍於要挾求封。一旦事權在握。豈僅僅虛名足稱其意。此八月二十九日事也。迨九月初一。日子夜。先帝急召諸臣。而龍馭上賓矣。此時主君爲重。宜急於請見。一見卽呼萬歲以慰人心。而宮門內使乃有持挺不容入者。臣冒犯忿詈與爭。此初一日卯刻入宮事也。諸臣哭臨畢。請見皇上於寢門。拜呼萬歲。天語不敢當者三。諸臣捧龍軒至文華殿門。行嵩呼叩頭禮。已而大小臣工共祈皇上卽日登極。上傳諭下期。而諸臣皇皇深以未登極爲危。蓋先帝變出倉卒。上無聖母之憑依。中無皇后之慰藉。在旁窺伺。誰爲可恃。此初一日辰刻事也。爾時諸臣議皇上宜歸何宮。臣思選侍



推挽景象。又習聞其上有深相交結之貴寵。乃云從來冲齡天子不宜託之素無恩德之婦人。且選侍如可託。皇上必深知之。雖強之離而不得。如不可託。雖強之留而亦不可得。而聖駕果徑歸慈慶宮矣。此初一日已刻事也。御極卜期初六。至初二日。九卿科道有移宮之請。御史左光斗有移宮之請。蓋因皇上一正九五。斷無避宮。而又不可同居。至初五日期且迫矣。臣是以有正位參及李進忠等之疏。總以宮嬪自有定分。卽加恩選侍。原不在宮之移與不移。假令登極之後。而宮嬪悍然居天子之宮。天子歸青宮。非理歸乾清。不得尙得朝廷尊而體統正乎。此初五日午刻。臣從諸臣於慈慶宮前憤爭事也。至本日移宮。臣卽語諸大臣。移宮自移宮。隆禮自隆禮。必兩者相濟而後。二祖列宗之大寶始安。先帝在天之靈始安。卽本日緝獲罪璫。只宜殲厥渠魁。無滋蔓引。大抵宸居未淨。先帝之社稷付託爲重。則平日之寵愛爲輕。及其宸居已定。旣盡臣子防危之忠。卽當體皇上如天之度。今諸大臣猶在耳也。臣之所以議移宮者。始終如此。乃移宮之後。忽來蜚語。有倡選侍徒跳踉欲自裁處。皇妹失所。至於投井者。或傳治罪璫過甚者。或稱內外交通者。使夙夜憂時之士。誤收爲一時感慨嘆息之言。作此日不白之案。九廟神靈鑒此熱血。若夫緝拏罪璫。此譬如人家主人謝世。羣僕乘間竊去帑藏。主人之子偶一究問。只在司法得其平耳。於選侍恩禮何與。臣謂甯可使今日惜選侍。無使移宮不早。不幸而成女后垂簾之事。彼三十餘年憑依蟠結之羣邪。又得以因緣多事。於以保惜先帝寵愛則得矣。而輔皇上要緊之深意。在天之靈果以此爲愉快耶。况兩奉聖諭。選侍居食恩禮有加。噫。鸞宮火。復奉有選侍皇妹無恙之旨。方知皇上雖念及於孝和。皇太后之哽咽。仍念及於光宗先帝之歎歔。海涵天蓋。盡仁無已。伏乞皇上採臣懇言。更於皇弟皇妹時。

勤召見諭安不妨曲及李選侍者酌加恩數。遵愛先帝之子女當亦聖母所共喜者。疏上下旨褒諭。又特諭廷臣曰。朕冲齡登極。開誠布公。不意外廷。乃有謗語。輕聽盜犯之訛傳。釀成他日之實錄。誠如科臣楊漣所奏者。朕不得不再伸諭以釋羣疑。九月初一日。皇考賓天。諸臣入臨畢。請朝見朕。李選侍阻朕於煖閣。司禮官固請。選侍許而後悔。又使李進忠請回者。至再至三。朕至乾清宮丹陛上。大臣扈從前導。選侍又使李進忠來牽朕衣。卿等親見當時景象安乎危乎。當避宮乎。不當避宮乎。是日朕自慈慶宮至乾清宮。躬視皇考入殮。選侍又阻朕於煖閣。司禮監王體乾固請得出。初二日。朕至乾清宮朝見選侍畢。恭送梓宮於仁智殿。選侍差人傳朕必欲再朝見方回。各官皆所親見。明是威挾朕躬。垂簾聽政之意。朕蒙皇考命依選侍。朕不住彼宮。飲食衣服皆皇祖皇考所賜。每日僅往彼一見。因之懷恨。陵虐不堪。若避宮不蚤。則彼爪牙成列。盈虛在手。朕亦不知如何矣。既毆崩聖母。每使宮眷王壽花等時來探聽。不許朕與聖母舊人通一語。朕苦衷外廷不能盡知。今停封以慰聖母之靈。奉養以尊皇考之意。該部亦可以仰體朕心矣。臣工私於李黨。不顧大義。諭卿等知之。今後毋得植黨背公。自生枝節。時方從哲在告。劉一燝等上言。皇上嗣位以來。宮禁肅清。乃以形跡影響之疑。互相紛辨。致厪聖懷。伏讀聖諭。當年宮掖事情。及頃者辟宮景象。悽惋危衷。宛然在目。諸臣徒以事後論安危。謂周防爲多事。皇上責以猜疑。輕聽誠恐有之。若云庇護黨私。則萬萬不敢也。御史王業浩上言。先帝毓德青宮。止孝止慈。何以一女子之微。致生枝節。如聖諭派與照管。并毆崩聖母等語。天下萬世不察。則先帝御家之盛德。不無少損。且父母之讎。不共戴天。普天率土。俱有同仇之義。而聖諭至此。且曲處如此。則前日之肅清。既未得爲義之盡。今此之優厚。亦不

得爲仁之至。外廷臣工比肩事主。至分目之曰安社稷。安選侍。臣恐水火之情形旣判。玄黃之戰辯方興。奏留中。庚午。都給事楊漣乞歸。疏曰。垂簾之祕事未聞。入井之煩言噴起。臣不過發明移宮始末。使了然在人耳目。而旋荷綸綍之褒。過邀忠直之譽。使臣區區之苦心。反爲夸詡。臣節之左券。臣之不安一也。當時首請御文華殿。受嵩呼者。周嘉謨等也。初出乾清宮。捧皇上左右手者。張維賢、劉一燝也。臣乃以憤爭之故。獨受忠直之名。俯慙卑末。豈可掩人於朝。仰藉清平。豈可貪天爲力。臣之不安二也。宮禁自就肅清。社稷有何惶杌。而聖諭以志安社稷爲言。君幸有子。不憂杞國之天。臣獨何人。敢捧虞淵之日。臣之不安三也。臣引分自思。俯全臣節。惟有決去一著而已。臣蹇窮骯髒之人。披上方之文綺。賚兩朝之賜金。步歸里門。以忠直二字出告親友。入教子孫。眞覺俯仰皆寬。卽不幸先犬馬填溝壑。持此二字以報皇考。於在天。見先人於地下。臣亦可瞑目安寢矣。臣無病。不敢以病請。皇上未罪臣。又不能以罪請。惟有明微薄之心跡。乞浩蕩之恩波。放臣爲急流勇退之人而已。詔許之。

熹宗天啓元年春二月。御史賈繼春直陳具揭之實。奉旨切責。繼春復上言。臣初入班行。當移宮之後。祇因痛切先帝。急欲効忠皇上。及捧讀聖諭。乃知天地之高厚曲爲保全。而小臣之狂愚。猶忘有規勸。謹備錄原揭回話。上以其疏中無雉經入井二語。著再回話。夏四月。吏部尙書周嘉謨及九卿科道會議云。繼春席藁待罪。懇請優容。仍下旨切責。落職永不敘用。

四年夏四月。大理寺少卿范濟世請遵遺命。封李選侍爲妃。下旨切責。先是光宗青宮舊監王安強直不阿。選侍魏忠賢旣矯殺之。乃盡反其所爲。會楊漣上疏發忠賢二十四罪。忠賢益憤。六月。遂矯上命復

議封選侍。禮臣林堯俞奏止之。不聽。竟封李氏爲康妃。十二月。召還御史賈繼春、徐景濂、王志道等。夏允彝曰：庚申一月之內。連遭大喪。中外洶洶。楊漣率衆排闥見東宮。卽羅拜。選侍時在乾清宮。以母禮自待。左光斗遽疏言：乾清宮非至尊不可居。持論自正。但中言武氏之禍。立見於今。差亦過當。楊左卽拉閣。臣揭請卽日移宮。選侍頗覺皇遽。御史賈繼春遂言：先帝至孝。何至一妾一女不能遺庇。亦未可盡言其非。然宮之應移。自屬定禮。楊左不可居以爲功。他人亦何可詆之爲罪也。楊與賈互相譏諷。賈以楊必將與大璫共受封拜。譏之。楊遂掛冠歸。中旨切責賈。賈倉皇自辨。詞頗哀。高宏圖、張慎言出疏兩解之。言至平且確。乃賈終黜爲民。而楊不久優擢至副院。則亦東林失平之事也。後遂以此殺楊左。則冤彌甚。卽賈亦心憐之。總之東林操論不失愛君。而太苛太激。使人難受。攻東林者言風癩。言可灼。無他意。移宮太亟。不失調停。卒以此罪諸賢。而加以一網。不大謬乎。

五年夏四月。給事中霍維華上言。挺擊紅丸移宮三案。略曰：選待之請封也。請封妃也。妃之未封。而况於后。請之不得。而况於自后。不妃不后。而况於垂簾。臣謂宮不難移也。王安等故難之也。難移宮者。所以重選待之罪。而張擁戴之功。神祖册立東宮稍遲。諸臣羣起而爭之。然篤愛震器。始終不渝。倘果如奸邪所稱。廢立巫蠱之謀。則九閭邃密。乃藉一風癩之張差。有是理乎。非神祖先帝慈孝無閒。王之案。陸大受同惡相濟。開釁骨肉矣。神祖升遐。先帝哀毀。遽發夙疾。而悠悠之口。致疑於宮掖。豈臣子所忍言。孫慎行借題紅丸。誣先帝爲受鳩。加從哲以弑逆。鄒元標、鍾羽正從而和之。兩人立名非真。晚節不振。委身門戶。敗壞生平。伏乞嚴諭纂修諸臣。以存信史。已而三朝要典成。起乙卯。止辛酉。魏忠賢矯宸翰弁之。

懷宗崇禎元年五月。侍講倪元璐上言。主梃擊者力護東宮。爭梃擊者計安神祖。主紅丸者仗義之言。爭紅丸者原情之論。主移宮者弭變。幾先爭移宮者持平。事後六者各有其是。不可偏非也。未幾而魏忠賢殺人。則借三案。羣小求富貴。則借三案。故凡推慈歸孝於先皇。正其頌德。稱功於義父。批根今日。則衆正之黨。碑免死他年。卽上公之鐵券。由此而觀。三案者。天下之共議。要典者。魏氏之私書。以臣所見。惟毀之而已。假闖豎之權。役史臣之筆。亙古未聞。當毀一。未易代而有編年。不直書而加論斷。當毀二。矯誣先帝。僞託宸篇。旣不可比。司馬光資治之書。亦不得援宋神宗手序爲例。當毀三。臣謂此書不毀。必有受其累者。則非主三案者之累。而爭三案者之累。又纂修三案者之累也。爭三案諸臣品原三等。如崔呈秀。劉志選。李春暉等。不足問矣。最上如黃克纘。賈繼春。王業浩。高宏圖。劉廷宣等。始處君子。而不必求同。旣遇小人。而自能爲異。本末炳然。然管華之席未割。老韓之傳同編。數人高明之觀。豈不引爲坐塗之辱。若其次者。雖非盡有執持。要亦不皆濡染。而特以史氏抑揚之過。保不爲後人翻駁之端。至於纂修詞臣之在當日。更有難言者。丹鉛未下。斧鑊先懸。姜逢元。閣筆一嘆。朝聞夕逐。楊世英。吳士元。余煌等。備極調維。其於忤璫諸疏。有匿其全文。有刪其已甚。時傳書成。而獄又起。則有甯加醜詆之詞。決不下一不道無將等字。以傳會爰書。凡此苦心。亦多方矣。而事在見聞之外。未易可明。若復彈章一加。萬節俱喪。此臣之所謂累也。顧敕部立將要典。鏤毀一切妖言市語。如舊傳點將之謠。新騰選佛之說。毋形奏牘。則廓然蕩平。上從之。

卷六十九

平奢安

熹宗天啓元年九月，四川永甯宣撫使奢崇明叛。奢氏裸糶種也。洪武中歸附，命爲宣撫司，世守其土。數傳至奢崇周，無子。奢崇明以族人得立，崇明性陰鷲，佯爲恭順。凡有徵調，罔不應命。人漸狎之。子奢寅有逆志，負整保招納亡命。時以邊事急，徵四方兵。崇明遂上疏請提兵三萬赴援，遣其將樊龍、樊虎以兵至重慶。四川巡撫徐可求點核，汰其老弱發餉，餉復弗繼。龍等遂鼓衆反，龍走馬舞槊直刺可求，可求死。遂一擁而上。道臣孫好古、駱日升、李繼周、知府章文炳、同知王世科、熊嗣先、推官王三宅、知縣段高選、總兵黃守魁、王守忠、參將萬金、王登爵等皆死之。原任鞏昌同知董盡倫聞變，帥衆入城殺賊，遇伏死。募兵科臣明時舉、臺臣李達、通判王天運俱負傷踰牆遁。時士兵數千列江岸，城內礮震，城外應之。賊遂據重慶，分兵一扼夔州水口，一踞綦江遵義，一踞瀘州，一截川西棧道，全蜀震動。奢崇明陷遵義，時遵義道臣李仙品、參將萬金督兵援遼，俱赴重慶。城中守備空虛，奢崇明同其子寅帥衆奄至，遵義署府通判袁任先期委城遁。賊乘勢焚劫，納溪、瀘州、江安等城，興文、永川、長甯、榮昌、隆昌、璧山皆空。賊攻合州、江津，知州翁登彥、知縣周禮嘉悉力捍禦，破走之。陷興文，知縣張振德不屈，率妻子赴火死。石碛宣撫司掌印女官秦良玉勤王，秦氏世爲宣撫司。良玉兄秦邦屏、邦翰援遼力戰死，弟秦民屏重傷，突圍出得歸。時藺賊厚遣秦氏求其助，良玉斬使留銀，率所部精兵萬餘，同弟民屏、姪秦翼明等捲甲疾趨，潛度重慶，營於南坪關，扼賊歸路。遣兵夜襲兩河，燒其船，以阻賊汎舟東下。自率大兵沿江而上，水陸竝進。又留兵一千多。

張旗幟。護守忠州等地方。以爲犄角之勢。移文夔州。設兵防瞿塘。爲上下聲援。十月。賊逼成都。時瀘叙諸郡邑瓦解。棹木龍泉諸隘口俱失。賊乘勢向成都。指揮冉世洪、雷安世、瞿英、周邦泰、張愷帥衆拒之。邦泰先至資陽。遇賊不戰降。冉世洪等至龍泉。賊駐兵山上。據高臨下。衆寡不敵。我兵陷陣。世洪、安世、英俱死之。張愷走免。賊兵進薄城下。懸旌僭號。四面夾攻城。內僅有鎮遠營七百人。調到松潘茂州龍安兵一千五百餘人。御史薛敷政、左布政使朱燮元登陴而守。初。燮元方以輯瑞就道。蜀王出國門與百姓遮留之。燮元慷慨自誓。賊薄城。燮元使土司坤汝常乘賊。指揮常恭等火礮助之。賊稍卻。斬賊先鋒一人。次日。賊數千人障革裹竹牌進。矢石不得近。燮元命架七星礮。火箭火輒衝擊之。殺數百人。至暮。賊擁鉤梯數千攀城欲上。燮元戒士卒第放礮。礮石亡譁。遲明。賊積屍陵城下。時冬濠水涸。賊帥降民持篋束薪載濠上。壘如山上。架蓬蓽。形類行屋。以避銃石。伏弩仰射。城中垂簾蔽矢石。燮元夜縋壯士持芻塗膏殺守者。縱火。火舉山墮。賊大阻。燮元又遣人決都江堰水至濠。濠滿。賊乃治橋。得少息。因緝獲城中與賊通者二百人。懸其首陴上。賊又於城四面立望樓。高與城等。燮元曰。賊設瞭望。必四出剽掠。其中虛。遂命死士五百人突出擊之。賊果無備。斬其三將。燒樓而還。當是時。諸道援兵相繼至。十二月二十四日。復安岳縣。二十八日。復樂至縣。與賊戰於倒流鎮。石橋、永清鋪俱有斬獲。各路兵或轉戰得至城下。或潰敗去。秦良玉兵三千亦至。然賊兵亦日益增。無退意。賊圍城八十餘日。歲且盡。城中人伏臘不祭。王正不賀。賊城外日發諸人家墓。城上望見皆泣。會有俘民脫歸者。言賊旦夕須旱船一決勝負。

二年春正月。賊數千自林中大噪而出。視之。有物如舟。高丈許。長五百尺。樓數重。簷簞左右。板如平地。一

人披髮仗劍。上載羽旂。中數百人。各挾機弩毒矢。牛數百頭。運石轂行。旁翼兩雲樓。如左右廣。俯視城中。老幼婦女皆哭。燮元曰。此呂公車也。破之。非駁石不可。駁石者。巨木爲杆柱。置軸柱間。轉索運杆。千鈞之石。飛擊如彈。凡賊舟不得近。燮元復募敢死士。以大礮擊牛。中其當軛者。牛駭返走。乘勢縱擊。敗之。然城中亦力竭矣。裨將劉養鯤言。有諸生范祖文。鄒尉陷賊中。遣孔之譚來約賊將羅乾象。欲自拔效用。燮元卽遣之。譚復往。至則與乾象俱來。燮元方臥戍樓。呼與飲。乾象衷甲佩刀。燮元不之疑。就榻呼同臥。酣寢。達旦。乾象感激。誓以死報。許之。縋而出。後賊營舉動。纖悉無不知者。乾象之力也。踰數日。又使牙將周斯盛詐降。質其來。設伏待之。崇明果自至。甫懸一人上。松潘守兵不知。大噪。崇明走。伏起。獲其從騎數人。崇明跳身免。乃謀遠遁。燮元偵知。造水牌數百面。投錦江順流而下。令有司沈舟斬筏。斷橋梁。嚴兵以待。賊夜半果逸。乾象等內變。賊營四面火起。崇明父子拔營走。乾象等皆來歸。成都圍凡百有二日而解。賊渡瀘歸重慶。事聞。以燮元爲巡撫。三月。羅乾象復江安。四月。官兵復新都。初。奢賊據新都。繕城積粟。爲守計。因克安岳。攻保甯。聲言直取潼關。人心震動。安錦副使劉芬謙。湖廣監軍楊述程。合兵攻之。兵至牛頭鎮。賊以騎數千。步萬人來援。秦良玉。譚大孝等夾擊敗之。遂復新都。賊退入蘭州。復遵義府。時有湄潭叛民王倫。引賊焚掠。湄潭爲川貴險要。都司陳一龍追至水西境。降之。諸軍進駐遵義。時惟重慶尙爲賊巢。五月。諸軍進逼重慶。初。奢崇明父子據瀘。倚樊龍爲聲援。龍盤踞重慶。已九閱月。重慶古渝州地也。三面臨江。春水泛漲。一望瀾漫。不可渡。其出入必經之。要道惟佛圖關。至二郎關一路。賊自通遠門城濠。至二郎關。連營十有七。宿精兵數萬。監軍副使邱志充。楊述程。總兵杜文煥。帥兵進攻之。再戰。幾入其



壘翌日。文煥帥參將楊克順等直抵賊營。石砭宜撫官秦民屏率部兵遠出其後。賊驚敗。遂連復佛圖。二郎二關。殺賊三千餘人。積屍深溝。兩岸俱平。乘勝進逼重慶。二十七日。以計擒賊首樊龍、張彤、何若海等三十一人。遂克之。六月。川師復瀘州。七月。遵義復陷。貴州水西土目安邦彥叛。邦彥安堯臣別枝也。安堯臣冒隴姓。并隴地。受撫得襲兄彊臣世職。堯臣死。妻奢社輝子安位幼。邦彥挾之反。時四十八馬頭與頭目安邦俊、魯連、安若山、陳其愚、陳萬典等蠶起和之。都司楊明廷以三千人敗沒於畢節。參將尹啓易等自烏撒奔回霑益。炎方松林皆不守。平彝衛亦爲賊黨李賢所破。賊圍普安。安南雲南都司李天常帥兵四千救之。賊將羅應奎僞降。誘至疊水鋪。伏發。全軍皆沒。於是交水、曲靖、武定、尋甸、嵩明之間。騷然苦兵矣。賊分遣王倫、石勝、俸下甕安襲偏沅。以斷我軍。倫等楊應龍餘孽也。洪邊土司宋萬化糾苗仲九股據龍里。邦彥自統蜀賊苗仲數萬進圍貴州。自二月初九日薄城下。造雲梯。製滾廂。築墩臺。百計攻城。撫臣李樞按臣史永安悉力禦之。賊沿山紮營。四面路把伏截。以斷城中出入。盡掘環城墳墓。殺掠甚慘。置木柵壘戶牆。鳥雀不能飛渡。鎮將張彥芳將兵二萬赴援。隔龍里不得進。貴州總兵楊愈懋推官郭象儀與賊戰於江門白杵營。死之。安邦彥破烏撒衛。指揮管良相死之。先是水西未叛。良相語李樞曰。奢氏反。安必繼之。黔中無兵餉。猝然有變。計將安出。宜招兵萬人。積二年穀。用許成名將之。以觀其變。樞以力不能止。後良相以祖母病乞假去。泣而曰。烏撒孤城。且與安效良相仇。水西有難。禍必首及。良相隻身無子。願以死報國。乞圖長策。保此一方。樞亦泣。良相去。甫一月而難起。烏撒首被賊破。良相自縊死。巡撫都御史王三善進兵平越。時平越所陳兵止萬餘人。副總兵徐時逢、參將范仲仁不相能。仲仁先

進。遇賊於瓮城河。戰不利。時逢擁兵不救。遂大敗。諸將馮一龍、白自強等殲焉。各處聲援俱絕。貴陽圍益困。城東隅有山岡與城齊。賊踞其上。作廂樓。官兵設計燒之。火三晝夜不絕。城中糧久乏。將士病不能戰。巡按史永安上疏。詆王三善。大聲疾呼。十一月。三善大會將士。議曰。省城不能待矣。外援不至。吾輩死法死敵。等死耳。尙何俟耶。命道臣何天麟督兵七千從清水江進。爲右部。道臣楊世賞督兵萬人從都勻進。爲左部。三善自將二萬與道臣向日升從中路進。當賊鋒。十二月。抵新添。啣枚疾走。二日。進母豬洞。三日。次新安。是夜賊報至。營中驚擾。議退兵。三善曰。退卽齋粉。以死捍之。按兵不動。卒無賊。四日。命劉超爲前部。抵龍頭營。三善以身尾之。相去不二里。聞銃聲。衆股栗欲止。三善曰。前驅當賊。必無退者。吾當爲後勁。遂策馬而前。未一里。劉超捷音至。超兵遇先卻。超下馬斬二人。持刀斷賊一標。賊首阿成驍勇善戰。超與部兵張良俊直前斬其首。賊遂披靡。適大兵至。大呼齊進。奪龍里。賊衆復大集。大戰卻之。五日。住龍里城。衆議去省會不遠。賊必重兵堵截。宜少休息。三善曰。我兵猝至。賊無備。不能持久。急擊之。勿失。六日。遂策馬先進。衆隨之。賊覘者亦知新撫自將。意有數十萬兵至。相顧駭愕。安邦彥給其衆曰。吾當增兵來助。遂遁去。賊相率退屯龍洞。我師奪高寨七里冲。乘勝進兵。畢節鋪。賊步騎如雲。孫元謨將所製木發貢。七門齊發。賊死無算。楊明楷率烏羅兵如牆而進。賊大敗。其渠安邦俊被銃死。棄輜重器械山積。遂乘勝抵會城。撫臣李標。按臣史永安。學臣劉元錫死守者幾十月。旦夕城且陷。忽見賊兵奔潰。如蟻。喊聲雷震。俄頃。五騎衝鋒至城下。云新撫至矣。軍民大悅。慶更生。是時三善同將卒披氈單騎。冒矢石。以二萬人破賊十萬。標等迎入城。三善曰。賊兵不遠。軍心未定。我大帥也。不可卽安。遂營於南門外坡上。大雪。次日。移

營宅溪。賊聞遠遁。陸廣河外。三善遣使諭奢社輝母子縛安邦彥降。不報。越數日。左右兩部兵至。又十日。而楚粵蜀之兵亦至。三善怒其後期。且憂乏食。欲謝遣之。將校皆曰。數千里赴援。不可卻也。三善念衆多。倉儲空虛。欲因糧於敵。又諸軍視賊過易。十二月三十日。前鋒楊明楷率兵渡河。札營三十里外。一軍屯陸廣。向大方奢社輝。一屯鴨池。向安邦彥巢穴。

三年春正月。賊復糾蘭賊與雲南安効良等帥衆數萬。并力攻陸廣。楊明楷奮勇接戰。蒙兵先潰。衆遂亂。溺水死者數千。明楷陷賊中。賊乘勝赴鴨池。我兵退屯威清。三善收兵入城。土司苗仲見我軍不利。復肆劫掠。自龍里至瓮城。屍橫四十餘里。夏四月。川師復遵義。時賊首尤朝柄、楊維新、鄭應顯據遵義。副將秦衍祚、侯良柱督兵二千攻之。誘戰於九接灘。以銃斃其渠採賽。復追敗賊於南城外羅鋼渡。遂克之。賊安鑾帥妻子部衆降。安鑾爲奢寅右臂。監軍道趙邦清密遣黨了相喻、文富招之。鑾心動。願以妾石氏子安在嵩在符國禎營。未敢發。十四日。官兵抵羅付大河口。擊奢寅敗之。鑾見寅敗。乃密約副總兵侯良柱助兵挾取妻子。良柱分遣羅安良進陶公灘。以牽賊。自帥親兵七百人同鑾部兵夜經三寨。抵賊巢。銃礮震天。賊倉卒不知我兵多少。符國禎先走。鑾率妻子及部兵數千自拔來歸。川師復永甯。先是。川撫朱燮元會衆議曰。我之久不得志於賊者。我以分賊以合也。於是列營納谿。陽爲進取。而陰令大兵會長甯首攻麻唐坎、觀音菴、青山厓、天蓬洞等處。乘霧奪險而入。與石砬兵會。進攻永甯。遇賊於土地坎。奢寅親率兵搏戰。我兵奮勇擊敗之。追至老君營。涼傘鋪。盡燒賊營。寅身被二槍。樊虎亦創死。復敗賊於橫山。入甲青崗坪等處。直抵城下。一鼓拔之。生擒周邦泰等。降賊二萬。踰城溺水死者無計。奢崇明父子列營。

江岸上官兵隔水而壘。降者日至。賊復遁。安邦彥知我兵潰。扇誘苗仲糾合逆黨宋萬化等復欲犯貴州。使其黨何中尉據龍里。李阿二督四十八莊兵圍青巖。斷我糧道。宋萬化督洪邊兵苗仲爲左翼。吳楚漢結八姑蕩平八莊苗仲爲右翼。自統水西兵約共犯會城。王三善遣游擊祁繼祖統盧吉兆左世選兵下龍里。一鼓破蓮花堡。連燒上中下三牌賊寨百五十處。何中尉敗逃深箐。龍里路通。遣參將王建中。劉志敏。宋迪。屈朝先等救青巖。斬首三百餘級。王元佐等兵繼進。焚賊寨四十八莊。李阿二中神槍逃歸水西。定番路通。諜報賊方糾八姑蕩洪邊二路兵進犯會城。三善夜遣王建中。祁繼祖等兵一萬五千進勦八姑蕩。焚生寨二百餘處。斬首五百級。窮追渡河。溺死者無算。焚其積聚數萬。賊糧絕。謀遂寢。宋萬化遣人詐降。覘動靜。三善佯許之。而調監軍楊世賞督劉志敏。祁繼祖等捲甲赴之。賊倉皇出戰。遂被擒。并其妻子及僞軍師劉洪祖等。萬化驍勇善戰。邦彥倚之。至是奪氣。四路旣通。秦民屏兵至平越。復還守龍里。諸苗叛者相繼降。三善給黃旗使各豎寨中。邦彥望見之。不敢復出。但於鴨池陸廣諸要路掘坑塹。修補水西。屯兵爲自守計。五月。川兵發永甯。進追奢崇明。連克紅崖。天台二寨。賊數千人迎降。遂安撫紅潦四十八砦。時總兵盧世卿擒僞御史汪澤遠。僞參謀文道南。副將秦翼明。擒僞監軍夏奇雲。僞給事中孔聞過等。并僞印十餘。鎧仗如山。又獲安兵田進忠。云奢賊計窮。將美女黃金降水西借兵。安邦彥遣兵十六七營已過河到獅子山。目把曾仲英領兵六營。尙請赤水河。謀分兵一由鎮雄兵三營乘永甯之後。一由普安入新寨。攻永甯之前。十三日。羅乾象督兵破蘭州。焚其九鳳樓。掃其巢。奢賊狼狽走。雲南六佐縣營長安應龍合霑益賊首補鮓爲亂。圍羅平。巡撫閔洪學攻羅平克之。移兵覆其巢。俘其妻子。應龍逃。

普安復入烏撒。已安効良乞降。責其縛補鮮應龍以誘之。効良縛應龍以獻。水西蘭賊合兵窺遵永時。蘭賊奢崇明、奢寅戰屢敗。窮蹙投水西。安邦彥復助兵合謀。一窺遵義。一窺永甯。官兵合長納兩路敗之。於芝麻塘。賊遁入青山。六月。貴州總兵魯欽等三路進兵。直入賊巢。擒土司何中尉等。進營紅崖。紅崖者天台。水脚。婁石。牛酸草等七囤。素稱天險。官兵未有至者。總兵張彥芳擊賊於羊耳。亦敗之。追至鴨池。河奪其戰象。斬首二百七十餘。七月。大兵戰勝。深入大垣。洪紅烏岡。賊所借烏芸等部。苗望風奔潰。三善按轡直入。大方降者千計。救出田景猷、劉志敏、楊明楷等。奢社輝、安位焚大方老巢。竄火灼堡。安邦彥逃入織金。川兵入龍陣。獲奢崇明妻安氏及奢崇輝、蔡金貴、李廷、王承恩、張尙極等。安位母子遣漢把劉光祚赴鎮遠乞降。總督楊述中許之。授賊黨袁紹等狀。令擒奢寅父子自贖。遣之回巢。紹等至省。羈留未發。而撫按會議亦勒限安位母子縛解。安邦彥奢寅然後請旨治罪。大抵三善以元凶未窮。當用勦爲撫。而述中一意主撫。議遂不合。三善註大方月久。邦彥日夜聚兵自益。令其黨陳其愚詐降。其愚者目把中大猾也。三善輕信之。多與參贊軍務。由是邦彥纖悉盡知。四年春正月。王三善自大方還貴州。陳其愚相繼隨行。忽傳其愚山後遇賊。三善勒馬回視。其愚故縱轡衝三善墮地。三善知有變。將帥印付家人。囑令護持先去。卽抽機中小刀自刎。頸皮已破。其愚下馬奪其刀。獼鬼諸苗蜂擁而至。三善罵賊不屈。賊割其首去。副將秦民屏亦死之。秦佐明、祚明突圍出。賊勢復張。事聞。總督楊述中回籍聽勘。旣而監軍御史傅宗龍獲陳其愚誅之。其愚狡凶多計數。邦彥倚爲耳目。至是伏誅。秋七月。總理魯欽、劉超克巖頭寨。破平茶。乘勝深入。至織金。敗績。

五年春。雲南巡撫閔洪學復霑益。水西、蘭、烏霑三逆合兵數萬。窺霑益。敗走之。四川烏撒土目安効良。水西賊安邦彥。肺腑之親也。其順逆惟水西是視。水、蘭相繼叛。滇撫閔洪學以兵力不繼。羈縻之。令其擒賊自贖。効良亦佯爲恭順。擒安應龍以獻。而所遺獻功之人。領文還。中途被劫。効良又見黔師出陸廣。滇師入霑益。隱然有撫背扼吭之勢。水、烏益成騎虎矣。至是。遂乘截黔之餘。焰南向入滇。合蘭、水、烏霑。安南諸部三十九營。直抵霑益。衆十倍於我。副總兵袁善宣。撫使沙源等。督率將士奮勇血戰。對壘城下者五日。夜。屢出奇兵破走之。

六年春。水西苗老虎阿引等殺賊酋奢寅來降。苗老虎隨侍奢寅有年。著巴乃寅騎引馬卒。李老松乃寅看茶卒。與寅同居聶舌垣上。寅妻在箐林山上。相去二、三里。奢崇明居克仲垣。相距三百餘里。寅子阿甫年七歲。一女嫁芒部。時水西約二月。三路興兵。一攻雲南。一攻遵義。奢寅專攻永甯。寅素性凶淫。附近彝人妻女有姿色者。強姦之。富於財者。勒索其銀。不遂輒死。以此部下多往鎮雄芒部逃生。其麾下人阿引等。故嘗受撫臣朱燮元金錢。令圖寅。與總兵李維新。歃血密謀舉事。寅微覺。縛阿引拷掠之。以利刃穿其左足。一晝夜。阿引至死不承。乃釋之。阿引因勾合苗老虎。李明山等同謀。適奢寅與其下痛飲酣歌。登牀而寢。老虎佯與寅蓋絮。見寅睡方鼾。持刀砍其胸。寅大呼。李明山復助砍。身死。腸出。明山刀折。僞總兵等闖入。苗老虎走。直往箐中擒寅妻。妻已聞變逃矣。賊黨追苗老虎等甚急。至一碗水遇官兵。乃降。二月。安邦彥率衆數萬。渡江與我兵大戰數日。總理魯欽力禦之。抵暮。賊兵益衆。而我兵因數月無餉。乘夜皆潰。魯欽自剄死。賊燒劫麻姑。孫官堡。苗仲復助逆。貴州三十里之外。樵蘇不行。城中大震。巡撫王璠。巡按

傅宗龍先遣王國禎等攻河沙壩。獯鬼盡俘之。廣順、定番、青巖、白納一帶苗蠻爲之奪氣。繼遣張雲鵬逆邦彥於趙官堡。小戰二日。大戰二日。所殺傷者甚衆。水內、水外之賊奔走潰歸。道路復通。總督朱燮元以父喪歸。加偏沅巡撫閔夢得總督。從中調度。控制五省。夏。黔兵攻勻哈。長田一帶諸苗。黔中四面苗仲。而最狡悍者無如勻哈。安邦彥初叛。圍龍里。新添皆藉其衆。至是數出沒劫掠清平。新添地方。餉道爲梗。平越知府會同都司張雲鵬率兵攻擺沙大寨。擺沙居寨之中。距平越百餘里。乘夜由間道掩襲破之。賊遁入箐。其中米積如山。次日搜百里大山。移營牛場箐。保文鸞攻甕岳等寨。復攻都勻城。西南仲賊入路。會兵入箐。各有斬獲。復攻江時、戶西、高平、養古數十寨。斬首二千餘級。掃蕩二百餘里。

七年春。參將楊明輝奉命宣諭安位。令擒獻首惡。爲安邦彥所殺。

懷宗崇禎元年秋九月。詔起朱燮元仍總督貴湖雲川廣五省軍務。

二年夏六月初。大方東倚播北倚蘭。相爲倚角。後播、蘭旣平。賊惟恃烏撒爲援。而畢節爲四裔交通處。先是王三善由貴陽陸廣入大方。陸廣至大方百七十里。皆獯鬼巢窟。前可衝我。後可包我。左右可衝擊我。三善卒以失地利陷。天啓間。燮元建議滇兵出霑益。遏安効。良應援。而別布天生橋。尋甸等以絕其走。蜀兵臨畢節。扼其交通四裔之路。而別出龍場巖。後以奪其險。黔兵由普定渡思臘河。徑趨彥巢。而陸廣鴨池擣其虛。粵西出泗城。分兵策應。然後帥大軍由遵義鼓行而前。尋以憂去。未及用。總督閔夢得繼之。亦以貴州抵大方。路險而賊惟持畢節一路外通。用兵宜從永甯始。自永甯而普市。而摩泥。而赤水。百五十里。皆坦途。赤水有城郭可憑而守。宜結營於此。漸進漸逼。四十里爲白巖。六十里爲層臺。又六十里爲畢

節。畢節至大方不及六十里。賊必併力來禦。須以重兵扼之。斷其四走之路。然後遵義貴陽剋期並進。亦不果用。至是。變元再蒞黔。乃檄滇兵下烏撒。蜀兵出永甯。畢節扼各路要害。而親帥大軍駐陸廣。逼大方。八月。奢崇明號大梁王安邦彥號四裔大長老。歹費小阿烏繼阿鮮怯等各號元帥。悉力趨永甯。先犯赤水。諜知之。變元授意守將許成名佯北誘賊深入。度賊已抵永甯。分遣林兆鼎從三岔入。王國禎從陸廣入。劉養鯤從遵義入。邦彥分兵四應。力不支。羅乾象復以奇兵繞出其背。急擊之。賊大驚潰。崇明邦彥等皆被創。漢兵斬其首獻。變元不欲窮兵。乃移檄安位赦其罪。許其歸附。而位豎子不能自決。其羣下復謀合潰兵拒我。變元乃大會諸將曰。水西多山險叢箐篁蠻烟棘雨。莫辨晝夜。深入難出。以此多敗。當與諸君扼其要害。四面迭攻。漸次蕩除。使賊乏糧。將自斃。於是焚蒙翳。剔巖穴。截溪流。發勁卒。馳騁百餘里。或斬樵牧。或焚積聚。暮還歸屯。賊益不能測。凡百餘日。所得首功萬餘級。生口數萬。每得嚮導。輒發窖粟就食。而賊饑甚。劉養鯤遺其客入大方。燒其宮室。懸榜而出。安位大恐。乞降。與約四事。一貶爵。一削水外六日之地歸朝廷。一獻殺王巡撫者首。一開畢節等驛路。安位皆受命。遂率土日納款。變元爲奏請。詔許之。乃條陳便宜九事。不設郡縣。置軍衛。不易其俗。土漢相安。便一。地益墾闢。聚落日煩。經界旣正。土日不得以民不耕地。漸侵軼。便二。黔地瘠。仰給於外。今自食其土。省轉輸之勞。便三。國用方匱。出太府金幣。勞諸將不足。以爵酬之。爵輕。不若以地。於國無損。便四。旣許世其土。各自立家。經久遠。永爲折衝。便五。大小相維。輕重相制。無事易以安。有事易以定。便六。訓農治兵。耀武河上。使賊日備我。便七。從兵民便。願耕者給之。且耕且戍。衛所自實。無勾軍之累。便八。軍耕抵餉。民耕輸糧。以屯課耕。不拘其籍。以耕聚人。不世其



伍使各樂其業。便九上可其奏。

九年朱燮元遣兵誅擺金、兩江、巴香、狼壩、火烘、五洞叛苗，悉平之。水西勢益孤，又通上下六衛，并清平、偏鎮四衛道路，凡一千六百餘里，設亭障，置游徼，以便往來。滇中沐氏土舍普名聲亂，燮元奉命移兵討平之，名聲伏誅。

十年水西安位死，無嗣，族屬爭立，朝議欲乘其弊郡縣之。燮元上書諫，乃止。燮元遂傳檄土目，諭以威德，諸部爭納土獻重器。燮元召將吏議，以爲衆建土司，使其勢少力分，則易制。各欲保土地，傳子孫，則不敢爲逆。乃上奏曰：臣按西南之境皆荒服也。楊氏反播，奢氏反蘭，安氏反水西，而滇之定番、彈丸小州爲長官司者十有七，二三百年来未聞有反者，非他司好逆而定番忠順也。蓋地大者跋扈之資，而勢弱者保世之策也。今臣分水西之壤，授諸渠長及有功漢人，咸俾世守，凡其俗虐政苛斂，一切除之，使參用漢法，可爲長久計。制曰可。西南遂底定焉。

谷應泰曰：天啓中奢崇明以裸羅稱據重慶，安邦彥以水西會反貴州，蓋苗俗叛服不常，乃其天性，而兩家者又倚爲唇齒，時通姻婭，所謂同功一體之人也。乃謀亂之初，則奢先而安繼，窮追之日，則奢敗而安亡，覆轍相尋，合若符契。小醜墜宗，於人何尤焉！以予觀奢崇明陰鷲有謀，其子寅招納亡命，一舉而全蜀震動，剽銳莫當，宜非邦彥所敢望也。然而邦彥之師尙堪持久，而崇明之衆旋即挫衄，又往往降於水西，投於安部者，則以安之地大而力盛也。奢會竊發，止蜀道一隅，而安會轉戰，西通巴夔，南壓滇黔，又合烏雷安南諸部落，縣互長驅，動搖數省，此之不戢，真江楚之深憂也。以故恢蕩之功，亦以平安爲首，平奢次

之。平奢者秦良玉之夜襲兩河。杜文煥之佛圖奪壘。盧元卿之紅崖積仗。其功不可泯也。平安者王三善之奮斬十萬。秦衍祚侯良柱之夜拔三寨。張雲鵬之八路進兵。許成名之三方深入。其功更不可泯也。乃崇明邦彥同時陣殲。奢寅淫橫。內自相圖。既平五洞。叛。又開清平四衛。新設亭障。增置游徼者凡一千六百餘里。雖漢之樓船十道。西通冉駹。其盛不能及也。然其時發縱指示。出奇無窮。多出於督臣朱燮元之方略。論者以固守成都。盪滅羣妖。招降安位。爲燮元功不世出。而不知善後撫綏。分裂其地。使南人不復反者。皆燮元之長算也。善乎燮元之疏曰。今分水西之壤。授諸渠長。及有功漢臣。咸俾世守。蓋地大者。跋扈之資。而勢弱者保世之策也。昔主父偃令宗室得分王子弟。而藩服益削。則知衆建土司。而少其力者。其真馭遠之良規歟。

卷七十

平徐鴻儒附王好賢 于宏志

熹宗天啓二年夏五月。山東妖賊徐鴻儒倡亂。鴻儒鉅野人。遷鄆城。萬歷末。以白蓮教惑衆。黨數千人。深州人王森以救一妖狐。妖狐斷尾令藏之。招人。人聞異香。多歸附之。號聞香教。森死。遺資巨萬。子好賢藉其資以結客。有異志。景州于宏志以棒棰會聚惡少年。好賢與通密。約鴻儒於八月望日。三方同起。而鴻儒以他事相激。先發。在卡家屯。刑牲誓衆。令衆至梁山泊寄家口。然後起兵。往圍魏家莊。又二千餘人圍梁家樓。據爲巢。去縣二十里。官兵不敢前。又攻鉅野縣。其黨楊子雨、李泰等被擒。又曹州擒張世佩。其身

旁匿紙人數千。號四大金剛。亦鴻儒黨也。鴻儒攻鄆城。知縣余子翼逃。遂據城。曹濮騷動。兗西道閻調羹以聞。巡撫都御史趙彥。總河侍郎陳道亨。巡撫都御史王一中。合兵捕之。其時四川亦有白蓮妖賊洪衆。劉應選。白仙臺等助賊蜂起。巡撫朱燮元擒捕正法。夏六月。徐鴻儒陷鄒縣。署印通判鄭一傑挈家出走。進陷滕縣。知縣姚之允逃。遂踞二城。時括遼餉殆盡。至是徵兵無餉可給。止練鄉勇。責有司捕治。魯王捐資保城。上賜璽書褒之。山東都司廖棟破武安賊巢。焚之。撫臣趙彥奏捷。賊盤踞巢穴。動以數萬。官兵奮勇力戰。斬首三千餘級。礮擊死者六七百人。又焚武安集賊巢。近旁小寨俱燬之。賊勢窮蹙。奔梁家樓。都司楊國盛與賊對壘。斬首千級。其東南東北之賊充塞道路。官軍攻擊。賊不能支。復斬首二千餘級。賊欲窺伺兗府。官軍尾其後襲之。連戰皆捷。遂復鄆城鉅野。秋七月。錄敍山東平妖將士楊國盛。廖棟等功績。巡撫趙彥奏妖賊聚衆日多。官兵策應日難。乞暫留秋班邊軍隨營勦賊。可省招募之費。從之。賊攻夏鎮。至彭家口。掠糧船四十餘艘。阻絕運河。侍郎陳道亨告急。上命兵部議添兵防守。時沙溝營把總姚文慶等集軍壯鄉勇擒賊十一人。殺五十餘人。奪回漕艘。淮兵又驅斬夏鎮妖賊。運道復通。山東一日二報捷。賊奔滕縣。與鄒縣賊會。合攻曲阜。領馬步萬餘擁至城下。知縣孔聞禮率民兵極力捍禦。殺賊甚衆。賊不能陷。旋以援至。拔營而去。復劫官營。都司楊國盛大敗。游擊張榜等皆死之。營內糧草火礮器刃俱被劫。賊僭稱大乘興。勝元年。巢有十數。兵十餘萬。欲先取兗州。次取濟南。聲勢甚銳。陳道亨疏請登萊兵防兗。恐糧餉有失也。景州妖賊屯阜城武邑。殺人祭旗。聲言取景州。焚掠四十餘里。官兵往捕之。賊首于宏志立馬仗弓。飛舞而來。官兵斬之於馬下。餘賊披靡四散。又擒妖民田傅民等。於是賊衆牛朝利。

等退據白家屯。掘深濠。伐木爲寨以固守。艾山賊趙大奉劉永明爲主。稱安民王。以二十八人塗面稱二十八宿。聚黨二萬餘人。合鄒滕賊共十七枝。官兵攻破之。獲永明。臨刑猶稱寡人云。妖攻兗州。先是趙彥親至兗州。同監軍道王從義、徐從治、總兵楊肇基至演武場閱兵。妖衆進逼城下。肇基迎敵。都司楊國盛、廖棟分擊。殺賊千餘人。賊回滕縣。九月。賊流劫金山口。徐州震動。官軍復錫山。賊始懼。僞都督侯五、僞總兵魏七等據城乞降。去其幟。而鴻儒同黨高尙賓、歐陽德、鄴九述、許道清等三百餘人復力守。官兵分攻之。趙彥下令鴻儒不出。卽四面焚攻。賊因縛鴻儒出降。三道臣入城安撫軍民。復滕城。十月。安插鄉民共二萬七千餘人。收騾馬千匹。神槍八百杆。大礮二百六。斧九十九。餘弓刀亡算。十二月。獻山東俘徐鴻儒。磔於市。加趙彥兵部尙書。餘進秩有差。鴻儒臨刑歎曰。我與王好賢父子經營二十餘年。徒屬甚衆。更遲數日。孰敢櫻其鋒者。而好賢見鴻儒敗。走薊州。又挈家二十餘人南走。至揚州。事露。就擒。吏科給事陳熙昌上言。東省妖賊雖平。地方善後宜策。并請存恤修復孟氏墓廟。上從之。命官致祭。四年八月。鄒縣賊餘黨因旱災復聚於泗州。數百人劫掠。兗州知府曹文衡、鄒縣知縣郭人吉、署泗水縣事同知張景親詣其地。安撫李守己等二十餘人。訴爲鄉里。陵偪願就招撫。編入保甲始安。谷應泰曰。慨自周之成康。刑措不用。漢之文景。斷獄四百。海內又安。何其盛也。其他致治之主。非有外患。則有內憂。若夫火坑之寇。旋卽艾除。飛燕之兵。逾時解散。此亂之小者也。然而疥癬致患。蜂蠶有毒。兩葉不去。斧柯是尋。有國者可不慎乎。明室數傳。中外多盜。憲武世神反者數起。雖常命張敞於京兆。遣虞詡於朝歌。而沸釜游魚。相隨斬馘。然弄兵者疇非赤子。蠶食者皆吾腹心。止渴而進鴆酒。救疾而吞烏喙。萑

苻屢殄。明祚不得長矣。比及熹宗。東省又起。鄆人徐鴻儒倡亂。號白蓮教。應之者深州王好賢。號聞香教。景州于宏志。號棒槌會。艾山劉永明。號安民王。而其餘四大金剛二十八宿。莫不三方並起。剋日興師。猶之樊崇鼓亂。而下江新市。互有聲援。張角煽妖。而小方大方。各推渠帥。雖賊徒之故智。亦奔命之深憂也。然聞之孽不自生。釁由人作。考其時閹璫擅政。必外吏喬虔苞苴在官。必朘削在下。俗敝則輕於爲非。民貧則去而爲盜。固然其無足怪。而論者又云。蓮社以梵教而惑妖狐。以吹火而興經營。廿年盜亦有道。豈足盡信哉。乃若魯藩捐資保城。趙彥盡力擒捕。而廖棟破之於武安。楊國棟殲之於鉅鹿。夏鎮告捷。運艘復通。滕縣旣恢。鴻儒遂磔。彼諸臣者。雖非龔遂之平渤海。亂絲徐理。抑亦廣漢之治三輔。袍鼓不鳴矣。然而莽蜂不懲。亂令亟行。黃巾旣叛。仍行鉤黨之誅。河朔初平。更遣括田之使。從此鴻飛滿野。萋楚無家。政散民流。積薪蘊火。人以爲潢池雲擾。禍烈於懷宗。予以爲東陵伏莽。釁叢於熹廟也。後三年而餘孽聚泗州。又七年而李自成起米脂。明竟以亡。悲夫。



萬有文庫

第一集一千種

王雲五主編

明史紀事本末

(十一)

谷應泰著

商務印書館發行

萬有文庫

第一集一千種



商務印書館發行



明史紀事本末

(十一)

谷應泰著



國學基本叢書



星3421—11

# 明史紀事本末

## 卷七十一

### 魏忠賢亂政

熹宗天啓元年秋八月。魏忠賢矯殺前太監王安。魏忠賢初名進忠。河間肅甯人也。少黠慧無籍。好酒善略。喜馳馬。能右手執弓。左手設弦。射多奇中。目不識丁。然亦有膽力。能決斷。顧猜狠自用。喜事尚諛。嘗與年少賭博不讎。走匿市肆中。諸少年追窘之。恚甚。因而自宮。萬曆十七年。隸司禮監掌東廠太監孫暹。時熹宗爲皇太孫。忠賢謹事之。導之宴游。甚得皇太孫歡心。孝和王后太孫生母也。忠賢夤入宮辦膳。其介紹引進者。魏朝朝故屬太監王安名下。安素剛正。主持一宮事。魏朝日譽忠賢。安善視之。朝初與太孫乳媪客氏私。卽所稱爲對食者。然朝以待安。又承事太孫。多不暇。忠賢乘間亦通焉。客氏者。故定興民侯二妻也。年十八進宮。又二年而嫠。生子國興。光宗踐祚。册太孫爲東宮。忠賢得充東宮典膳。客氏力也。光宗升遐。東宮暫居慈慶。給諫楊漣疏參及忠賢。忠賢無措。泣求魏朝於王安。力營救之。遂與李選侍宮中。李進忠爲一人。外廷不知也。忠賢深德朝。結爲兄弟。而兩人皆客氏私人。上卽位數月。一夕。忠賢與朝爭擁客氏於乾清宮。煖閣醉。詈而罵。聲達御前。時上已寢。漏將丙夜。俱跪御榻前。聽上令。客氏久厭朝儂薄。而喜忠賢憨猛。上逆知之。乃退朝。而與忠賢。忠賢卒矯旨發朝。鳳陽縊殺之。自是得專客氏。而尾大不掉之患成焉。初。帝之立也。王安與諸大臣同受顧命。見忠賢侵權。欲重懲之。奏之帝。會御史方震孺上疏請逐。

客氏。帝乃令客氏出宮。忠賢發安鞠問。安詰責。令其自新。忠賢得釋。客氏蚤緣復入宮。將甘心於安焉。時安奉旨掌司禮監。辭未赴。王體乾卽欲起攘之。因忠賢以危言動客氏曰。爾我比西李何如。勢在騎虎。無貽後悔。西李者李選侍也。忠賢遂嗾給事霍繼華劾之。又令劉朝田詔等上疏辨冤。客氏從中附和之。於是矯旨革安職。而以體乾掌司禮監。忠賢必欲殺安。遂以劉朝提督南海子。而降安爲南海淨軍。勒令自裁。方光宗居青宮時。憂讒畏譏。幾三十年。安左右勤勞。靡敢怠玩。光宗頗任用之。安素剛。不肯順使於李選侍。劉朝。李進忠。皆選侍私人。故以移宮恨安。至是。安旣死。而忠賢益無所憚矣。忠賢闇文義。乃取舊司禮監李永貞入備贊畫。李實。李明道。崔文昇。各司監局。探上意爲奸。忠賢自掌東廠。客氏封奉聖夫人。命奉聖夫人客氏如皇祖戴聖夫人例。加其子侯國興錦衣衛指揮使。御史劉蘭上言。皇上初登寶位。客氏保護是賴。今釐降之儀。肇舉。關雎之慶。方新。恩禮所加。權勢歸之。初。上大昏禮成。魏忠賢廕姪二人。給事中程注。周之剛。亦奏祖制非軍功不襲。國典不當濫予。俱不聽。九月。上以客氏保護聖躬。命戶部擇田二十頃。以爲護墳香火之用。魏忠賢侍衛有功。命工部於陵工成。敍錄。御史王心一奏云。梓官未殯。先規客氏之香火。陵工旣成。強入忠賢之勤勞。於禮爲不順。於事爲失宜。忠臣愛君。必防其漸。上怒責之。冬十月。降吏科給事中侯震揚於外。初。客氏已出宮。復召入。震揚奏曰。皇上於客氏始而徘徊眷注。稍遲其出。猶可言也。出而再入。不可言也。中涓羣小。煬竈借叢。王聖寵而煽江京。李閏之奸。趙嬈寵而構曹節。王甫之禍。可爲寒心。上怒降之。時倪思蕙。朱欽相。馬鳴起。王心一。相繼疏劾。皆降謫。吏部尙書周嘉謨論救不報。刑科給事中孫杰。疏糾周嘉謨。劉一燝。謂統均仰輔臣之權。輔臣奉王安之意。中旨錯出。致誤

封疆嘉謨免一燬尋亦回籍。

二年春三月禮科給事中惠世揚疏糾大學士沈淮使其門客晏日華潛入大內誘劉朝等練兵頓使聖明之朝再見江彬之事外戚鄭養性厚募死士包藏禍心上慰留淮而譎世揚於外初淮藉內監劉榮得通於忠賢內操之議皆自淮導之未幾刑部尚書王紀亦劾淮與客魏交通彼此攻訐忠賢矯旨削紀籍夏五月御史周宗建上言近日朝廷處分章奏外庭嘖嘖咸謂奧窔之中莫可測識論旨之下有物憑焉如魏忠賢者目既不識一丁心復不諳大義揭其志慮有何嘉謀又曰耳目嘖笑之暇漸與相親宮廷禮法之事漸與相近一切用人行政墮於其說必且東西易面而不知奏入咸爲宗建危之秋八月兵科給事中朱童蒙疏糾鄒元標馮從吾醜金講學比之妖賊元標等致仕歸冬十月修撰文震孟上言勤政講學之實中云君臣相對如家人父子則左右近習無緣可以蒙蔽疏入忤魏忠賢不下庶吉士鄭鄮復疏促之曰經御覽而留中則非止輦轉圓之義不經御覽而留中必有藏伏奧援之奸本朝故事惟武宗及神宗末年有之權璫煬竈相顧太息無可如何矣忠賢深惡之承上觀劇摘震孟疏中傀儡登場語激怒上時太僕寺卿滿朝薦亦言之力俱謫歸十二月命劣轉科臣霍維華孫杰優陞京堂顧秉謙魏廣微爲大學士入閣辦事

三年秋八月內官張守仁等索冬衣譁於工部堂上尚書鍾羽正致仕歸詔開內操鉦鼓之聲喧闐宮禁或云皇子生震死焉御史劉之鳳上言虎符重兵何可倒戈授巷伯之手假令劉瑾擁甲士三千能束手就擒乎御史李應昇黃尊素宋師襄交章論之尊素疏有阿保重於趙嬈禁旅近於唐末等語忠賢尤

惡之。皆矯旨切責。忠賢自殺。王安後。益驕橫。設內標萬人。衷甲出入。內監王進嘗試銃。上前銃炸傷進手。上幾危。光宗選侍趙氏。與客魏不協。矯旨賜死。選侍盡出。光宗所賜珍玩列於庭。再拜投繯而絕。裕犯張氏方妊。膺冊封禮。客氏譖於上。絕飲食。閉禳道中。偶天雨。匍匐掬簷溜數口而絕。成妃李氏誕二公主而殤。先是馮貴人嘗勸上罷內操。客魏惡之。矯旨貴人誹謗賜死。成妃從容爲上言之。乃矯旨革封。絕飲食。成妃故寧裕妃。餓死。密儲食物壁間。數日不死。魏客怒少解。斥爲宮人。遷於乾西所。皇后張氏素精明。魏客憚之。后方妊。腰痛。客氏密布心腹宮人。奉御無狀。隕焉。又於上郊天之日。掩殺胡貴人。以暴疾聞。四年春二月。加錦衣衛田爾耕太子太保。以其緝捕有功也。爾耕尙書田樂之孫。以軍功補廕錦衣。附魏忠賢。遂得美擢。三月。刑科傅櫬疏參僉都御史左光斗。吏科都給事魏大中。詞引故內臣王安及中書汪文言。廕魏忠賢弟姪一人。錦衣百戶。五月。以許顯純掌北鎮撫司理刑。六月。左副都御史楊漣疏參魏忠賢二十四罪。曰。忠賢原一市井亡賴人耳。中年淨身。蚤入內地。初猶謬爲小忠小佞。以倖恩。旣而敢爲大奸大惡。以亂政。祖宗之制。以票擬託重閣臣。責無他委。自忠賢擅權。旨意多出。傳奉徑自內批。壞祖宗二百年來之政體。大罪一也。劉一燝。周嘉謨。同受顧命之大臣也。忠賢急於翦己之忌。不容皇上不改父之臣。大罪二也。先帝一月賓天。進御進藥之間。實有隱恨。執春秋討賊之義者。孫慎行也。明萬古綱常之重者。鄒元標也。忠賢一則逼之告病去。一則嗾言官論劾去。顧於護黨氣毆聖母之人。曲意綢繆。終加蟒玉以贈其行。親亂賊而讎忠義。大罪三也。王紀。鍾羽正。先年功在國本。及紀爲司寇。執法如山。羽正爲司空。清修如鶴。忠賢一則使人交諂於堂。辱而迫之去。一則與沈灌交構。陷之削籍去。必不容盛時

有正色立朝之直臣。大罪四也。國家最重無如枚卜。忠賢一手握定。力阻前推之孫慎行。盛以宏。更爲他辭以錮其出。是真欲門生宰相乎。大罪五也。爵人於朝。莫重廷推。去歲南太宰北少宰所推皆黠陪貳。致一時名賢不安位去。顛倒有常之銓政。掉弄不測之機權。大罪六也。聖政初新。正資忠直。乃滿朝薦文震孟等九人。抗論稍忤忠賢。傳奉盡令降斥。屢經恩典。竟阻賜環。長安謂皇上之怒易解。忠賢之怒難調。大罪七也。然猶曰外廷之臣子也。傳聞宮中有一舊貴人。以德性貞靜。荷上寵注。忠賢恐其露己驕橫。謀之私比。託言急病。立刻掩殺。是皇上且不能保其貴幸矣。大罪八也。猶曰無名封也。裕妃以有喜得封。中外欣欣相告。忠賢以抗不附已。囑其私比。矯旨勒令自盡。是皇上不能保其妃嬪矣。大罪九也。猶曰在妃嬪也。中宮有慶。已經成男。乃繞電流虹之祥。忽化爲飛星墮月之慘。傳聞忠賢與奉聖夫人實有謀焉。是皇上不能保其子矣。大罪十也。先帝在青宮四十年。操心慮患。所以護持孤危者。僅王安一人耳。皇上倉卒受命。擁衛防護之中。亦不可謂無微忠。而忠賢以私忿。矯旨掩殺於南海子。是不但讎王安。而實敢於讎先帝之老僕與皇上老犬馬。略無顧忌。大罪十一也。今日獎賞。明日祠額。要挾無窮。王言屢褻。近又於河間府毀人房屋。以建牌坊。鏤鳳雕龍。干雲插漢。又不止於塋地。擅用朝官。規制僭擬陵寢而已。大罪十二也。今日蔭中書。明日蔭錦衣。金吾之堂口。皆乳臭。誥敕之館目。不識丁。如魏良弼。魏良材。魏良卿等。五候七貴。何以加茲。大罪十三也。因立枷之法。以示威。枷號家人者。欲攀陷皇親也。攀陷皇親者。欲動搖三宮也。當時若非閣臣力持椒房之戚。又興大獄矣。大罪十四也。良鄉生員章士魁。以爭煤窰傷其墳脈。託言開礦而致之死。假令盜長陵一抔土。何以處之。趙高鹿可爲馬。忠賢煤可爲礦。大罪十五也。伍思敬。胡遵。

道以侵占牧地細事而徑置囚阱。草管士命。使青燐赤壁之氣。先結於辟宮泮藻之間。大罪十六也。科臣周士樸執糾織監一事。原是在工言工。忠賢竟停其陞遷。使吏部不得專其銓除。言官不敢司其封駁。大罪十七也。北鎮撫臣劉僑不肯殺人媚人。自是在刑言刑。忠賢以其不善鍛鍊。竟令削籍。明示大明之律令。可以不守。而忠賢之律令不可不遵。大罪十八也。科臣魏大中到任。已奉明旨。鴻臚寺傳單。忽傳詰責。及科臣覆奏。臺省交章。又再襲王言。而煌煌天語。朝夕紛更。令天下後世視皇上爲何如主。大罪十九也。東廠原以察奸細非常。不以擾平民也。自忠賢受事。雞犬不甯。野子傳應星等爲之招搖引納。陳君恭爲之鼓舌搖唇。傅繼教爲之投罟設網。片語違忤。駕帖立下。如近日之逮汪文言。不從閣票。不令閣知。而傅應星等造謀告密。日夜未已。勢不至於興同文之獄。刊黨錮之碑不已者。當年西做汪直之僭。恐未足語此。大罪二十也。前韓宗功潛入長安。偵探虛實。往來忠賢私房之家。事露始令避去。大罪二十一也。祖制不蓄內兵。原有深意。忠賢創立內操。使羽黨盤踞其中。安知無大盜刺客深謀不究之人。識者每爲寒心。昔劉瑾招納亡命。曹吉祥傾結達官。忠賢蓋已兼之。大罪二十二也。忠賢進香涿州。鐵騎之簇擁如雲。蟒玉之趨隨耀日。警蹕傳呼。清塵墊道。人人以爲駕幸涿州。及其歸也。以輿夫爲遲。故駕駟馬。羽幢青蓋。夾護環遮。則已儼然乘輿矣。大罪二十三也。蓋寵極則驕。恩多成怨。聞今春忠賢走馬御前。皇上曾射殺其馬。貸忠賢以不死。忠賢不自畏罪。請死。且進有傲色。退有怨言。朝夕提防。介介不釋。從來亂臣賊子。只爭一念放肆。遂至收拾不住。奈何養虎兇於肘腋間乎。此又寸樹忠賢不足盡其辜者。大罪二十四也。凡此逆跡。左右旣畏而不敢言。外廷又皆觀望而不敢言。卽或內廷奸狀敗露。又賴有奉聖客氏爲之彌縫其



罪戾而遮飾其回邪。故掖廷之內知有忠賢。不知有皇上。都城之內知有忠賢。不知有皇上。即大小臣工。又積重之所移。積勢之所趨。亦不覺不知有皇上。而止知有忠賢。宮中府中大事小事無一不是忠賢專擅。反覺皇上爲名。忠賢爲實。且如忠賢已往涿州矣。一切事情必星夜馳請意旨。票擬必忠賢到始敢批發。嗟嗟。天顏咫尺之間。忽漫不請裁。而馳候忠賢意旨於百里之外。事勢至此。皇上威靈尙尊於忠賢耶。疏入。忠賢亦惴惴懼禍。欲結輔臣韓爌爲之地。爌嚴拒。不得已泣訴御前。客氏又從中委曲調之。遂令魏廣微條旨。廣微素固結忠賢。附爲同姓。漣疏中復有門生宰相語。廣微恨之。是時忠賢亦有疏辭廠。疏先下。備極溫諭。次日乃下漣疏。切責不少貸。先是漣疏成。意欲於午朝面奏。出疾雷掩耳之計。繕寫甫竟。次日免朝。恐再宿則機洩。且害成也。遂循例封進。故忠賢得以彌縫。漣愈憤激。冀補牘以伺對仗。忠賢聞之。阻遇上不御朝者三日。至四日乃出御。皇極門。刀劍倍於往時。侍班官僚更爲嚴謹。左班諸臣不許擅出。奏事而諸臣公憤愈甚。繼漣上疏者屬至。給事陳良訓。魏大中。許譽卿。劉茂。傅櫬。陳熙昌。周之綱。杜三英。楊夢寰。顧其仁。胡永順。朱大典。陳奇瑜。熊奮渭。李精白。孫詔沆。陳維新。楊維新。御史袁化中。周宗建。劉芳。劉廷佐。李應昇。房壯麗。劉環。胡良機。喻思洵。林汝翥。胡士奇。謝奇舉。洪如鐘。黃尊素。梁元柱。李光春。張鏞。翟學程。劉之侍。周汝弼。李喬崙。劉其忠。宋政南。科道徐憲卿。趙應期。兵部尙書趙彥。詹事翁正春等。卿寺朱欽相。胡世賞。吏部郎中鄒維漣。撫甯候朱國弼等。不下百餘疏。先後申奏。或專或合。無不危悚激切。俱不聽。南京兵部尙書陳道亨已引疾杜門不與公事。及見楊漣參疏。忽奮擊扼腕曰。國家安危誠在此舉。吾備位大臣。不言誰爲言者。即日出署。合各部院九卿諸大臣公疏以上。凡千言。指陳剴切。疏入。嚴旨切

責道亨嘆曰。此何時。尙可在公卿閒耶。乃具疏力辭而去。屯田司郎中萬燦先授營繕司主事。管寶源局。疏請內監廢銅。忤忠賢意。至是燦復上疏曰。忠賢原名進忠。今改名忠賢。當亦顧名而思忠賢之義乎。夫以忠賢珠玉盈筥。金銀滿屋。何求不得。何欲不遂。以此破廢銅器無足入其目。當其心。而亦必一手握定者。其設心以爲不若是無以操天下之利權。旣操天下之利權。何難攬天下之政權。奸雄用意最深。蓄謀甚毒。臣有以窺其微矣。疏入。忠賢矯旨杖燦於午門外。羣閣至燦寓。捽之而出。辱毆於道。燦幾危。及至闕受杖。忠賢命立斃之。先是御史林汝翥葉向高鄉人也。忠賢欲借之以傾向高。會翥巡城。有火者曹大傅國興挾人命劫財。鬪於塗。汝翥欲參之。皆願受杖免參。翥信其無他也。卽杖之。數日後。萬燦禍作。忽中旨逮汝翥廷杖。汝翥懼出亡。羣閣疑向高匿之。百餘人直入其寓。辱及婦女。嫚罵坐索。向高奏之。置不問。至七月。林汝翥自詣遵化軍門獄。蓋翥懼未受廷杖。先殞命於中涓之私毆。故逸出都門。詣遵化撫臣獄求爲代題。各道潘雲翼等疏救不聽。執前旨如故。己而被杖。創甚幾斃。向高奏曰。楊漣一人之言。容有過激。未幾而諸疏繼至矣。又未幾而臺省九卿復有公疏。舉朝闕然。卽臣等亦被其指摘。甚者疑其爲忠賢畫策。當與焦芳同傳矣。臣地居密勿。不敢自同於廷臣。卽受疑受謗。情固甘之。惟是皇上念忠賢則當求所以保全之。而今日保全忠賢之計。莫如聽其自請。且歸私第。遠勢避嫌。以釋中外之心。使天下曉然知忠賢之無他。其於轉禍爲福。直俄頃閒耳。至內操一事。祖宗朝所無。聚數千之甲兵於宮廷肘腋閒。在今日雖無可慮。他日終屬隱憂。疏上。溫旨復。悉數忠賢勤勞。責羣臣附和。詔錦衣衛杖汪文言革爲民。大學士葉向高予告回籍。向高初相時。猶可展布。自忠賢專擅。同官顧秉謙魏廣微希意阿旨。向高強半

註籍疏三十上。至是以御史林汝翥逸出羣閣園第。決意去。初廣微以己意用墨筆點繒紳一冊。分差等。目爲邪人。其人則葉向高。韓爌。何如寵。錢謙益。成基命。繆昌期。姚希孟。陳子壯。侯恪。趙南星。高攀龍。楊漣。左光斗。魏大中。黃尊素。周宗建。李應昇等約六七十人。密達於忠賢。以漸擯斥。復手書所欲起用之人。黃克纘。王紹徽。王永光。徐大化。霍維華。阮大鍼等五十六人。指爲正人。以次點用。至是向高去。秉謙居首揆。吏部謝陞起用。至京見時政日非。勉終一選歸。且以書規廣微。中旨大拂廣微之意。史記事黃汝亨各有書以大義告廣微。咸拒不納。八月署國子監祭酒禮部右侍郎蔡毅中。監丞金維基。博士門洞開。鄧光舒。王裕心。助教張翰南。徐伯徵。姚士儒。孫世裕。董天允。學正王永興。蔣紹燧。學錄聶雲翔。杜士基。典簿萬民懋。典籍陳烈。公疏劾魏忠賢。上不問。毅中旣與璫忤。四疏請告。亦不許。九月左都御史高攀龍疏參貪污御史崔呈秀。革職聽勘。冬十月朔有事太廟。上冕而升。百執事成集。大學士魏廣微不至。迨飲福受祚。禮且告畢。踉蹌入班拜跪。吏科給事魏大中劾之曰。皇上升殿。頒來歲之歷。四方萬國。誰不頽首奉行。其矯命雄行。獨奢安耳。廣微執政重臣。何以驚焉。不拜正朔也。皇上於一日閒行二大禮。頒朔不至。享廟則後至。其無禮於皇上亦已甚矣。廣微上疏自理。且乞骸。溫旨留之。廣微恨大中甚。御史李應昇上言。閣臣魏廣微疏辨自謂罪止失儀。夫行禮誤錯。始謂失儀。謹按大明律失誤朝賀者笞四十。祭奠失誤者杖一百。廣微尙可覩焉。入中書之堂乎。國家設立言官。稱耳目近臣。言及乘輿。則天子改容。事關廊廟。則宰相待罪。廣微父允貞嘗爲言官。公正發憤。得罪閣臣以去。聲施至今。廣微獨不念乎。奈何比之路馬。斥之此輩。夫不與此輩爲伍者。必另有一輩爲緣。方今聖天子在上。賢公卿在下。廣微有何疚心之事。清夜

抱慙。每見指摘。輒自張皇。若十手十目之暴其隱也。廣微當退讀父書。保其家聲。毋倚三窟。與言官爲難。異日亦可見乃父於地下。上切責之。降吏科都給事魏大中。吏部員外夏嘉遇。御史陳九疇。三級調外。吏部尙書趙南星。左都御史高攀龍。乞罷。許之。大學士韓爌力爭不報。南星等狼狽去國。削吏部左侍郎陳于庭。右都御史楊漣。左僉都御史左光斗籍。趙南星之去也。銓部以陳于庭代署。西臺以楊漣代署。俱留中。及會推冢宰。漣以註籍不與。其所會推喬允升。馮從吾。汪應蛟。上仍以南星私人責之。并責楊漣。袁化中。一時盡去。部署皆空。降御史房可壯。三級。吏科許譽卿。沈惟炳。河南道御史袁化中。各一級。降吏部文選司郎中張光前。三級俱調外。光前甫入署。二旬。因南星等後先奉旨去。乃上疏曰。臣若緘默不言。爲苟免之計。是賣友也。賣友之人。卽是欺君之人。臣豈敢蹈欺君賣友。令皇甫規笑人千載之上哉。冬十二月。復逮汪文言。

五年春正月。起崔呈秀。復爲御史。呈秀爲高攀龍所糾。乃微服持賂叩忠賢。願爲忠賢子。呼之以父。忠賢大悅。遂出中旨。免其勘起用。時忠賢竊柄。動曰中旨。兵科給事中李魯生。阿忠賢意。上言。執中者帝。宅中者王。旨不自中出。而誰出。時論鄙之。罷禮部侍郎何如寵。右諭德繆昌期。削太僕寺少卿劉宗周籍。起用阮大鍼十一人。二月。大理寺丞徐大化劾楊漣。左光斗黨同伐異。招權納賄。命侯汪文言逮。至鞠之。削御史周宗建。李應昇。黃尊素。張愼言籍。工部主事曹欽程。復劾趙南星。周宗建。張愼言。李應昇。高攀龍。黃尊素。鄒維漣。魏大中。大約誣以受熊廷弼賂。以汪文言爲之證。三月。上視太學。魏忠賢王體乾擅改儀注。賜坐。而大臣不得賜茶。五月。上祭方澤。還宮。卽幸西苑。時日己晡。忠賢與客氏乘大舟飲酒歡。

甚。上獨與宦豎二人泛小舟蕩漾。上身自刺舟。一璫佐之。相顧笑樂。忽風起舟覆。上及二璫俱墮水中。二璫死焉。上救免。忠賢及客氏相顧錯愕而已。詔肅甯縣建坊賜敕旌獎魏忠賢。并廕其弟姪一人。都督僉事。特賜璽書褒美錦衣衛都督田爾耕。仍命所司賚之羊酒。建坊以示眷答。至意。時修舉屯政。以濟軍需。爾耕乃捐田十七千餘頃。以佐縣官之急。故下璽書美之。錦衣衛指揮掌北鎮撫事許顯純。勘問汪文言獄。辭連趙南星。楊漣。左光斗。魏大中。繆昌期。袁化中。惠世揚。毛士龍。鄒雄。埏。鄧漢。盧化鰲。夏之令。王之竊。錢士晉。徐良彥。熊明遇。施天德等。略曰。移宮建議。原爲立名。躡等之資。整頓銓政。實是偏聽招權之藉。布買命之金。而楊熊之刑。停啓賄賂之門。而陞遷之法。濫總文言。得力於父事王安。結納權要。濁亂朝政。請勅法司研鞫。已而忠賢矯旨。仍命顯純訊之。於是周朝瑞。黃龍光。顧大章。并以求緩。楊熊獄入焉。初。文言再下詔獄。鍛鍊兩月餘。弗屈。有旨杖之百。其甥悲失聲。文言叱曰。孺子真不才。死豈負我哉。而效兒女子相泣耶。至是下獄。嚴鞫者四。酷刑備加。弗屈如故。最後不能堪。始仰視許顯純曰。吾口終不似汝心。任汝巧爲之。我承焉可也。顯純誣魏周諸人以賊。文言蹶起曰。天乎冤哉。以此蠹清廉之士。有死不承。六月。九門提督太監金良輔劾御史倪文煥。擅責官軍。文煥求解於崔呈秀。呈秀引入璫幕。青衣叩頭。珍奇盈列。求爲忠賢義子。閱數日。卽具疏劾周順昌等。以逢其意。忠賢悅。自此入幕用事。秋七月。下楊漣。周朝瑞。左光斗。顧大章。袁化中。於北鎮撫司。初。獄上。擬漣以移官一案。許顯純等相與謀。謂不引入移官。則罪名不大。不假借封疆。則難與追賊。遂坐以受熊廷弼賄。漣等不肯承。而顯純箠楚甚酷。無生理。左光斗曰。彼殺我有兩法。乘我之不服。而亟鞫以斃之。又或陰害於獄中。徐以病聞耳。若初鞫輒服。卽送法

司。或無死理。於是靡焉承順。遂五日一比。慘酷更甚。比時纍纍跪階前。訶詬百出。裸體辱之。弛桎則受桯。弛鐐則受夾。弛桯與夾則仍戴桎。鐐以受棍。創痛未復。不再宿復。加榜掠。後訊時皆不能跪起。荷桎梏平臥堂下。見者無不切齒流涕。材官蔣應陽因熊廷弼下獄。代爲投揭白其冤。時時入監左右之。魏忠賢緝獲。以其所攜遼東圖畫指爲妖書以獻。上命寘重辟。加廕忠賢以羊酒銀幣賜之。八月。御史張納上書論東林書院。詆鄒元標。孫慎行。馮從吾。余懋衡。俱削籍。副都御史楊漣卒於獄。漣身事三朝。親受光宗顧命。自下獄。體無完膚。及其死也。土囊壓身。鐵釘貫耳。僅以血濺衣。裹置棺中。後櫬歸。無葬地。置於河側。母妻俱棲息城樓。而忠賢仍令撫按追贓。吏科都給事魏大中卒於獄。其子學溍死之。大中家徒四壁。卓然以名教自持。熊楊之獄。大中力言宜寘重辟。諫草傳布。而竟誣以熊楊賄賂。坐贓死。方溽暑。殷雷旨故遲遲不下。越六七日始出尸。牢穴中尸潰甚慘。方被逮時。其子學溍徒跣攀號。欲隨之。北大中曰。覆巢甯有完卵耶。父子俱斃。無益也。學溍微服閒行。尾緹騎。刺探起居。抵國門。邏卒四布。則變姓名匿旅邸中。晝伏夜出。以救其父。迨獄益危。榜掠益毒。度無生理。欲搗登聞鼓。上書自刎。已而不果。扶櫬歸。朝夕號哭。未嘗入寢室。勺水不進而死。決熊廷弼於市。僉都御史左光斗卒於獄。先是楊漣疏上。魏廣微惡之。時有謂廣微者曰。楊漣攻魏公。波及於閣下。公知其故乎。曰不知也。曰出疏者楊漣。造意者左光斗。潤色者繆昌期也。吾爲閣下足了此事矣。廣微首肯。遂與盟。授旨於御史陳九疇。發其端。而旋以會推彰其事。復理移宮爲傷孝。垂簾爲阿黨。定策元勳爲居功。及再鞫。改爲封疆。誣以贓。矯旨五日一比。竟斃於獄。九月。賜魏忠賢印。文曰顧命元臣。客氏印。文欽賜奉聖夫人。顧大章下獄。尋卒。冬十月。逮御史惠

世揚夏之令於獄。刑部侍郎朱世守。大理寺丞楊一鵬。兵部侍郎劉策。布政陸完。學俱削籍。中書舍人吳懷賢下獄。懷賢以忠賢陷。傾忠良。目擊不平。時閔邸報。見楊漣有二十四罪疏。擊節稱快。旁註曰。當如任守忠。卽時安置。適工部吳昌期。以劾忠賢還籍。懷賢服其不阿。遺書稱之爲事極必反。反正不遠。辭多激烈。凡對客及貽書親朋。輒寓感憤。義形於色。同官傅應星入告忠賢。卽逮之下獄。拷死。籍其家。妻程氏以驚死。十一月。以崔呈秀爲工部右侍郎。歲加魏忠賢祿米一千二百石。爲殿工也。呈秀初倚許秉彝。通忠賢。至是。殿工興。忠賢借督工。無日不與呈秀相見。屏人密語。移時。呈秀授黨人姓名。如天寧等錄。忠賢奉爲聖書。一時梁夢環。李魯生。曹欽程。各獻諛入告。而追贓嚴比等。旨俱自顧秉謙出之。天寧錄首列東林葉向高。韓爌。孫承宗。劉一燝。趙南星。楊漣。高攀龍。左光斗。孫居相。李邦華。喬允升。王洽。曹于汴。李騰芳。錢謙益。姚希孟等。次列東林之黨孫鼎相。徐良彥。熊明遇。沈惟炳。熊奮渭。侯恪等。又列真心爲國不附東林顧秉謙。魏廣微。王紹徽。王永光。霍維華。徐大化。周應秋。崔呈秀。閻鳴泰。王在晉。楊維垣。卓邁。倪文煥。李魯生。吳澹夫。孫國珍。劉廷元等。同志錄者首列詞林部院卿寺。則陳宗器。韓維思。易應昌。張潑等。臺省則黃尊素。李應昇。劉芳。張慎言。惠世揚。房可壯。章允儒。劉宏化。侯恂。游士順等。部屬則賀煊。張光前。孫必顯。汪如亨等。點將錄者首曰。天罡星託塔天王李三才。及時雨葉向高。浪子錢謙益。聖手書生文震孟。白面郎君鄭鄞。霹靂火惠世揚。大刀楊漣。智多星繆昌期等。共三十六人。地殺星神機軍師顧大章。旱地忽行游大任。鼓上卓汪文言等。共七十二人。揚州知府劉鐸下獄。僧本福攜鐸贈三詩至京。爲其語多譏刺。遂逮之。錦衣衛指揮僉事高守謙。毆翰林丁乾學。斃之。乾學典試江西。試策中引汪直。劉瑾。觸怒忠

賢降級調外未及赴。守謙與乾學有舊憾。遂嗾忠賢使二十餘人擁入乾學寓。矯稱有詔。乾學俯伏就逮。守謙偕諸人箠楚交下。乾學創甚。尋卒。時科臣陳熙昌。詞臣陳子壯。亦以試錄有庸主失權。英主攬權等語。亦削籍。戊吏部尚書趙南星。南星以忤沈一貫削籍家居三十年。其入朝也。大理寺卿周應秋知其柄用。郊迎結歡。南星益鄙之。嘆曰。吾入山三十年。安知士風至此乎。見大學士魏廣微。廣微父魏允貞與南星善。以父執自居。廣微因力排之。中旨削奪。巡撫山西郭友尚誣其贓。追論。戊振武衛。子清衡。戍莊浪衛。南星日短衣執士伍。卒於戍所。

六年春正月。削曹欽程籍爲民。欽程以媚璫劾周宗建諸人。稱忠賢爲父。躐秩太僕寺卿。復與同黨不合。忠賢厭薄之。遂責其敗羣削籍。出都門時。再拜忠賢前云。君臣之義已絕。父子之恩難忘。遂倉卒踉蹌而去。命修三朝要典。以紅丸挺擊移宮三案編緝成書。蘇杭織造太監李實疏劾南京巡撫周起元。松江知府張宗衡。同知孫應崐。詔逮之。時李實特印空疏遣人持至京。奉忠賢。忠賢令李朝欽。李永貞屬草。而命孫昇書之以上。三月。御史周宗建下獄。宗建屢疏劾魏客。魏客恨之。先是爲曹欽程所誣。逮至詔獄。鞠時。箠楚較衆更毒。宗建偃臥不能出聲。許顯純罵之曰。此時尙能說魏公不識一丁否。蓋宗建前疏。魏忠賢有目不識一丁語也。卒斃於獄。遼人武長春往來京師。魏忠賢指爲間諜。緝之以邀功。竟磔之。以獲武長春功。封魏良卿。肅甯伯世襲。并賜養贍田七百頃。忠賢用事。獎敕約百道。閣臣撰敕全倣曹操。九錫文爲之。先是掌司禮秉筆者非公事不得出。忠賢獨招搖畿輔。以恣馳逐。每先期治儲。待於停驂。所在數千百騎絡繹不絕。民間皆焚香插柳枝於戶。又以輿夫遲。駕四馬輿。青蓋羽幢。環遮夾擁。疾於飛鳥。



凡朝中草疏。李永貞必遣急足馳白。卽百里外。一日常再往返也。章疏至。分閱者王體乾。梁棟。李永貞。石元雅。涂文輔。有關切者。鈐以寸紙。又捏一指甲重痕爲識。永貞等以次朗誦。而體乾爲疏其意旨焉。左諭德繆昌期下獄。昌期湖廣典試策語。侵魏忠賢。忠賢銜之。以昌期負文名人望所屬。不卽發。及楊漣二十四罪疏。昌期爲之屬草。忠賢深恨之。昌期往告葉向高。以清君側之惡。向高唯唯。昌期色變而出。韓爌當國。頗信昌期。益持正議。及爌去。趙南星。高攀龍逐。楊左奪削。昌期日慨慷。置酒餞別。忠賢愈怒。使人詈於朝。曰。昌期何人。尙留此送客耶。昌期請告。忠賢矯旨勒閑住。忠賢嘗營墳於玉泉山。遣人詣昌期乞墓碑。昌期瞑目叱曰。吾生平恥爲諛墓。豈肯順璫旨耶。客曰。身履虎尾。不畏其啣乎。壽甯事可嗾也。昌期大恚曰。壽甯曾困李獻吉。今日壽甯安在。忠賢聞之。怒益不解。至是起大獄。與周順昌同詔獄。爲許顯純所斃。左都御史高攀龍卒。攀龍削籍家居。杜門著書。聞緹騎至。焚香沐浴。手繕遺疏。封固以授其子。世儒曰。事亟方啓之。乃給家人令各自寢息。勿得驚恐。夜半密起。整衣冠。望闕叩頭。自投於園池。次早。世儒矚戶。寂無人聲。啓視之。留詩以寓意。亟走池中出口。因以遺疏附呈。疏曰。臣雖削籍。舊屬大臣。大臣不可辱。辱大臣則辱國矣。謹北面以效屈平之遺。君恩未報。願結來生。望使者持此以復皇上。忠賢復矯旨逮世儒。吏部主事周順昌下獄。順昌吳縣人。時緹騎出。魏大中被逮過吳。順昌周旋累日。臨別涕泗。卽以女許配其孫允桮。緹騎促大中行。語侵順昌。順昌張目叱之曰。若不知世間有不畏死男子耶。若曹歸語而忠賢。我卽故吏部郎周順昌也。大中下獄。御史倪文煥卽以緝昏事劾順昌削籍。內臣李實復疏參順昌。攀龍。應昇。尊素。宗建五人。俱矯旨逮繫。緹騎挾威橫行。所至索金數千。宗建逮行。未三日而逮順昌者復

至。吳中沸然。士民素德順昌。聞其逮。不勝冤憤。吳令陳文瑞順昌所拔士也。夜半叩戶求見。撫牀爲慟。公曰。吾固知詔使必至此。特意中事耳。毋效楚囚對泣。顏色不變。語良久。令請順昌入治裝。舉家號慟。順昌笑曰。無事。亂人懷也。顧案上有素榜。徐曰。此龍樹菴僧屬我書者。我向許之。今日不了。亦一負心事。乃題小雲棲三字。後識年月。投筆而起。改囚服。出門。士民擁送者不下數千人。順昌出赴使署。開讀。巡撫毛一鷺至署。諸生五六百人。王節。楊廷樞。劉羽儀。文震亨等。遮中丞。懇其疏救。一鷺流汗不能出一語。緹騎見議久不決。手擲銀鐙於地。厲聲曰。東廠逮人。鼠輩何敢置喙。於是市人顏佩章等前問曰。旨出朝廷。乃東廠耶。緹騎曰。旨不出東廠。將誰出。衆怒。鬩然而登。叢毆緹騎。立斃一人。諸司不復相顧。順昌旁皇立久之。無所屬。步詣府署。適緹騎之逮黃尊素於浙者。舟泊胥門。要挾需索。聞變。焚其舟。沈駕帖於河。緹騎皆泅水遁。不復往浙。時有謂順昌者曰。公不幸遭清流之禍。忠良無得全者。矧今日變。因公起。恐徒自苦。順昌嘆曰。以我一人貽禍桑梓。死且目不瞑。我豈不知自裁。然順昌小臣也。豈得引高公不辱之義乎。今我赴都必死。死則訴高皇帝速殛元兇。以清君側之惡。手書別親友。以三月二十六日。行人無知者。就詔獄。顯純拷比倍酷。身無完膚。罵不絕口。無一語哀乞。好義者醵金代其納贖。顯純令獄卒私殞之。臨死。短章祈以尸諫。獄卒見而毀焉。魏良卿請第宅朝房。工部議如李成梁例。給庫銀一萬九千兩爲第宅之價。以武清伯西朝房改付。從之。御史李應昇下獄。忠賢擅權。應昇草十六事欲上。會楊漣先發。遂易稿以奏。忠賢切齒。嗣後救萬璟有疏。劾魏廣微有疏。棄擲於地。不食者二日。欲廷杖之。讀至異日何以見乃父於地下。氣歉乃已。方駕帖之至也。應昇獨立門側。佇望使來。一無他顧。惟入慰父母云。兒此去。或

徼君恩得以生還。慎勿憂念。縣令至門。奮身就道。登舟作賦。略無抑鬱之色。至獄。亦拷死。卒之前一日。寄詩別親友。遺書誡其子。詩有云。白雲渺渺迷歸夢。春草淒淒泣路岐。寄與兒曹焚筆硯。好將犁犢聽黃鸝。聞者傷心焉。戊毛士龍。削夏嘉遇。姜志禮。王心一。劉大受等籍。御史黃尊素卒於獄。卒前一日。獄吏告尊素曰。公休矣。內傳欲斃公。公何語。卽書以寄家。尊素略不及他事。卽於三木上賦詩。是夜卒。五月。王恭廠災。兵部尙書王永光請寬訟獄。停工作。慎票旨。給事中彭汝楫。御史高宏圖亦言之。俱削籍。未幾降敕獎忠賢撲滅雷火功。從尙書薛貞之請也。六月。命逮吳養春等。養春歙縣人。家世饒富。祖守禮常輸邊二十一萬。養春官中書。有黃山收息不貲。又淮浙中鹽與從兄弟訐訟。置僕吳榮於獄。榮脫入京。訴於東廠。誣其私占黃山。歷年獲租稅六十餘萬金。忠賢遂矯旨逮養春至京。坐養春贓六十餘萬。程夢庚贓十三萬六千。其山場木植估價三十餘萬。命官變易之以助大工。忠賢以能發奸剔弊。廕錦衣衛指揮。時養春等俱拷死。工部遣主事呂下問至歙追產。吳氏家已破。其妻女俱自縊。呂下問專召富家派買。坐累至破家者甚多。激民變。下問遁回。忠賢復命太僕寺丞許志吉至歙續追。志吉卽徽人。其酷不減下問。殺揚州知府劉鐸。方鐸下獄時。李承恩方震孺同繫獄。鐸與二人相得甚洽。會鐸以前詩乃歐陽暉所作。事白得釋。遂爲承恩行金救免。爲張體乾所緝獲。體乾心欲媚璫。遂誣鐸與假官曾雲龍同謀。倩道士方景陽詛呪廠臣。忠賢聞之。怒甚。卽使谷應選逮景陽至。榜掠數百。景陽不勝楚。誣服。然景陽實未識鐸。具獄時。鐸亦不復與景陽面質。獄成。始擬戍。旣擬絞。賢矯旨令從重擬。是時景陽已斃於獄。而刑部尙書薛貞承忠賢意。竟擬斬。決不待時。疏上。報可。方貞再鞠時。語鐸曰。當今之時。以己功名爲重耳。他人生死

何與己事。鐸曰：一時功名有限，千秋清議難逃。貞大恨之，撲之。二十未幾，詔斬於西市，并戮景陽屍。浙江巡撫潘汝禎議爲忠賢建祠宇，乞賜額。從之。時汝禎疏先至，而巡按劉之侍疏遲至一日，忠賢怒，削奪之。僉都御史周起元下獄拷死。九月，削廣西副使曹學佺籍。時學佺有野史紀略一書，議論與要典相反，故削籍毀板。以皇極殿工成，晉魏忠賢爲上公，加恩三等。原封肅甯侯魏良卿進甯國公，賜鐵券。世襲。加吏部尙書侍郎周應秋等十八人宮保，進秩金幣有差。馬嘉會、崔呈秀、廕子錦衣衛指揮世襲郭允厚、薛鳳翔、廕子入監徐大化、孫杰升工部尙書，科道郭興言加銜，賜銀幣有差。加恩張惟賢等七人，傅應星加太子太保，李承錦加太子太傅，魏士望等十四人升都督僉事，各賜銀幣有差。又敕賜魏忠賢莊田二千頃，甯國公祿米照魏國公例歲支五千，以示酬眷至意。蘇杭織造李實奏廠臣祠宇已建，乞授杭州衛百戶沈尙文等永守祠宇，世爲祝釐。崇報上允之。祠建於西湖之麓，居關壯繆岳武穆祠之中，備極壯麗。閣臣縉紳施鳳來撰記。張瑞圖書丹，賜額曰普德。子衿微有反唇者，則守祠之豎叢毆之。蘇州立普惠祠，松江立德馨祠者，巡撫毛一鷺。巡按徐吉也。淮安立瞻德祠，楊州立沾恩祠者，漕運郭尙友。巡按宗楨模許其孝也。蘆溝橋立隆恩祠者，工部郎中曾國禎也。崇文門內立廣仁祠，宣武門外立茂勳祠者，順天府通判孫如列。府尹李春茂。巡撫劉詔。巡按卓邁。戶部主事張化愚也。濟寧立昭德祠，河東立褒勳祠者，巡撫李精白。巡按李燦然。黃憲卿。并漕運郭尙友也。河南立戴德祠者，巡撫郭增光。巡按鮑奇謨。守道周鏘也。山西立報功祠者，巡撫牟志夔。曹爾楨。巡按劉宏光也。大同立嘉德祠者，巡撫王點。巡按張素養。汪裕也。登萊立報德祠者，巡按李嵩也。湖廣立隆仁祠者，巡撫姚宗文。巡按溫皋謨也。四川房

山立顯德祠者。工部郎中加侍郎何宗聖也。陝西立祝恩祠者。巡撫朱童蒙。巡按莊謙。王大中也。徽州立崇德祠者。知府頡鵬也。通州立懷仁祠者。督漕內監李明道也。通州昌平二鎮立崇仁彰德二祠者。總督閻鳴泰也。密雲立崇功祠者。巡撫劉詔。巡按倪文煥也。林衡署中立永愛祠者。庶吉士李若琳也。嘉蔬署中立治恩祠。良牧署中立存仁祠者。上林監丞張永中也。福建則絕未有請。江西亦最後。明年六月內方題建賜隆德祠者。巡撫楊廷憲。巡按劉述祖也。各曲意獻媚。務窮工作之巧。攘民田墓。伐人樹木。無敢發聲。其上食饗祀一如王公。像以沈香木爲之。眼耳口鼻手足宛轉一如生人。腹中肺腸皆以金玉珠寶爲之。衣服奇麗。髻上穴空其一。以簪四時香花。一祠木像頭稍大。小豎上冠不能容。匠人恐急削而小之。以稱冠焉。小豎抱頭慟哭。責匠人。薊州道胡士容下獄。士容任薊州督師有聲。崔呈秀薦其妾弟蕭惟中。宋珏等爲守備。私人鄭冲字等爲中軍。不從。且置之法。欲建祠於薊州。士容又勿聽。遂激忠賢怒。矯旨逮之。許顯純拷掠最毒。幾斃。大學士顧秉謙回籍。冬十月。順天府丞劉志選上言。張國紀怙惡不悛。上下旨切責。國紀后父也。后賢明。客氏忌之。誣稱后非國紀女。幾搖天聽。忠賢嗾志選及御史梁孟環論之。志選疏有丹山之穴。藍田之種等語。尤悖逆。上一日幸后宮。顧見几上書一卷。問后何書。曰。趙高傳也。上默然。忠賢益怒。次日。伏壯士數人於便殿。上御殿。搜得之。懷刃上。大驚。送廠衛。忠賢乃誣后父國紀謀立信王爲不軌。欲興大獄。謀之王體乾。曰。主上凡事憤憤。獨於夫婦兄弟間不薄。脫有變。吾輩無類矣。忠賢懼。乃亟殺之以滅口。事得寢。

七年春正月。削禮部尙書李思誠。吏部主事于志舒。懷來兵備邱志充籍。命錦衣衛逮志充。同上林監署。

丞王家棟下獄。家棟以太醫院醫士授署丞，出入崔呈秀門。時戶部主事于志舒託家棟通賄呈秀，得除吏部。而懷來兵備邱志充亦與棟有交，囑棟營求呈秀，謀升太僕寺卿。棟暮夜攜賂呈秀，適遇廠中旂尉獲之，棟窘甚，往呈秀家叩門求解。時呈秀與禮部尙書李思誠接壤而居，遂誣以此，所以賂思誠者，忠賢疏發其事，而思誠實不知也。因削籍。魏忠賢欲任天下兵柄，以提督忠勇營內操太監劉應坤、陶文紀用鎮守山海關。又命司禮監涂文甫總督太倉節慎二庫，原任司禮監崔文昇、李明道總督漕運，疏通河道。凡司道以下俱行屬吏禮。李明道至淮，以淮安道楊廷槐不廷跪，參論削籍。削翰林陳仁錫、文震孟、鄭鄮籍，擬孫文豸、顧同寅罪，斬文豸、仁錫、戚也。嘗作策論嘲時，忠賢知之，因誣文豸造妖言，謗朝政，置重辟。所指妖言者，則韓愈原道篇、欽天監步天歌也。先是，仁錫在講筵，因王恭廠火災，又見正人屠戮，忠賢竭土木不休，講時不避忌諱，忠賢怒，復以不撰甯國敕，怒愈甚，遂命許顯純擬文豸獄。詞連仁錫等，因削職，追奪誥命。夏四月，遵化道耿如杞下獄。時劉詔巡撫順天，行縣至肅甯，叩首於忠賢家，及謁祠，見忠賢像，卽行五拜三叩頭，因創立生祠，諭意於如杞，不應祠成，又欲率如杞往拜，如杞半揖而出。事聞，忠賢怒，令詔疏劾之，疏連入，而如杞下獄。遣三王之國，忠賢包藏禍心，故有是遣。五月，監生陸萬齡請建魏忠賢祠於國學之旁，謂孔子作春秋而忠賢作要典，孔子誅少正卯而忠賢誅東林，許之。秋七月，以邊功加恩，魏忠賢三等廕弟姪一人，錦衣衛指揮世襲王體乾等各有差，旣而以廠臣安攘天下，封魏鵬翼、安平伯三殿告成，加寧國公魏良卿太子太保，襲伯爵錦衣衛指揮魏明望進秩少師，封魏良棟爲東安候。時良棟僅三歲，鵬翼二歲，世襲賜奉聖夫人客氏金幣，加恩三等廕一人，錦衣衛指揮使世襲。以

田吉爲兵部尙書。霍維華總督薊遼。袁崇煥不爲魏忠賢所喜。邊功不敘。恩廕。維華請以已廕讓之。上下旨切責。初。維華內弟陸蘆臣爲午門擋。得通於忠賢。因進仙方靈露飲。其法雜取秬稷諸米淘淨入木甌。蒸之。甌中底安長頸大口空銀瓶。一米漸添。漸熟。水漸熟。漸易。不數易而瓶中之露滿矣。乃米穀之精也。上飲而甘之。以餘瀝分賜近侍。及上不豫。忠賢歸罪於此。因恚維華。維華又偵知上彌留。遂先與忠賢貳。八月。以崔呈秀爲兵部尙書。少傅兼太子太傅。仍兼左都御史。奪情視事。從來九卿未有兼官如呈秀者。呈秀初以御史監工。帶左都銜。及晉司馬。尙如故。旣竊兵柄。復擅紀綱。奪情視事。不用綬墨。上不豫。禮部頒爵賞。列封廕。羣臣謝恩之日。卽帝上賓之日也。二十二日乙卯。上崩。初。上病亟時。召皇弟信王入。諭以當爲堯舜之君。再以善事中宮爲託。及委用忠賢。語旣崩。忠賢自出迎王入。王危甚。時羣臣俱在寓。聞訃。恐入朝之時有他變。生死且不測。厥明。至殿門。宦者持門不得入。告以宜用喪服。旣改服。又言未成服。宜如常。羣臣奔走出入者三。氣喘且不續。哀訴宦者乃得入。旣哭。大行皇帝。司禮太監王體乾及忠賢在喪次。獨體乾語禮部備喪禮。忠賢目且腫。無所言。羣臣出。少頃。獨呼兵部尙書崔呈秀人。屏人語移時。祕不與聞。或曰忠賢欲自篡。而呈秀以時未可止之。丁巳。信王卽皇帝位。九月。東廠太監魏忠賢乞辭。位不許。奉聖夫人客氏出外宅。國子司業朱之俊劾監生陸萬齡。曹代請祠。魏忠賢國學宜罪。命下獄。忠賢乞止建祠。上優答之。其前賜額如故。餘俱罷止。同時更有一張生者。欲上疏以忠賢與孔子並尊。入國學。自稱見子路擊之。遽殂。給太師甯國公魏良卿。少師安平伯魏鵬翼鐵券。巡撫江西僉都御史楊邦憲。巡按御史劉述祖。請建魏忠賢祠。不許。冬十月。巡撫登萊孫國楨報宜川之捷。敘及廠臣。論賞。

廢魏忠賢、王體乾、徐應元、崔呈秀各錦衣衛指揮同知。御史楊維垣劾兵部尚書崔呈秀，呈秀奏辨，求之。次日，百官哭臨，忽隆道閣前有數小內臣招呼兵部尚書崔家，羣臣錯愕，所言公當公言之，豈呈秀所得私耶？臣言及此，不寒而栗。又云：祖制不許上言大臣德政，何況內臣？語頗侵忠賢。工部主事陸澄源上言四事：正士習，糾官邪，安民生，足國用。其正士習略曰：比來士氣漸降，惟以稱功頌德爲事。廠臣魏忠賢服事先帝，論功行賞，自有常典，何至寵踰開國爵，列三等也？外廷奏疏不敢名書姓，盡廢君前臣名之禮。釐祝遍於海內，奔走狂於域中。士習漸衰，莫此爲甚。兵部主事錢元愨上言：魏忠賢以梟獍之姿，供綴衣之役，先帝念其服勤左右，假以事權，羣小蟻附，勢漸難返。稱功頌德，布滿天下。幾如王莽之妄引符令，列爵三等，畀於乳臭。幾如梁冀之一門五侯，徧列私人，分置要津。幾如王衍之狡兔三窟，與珍輦寶，藏積肅寧。幾如董卓之鄙塢自固，廣開告訐，誅鋤士類。幾如節甫之鉤黨株連，陰養死士。陳兵自衛，幾如桓溫之壁後置人，使先帝而蚤知其如此，亦必有以處忠賢矣。卽皇上念其勤勞，貸之不死，宜勒歸私第，使國家無尾大之患。魏良卿輩既非開國之勳，又非從龍之彥，安得玷茲茅土？自宜褫革。至告訐獲賞之張體乾、煨煉驟貴之楊寰、夫頭乘轎之張淩雲、委官開棍之陳大同，號稱大兒之田爾耕、甯國契友之門太始，凡爲爪牙，俱宜明暴其罪，或殛或放，而奸黨肅清矣。貢生錢嘉徵上數忠賢之罪，曰：並帝內外封章必先關白，稱功頌德上配先帝，及奉俞旨，必曰朕與廠臣自古未聞有此奏體。曰：蔑后皇親，張國紀於御前面，折逆奸，遂遭羅織，欲置之死，賴先帝神明，祇膺薄懲。不然，皇親危則中宮危矣。曰：弄兵，祖宗朝不聞內操，忠賢外脅臣工，內逼宮闈，操刀禁中，深可寒心。曰：無二祖列宗，高皇帝垂訓，中涓不許干預朝政，乃忠賢



一手障天。流毒縉紳。凡邊腹重地。漕運咽喉。多置腹心。意欲何爲。曰克削藩封。三王之國。莊田賜賚甚薄也。而忠賢封公侯伯之士田膏腴萬頃。曰無聖先師爲萬世名教主。忠賢何人敢祠太學之側。曰濫爵古制非軍功不侯。忠賢竭天下之物力。佐成三殿。居然襲上公之爵。覲不知省。曰邀邊功。遼左用兵以來。墮名城殺大帥。而冒侯封伯。曰傷民財。郡縣請祠遍天下。計祠所費不下五萬金。敲骨剝髓。孰非國家之脂膏乎。曰褻名器。順天賢書崔呈秀之子鐸目不識丁。遂登前列。疏上俱報聞。太監魏忠賢有罪免。甯國公魏良卿改錦衣衛指揮使。東安侯魏良棟改指揮同知。安平伯魏鵬翼改指揮僉事。十一月甲子。安置魏忠賢於鳳陽籍其家。初上神明默操。忠賢黨與林立。莫發其奸。楊維垣首糾崔呈秀語侵忠賢。而崔魏之勢衰。後陸澄源錢元愨直攻忠賢。至錢嘉徵十大罪疏上。忠賢不勝憤。哭訴於上。上命內侍讀嘉徵疏使聽之。忠賢震恐喪魄。客魏相倚。知信邸內監徐應元爲上所任。忠賢屈身事之。餽以貨。告之辭。東廠印。援爲後勁。應元果爲間。至是謫忠賢鳳陽司香祖陵。籍客魏二氏。安置徐應元於顯陵。尋謫戍。丁卯諭兵部曰。逆惡魏忠賢擅竊國柄。誣陷忠良。罪當死。姑從輕降發鳳陽。不思自懲。素蓄亡命之徒。環擁隨護。勢若叛然。令錦衣衛擒赴治其罪。庚午魏忠賢宿阜城尤氏邸舍。其黨密報上旨。知不免。夜同李朝欽自經。忠賢初直東宮。有道人宿朝天宮。日歌市中曰。委鬼當朝立。茄花滿地紅。蓋指客魏也。至是始驗。下魏良卿鎮撫司獄。庚辰奉聖夫人客氏有罪誅。先是籍其家。命太監王文政嚴訊之。得宮人姪身者八人。蓋出入掖庭。多攜其家侍媵。冀如呂不韋李園事也。上大怒。立命赴浣衣局掠死。子候國興下獄。良卿國興俱伏誅。客光先客璠楊六奇等永戍。光先璠客氏之兄子。六奇忠賢之壻也。初忠賢肆惡。皆客氏成之。忠賢晤

客氏必屏宮人密語移時。其危中宮。害裕妃。成妃。用王體乾。殺王安等。皆客氏造意也。天啓初。矯旨慰留客氏。皆體乾爲之。客氏在宮中。乘小轎。內官負之。如妃嬪禮。儼然自視爲上八母之一。誕日上。必臨幸。升座勸飲。賞賚無限。中宮皇貴妃迥不及也。客氏往私宅。內侍王朝忠等數十人著紅玉帶。前驅。客氏盛服。倩粧。乘輿由嘉德門。經月華門。至乾清宮前。亦不下輿。出西下馬門。呼殿侍從之盛。遠過聖駕。燈炬簇擁。熒然白晝。衣服鮮華。儼若神仙。都人士所罕見也。其到私宅。升廳事。自管事。至近侍。挨次叩頭。老祖太太。千歲之聲。喧闐震天。各以銀幣犒答之。欽賜金幣無算。每日三時。輟御前膳。以賜絡繹不絕。在外或住旬日。忠賢促之始入。出入皆以五更。忠賢亦有私第。與客氏居。斜對不遠。先是熹宗崩。上准歸私第。客氏五更。衰服赴梓宮前。出一小函。用黃色龍袱包裹。皆先帝胎髮痘痂。及累年鬢髮落齒指甲等。痛哭焚化而去。良卿謹慎。稍善言詞。國興昏愚。與人坐。輒欠伸入夢鄉。至是俱駢首受戮。嬰孩赴市。有盹睡未醒者。天下以爲慘毒之報。無不快之。給事中許可。徵劾崔呈秀。下吏部勘處。都給事中吳鴻業論。吏部尙書周應秋。南京兵部右侍郎潘如禎。及呈秀子倖舉。呈秀歸薊州。列姬妾羅諸珍異器。縱飲。飲一卮。卽擲壞之。飲已。自經。其子鐸覆試。僅構二義。削籍戍邊。廷議呈秀死有餘辜。命法司按律暴其罪於天下。河南道御史倪文煥。吏部郎中周良材。工部尙書吳淳夫。吏部尙書周應秋。兵部尙書田吉。太僕寺卿白官。始尙寶司卿魏撫。民並劾免。東廠太監張體乾。漕運太監李明道。崔文昇免。復先帝成妃李氏。裕妃張氏。封號。右都督張國紀爵。釋薊鎮兵備道耿如杞於獄。復其官。提督操江都御史劉志選。削籍。復撫寧侯朱國弼俸。復故太監王安官。予祭葬。立祠愍勞。降太監李實。奉御安置南京。涂文輔。司香鳳陽。

尚書楊夢寰、孫杰、左副都御史李夔、龍免。戶部員外王守履奏逆黨文臣崔呈秀、田吉、吳淳夫、李夔、龍、倪文煥爲五虎。武臣田爾耕、許顯純、孫雲鶴、楊寰、崔應元爲五彪。命削爾耕籍，籍其家。爾耕貪婪，好羅織諸臣，榜掠慘毒，皆爾耕爲之。御史楊維垣參太監李永貞、劉若愚、佐逆御史卓邁亦言永貞習於文字，其惡過於忠賢，遂下永貞獄。戍顯陵。初，永貞辭任，聞忠賢敗，其黨徐應元、王國泰俱危，餽太監王體乾。王永祥、王文政各五萬金，懼泄，以獻內承運庫。永貞知之，卽遁。久而獲之，赴戍所。十二月，監生王之鼎劾大理寺副許志吉借黃山一案毒害民命，下志吉於理。初，監生胡煥猷論大學士黃立極施鳳來、張瑞圖、李國權當魏忠賢專權，揣摩意旨，專事逢迎，浙直建祠，各撰碑稱頌，宜亟罷，併糾督撫按之請祠者。法司引臥碑生員禁言事律，論杖除名。立極等各上疏辨，言忠賢碑文使其食客游士自爲之，至於取旨褒贊，則文書官稱上命擬票，臣等不能盡職，計惟有見幾之作，而忠賢不惟視臣等去就輕，卽視臣等死生亦輕，不得已徘徊其門，冀有毫髮之益於國，則亦少盡區區之心耳。鳳來疏中並引及陳平、周勃、狄仁傑事，上優答之。太常寺卿阮大鍼論魏忠賢之罪，且辨要典，勒入臣名。釋大理寺少卿惠世揚、御史方震孺獄。李承恩論減卹工部郎中萬燦。定逆案，先將五虎、五彪下法。司議罪，時呈秀已伏法。夔、龍、淳夫、文煥、吉追贓遣戍。爾耕顯純死，應元、雲鶴、寰戍邊。懷宗崇禎元年春正月，召前兵部尚書霍維華。維華辭救命，且述忤熹始末，薦周道登、郭鞏，不允辭。法司追論魏忠賢等罪，上命磔忠賢屍於河間，斬崔呈秀於薊州，又戮客氏屍，尋復誅許顯純、田爾耕。天下快之。阮大鍼請合計先朝奸狀，略曰：汪文言以徽州庫吏逃罪，投王安幕下，引左光斗入幕，移宮之疏。

紛紛迎合。此中外謀傾宮闈之始。御史賈繼春疏揭力爭。汪文言等嗾臺省諛王安。佐楊漣。左光斗。繼春削職。此中外謀殺言官之始。吏部尚書周嘉謨雅重熊廷弼。復任經略。而重處姚宗文。馮三元。此中外謀危封疆之始。汪文言處霍維華以謝王安。逆闖效之。逐戚畹。撼中宮。此中外謀危母后之始。時逆黨次第伏法。二月。免楊漣。熊廷弼等誣賊。戶部尚書曹爾楨免。爾楨撫山西。祠魏忠賢。明年追論削籍。御史高宏圖劾順天府丞劉志選。太僕寺少卿梁夢環。順天巡撫劉詔媚璫。俱逮之。下太監李永貞。劉若愚。李實於獄。永貞粗通文墨。爲司禮監秉筆導虐。李實往蘇松織造。誣陷周起元。周順昌等。若愚博洽典故。永貞每諮問之。俱爲言官所劾。尋誅李永貞。其籍銀二十七萬。太監崔文昇下獄。戍南京。五月。兵部推戎政尚書霍維華署督師事。工科給事中顏繼祖上言維華狡人。璫熾則借璫。璫敗則攻璫。擊楊左者維華也。楊左逮而陽爲救者亦維華也。以刑科給事中三年躡致尚書。無敍不及。有賚必加。卽維華難以自解。乞褫革以儆官邪。遂罷維華行邊。尋免官歸。太僕寺少卿楊維垣削籍。御史鄒允祚劾維垣爲逆璫私人。占氣最先。轉身最捷。貪天爲功。沽名反覆。故有是命。光祿寺卿阮大鍼免。大鍼與左光斗同里。有隙。天啓四年。吏科都給事中闕宜補大鍼。廷議以大鍼貪邪。遂授魏大中。其後左魏被陷。皆大鍼意也。至是。御史毛羽健劾其黨邪。明年追論削籍。兵科給事中李魯生。太僕寺少卿李蕃相繼免。魯生當魏忠賢時迎合中旨。倡爲執中之說。李蕃督學。建忠賢祠。至是。給事中顏繼祖。御史王之朝劾罷之。魯生蕃故與禮科給事中李恆茂號三李。謠曰。官要起。問三李。都察院左僉都御史賈繼春免。先是。繼春首爭移宮。削籍。楊左去。中旨復繼春官。上嗣位踰月。繼春督學南畿。馳疏劾忠賢。怙權流毒狀。累遷內臺。至

是劉新堞劾其變詐。明年削籍。編修倪元璐追論大學士顧秉謙、魏廣微媚璫，奪恩廕。廣微尋削籍。上曰：「故輔魏廣微持國柄，授逆璫，毒遍海內，實爲禍首。其以先朝焦芳例除名爲民，以爲人臣附奸不忠之戒。」六月，前吏部尚書周應秋、戶部尚書黃運泰、兵部尚書閻鳴泰、太僕寺卿郭興治、御史卓邁並削籍。南京兵部尚書范濟世免，以言官劾其媚璫也。大學士楊景辰新被命，亦以豫修要典罷，誅前提督巡捕營張體乾、谷應選。八月，前兵部尚書邵輔忠、戶部尚書李精白、黃憲卿、翰林院編修吳孔嘉削籍。孔嘉微時，故怨族人及登第，因詰奏黃山之案，傾陷數百家。九月，協理京營兵部尚書呂純如免。二年春正月，召大學士韓爌、李標、錢龍錫、吏部尚書王永光、刑部尚書喬允升、左都御史曹于汴定逆案。諭以首開諂附、傾陷擁戴及頌美不置，并雖未頌祠而陰行贊導者，據法依律，無枉無徇。初，逆璫既伏法，上欲因臺諫言定逆案。大學士韓爌、錢龍錫不欲廣搜禁錮，僅列四五十人以請。上大不悅，再令廣搜。且云：「皆當重處，輕則削籍。」閣臣又以數十人進，上怒其不稱旨，諭以稱頌贊導速化爲題，皆書列入。又曰：「忠賢一人在內，苟非外廷逢迎，何遽至此？且內臣同惡，亦當入之。」閣臣以外廷不知內事對。上曰：「豈皆不知，特畏任怨耳。」閱日，召閣臣指黃袱所封章疏，纍纍示閣臣。曰：「此皆璫實跡也。宜一一按入之。」閣臣知勢難遺漏，乃云：「臣等職司輔導，三尺法非所習也。」上呼王永光問之，以吏部止諳考功不習刑名對。乃召喬允升、曹于汴參定之。二月壬子，召廷臣於平臺，向張瑞圖來宗道，何以不在逆案？對曰：「二臣無實事。」上曰：「瑞圖善書，爲璫所愛。宗道祭崔呈秀母，稱在天之靈，其罪著矣。問賈繼春何以不處？」閣臣言繼春欲善待選侍，不失厚道。後雖反覆，其持論閒有可取。上曰：「唯反覆故爲小人。」於是發原奏，并前紅本未入各官六十

九人案列無遺。三月辛未，廷臣上欽定逆案，詔刊布中外，以七等定罪。魏忠賢、客氏磔死外，曰首逆。同謀兵部尚書崔呈秀等六人，結交近侍，提督操江都御史劉志選等十九人，結交內侍。次等大學士魏廣微等十一人，逆孽軍犯，東平侯魏志德等三十五人，諂附擁戴軍犯，內監李實等十五人，結交內侍。末等俱配贖。大學士顧秉謙等百二十八人，祠頌，照不謹例冠帶閑住。大學士黃立極等四十四人，谷應泰曰：魏忠賢者，河間惡少，肅甯醜類，樗蒲坐困，腐身自媒，斯固以刀鋸之兇殘，冀鼎俎之拾藩者也。遂乃潛事皇孫，惟供刀匕。玄宗藩邸，力士傾心，肅帝東宮，輔國稱職，攀鱗附翼，有自來爾。乃熹宗之初御，忠賢輒伺嘖笑，欲攬太阿，而乳媪客氏又以妖佞毀政之姿，爲治比對食之舉。於是勢同羶附，情昵晏私。王聖寵而京閨煽孽，趙嬖尊而甫節構禍。女子小人朋淫於國矣。乃王安者，名在閣餘，職邀顧命，郭耽清謹，不事威權。呂強剛直，終陷刑戮，蓋自安死而忠賢愈肆滔天，益無顧忌。諂奉者登進，忤恨者誅傷。此左官有回天之名，令致有阿父之號也。乃若釁開宗社，毒流縉紳，誣織封疆，飛文宮禁，威明豈貨，羣羌乃輸。左校張儉，詎危社稷，更煩北寺耶。洎乎文言冤獄，徧染清流，楊漣、左光斗等並繫銀鑕。魏大中、周順昌等同嬰桎梏，正如朱竝所告二十四人，李膺所坐六百餘士，雖夕陽亭下，震醜何辭。首陽山前，滂屍不愧。而田爾耕三木橫加，許顯純五毒備至。乳虎乍逢，盡灑蓑宏之血。蒼膺所擊，皆含杜伯之冤。是則拊髀之憤，原不馮生而破柱之風，猶能爲厲矣。倘非金閭告變，佩章倡怒，殺詔使於廁上，沈駕帖於河中，則懸金之募，沈命還多。瓜蔓之抄，囊頭未已也。又若中外戚屬，濫賜襲封，呈秀淳夫具邀顯秩，五人同貴，首自單超。一子爲侯，咸尊馬惠，而伯榮出入宮掖，張朔貪橫野王，又有光和太尉，承望內官，延光司空，徧徵親故。此

所謂蹶馬番徒。倡予和汝者也。尤可異者。祠宇徧天下。俎豆及學宮。賢非苟勗。乃祀安陽。學異荆公。敢配孔子。頌功德者四十萬人。趨勢利者。鴻都門下也。至操兵禁御。將衷甲於桃園。蓄孕閨房。欲繼牛於典午。又且遣王郡國。遠徙扶蘇。危后中宮。謀誅伏氏。取代之規。誠難掩覆矣。而况大行當憑几之日。多官邀橫拜之恩。弓裘不御。鬼蜮仍多。城社已摧。狐鼠猶據。所幸者。武陽色變。易與北軍。猶豫無成。而信邸英開。神明獨運。雲龍初入。方深斷仗之憂。江陵收璽。漸除徐傅之黨。迨至卓躋。然京莽頭傳宛。而人心始快。國紀肅焉。嗚呼。自予考之神光二廟。朝議紛爭。元黃溷淆。朋徒互揣。至此則鉤黨同文。得禍斯酷矣。然封諱事發。始知顧及之賢。蔡京事敗。益信元祐之正。身雖蕩滅。名義所從判爾。

## 卷七十二

### 崇禎治亂

熹宗天啓七年八月。上不豫。時魏忠賢張甚。中外危栗。上召信王入見。諭以吾弟當爲堯舜之君。信王惶恐不敢當。但云陛下爲此言。臣應萬死。信王出。上崩。忠賢自出請王入。王危甚。袖食物以入。不敢食。大官庖也。當是時。羣臣無得見王者。王秉燭獨坐。久之。見一奄攜劍過。取視之。留置几上。許給以賞。聞巡邏聲。勞苦之。問左右。欲給以酒食。安從取乎。侍者以宜問之光祿寺。傳令旨取給之。歡聲如雷。次日。卽皇帝位。於中極殿。受百官朝。毋賀。朝時。忽天鳴。九月。諭停刑。十一月。魏忠賢客氏伏誅。罷各道鎮守內臣。戶部郎中劉應遇上言。天下六大苦。一逮繫。二獄死。三追賊。四仕途去就。五新進禁錮。六廷臣被劫。上然之。

命逮死各臣。賊銀盡免之。釋其家屬。魏崔黨次第伏誅。時魏璫甚熾。帝不動聲色。逐元兇。旁無一人之助。而神明自運。宗社再安。崇禎始政。天下翕然稱之。工部尚書楊夢寰請停開納事例。廷推閣員。以錢龍錫、楊景辰、來宗道、李標、周道登、劉鴻訓爲禮部尚書。東閣大學士。罷蘇杭織造。諭曰：封疆多事。征輸重繁。朕甚憫焉。不忍以衣被組繡之工。重困此一方民。其俟東西底定之日。方行開造。以稱朕敬天恤民至意。十二月。復故建文臣練子寧官。南京御史劉漢言四事。崇正學以培治本。勵廉恥以清仕路。惜名器以尊體統。重耕農以節財用。上是之。命吏部嚴加清汰。凡會典額外官。添註添設者。有闕勿推補。文臣非卿貳武臣非勛爵。總兵非實有戰功者。不得加保傅銜。上御便殿。閱章奏。聞香烟心動。疑之。出步階城閒。乃定。詢內官此自何至。曰宮中舊方。上叱令毀之。勿復進。太息曰：皇考皇兄皆爲此誤也。懷宗崇禎元年春正月。禁衣飾侈僭及婦女金冠袍帶等。從御史梁天奇之言也。命司禮監斥賣魏忠賢田宅。因以賜第。請上曰：俟東西底定。留賜第以待功臣。榜曰策勳府。二月。以侍讀學士溫體仁直經筵日講。三月。以周延儒爲禮部右侍郎。五月。上召廷臣於平臺。諭輔臣來宗道曰：票擬之事。宜悉心商確。諭吏部曰：起廢太多。會推宜慎。責戶部措辦邊餉無術。侍郎王家禎引罪。論邊事。兵部尚書王在晉語未詳。命中官給筆札錄進。諭刑部曰：天時亢旱。用法宜平允。次日復諭吏戶兵三部曰：昨召對九卿科道官。輔臣劉鴻訓言更調甚速。宜行久任之法。責實效。又云海內疲於賦役。朕甚憫之。夫更調速則民滋擾。任事久則功易成。自今藩臬郡邑毋輕改調。言官薦舉人才。市私恩。坐之遼黔。兵興催科日益加。其有司私徵者。撫按禁飭毋貸。六月。上召廷臣於平臺。以插漢故。發帑十萬給邊吏。刑科給事中薛國觀疏



營伍之弊。令自宣讀。至關門虛冒。上善之。復示諸臣。召提督京營保定侯梁世勛。戒以訓練。已命翰林官凡值召對。入侍記註。戶科給事中黃承昊上言。祖宗朝邊餉止四十九萬三千八百八十八兩。神祖時至二百八十五萬五千九百餘。先帝時至三百五十三萬七千七百餘。其他京支雜項。萬歷閒歲放不過三四萬一千六百餘。邇來至六十八萬二千五百餘。今出數共百餘萬。而歲入不過三百二三十萬。卽登其數。已爲不足。而重以逋負。實計歲入僅二百萬耳。戍卒安得無脫巾。司農安得不仰屋乎。乞敕各邊督撫。清覈歷年增餉。至京支雜項。亦令各衙門自加嚴汰。又先臣葉淇變鹽法。改折色。以至邊粟踊貴。必復祖制。開中輸邊之法。西北多曠土。責有司開荒以足軍餉。上納之。召廷臣於平臺。以御史吳玉錢糧積弊疏。宣示閣臣。問何不指名也。玉對曰。此夙弊。非獨一人一事。無可指名。出黃承昊疏。問戶部侍郎王家禎。何濫增至此。曰。皇祖入數多。出數少。故太倉粟紅朽。內帑又無算。後邊臣隨請隨給。出入不相準。又讀至鹽法。閣臣請復祖制。關屯種引。上然之。出宣府巡撫李養冲疏云。旗尉往來如織。不賂之。恐毀言之日至。賂之。愁物力之難勝。上不憚。兵部尙書王在晉曰。大同焚掠。宜以按臣勘。不煩旗尉。上曰。疆事仗一喇嘛僧講款。諸文武何爲。敵不輕中國耶。諸臣退。時大同以插漢講款。不設備。故上責之。戶科給事韓一良上言。皇上召對平臺。有文臣不愛錢之語。然今之世。何處非用錢之地。何官非愛錢之人。向以錢進。安得不以錢償。臣起縣官居言路。以官言之。則縣官行賄之首。而給事爲納賄之魁。今言蠹民者。俱咎守令之。不廉。然守令亦安得廉。俸薪幾何。上司督取。不曰無礙官銀。則曰未完紙贖。衝途過客。動有書儀。考滿朝覲。不下三四千金。夫此金非從天降。非從地出。而欲守令之廉得乎。科道號爲開市。臣兩月來辭金五百。臣

寡交猶然。餘可推矣。乞大爲懲創。逮其已甚者。使諸臣視錢爲汚。懼錢爲禍。庶幾不愛錢之風可覩也。上召廷臣於平臺。命一良誦前奏。嘉獎之。擢一良右僉都御史。八月。諭曰。朕欲與大小臣工日籌庶務。而諸司各有職掌。恐不暇給。惟是輔臣左右拂予。自今非盛暑祁寒。朕當時御文華殿閱章奏。丁未。上御文華殿。翰林科道各二人備宣讀。中書舍人二人侍班。十月己丑。召廷臣於平臺。以錦州軍譁。袁崇煥請餉疏。示閣臣。閣臣求允發。上責戶部尚書畢自嚴。禮部侍郎周延儒曰。關門昔防敵。今且防兵。前甯遠譁。錦州尤而效之。未知其極。上問延儒若何。對曰。臣非阻發帑。雖予之。當益求經久之策。上稱善。又責科道官言事失實。卽召對商確。徒具文耳。諸臣俱愧謝。十一月辛未。召甯陽侯陳光裕。襄城伯李守筠。清平伯吳遵周。誠意伯劉孔昭於文華殿。問京營整理何若。各有所對。上以守筠總督京營。十二月己丑。大學士韓爌入朝。

二年夏四月。時秦晉飢。盜起。朝臣捐俸助餉。上曰。諸臣興利除害。國家受益多矣。何必言助。六月。御史李長春論周延儒有私不聽。九月。順天府尹劉宗周上言。陛下勵精求治。召對文華殿。躬勤細務。朝令夕考。庶幾太平立至。然程效過急。不免見小利而慕近功。夫近日所汲汲於近功者。邊事也。竭天下之力以養飢軍。而軍愈驕。聚天下之軍以冀一戰。而戰無日。此計之左者矣。今日所規規於小利者。理財也。民力已竭。司農告匱。而一時所講求者。皆聚斂之術。水旱災傷。一切不問。有司以培克爲循良。而撫字之政絕。大吏以催科爲殿最。而黜陟之法亡。赤子無甯歲矣。頃者嚴賊吏之誅。自執政以下。坐重典者十餘人。可謂得救時之權。然貪風不盡息者。由於道之未盡善。而功利之見不泯也。十一月。河南府推官湯開

遠言。皇上急於求治。諸臣救過不給。臨御以來。明罰敕法。自小臣以至大臣。與衆推舉。或自簡拔。亡論爲故爲誤。俱褫奪配戍。不少貸。甚者下獄考訊。幾於亂國用重典矣。皇上或以薦舉不當。疑其黨徇。四岳不薦。繇乎績用弗成。初未併四岳殛之也。皇上又以執奏不移。疑其藐抗。漢帝不從廷尉之請乎。亦以張釋之曰。法如是止耳。不聞責其逆命也。皇上以策勵望諸臣。於是多戴罪。夫不開以立功之路。而僅戴罪。戴罪無已時矣。皇上以詳慎望諸臣。於是有認罪。夫不晰其認罪之心。而槩以免究。認罪亦成故套矣。侵糧欺餉之墨吏。逮之宜也。恐夷由之侶。不皆韓范。宜稍寬之。不以清吏詘能臣。今諸臣怵於參罰之嚴。一切加派。帶征餘征。行無民矣。民窮則易與爲亂。皇上寬一分在臣子。卽寬一分在民生。如此則諸臣可幸無罪。而尤望皇上宮府之際。推諸臣以心。進退之間。與諸臣以禮。錦衣禁獄。非有寇賊奸宄。不可入。而謂大小分工。不圖報爲安攘者。未之有也。十二月。進禮部侍郎周廷儒爲禮部尙書。東閣大學士。三年春正月甲申。召戶兵工各科於會極門。令註銷案牘。各委給事中一人清理。六曹勒期奏報。前尙寶司卿原抱奇。劾大學士韓爌致寇。爌致仕歸。復故大學士張居正廕。賜故都督戚繼光表忠祠。六月。進禮部尙書溫體仁。東閣大學士。四年春正月。刑科給事中吳執御言。理財加派。不得已而用之。未有年餘。不罷者。捐助搜括二者。猶難爲訓。上曰。加派原不累貧。捐助聽之好義。惟搜括滋奸。若得良有司奉行。亦豈至病民乎。不聽。上召廷臣及各省監司於平臺。問浙江按察副使周汝弼。浙閩相連。海寇備禦之策。對曰。去秋寇犯海上。五日卽去。問江西布政使何應瑞。爾省宗祿。何以不報。應瑞曰。江西山多田少。瘠而且貧。撫按查覈。有司尙未報耳。

問湖廣右布政使杜詩爾楚去夏民變樹幟何也。詩曰：樹幟之後，地方仍安。問福建布政吳暘陸之祺海寇備禦若何。暘曰：海寇與陸寇不同，故權撫之。但官軍狃撫爲安，賊又因撫益恣，故數年未息耳。上問實計安在。祺曰：海上官兵肯出死力，有司練鄉兵築城，要地多設火器，以戰爲守，此上策也。問河南布政楊公翰賈鴻洙以收稅耗重宜斥有司。鴻洙曰：近奉命已革去矣。問廣東布政陳應元焦元溥曰：爾省所負宣大兵餉數十萬何也。應元曰：近已解納，問其數曰：七千兩。上少之曰：宣大重鎮急需，其毋玩。問山西按察使杜喬林流氛若何。對曰：寇在平陽，或在河曲，須大創之，但兵寡餉乏耳。上曰：前言寇平，何尙阻也。曰：山陝界河條去條來，故河曲被困。問河曲之陷，曰：賊未嘗攻，失於內應。問導賊何人乎。喬林曰：大抵出於饑民。問陝西參政劉嘉遇對曰：寇見官兵卽散，退復嘯聚。上曰：寇亦我赤子也，可撫撫之。曰：今方用撫。上曰：前王子順旣降，何又殺之。曰：彼撫仍掠，宜其僂也。近寇何如。對曰：一在延安，一在雲巖。宜川問廣東布政使陸問禮按察使孫朝肅。時問禮已除南贛巡撫。上曰：南贛多盜若何。對曰：南贛在萬山中，接壤四省，當行保甲，練兵伍，庶足弭賊。上曰：此須實效，空言何爲。問海寇若何。曰：廣東海寇俱至自福建，舟大而多火器，兵船難近，但守海門勿令登陸，則不爲害。問廣西布政鄭茂華李守俊靖江王府爭繼何也。對曰：憲定王二子履祥履祐履祥蚤沒，王請立履祐爲世子，而履祥有未奏選之妾生子，今已長矣，是以爭。向四川布政華敦復鄉紳挾御史何也。以逋賦對。上曰：守臣何不彈壓。對曰：遠方有司多科貢，故不能耳。時雲南布政婁九德被劾，問貴州布政朱芹以安位事。對曰：督撫臣責安位以四事，一擒奢崇明，一獻樊虎，奢寅妻馬人子阿甫，一送賊巡撫王三善人，一責削地。故議未決。對畢，召各官諭之，正己，率屬愛養百姓。

用命。有顯擢。不則隨罰之。各退謝。召左都御史閔洪學。左副僉都御史張捷。高洪圖。諭洪學曰。巡按賢則守臣皆賢。若巡按不肖。其誤非小。屢飭回道嚴核。何近日不稱職之多也。又曰。卿與吏部實心任事。天下不難爲。乃退。四月上。念旱。釋前工部尙書張鳳翔。左副都御史易應昌。御史李長春。給事中杜齊芳。都督李如楨於獄。五月。吳執御上言。昨見計臣疏。稱歲額四百萬。今加至七百萬。闕額尙百六十萬。則餉猶未裕也。加派則害民。不加派則害兵。前年遵永之變。袁崇煥。王元雅。皆以數百萬金錢。狼狽失守。而史應。張星。王象虞。左應選。各以一邑固守於嬰城之際。由此言之。今日言餉。不在創法。而在擇人。可知已。臣妄謂沿邊諸邑。宜敕吏部選補賢能。畀以本地錢糧。訓練士著。此法一行。餉不取償於司農。兵不借援於戍卒。計無便於此。上以錢糧留本地。則國課何從出。不聽。八月。吳執御論周延儒攬權壅蔽。私其鄉人。塘報奏章一字涉邊疆盜賊。輒借軍機密封下部。明畏廷臣。摘其短長。他日敗。可以捷聞。功可以罪按也。皇上習見延儒摘發細事。近於明敏。遂爾推誠。抑知廷儒特借此以行其私乎。上切責之。執御劾疏。凡三上。俱留中。十一月。中允倪元璐上言。原任中允黃道周抗疏獲譴。臣恐海內士大夫之氣化爲繞柔。前府尹劉宗周清恬耿介。道周旣蹇。謗承貶。宗周以骯髒投閒。天下本無人。得其人。又不能用。誰爲陛下奮其忠良者。上不聽。時道周以救錢龍錫。謫外。十二月。時考選科道後。更核在任征輸。於是戶部尙書畢自嚴下獄。熊開元。鄭友元俱謫。吏科都給事顏繼祖上疏救。上切責之。自是考選將及。先核稅糧。不問撫字。專於催科。此法制一變也。禮部侍郎羅喻義直日講。以尙書商王布昭聖武。章送閣。溫體仁裁其半。以所引京營大閱語也。喻義執不可。體仁上言。舊例惟經筵多進規語。日講則正講多。進規少。喻義以日

講而用經筵之例。駁改不聽。自愧不能表率後進。命下部議。聖聰天亶。何俟喻義多言。遂放歸。五年六月。兵部員外華允誠上言三大可惜。四大可憂。刺溫體仁。閔洪學。上切責之。允誠回奏。又極言其失。謂私沈演。唐世濟等。上怒。奪允誠俸。體仁上疏自理。十二月。詔停開納例。六年二月。諭吏部薦舉潛修之士。科道不必專出考選館員。須應先歷之推。垂爲法。冬十月。論囚。上素服御建極殿。召閣臣商確。溫體仁竟無所平反。陝西華亭知縣徐兆麒赴任七日。城陷。竟棄市。上頗心惻。體仁不爲救人。皆冤之。

七年春正月。刑科給事李世祺劾大學士溫體仁。吳宗達。謫於外。復罪考選郎中吳鳴虞。山西提學僉事袁繼成。上言曰。養鳳欲鳴。養鷹欲擊。今鳴而箝其舌。擊而繼其羽。朝廷之於言官。何以異此。使言官括囊無咎。而大臣終無一人議其後。大臣所甚利。忠臣所深憂。臣所爲太息也。且皇上所樂聽者讜言。而天下誤以攻彈貴。近爲天子所厭聞。其勢將波靡不止。上以越職言事。切責之。三月。山陝大飢。民相食。發金五萬賑之。免浙江崇禎三年以前織造。六月。江西飢。逋賦益多。觀政進士陸運昌上撫字八條。上可其奏。下戶部議。冬十月。上數御經筵。遇雪不輟。諭講官尙書韓日纘。姜增元等毋忌諱。少詹事文震孟講春秋。上論仲子歸。贈云。此見當時朝政有闕。所以當講。自今進講。當以此類推。十一月。侍讀倪元璐上制實八策。曰。離敵交。繕旁邑。優守兵。靖降戎。益軍餉。儲邊才。奠輦轂。嚴教育。又制虛八策。曰。正根本。伸公議。宣義問。一教條。慮久遠。昭激勸。勵名節。明駕馭。疏入。上令確奏伐交實計。其撫降戎。儲邊才。留秦晉餉。館監教習。俱下部。其制虛八策。多係奉旨。不必繼陳。旣而元璐再陳開敵之術。且請盡徹監視內臣。以重

邊疆不報。禮部右侍郎陳子壯嘗謁大學士溫體仁。體仁盛稱主上神聖。臣下不宜異同。子壯曰。世宗皇帝最英明。然祔廟之議。勳戚之獄。當日臣工猶執持不已。皇上威嚴有類世宗。公之恩遇孰與張桂。但以將順而廢匡救。恐非善則歸君之意也。體仁意沮。遂成嫌隙。八年春正月。兵部職方主事賀王盛再劾。溫體仁庸奸誤國。謫外。御史吳履中劾溫體仁。王應熊。并及監視內臣。上切責之。議湖廣加派。上以祖訓。凡郡王子孫。有文武才能堪任用者。宗人府具以名聞。朝廷考驗。授以秩。其遷除如常例。禮部右侍郎陳子壯上言。宗秩改授。適開僥倖之門。隳藩規。溷銓政。上以其沮詔閒親。下於理。明年四月。始得釋。已而蒞官多不法。公私苦之。二月。侍讀倪元璐上言。盜賊之禍。震及祖陵。國家大辱極矣。陛下下罪己之詔。布告天下。然此非徒空言也。今民最苦無若催科。未敢興言。冀停加派。惟請自崇禎七年以前。一應逋負。悉與蠲除。斷自八年。督徵有司。考成亦少寬之。東南雜擾。累無紀。如絹布絲綿顏料漆油之類。悉可改從折色。此二者於下誠益。於上無損。民之脫此。猶湯火也。至發弊而遠追數十年之事。糾章一上。蔓延不休。攀貽而旁及數千里之人。部文一下。冤號四徹。誰有以民間此苦告之陛下者乎。及今不圖。日蔓一日。必至無地非兵。無民非賊。刀劍多於牛犢。阡陌決爲戰場。陛下亦安得執空版而問諸燐燹之區哉。上是之。

補給事中劉含輝乞蠲陝西八年以上逋租。不許。承運庫太監周禮言。崇禎六年七年。省直金花銀共逋八十九萬。命趨之。夏四月。予故遼東總兵寧遠伯李成梁祭葬。五月。諭戶部暫開撥納濟軍需。秋七月。進文震孟禮部左侍郎兼東閣大學士。尋忤溫體仁罷歸。丙子。召廷臣於中左門試時政。邊才論。

又出各疏命翰林官擬上。八月，上諭致治安民全在守令，命兩京文職三品以下五品以上各舉堪任知府一人，亡論科第貢監，在內翰林科道，在外撫按司道知府各舉州縣官一人，亡論貢監吏士，過期不舉者議處，失舉連坐。冬十月乙巳，上罪己，避殿徹樂，下詔曰：朕以涼德，纘承大統，不期倚任非人，邊乃三入寇，則七年師徒暴露，黎庶顛連，國帑匱絀，而征調未已，閭閻凋敝，而加派難停，中夜思維，不勝媿憤。今年正月，流氛震驚皇陵，祖恫民仇，責實在朕，今調勁兵，留新餉，立救元元，務在此舉，惟是行閒文武吏士勞苦飢寒，深切朕念，念其風餐露宿，朕不忍安臥深宮，念其飲水食糞，朕不忍獨享甘旨，念其披堅冒險，朕不忍獨衣文繡，茲擇十月三日，避居武英殿，減膳徹樂，非典禮事，惟以青衣從事，與我行閒文武吏士甘苦共之，以寇平之日爲止。文武官其各省愆淬厲，用回天心，以救民命。十二月，城鳳陽，初，潁州賊將趨鳳陽，巡撫楊一鵬請移鎮，大學士王應熊擬旨止之，賊陷鳳陽，焚皇陵，幽宮不保，諸臣忌諱，不敢聞，尋以權穴爲解，又因而祕之，至是城始成。吏部尙書謝陞奏起廢張士範等一百六人，不果用，先是寬恤條款議及罪譴諸臣，奉旨下部，刑部方具招列名疏，請旨未下，而陞爲冢宰，銳意欲疏起用，大學士錢士升詔陞曰：公意大善，盍俟刑部疏下，先是罪而後起廢，方有次第，陞守前說不聽，疏上，臚列無有遺者，上怒，切責，遂下選郎於獄，而事不可爲矣，至是復以一百六人上，溫體仁力沮之，事遂中止。九年春正月，以劉宗周爲工部右侍郎，淮安武舉陳啓新上言：今天下有三大病，曰科目取人，資格用人，推知行取科道，惟皇上停科目，以詘虛文，舉孝廉以崇實行，罷推官行取，以除積橫之習，蠲災傷錢糧，蘇累困之民，而且專拜大將，舉行登壇推轂之禮，使其節制有司，便宜行事，庶幾民怨平而寇氛靖，上異



其言特授吏科給事中。命遇事直陳毋隱。啓新本庸人。時政府覘知上意。必有關門特達之典。故令啓新上書。跪正陽門。曹化淳實聞之於內。立致省垣。將借以搏擊善類。迨啓新既得進。惟從事敝車羸馬以逢迎上意。而政府有求皆不應。故府政恨之不見信任。三月。工部右侍郎劉宗周上言。皇上以不世出之資。際中興之運。卽位之初。銳意太平。甚盛心也。而施爲次第之間。未得其要。屬意邊疆賊臣。以五年爲期之說。進遂至戎馬生郊。震及宗社。而朝廷始有積輕士大夫之心矣。由此耳目參於近侍。腹心寄於干城。廠衛司譏防而告密之風熾。詔獄及卿士而堂廉之情違。人人救過不給。而欺罔之習轉甚。事事仰承。獨斷而諂諛之風日長。甚者參核之法。惟重征輸。官愈貪。民愈困。而賦愈逋。總理之外。復設監紀。權愈分。法愈廢。而盜愈多。夫君臣相遇。至難也。得一文震孟。以單詞報罷矣。得一陳子壯。又以過戇詔下獄矣。而於是市井雜流者。乃得操其訛說。投閒抵隙。以希進用。而國事尙可問哉。夫皇上不過始於一念之矯枉。而積漸之勢。釀爲厲階。遂幾於莫可匡救。則今日轉亂爲治之機。斷可識已。皇上所恃以治天下者。法也。而非所以法也。所以法者。道也。如以道。則必體上天生物之心。而不徒倚用風雷。念祖宗學古之益。而不至輕言改作。以寬大養人材。以撫循結人心。而且還內庭以掃除之役。正儒帥以失律之誅。慎宗賢以改秩之授。特頒尺一。遣廷臣。賈內帑。巡行郡國。爲招撫使。赦其無罪。而流亡者。專責撫鎮。陳師險隘。堅壁清野。聽其窮而自歸。誅渠之外。不殺一人。此聖人治天下之明效也。武生新授吏科給事中。陳啓新一言投契。立置清華。此誠盛事。臣愚謂宜先令以冠帶辦事黃門。稍如試御史例。俟數月後。果有忠言奇計。實授未晚。不然如名器可惜。何。皇上天縱聖明。而諸臣不能以道事君。徒取一切可喜之術。臣竊痛之。疏入不報。

國子祭酒倪元璐上言。昨見黃安縣學生鄒華妄行薦舉。列及臣名。不勝驚異。陛下求言若渴。本期宣幽燭隱。而宵人干進。薄孔孟爲糝糠。網簪纓爲桃李。吳鯤化部民也。及撫按鄒華下士也。薦及朝紳。如是而望朝廷之上。昂首伸眉。豈可得乎。上是之。夏四月。武生李璉奏。致治在足國。請搜括巨室助餉。大學士錢士升擬下之法。司不聽。士升上言。自流寇蔓延。皇上憫生民之憔悴。懲吏治之貪殘。擢陳啓新。置省闈。豈真謂其言遂爲確論哉。毋亦借此以勵縉紳。動其愧懼耳。比者借端倖進。實繁有徒。而李璉者。乃倡爲縉紳豪右報名輸官。欲行手實籍沒之法。此皆衰世亂政。載在史冊。而敢陳於聖人之前。小人之無忌憚。一至於此。其曰縉紳豪右之家。大者千百萬。中者百十萬。其萬計者不勝枚舉。臣江南人也。以江南論之。數畝以對。大數以百計者十之六七。以千計者十之三四。以萬計者千百中一二。江南如此。他郡可知。且所惡於富者。兼併小民耳。郡邑之有富家。亦貧民衣食之源也。兵荒之故。歸罪富家。而籍沒之。此秦始皇所不行於巴清。漢武帝所不行於卜式者也。此議一倡。亡命無賴之徒。相率而與富家爲難。大亂自此始矣。已而溫體仁以上欲通言路。竟改擬上。仍切責士升。以密勿大臣。卽欲要譽。已足致之。毋庸汲汲。士升遂乞罷。許之初。士升以助體仁。幾見擯。公論至是。復爲體仁所搆去。御史詹爾選上言。大學士錢士升引咎回籍。明乎輔臣以執爭去也。此舉差強人意。皇上宜鼓舞之不暇。顧以爲要譽耶。人臣而沽名。義所不敢也。乃人主不以名譽鼓天下。使其臣爭爲尸祿保寵。習爲寡廉鮮恥之世。又豈國家所利哉。天下之疑皇上者不少矣。其君子憂驅策之無當。其小人懼陷累之多門。明知一切苟且之政。拊心愧恨。有難殫述。輔臣不過偶因一事代天下請命耳。而竟鬱志以去。所日與皇上處者。維此苛細刻薄。不識大體之

徒毀成法而釀隱憂。天下事豈可言哉。癸巳。上召廷臣及御史詹爾選於武英殿。上怒爾選詰之。聲色俱厲。爾選從容不爲詘。問如何爲苟且。對曰。卽捐助一事亦苟且也。反數復百言。且曰。臣死不足惜。皇上幸聽臣事。尙可爲。卽不聽臣。亦可留爲他日之思。上益怒。欲下之獄。閣臣申救良久。命頸繫直廬。下都察院論罪。大學士溫體仁等各捐俸市馬。從關甯太監高起潛之請也。劉宗周上言。一歲之間。助陵工。助城工。又助馬價。亦何報稱於萬一。而時奉急公之旨。諸臣於此。毋乃沾沾有市心。惟皇上罷得已之役。停不急之務。節省愛養。不徒爲一切旦夕之計。亦何事屑屑以利爲言乎。不聽。宗周尋罷歸。令有司務修練儲備。毋科擾。命鄉會試二三場。兼武經書算。放榜後騎射。刑部尙書馮英以藐玩下法。司擬罪。英自赴獄。左侍郎朱大啓以聞。上令出私邸待罪。重慶翟昌進白兔。斥之。秋七月。都城戒嚴。召廷臣於平臺。問方略。時斗米三百錢。上憂之。戶部尙書候恂言。禁市沽。左都御史唐世濟言。破格用人。刑部侍郎朱大啓請列營城外爲守禦。吏科都給事中顏繼祖言。收養京民細弱。上諭莫若蠲助爲便。冬十月。前工部右侍郎劉宗周上言。自己巳以來。無日不綢繆未雨。而禍亂一至於此。往者袁崇煥誤國。其他不過爲法受過耳。小人競起而修門戶之怨。舉朝士之異己者。概坐煥黨。次第寘之重典。或削籍去。自此小人進而君子退。中官用事。而外臣浸疏。朝政日隳。邊政日壞。今日之禍。實己巳釀成之也。且張鳳翼之溺職中樞。而與之專征。何以服王洽之死。丁魁楚之失事於邊。而與之戴罪。何以服劉策之死。諸鎮巡勤王之師。爭先入衛者。幾人。何以服耿如杞之死。今二州八縣。生靈塗炭。極矣。廷臣之纍纍若若。可幸無死者。又何以謝韓爌。張鳳翔。李邦華之或戍或去。豈昔之爲異己驅除者。今不難以同己互相容隱與。臣於是知小人

之禍人國無已時也。皇上惡私交，而臣下多以告訐進。皇上錄清節，而臣下多以曲謹容。皇上崇厲精，而臣下奔走承順以爲恭。皇上尙綜覈，而臣下瑣屑苛求以示察。窺其用心，無往不出於身家利祿。皇上不察而用之，則聚天下之小人立於朝，而有所不覺矣。至於近日，刑政最舛，成德傲吏也，而以賊戍，何以肅懲貪之令。申紹芳十餘年監司也，而以營求戍，何以昭抑競之典。鄭鄴久干鄉議，而杖母之獄，特以無告坐，何以示敦倫之化。此數事皆爲故輔文震孟引繩批根，卽向者驅除異己之故智。廷臣無敢言，皇上亦無從而知之也。嗚呼！八年之間，誰秉國成。臣於是不能爲首揆溫體仁解矣。語曰：誰生厲階，至今爲梗。惟皇上念亂圖存，進君子，退小人，急罷三協通津之使，責成中外諸臣各備職業，不再以人國爲僥倖。體仁桑榆之收，庶幾在此，疏入，不報。禁文武輿蓋器飾之僭。起守制楊嗣昌爲兵部尙書。命採平陽鳳翔諸礦以儲國用。十一月，蠲山東五年前逋租，命吏部指奏數年銓政大弊，吏部覆奏，上切責之。以爾部職專用人，推舉不效，乃反稱綱目太密，使中外束手。且平時陞轉必優京卿甲科，乃云京卿未必勝外官，甲榜未嘗勝乙榜，如此游移，豈大臣實心體國之道。尙書謝陞罷。

十年春正月，工部尙書劉遵憲因培築京城，上加派輸納事例。二月，遣廷臣趣各省逋賦。夏四月，諭百官求直言。刑科給事中李如燦上言：寇盜憑陵以來，天下財賦之區已空其半，而又遇此亢旱，吳楚齊豫之間幾千萬里，是所未盡空者，殆將盡空矣。臣謂斂怨干和，皆財用爲之也。國朝祖制，千古稱善，自軍不用而兵設，民始不得安其身，自屯不耕而餉興，農始不得有其食，有兵不練，兵增而餉益匱，有餉不核，餉多而兵愈冒。比者核實之使四出，而培克屢聞，占冒不減，可謂有政事乎。魏呈潤、詹爾選、李化龍、劉宗

周皆以一鳴輒斥。今下明詔求直言。儻赦其前愆。收之左右。是直言不求而自至也。若夫輔成君道。尤在相臣。今俱泯默。未有聞也。此瞻彼顧。結黨徇私。蓋自八九年拂戾干和之事。始於宮隣。成於金虎。又何怪水旱盜賊之屢見哉。上怒。下如燦於獄。左諭德黃道周上言。陛下下詔求直言。清刑獄。然方求言而建言者。輒斥。方清獄而下獄者。旋聞。大臣雖清強。曾何益理亂之數。臣願陛下訓練軍士。以固邊圉。選舉賢能。以任州縣。而最切者。尤在起批鱗強項之臣。旌應詔直言之士。使天下淒風苦雨。盡爲皎日祥雲。則朝廷之刑威。可以漸措。何必疲敝於兵刑。錢穀之下哉。上不懌。切責之。新安所千戶楊光先劾吏科給事中陳啓新及元輔溫體仁。昇棺自隨。上怒。廷杖戍遼西。楊嗣昌上均輸事例。六月。大學士溫體仁引疾免。初。體仁以摘發錢謙益受主知。遂入相。時上英明。憤廷臣苞苴亡狀。體仁以殘刻輔之。園扉之內。候訊追比。纍纍。趾相屬者千餘人。性忌而險。初藉周延儒入。旋以權相軋。周去而溫獨存。同官文震孟。何吾騶。錢士升。皆先後牴牾罷。自佐政以來。邊徼潢池之警。漫無經畫。惟斤斤自守。不殖貨賄。故上始終敬信之。八月。上登正陽門。閱城。徧視雉堞樓櫓。成國公朱純臣。以京營兵屯宣武門外。上善之。召登西南城樓。賜之爵。閱外城。以南城薄。詔加築。命內官監太監丁紹呂。馬光忭。總理分任。濬大濠於五里外。壞冢墓。無算。工未竟而止。東西北無城。不之問。十二月。罷禮部尙書姜逢元。兵部尙書王業浩。先是。陳啓新疏論考選。又進吏部訪冊。而逢元業誥。獨圈多。上嫌其濫。啓新遂參知縣尹民興等。俱降調。十一年春正月。裁南京冗官八十九員。翰林檢討郭之祥。請進士二甲以下。盡任知縣。推官不歷州縣。毋補部曹。不歷部曹。毋改翰林科道。二月。巡按河南御史張任學。改都督僉事總兵官。鎮守河南。任學

親得巡撫。且欲薦故丹徒知縣張放。極詆諸總兵不足恃。盛稱文吏有奇才。可禦寇。上竟以總兵授之。意大沮悔。尋被逮。丙午。上御經筵畢。召詹事府翰林院諸臣。顧錫疇等二十餘人。問保舉考選孰爲得人。少詹事黃道周言。樹人如樹木。須養之數十年。近來人才遠不及古。况摧殘之後。必深加培養。既復班。又詢之。對曰。立朝之才。存乎心術。治邊之才。存乎形勢。先年督撫未諳形勢。隨賊奔走。事旣不效。輒謂兵餉不足。其實新舊餉約千二百萬。可養四十萬之師。今甯錦三協師僅十六萬。似不煩別求供勦寇之用也。庶子黃景昉請宥鄭三俊。上曰。三俊蒙徇。雖清何濟。又命諸臣各陳所見。上曰。言須可行。如故講官姚希孟。竟欲折漕一年。誤矣。編修楊廷麟曰。自溫體仁薦唐世濟。王應熊薦王繼章。今二臣皆敗。而薦者無恙。是連坐之法。先不行於大臣。而欲收保舉之效。得乎。上默然。命諸臣出。宴午門之廡道。周等退。各補奏會。南京應天府丞徐石麒亦上言。鄭三俊清節。得釋。三俊爲司寇。敝衣一篋。爨煙不給。以擬獄輕得罪。上亦素知之。故得放還。三月。上御左順門。召考選諸臣五人爲班。遞進。問兵食計。知縣曾就義曰。百姓之困。皆由吏之不廉。使守令俱廉。卽稍從。加派以濟軍需。未爲不可。上拔第一。未幾。卽有勦餉練餉之加。夏四月己酉。丑刻。熒惑去。月僅七八寸。至曉。逆行尾九度。掩於月。五月丁卯夜。熒惑退。至尾初度。漸入心宿。兵部尙書楊嗣昌上言。古今變異。月食五星。史不絕書。然亦觀其時政事相感。災祥之應。不一其致。昔漢元帝建武二十三年。月食火星。明年呼韓單于款五原塞。明帝永平二年。日食火星。皇后馬氏德冠後宮。常衣大練。明帝圖畫功臣於雲臺。馬援以椒房不與焉。唐憲宗元和七年。月食熒惑。其年田興以魏博來降。宋太祖太平興國三年。月掩熒惑。明年興師滅北漢。遂征契丹。連年兵敗。今者月食火星。猶幸在尾內。

則陰宮。外則陰國。皇上修德以召和。治內以威外。必有災而不害者。工科都給事中何楷糾之。言古人謂月變修刑。又言禮虧則罰見。熒惑誠欲措刑。莫如右禮。誠欲右禮。莫先省刑。今爰書之。賸極矣。部司議宥。止於重辟數人。而未折之案。先後纍纍。誰復過而問焉。楊嗣昌縷縷援引。出何典記。其言建武款塞者。欲借以伸通市之說也。其言元和宣慰者。欲借以伸招撫之說也。其言太平興國連年兵敗者。欲借以伸不敢用兵之說也。附會誠巧。矯誣實甚。至所述永平皇后等語。一篇之中。三致意焉。臣更不知其意所指斥矣。嗣昌上疏自理。但言科臣以危機中。臣不復及通市招撫事。先是。嗣昌因講筵誦孟子善戰服上刑語。上非之。至是。乃借月食火星以爲可化災爲祥。冀以動上意。然考之漢書。建武二十三年三月。月食火星。二十五年。匈奴部人始立呼韓邪單于內附。則與明年無與。永平二年。少府陰就于豐坐自殺。陵鄉侯梁松坐誹謗下獄死。而圖畫雲臺則三年事。與日食火星亦無涉。嗣昌不自知其說之謬也。時戶部主事李鳳鳴亦言火星逆行。常而非變。禮科給事中解學尹糾其詔。六月。兵部尙書楊嗣昌改禮部兼東閣大學士。仍署兵部。十月。命嗣昌大祀大慶暨傳制頒詔諸大典不與。朝講召見如常。服隨班。時嗣昌母服纔五月。工科給事中何楷劾嗣昌忘親。上切責之。先是。吏部會推閣員。止及詞臣資序。上不允。命并及在籍守制者。蓋嗣昌爲陳新甲地也。已而特召新甲爲兵部右侍郎。總督宣大。侍講學士黃道周上言。朝廷卽乏人。豈無一定策效謀者。而必破非常之格。以奉不祥之人。上不懌。乙巳。召廷臣於平臺。問道周曰。朕聞無所爲而爲之。謂天理有所爲而爲之。謂人欲。爾前疏適當枚卜不用之時。果無所爲乎。道周對曰。天人止是義利。臣心爲國家。不爲功名。自信其無所爲。上曰。前月推陳新甲何不言。對曰。時御史林蘭友給

事何楷皆有疏。二人臣同鄉，恐涉嫌疑耳。上曰：今遂無嫌乎？曰：天下綱常，邊疆大計，失今不言，後將無及。臣所惜者綱常名教，非私也。上曰：清雖美德，不可傲物，遂非唯伯夷爲聖之清，若小廉曲謹，是廉非清也。道周曰：伯夷忠孝，故孔子許其仁。上怒其強說。道周又極詆楊嗣昌。嗣昌出奏曰：臣不生於空桑，豈遂不知父母？臣嘗再辭，而明旨迫切。道周學行人宗，臣實企仰之。今謂不如鄭鄆，臣始太息絕望。鄆杖母行同梟獍，道周又不如鄆，何言綱常也？道周曰：臣言文章不如鄭鄆，上責其朋比。道周曰：衆惡必察，何敢爲比。上曰：孔子誅少正卯，當時亦稱聞人，惟行僻而堅，言僞而辨，不免孔子之誅。道周曰：少正卯欺世盜名，臣無其心。臣今日不盡言，則臣負陛下。陛下今日殺臣，則陛下負臣。上曰：爾讀書有年，祇成佞耳。叱去。道周叩頭起，復奏曰：忠佞二字，臣不敢不辨。夫臣在君父之前，獨立敢言爲佞，豈在君父之前，讒諂面諛者爲忠乎？忠佞不分，則邪正混淆，何以致治。上怒甚。嗣昌乞優容之。上曰：朕亦優容多矣。諸臣退。上召回諭以毋黨同伐異，宜共修職業。翰林院修撰劉同升、編修趙士春、都給事何楷、試御史林蘭友各疏救道周，劾嗣昌，俱譴調有差。十一月，括廢銅鑄錢。

十二年二月，貴州道御史王聚奎劾刑科右給事中陳啓新緘默溺職，上切責之。左僉都御史李先春議當奪俸，上不懌。譴聚奎。吏部左侍郎董羽宸以不能駁正奪俸，并罷先春。先春前河南布政司，以編修林增志薦入，遂追譴增志。增志亦引罪。三月乙酉，召參議鄭二陽於平臺，問練兵措餉之計。對曰：大抵額設之兵原有額餉，但求實練，則兵不虛冒，餉自足用。是覈兵卽足餉也。若兵不實練，雖措餉何益。上問措餉曰：諸臣條陳盡之矣，在得其人，得人則利歸公家，否則在私室。上曰：各處災傷奈何？曰：裁不急之官，亦



可省費。又曰：臣見州縣殘破，急宜下寬大之詔，收拾人心。上稱善，擢二陽都察院右僉都御史。四月，免高淳去年旱蝗田租，諭釋輕繫。時上頗於內庭建設齋醮，禮科給事中張埰上言：宗社之安危，必非佛氏之禍福。正德初年，遣太監劉允誠馳驅西域，可爲警戒。山西道御史廖惟義亦言之，不聽。京城浚濠，廣五丈，深三丈，給事中夏尙訥上言：連年塞垣失守，門庭無恙，若使塹水足拒，則去年通德滄濟，其爲廣川巨浸，何限而揚鞭飛渡，如入無人，則控扼險要，在人不在險，明矣。今擲此百萬於水濱，孰若移而用之於巖疆，使敵騎不得躡入哉？不聽。五月，出帑金三十萬濟餉，仍命後償之。山西按察副使魏士章請禁有司收賦耗羨，遣京官搜括天下錢糧充餉，從之。六月，禮部尙書林欲楫請覈僧道贍地，毀淫祠，括絕田助餉。七月辛未，戒中外官饋遺請託。九月，免唐縣等四十州縣去年田租十之五。禹州等十州縣十之二。光州等八州縣十年之五。去年之二。時中外交訐，上念窮民罹災，己卯庚辰之間，蠲貸屢年，而有司劓法侵蠹如故。十月，彗星見，諭停刑。十一月，前庶吉士張居請行銅鈔，從之。十三年春，閏正月，紀錄卓異諸臣。蘇州知府陳洪謐多逋賦，不預。尋削籍。松江知府方岳貢亦以逋賦奪官。浙江永康知縣朱露上言：有司科罰攫取，撫按不以聞。上命申飭各官，授露吏科給事中，改名統鑣。命巡城御史煮粥賑饑，發帑金八千賑真定。諭戶部以保定、永清等郡縣芻糧給畿南饑民，抵秋以償。發帑金六千賑山東。二月，令會試貢士先廷對日校射。風霾亢旱，下詔求直言。三月，免畿郡十一年料匠等銀，賑京城貧民各錢二百。戶科給事中左懋第上言：去歲彗見，下詔停刑，而彗卽消，何今日之不應也。夫停刑之詔，特其具也。今之齋禱，猶其文也。臣知皇上先以文，卽繼以實。此時得毋實尙未見。

而天不之信乎。臣敢以實進。練餉之派。以益軍實。不得已之事也。今兵汰而餉猶未減。恐貪者藉以飽其私。惟陛下詔寬加派之數。使天下明知之。至於刑獄之輕重。宜一一得其實。亭刑可以消彗。豈明刑不足以返風乎。已分賑畿南三萬金。是日雨。免兩河積逋。其災甚者。緩征之。免八年九年十之三。宿州。沭陽。通州等州縣災。免逋賦有差。策貢士於建極殿。賜魏藻德第一。先是上召貢士四十八人於文華殿。上問邊隅多警。何以報仇雪恥。藻德對曰。以臣所見。使大小諸臣皆知所恥。則功業自建。娓娓數百言。藻德通州人。更自言戊寅守城功。上心識之。得拔第一。夏四月。命撫按薦舉分治兵。治餉。失實者坐。考選大典。須科貢兼取。以收人才之用。已而以吏部考選不列舉貢。遂命貢士并歲貢士二百六十三人。俱補部寺司屬。推官知縣不爲例。令朝臣及撫按各舉將才。五月。減商州湖廣田租。上以兩京及山東西河南陝西各處告饑。命地方有司設法賑濟。招徠流徙。撫按躬行州縣。定殿最以聞。召九卿科道於平臺。問守邊救荒安民三事。通政使徐石麒以守邊在農戰互用。救荒在勸民輸粟。安民在省官用賢對。上是之。截漕米萬石賑山東。免霍泰潛山七年以上逋稅之五。近年之三。七月。發帑金二萬賑順天保定。八月。發倉粟賑河東饑民。帑金三萬賑真定山東河南饑民。九月。免汝州十年前田租。隴西五縣逋賦。折徵江南絹布等歲課。諭災荒停刑。又恐人心肆玩。其事關封疆及錢糧勦寇者。限刑部五月具獄。命有司祭難民。瘞暴骸。諭吏部推侍郎巡撫併及資深翰林。著爲令。御史魏景琦論囚西市。御史高欽舜。工部郎中胡連等十五人已論辟。忽內臣本清銜命馳免。因釋十一人。明日。景琦回奏。被責下錦衣衛獄。蓋上以囚或有聲寃者。停刑請旨。景琦倉卒不辨也。冬十月。命抵通州漕米每石帶練米八升。以山東

河南饑。十五年爲始。餘從明年。出帑金萬兩。市舊綿衣二萬。給京師貧民。戶部尙書李待問請損交際。裁工食爲恤窮之計。從之。十一月。工部主事李振聲請限品官占田。如一品田十頃。屋百間。其下遞減。下部議。諭刑部繫囚早結。毋延斃。

十四年夏四月。召前大學士周延儒入朝。時薛國觀有罪。尋賜死。國觀性褊刻。自僉憲驟登政府。溫體仁實薦之。上常憂用匱。國觀對以外則鄉紳。臣等任之內則戚畹。非出自獨斷不可。因以李武清爲言。遂密旨借四十萬金。李氏盡鬻其所有。追比未已。戚畹人人自危。因皇子病。倡爲九蓮菩薩之言。云上薄待外戚。行天折且盡。上大懼。國觀又忤太監王化民。遂敗。冬十月。特設裕國足民奇謀異勇科。諮訪徵辟。稱朕破格旁求之意。

十五年春正月辛未朔。上朝畢。召大學士周延儒賀逢聖。謝陞入殿曰。古聖帝明王皆崇師道。卿等朕之師也。宗社奠安。惟諸先生是賴。命東向立。上降座西向揖之。各媿謝。蜀各省直十二年以前蠟茶等稅。

二月。發帑金二萬賑山東。免省直十二年以前稅糧。有司混徵者罪。百姓歡呼稱慶。又從刑部左侍郎惠世揚請免十二年以前贓罰谿罪。夏四月。禮科給事中倪仁禎上言。臣等初拜官。例候閣臣謝陞。言及兵餉事。忽曰。皇上自用聰明。察察爲務。天下俱壞。陞位極人臣。敢歸罪天子如此。上怒。命削陞籍。周延儒奏詞。臣一員佐兵部。後之著爲令。免四川貢扇三年。諭釋輕繫。六月。免開封河南歸德汝州去年田租。諭各省直停刑三年。進蔣德璟黃景昉吳牲東閣大學士。且責吏部會推大典。自當矢公矢慎。今稱詭徇情。如房可壯張三謨。宋玫並與推舉。此豈大臣之道。辛酉。召廷臣於中左門賜饌。上青袍。皇

太子定王、永王、緋衣侍。上詰吏部尚書李日宣曰：朕屢諭諸臣，有甯背君父、不背私交、甯墮職業、不破情面兩語。昨枚卜，猶濫舉如此，况其他乎？日宣奏辨。上又責吏科都給事中章正宸、河南道御史張煊。閣臣力爲救解，不聽。明日，下日宣等六人於理。日宣等戍邊，可壯等削籍。初，大學士陳演所親廖惟一爲試御史，及考核託副都御史房可壯爲之地，不納。張煊又加厲焉。遂外調。演憾之，適上游西苑，演從密陳云：枚卜大典皆二人主持，上怒，故有是譴。御史吳履中上言：皇上之失有二，曰大奸之罪狀未彰，而身爲受過。圖治之綱領未挈，而用志多分。臨御之初，天下未大壞也。溫體仁託嚴正之義，行媚嫉之私，使朝廷不得任人以治事，釀成禍源。體仁之罪也。專任楊嗣昌，恃款撫，加練餉，致民怨天怒水旱盜賊，結成大亂之勢。楊嗣昌之罪也。皇上信任二人，二人售其奸欺，輒曰：皇上自爲之。皇上亦曰：彼實未嘗專擅。是皇上爲二奸所誤，而反代二奸受過也。至於圖治自有綱領，因時制宜，內治闕而後戎馬生，民生促而後寇盜起。今者敵起於外，而政治愈棼；寇起於內，而賦斂愈急。欲無生亂得乎？八月，刑部尚書鄭三俊改吏部尚書。范景文改刑部尚書。進劉宗周左都御史。蠲濟南兌州東昌濮州逋租。刑科右給事中陳啓新匿喪被劾，下撫按訊之。尋遁。九月，誅兵部尚書陳新甲。初，周延儒爲營解甚力，因奏國法大司馬兵不臨城，不斬。上曰：他邊疆卽勿論，僂辱我親藩七，不甚於薄城乎？不聽。十月，賜貧民米布。十一月，左都御史劉宗周上言六事曰：建道揆，京師首善之地，先臣馮從吾立首善書院，臣請亟復之，以昭聖明致治之本。曰：貞法守，高皇帝讀老氏民不畏死，奈何以死懼之，立焚錦衣刑具，請一切獄詞專聽法司，不必下錦衣。曰：崇國體，大臣自三品而上犯罪者，宜令九卿科道會詳之後，乃付司寇。司寇議辟，始得收係。此於僂

辱之中不忘禮遇之意。曰清伏奸。凡禁地匿名文書。請一切立毀。曰懲官邪。京師士大夫與外官交際。愈多愈巧。臣必爲風聞彈劾之。惟祈嚴斷。曰飭吏治。今吏治之敗無如催科火耗。詞訟贖錢已復爲常例矣。至於營陞謝薦。巡方御史尤甚。臣請以風憲受賊之律爲回道考察第一義。上是之。召考選官時敏等面問兵食。卽註官俱補給事中。初敏令固始縣。轉主事。因禮部主事吳昌時通周延儒。自奏固始禦寇。求考選得首對。上面註御史。敏出語人曰。安能以獸補向人乎。是夕延儒揭入改給事中。周延儒薦大學士王應熊。延儒知外漸有異議。故以自代。蓋資其強狠爲援也。上從之。命召應熊。已而延儒敗。上知其非。入朝陞見。請老許之。賜金幣還。發帑金十萬資餉。閏十一月詔曰。比者災害頻仍。干戈擾攘。宵旰靡甯。皆朕不德所致也。自今日始。朕敬於宮中默告上帝。戴罪視事。以贖罪戾。惟二祖舊制。每日朝畢。勳戚文武諸司等奏事者。赴宏政門報名候召。下禮科給事中姜燾於理。先是上戒諭言官。又時有匿名書二十四氣之說。隱詆朝士。燾言皇上修省罪己。又致誠言官。唯視言官獨重。故望之獨切。若云代人規卸。安敢謂盡無其事。臣獨展轉而不得其故。皇上何所聞而云然乎。如誹語騰謗。必大奸巨慝。惡言官而思中之。謂不重其罪。不能激皇上之怒。箝言官之口。後將爭效寒蟬。壅閉天聽。誰爲皇上言之哉。上怒。立置獄。甲子召廷臣於中左門。問禦敵及用督撫之宜。左都御史劉宗周曰。使貪使詐。此最誤事。爲督撫者。須先極廉。上曰。亦須論才。宗周退。御史楊若橋舉西洋人湯若望演習火器。劉宗周進曰。唐宋以前用兵。未聞火器。自有火器。輒依爲勁。誤專在此。上色不懌。曰。火器終爲中國之長技。命宗周退。羣臣以次對。上色解。宗周又進請釋姜燾。熊開元云。廠衛不可輕信。是朝廷有私刑也。上遽怒。仰視屋梁曰。東廠錦衣衛。

俱爲朝廷。何公何私。宗周抗論不屈。左副都御史金光宸言。宗周無他意。上益怒。責宗周。免冠謝。徐起退。先是行人右司副熊開元求獨對。召入德政殿。請屏閣臣。周延儒求退。不許。開元所奏大抵責延儒之失。命補牘。明日。奏劾延儒。以釋纍囚。蠲宿逋。起廢籍。奉行德意。自謂有裨於聖德。有功於人才。孰敢起而攻之。願皇上徧召羣臣。問延儒賢否。卽以所論賢否。定其人之賢否。於是察吏安民。誅凶除暴。天下之治。端在於此。若皇上不加體察。一時將吏。狃於賄賂。雖失地喪師。皆得無罪。誰復爲皇上捐軀報國者。上怒。下鎮撫司。詰主使。周延儒引退。手敕慰留。初。開元出朝。禮部儀制司主事吳昌時力沮之。雖補牘。未敢盡。在獄。列款具奏。鎮撫司格不以聞。尋廷杖姜埰。熊開元仍下鎮撫司。劉宗周削籍。金光宸降調。吏部向書鄭三俊。刑部尙書徐石麒。各疏救。不聽。貢士祝淵奏寬宗周。下淵於刑部獄。吏科都給事中吳麟徵等疏救。埰。開元。不聽。徐石麒罷。以埰。開元。竟具獄。不廷訊也。開元至十七年。始釋獄。埰戍邊。刑科給事中陳燕翼上言。兵餉匱乏。朝廷無剛正之臣。利口獲進。陛下設廠衛。卽因廠衛爲介紹。託近侍。卽因近侍爲援引。陛下籌兵措餉。不遺餘力。而此輩平日所輦輸。以得官者。皆陛下之兵。所滿載而候代者。卽陛下之餉也。陛下深居法宮。左右大臣發憤改圖。庶幾挽積習而強國本。

十六年三月。免直隸山東殘破州縣去年田租。夏四月。釋輕繫。五月己亥。召巡撫保定石僉都御史徐標入對。標曰。臣自江淮來。數千里見城陷處。固蕩然一空。卽有完城。僅餘四壁。蓬蒿滿路。鷄犬無聲。曾未遇一耕者。土地人民。如今有幾。皇上亦何以致治乎。上欷歔泣下。標又曰。須嚴邊防。天下以邊疆爲門戶。門戶固。則堂奧安。其要更莫若修內治。重守令。守令賢。則政簡刑清。而盜自息。上曰。諸臣不實心任事。

以至於此。皆朕之罪。標又言車戰墾田。上善之。標四月己卯受事。辛卯陞見。賜金幣。至是復召。蓋上閱畿民。欲得其詳也。五月。進修撰魏藻德爲禮部右侍郎兼東閣大學士。閱京營刀甲車子於觀德殿。命勳武臣子習騎射。六月戊辰。召廷臣及桐城諸生蔣臣於中左門。臣前保舉戶部尙書倪元璐薦爲戶部司務。其言鈔法曰。經費之條。銀錢鈔三分用之。納銀賣鈔者以九錢七分爲一金。民間不用。以違法論。不出五年。天下之金錢盡歸內帑矣。吏科給事中馬嘉植疏爭之。詔除河南五年被陷地方稅糧。其省直殘破州縣自十六年爲始。一切三餉雜賦俱蠲免。己卯。召山東武德道兵備僉事雷演祚入朝。先是。總督范志完在山東縱兵淫掠。演祚面奏之。上命逮訊。七月己亥。召演祚及志完面質於中左門。問志完兵淫掠。又金銀鞍數千兩。馬百匹。行賄京師狀。演祚歷歷有指。因召問演祚云。爾所言稱功頌德。徧於班聯者誰也。曰。周延儒招權納賄。如起廢清獄。蠲租自以爲功。考選科道。盡收門下。凡求總兵巡撫。必先通賄幕客董廷獻。然後得之。上怒。卽命逮廷獻。又問志完鞍馬何所餽。志完謝無有。且曰。是日臣在大王莊。副總兵賈芳名等禦敵。乘大風卻之。上斥其妄。問御史吳履中爾在天津察志完云何。履中對如演祚言。尋誅志完。以史可法爲南京兵部尙書。發帑金四十萬貯富新倉。出陳納新。毋得輕重。出千金資太醫院療疫。時京師自春徂秋大疫。死亡略盡。又出金二萬下巡城御史收殮。八月。諭入覲官薦將才。令兵部彙上。并廷臣所舉堪督撫總副者。時所用多夸誕。雖三尺不貸。而嗜進不已。九月。諭廷臣凡失事定罪。戰守定賞。俱限十日奏。餘犯矜疑。可速結。毋淹留。朕久服澣衣減膳。各衙門裁節事宜。各條對。擢山東漕儲副使方岳貢爲左副都御史。岳貢上言四事。清言路以收人心。定推遷以養廉恥。責吏治於

荒殘。儲將才於部伍。上是之。尋進岳貢東閣大學士。冬十月。諭有司贖鍰其留額積穀外俱充餉。括民間廢銅鑄錢。上自用銅錫木器。屏金銀。命文武諸臣各崇省約。士庶不得衣錦繡珠玉。免懷來桐城田租。十一月。諭臣民助餉立功者錄之。十二月。誅吏部文選郎中吳昌時。以事連前大學士周延儒賜死。谷應泰曰。嗚呼。自古未有端居深念。旰食宵衣。不邇聲色。不殖貨利。而馴致敗亡。幾與暴君昏主同失。而均貶者。則以化導鮮術。貪濁之風成於下。股肱乏材。孤立之形見於上。夫是以欲安而得危。圖治而得亂也。考之懷宗。以漢昭嗣服之年。膺唐堯繼見之歷。手翦貂璫。人膺玉燭。咸五登三。將在是矣。而無如神祖倦勤。王綱解紐。熹宗拱手。魁柄潛移。譬之漢遭靈帝。以還。周自赧王之後。斯真儒生流涕而指陳。聖哲馳驚而不足矣。然而懷宗之圖治。與其所以致亂。揆之事實。蓋亦各不相掩焉。方其大東罷貢。便殿停香。記注重珥言之臣。寒暑御文華之講。進監司而問民疾苦。重宰執而尊禮賓師。以至素服論囚。蠲逋弭亂。罪己則輟減音樂。賑饑則屢發帑金。於凡愛民勤政。發奸摘伏。此則懷宗之圖治也。及其禦寇警則軍興費煩。急征徭則閭閻告病。以至破資格而官方愈亂。禁苞苴而文網愈密。惡私交而下滋告訐。尚名實而吏多苛察。於凡舉措聽熒。貞邪淆混。此則懷宗之致亂也。然其時亦未嘗無深識之士。不二心之臣。強項批鱗。呼號入告。如弭亂有近功之慮。匡時多救過之憂。批龍鱗則制實八策。攀殿檻則應詔一言。而究之賈生慟哭。無救突薪。索靖銜悲。自然荆棘。無他。九關之虎豹格於中間。而文具之積弊澤不下究也。雖然。吾有疑焉。周藉舊基。天命未改。秦得中主。二世不亡。以懷宗之殫慮竭精。勤求民瘼。英察類漢明。猜忌則優



於唐德。綜覈近孝宣。偏聽則異於宋神。斯固治世足以奮烈。而亂世足以救亡者。獨奈何。皇輿埽跡。天祿隕墜。相報蓋若斯之酷耶。是豈炎精害氣。必難返於夷庚。抑亦榮公賄風。定欲摧其傾軫也。語云。始於宮隣。成於金虎。懷宗之遇。則然而議者欲與暴君昏主同失而均貶。則皆吠聲之論矣。予無取焉。

### 卷七十三

#### 修明歷法

太祖吳元年冬十一月。太史院使劉基率其屬高翼。上戊申大統歷。

洪武元年冬十月。徵元太史院使張祐。張沂。司農卿兼太史院使成隸。太史同知郭讓。朱茂。司天少監王可大。石澤。李義。太監趙恂。太史院監候劉孝忠。靈臺郎張容。回回司天監黑的兒。阿都刺。司天監丞迭里月實。一十四人。修定歷數。

二年夏四月。徵元回回司天臺官鄭阿里等十一人。至京。議歷法。占天象。

三年六月。改司天監爲欽天監。設欽天監官。其習業者分四科。曰天文。曰漏刻。曰大統歷。曰回回歷。自五官正而下。至天文生。各專科肄焉。五官正理歷法。造歷。歲造大統民歷。御覽月令歷。六壬遁甲歷。御覽天象歷。七政躔度歷。凡歷。註上御歷三十事。民歷三十二事。壬遁歷六十七事。靈臺郎辨日月星辰之躔。次分野以占候。保章正專志天文之變。辨吉凶之占。挈壺正知漏。孔壺爲漏。浮箭爲刻。以考中星昏明之度。而統於監正丞。

十五年命大學士吳伯宗等譯回回歷經緯度天文諸書。

十七年冬閏十月欽天監博士元統上言臣聞一代之興必有一代之歷隨時修改以合天道今歷雖以大統爲名而積分猶踵授時之數非所以重始敬正也授時法以至元辛巳爲歷元至洪武甲子積一百四年以歷法推之得三億七千六百一十九萬九千七百七十五分經云大約七十年而差一度每歲差一分五十秒辛巳至今年遠數盈漸差天度擬合修改請以洪武甲子歲冬至爲歷元而七政之行有遲疾順逆伏見不齊其理深奧實難推演聞磨勘司令王道亨有師郭伯玉者精明九數之學願徵令推算以宣昭一代之制書奏報可擢統爲監正。

二十年冬十一月選疇人年壯解書者赴京習天文推步之術。

二十六年秋七月欽天監副李德芳言故元至元辛巳爲歷元上推往古每百年長一日下驗將來每百年消一日永久不可易也今監正元統改作洪武甲子歷元不用消長之法考得春秋晉獻公十五年戊寅歲距至元辛巳二千一百六十三年以辛巳爲歷元推得天正冬至在甲寅日夜子初三刻與當時實測數相合洪武甲子元正上距獻公戊寅歲二千二百六十一年推得天正冬至在己未日午正三刻比辛巳爲元差四日六時五刻當用至元辛巳爲元及消長之法方合天道疏奏元統復言臣所推甲子歷元實於舊法無爽上曰二說皆難憑獨驗七政交會行度無差者爲是於是欽天監以洪武甲子爲歷元而造歷依授時法推算如初。

英宗正統十四年造己巳大統歷冬夏二至晝夜六十一刻行之而疏尋廢不行學士楊廉言漢興四百

年更三造歷。唐三百年更七造歷。宋三百餘年。至十八造歷。本朝自洪武至今百四十年。未更造。而交食一一驗不爽。則知許平仲郭守敬所造歷。理數極精。古今歷無過之者。乃天生桀出之智。豫國家歷數無疆之用也。

憲宗成化十七年秋八月。真定教諭俞正己言。歷象授時。乃敬天勤民之急務。後世歷法失差。由不得古人隨時損益之法也。我朝盡革前代弊政。獨於歷法可議。臣竊以經傳所載日月行天下之常度。本歷元以步算。又陰陽虧盈之理求之。以驗今歷。詳定成化十四年戊戌十一月初一日己丑子正初刻合朔。冬至日月與天同會於斗宿七度。至三十三年丁巳十月初一日戊辰酉正初刻合朔。冬至日月與天復同會於斗宿七度。所謂氣朔分齊。是爲一章者也。今將一章十有九年七閏之數。冬至月朔閏月節氣年月日時。逐月開坐。編成一冊上進。請敕該部精加考訂。仍行欽天監從宜造歷。頒布天下。疏下部。尙書周洪謨掌欽天監事童軒與正己參考講論。竟日不能決。洪謨等因奏正己止。據卮子臯極經世書及歷代天文志推算氣朔。又祖述前代術家評論歲差之意。言古今歷法俱各有差。曾不知與天合。雖差而可。今正己膠泥所聞。輕率妄議。請下法司治罪。詔錦衣衛執治之。

孝宗宏治十一年。訪世業疇人并諸能通歷象遁甲卜筮者。

武宗正德十三年夏五月己亥朔。日食起復弗合。日官周濂請驗交食。以更曆元。十五年冬十月。禮部主事鄭善夫奏曰。今歲及去年三次月食。臣皆同欽天監官登臺觀驗。初虧復圓。時刻分秒。多不合占步。蓋天道幽玄。其數精微。以人合天。誠亦未易。歲差之法。晉虞喜定以五十年差一度。

久而驗之弗合也。何承天以百年。劉焯以七十五年。僧一行以八十三年。久而驗之。又弗合也。許衡。郭守敬。定以六十六年有餘。似已密矣。今據法推演。仍又不合。天道豈易言哉。且如定歲差之法。積四期餘一日。以一日分加於四期。故二至之時。只爭絲忽。此所宜定也。又如定日之法。一日百刻。而變爲九百四十分者。以氣朔有不盡之數難分也。凡月三十日。二氣盈四百一十一分二十五秒。一朔虛四百四十一分。積虛盈之數以制閏。故定朔必視四百四十一分前後爲朧。只在一分之間。此又所宜定也。如日月交食。惟日食爲最難測。月食分數。惟以距交遠近。別無四時加減。蓋月小。閏虛大。月入閏虛而食。故八方所見皆同。若日爲月體所掩而食。則日大而月小。日上而月下。日遠而月近。日行有四時之異。月行有九道之異。故旁觀者遠近自不同矣。如北方食既。南方纔半虧。南方食既。北方纔半虧。故食之時刻分秒。必須據地定表。因時求合而後準也。如正德九年八月朔日食。歷官報食八分六十七秒。而閩廣之地。遂至食既。其時刻分秒。安得而同。今按交食以歷元時分刻。刻分分分秒。極精極細。及至於半秒難分之處。亦須酌量以足者也。若皆半秒。積以歲月。則躔離朧朧。皆不合矣。漢宋以來。皆設算學。與儒藝同科。稱四門博士。九章之法大明。故定差法。更歷元。每得其人。我朝算法既廢。而占天之書。國法所禁。官生之徒。明理實少。必須明理。然後數精。方今海內儒術之中。固有天資超遇。究心天人之學者。使得盡觀祕書。加以歲月。必能上按往古。下推未來。庶幾歷元可更也。不報。

世宗嘉靖三年。光祿少卿管監事華湘言。天子奉順陰陽。治歷明時。蓋時以作事。事以厚生。而世從治也。時苟不明。將每朔弦晦。失其節分。至啓閉乖其期。無以該治生靈。而世亂矣。夫歷數之典。代有作者。曷

嘗不廣集衆思。人無遺智。法無遺巧。期於永久不變也哉。然不數歲而輒差。歷所以差。由天周有餘。而日周不足也。日之差。驗於中星。堯冬至昏昴中。而日在虛七度。躔元枵之子。今冬至昏室中。日在箕三度。躔析木之寅。計去堯三千餘年。而差者五十度矣。再以赤黃道考之。至元辛巳改歷。冬至赤道。歲差一度五十秒。今退天三度五十二分五十秒矣。黃道歲差九十二分九十八秒。今退天三度二十五分七十四秒矣。是以正德戊寅日食。庚辰月食。時刻分秒。起復方位。類與推算迕。恭惟皇上入繼大統之年。適與元革命改憲之年合。則調元正歷。固有待於今日也。臣伏揆古今善治歷者三家。漢太初以鐘律。唐太衍以著策。元授時以晷景。而晷景爲近。其所因者本也。欲正律而不登臺測景。竊以爲皆空言臆見。非事實已。伏望許臣暫住朝參。督同中官正周濂。及掄選疇人子弟諳曉本業者。及冬至前。詣觀象臺。晝夜推測。日記月書。至來年冬至。以驗二十四氣分至合朔日躔。月離黃赤二道昏旦中星七政紫氣月孛羅喉計都之度。視元辛巳所測。差次錄聞。昔班固作漢志。言治歷有不可不擇者三家。專門之裔。明經之儒。精算之士。臣三者無一。蚤夜皇皇。罔知所措。乞敕禮部延訪有能知歷理如揚雄。精歷數如邵雍。智巧天授如僧一行。郭守敬者。徵赴京師。令詳定歲差。成一代之制。不報。

神宗萬歷二十三年秋九月。鄭世子載堉疏請改歷。略曰。高皇帝革命之時。元歷未久。氣朔未差。故仍舊貫。不必改作。但討論潤色而已。今則積年既久。氣朔漸差。似應修治。後漢志所謂三百年斗歷改憲者。宜在此時。仰惟列聖御極以來。未嘗以歷爲年號。至我皇上始以萬歷爲元。而九年辛巳歲。距至元辛巳正三百年。適當斗歷改憲之期。又協乾元用九之義。而歷元應在是矣。繼述之盛舉。甯不可待於今日乎。前

代人君。或有新歷考成。則改年號。以歷爲名。以紀之。以爲福壽之徵。然此不過後天而奉天時者也。聖上預以萬歷爲元。此乃先天而天弗違。固宜有歷以應之。爲聖壽萬萬歲之嘉徵。乃俟之久而未見焉。此愚臣日夜之所惓惓也。於是採衆說之所長。輯爲一書。名曰律歷融通。其學大旨出於許衡。而與衡歷不同。後漢志曰。陰陽和則景至。律氣應則灰除。是故天子常以日冬至。夏至。御前殿。合八能之士。陳八音。聽樂均。度暑景。候鐘律。權土灰。放陰陽。效則和。否則占。晉志曰。日冬至。音比林鐘。浸以濁。日夏至。音比黃鐘。浸以清。十二律應二十四氣之變。其爲音也。一律而生五音。十二律而爲六十音。因而六之。六六三十六。故三百六十音。以當一歲之日。故律歷之數。天地之道也。夫黃鐘乃律歷本原。而舊歷罕言之。新法則以步律呂爻象爲首。此與舊歷不同。一也。堯時冬至日躔所在宿次。劉宋何承天以歲差及中星考之。應在須女十度左右。唐一行大衍歷議曰。劉炫推堯時日在虛危閒。則夏至火已過中。虞胤推堯時日在斗牛閒。則冬至昂尙未中。蓋堯時日在女虛閒。則春分昏張一度中。秋分虛九度中。冬至胃二度中。昂距星直午正之東十二度。夏至尾十一度中。心後星直午正之西十二度。四序進退。不逾午正閒。軌漏使然也。元人歷議亦云。堯時冬至日在女虛之交。而授時歷考之。乃在牛宿二度。是與虞胤同。大統歷考之。乃在危宿一度。是與劉炫同。相差二十六度。皆不與堯典合。新法上考堯元年甲辰歲。夏至午中。日在柳宿十二度左右。冬至午中。日在女宿十度左右。心昂昏中。各去午正不逾半次。與承天一行二家之說合。而與舊歷不同。二也。春秋左傳。昭公二十年己丑。日南至。授時歷推之。得戊子。先左傳一日。大統歷推之。並壬辰。後左傳三日。新法推之。與左傳合。此與舊歷不同。三也。授時歷以至元十八年爲元。大統歷以洪武十七年爲

元新法則以萬曆九年爲元。其餘各條不同者多。詳見歷議新法。比諸授時。庶幾青生於藍而青於藍者。章下禮部覆言。歷名沿襲已久。未敢輕議。至於歲差之法。當爲考正。所以求之者。大約有三。曰考月令之中星。移次應節。曰測二至之日景。長短應候。曰驗交食之分秒。起復應時。考以衡管。測以臬表。驗以刻漏。斯亦僥得之矣。夫天體至廣。歷家以周天三百六十五度四分度之一。而紀日月星辰之行次。又析一度爲百分。一分爲百秒。可謂密矣。然在天一度。應地二千九百三十二里。其在分秒。又可推也。譬之輪轂。外廣而中漸以狹。至於輻輳之處。閒不容髮矣。夫渾儀之體。徑僅數尺。外布三百六十五度四分度之一。每度不及指許。安所置分秒哉。至於臬表之樹。不過數尺。刻漏之籌。不越數寸。以天之高且廣也。而以徑尺寸之物求之。欲其纖微不爽。不亦難乎。故方其差在分秒之間。無可驗者。至踰一度。乃可以管窺耳。此所以窮古今之智巧。不能盡其變與。今之談歷者。或得其算。而無測驗之具。卽有具而置非其地。高下迥絕。則亦無準。宜非墨守者之所能自信也。卽如世子言。以大統授時二歷相較。考古則氣差三日。推今則時差九刻。夫時差九刻。在亥子之間。則移一日。在晦朔之交。則移一月。此可驗之於近也。設移而前。則生明在二日之昏。設移而後。則生明在四日之夕也。弦望亦宜各差一日。今似未至此也。此以歷家雖有成法。猶以測驗爲準。爲今之計。直令星歷之官。再加詳推。以求歲差之故。亟爲更正。嘗聞前禮官鄭繼之有言。欲定歲差。宜定歲法於二至餘分。絲忽之間。定日法於氣朔盈虛一晝之際。定日月交食於半秒難分之所。斯其言似中歷家肯綮。要在得精思善算。而又知歷理者以職其事。誠博求之。不可謂世無其人。而其本又在我皇上秉欽若之誠。以建中和之極。光調玉燭。默運璇璣。正歷數以永大統之傳。是在今日。誠千

載一時也。載增議遂格不行。

二十四年。河南按察司僉事邢雲路奏。窺天之器。無踰觀象。測景候時。籌策四事。乃今之日至。大統推在申正二刻。臣測在未正一刻。是大統實後天九刻餘矣。不甯惟是。今年立春。夏至。立冬。皆適值子午之交。臣測立春乙亥。而大統推丙子。臣測夏至壬辰。而大統推癸巳。臣測立冬己酉。而大統推庚戌。夫立春與冬。乃王者行陽德。陰德之令。而夏至則其祀方澤之期也。今皆相隔一日。則理人事神之謂何。是豈爲細故。且歷法疏密。驗在交食。自昔記之矣。乃今年閏八月朔日有食之。大統推初虧已正二刻。食幾既。而臣候初虧已正一刻。食止七分餘。大統實後天幾二刻。而計閏應及轉應。若交應。則各宜如法增損之矣。蓋日食八分以下。陰歷交前。初虧西北。固歷家所共知也。今閏八月朔日食。實在陰歷交前。初虧西北。其食七分餘。明甚。則安得謂之初虧正西。食甚九分八十六秒耶。而大統之不效。亦明甚。然此八月也。若或值元日於子半。則當退履端於月窮。而朝賀大禮。當在月正二日矣。又可謂細故耶。此而不改。臣竊恐愈久。愈差。將不流而至春秋之食晦不止。臣故曰。閏應轉應。交應之宜。俱改也。久之。刑科給事中李應策亦言。國朝歷元。聖祖崇諭二說。難憑。但驗七政交會。行度無差者爲是。惟時以至元辛巳。揆之。洪武甲子。僅百四年。所律以差法。似不甚遠。至正德嘉靖。已當退三度餘。奚俟今日哉。春秋不食朔。猶值書官失之。今日食後天幾二刻。冬至後天逾九刻。計氣應損九百餘分。乃云弗失乎。歷理微妙。日月五星運轉交會。咸取應於窺管測表。歐陽修所謂事之最易差者。雖古太初太衍諸書。詎不深思玄解。得羲和氏之歷象。授時遺意。然果以鐘律爲數無差。則太初歷宜卽定於漢。而後之爲三統四分者。若何。又果以蓍策爲術無



差則大衍歷亦當卽定於唐而後之爲五紀貞元觀象者又若何蓋陰陽迭行隨動而移移而錯錯而乖違日陷不止則躔離之謬分至之忒積此焉窮雲路持觀象測景候時籌策四事議者應宜俱改使得中祕星歷書一編閱而校焉必自有得於是欽天監正張應侯等疏詆其誣禮部言使舊法無差誠宜世守而今旣覺少差矣失今不修將歲愈久而差愈遠其何以齊七政而釐百工哉理應俯從雲路所請卽行旁求歷算漸次修改但歷數本極玄微修改非可易議蓋更歷之初上考往古數千年布算雖有一定之法而成歷之後下行將來數百年不無分秒之差前此不覺非其術之疏也以分秒布之百餘年閒其微不可紀蓋亦無從測識之耳必積至數百年差至數分而始微見其端今欲驗之亦必測候數年而始微得其槩卽今該監人員不過因襲故常推衍成法而已若欲斟酌損益緣舊爲新必得精諳歷理者爲之總統其事選集星家多方測候積算累歲累析毫芒然後可爲準信裁定規制伏乞卽以邢雲路提督欽天監事該監人員皆聽約束本部仍博訪通曉歷法之士悉送本官委用務親自督率官屬測候二至太陽晷刻逐月中星躔度及驗日月交食起復時刻分秒方位諸數隨得隨錄一切開呈御覽積之數年酌定歲差修正舊法則萬世之章程不易而一代之歷寶惟新其於國家敬天勤民之政誠大有裨益矣疏奏留中未行

四十一年南京太僕寺少卿李之藻上西洋歷法略言邇年臺諫失職推算日月交食時刻虧分往往差謬交食旣差定朔定氣由是皆舛伏見大西洋國歸化陪臣龐迪弢龍化民熊三拔陽瑪諾等諸人慕義遠來讀書談道俱以穎異之資洞知歷算之學攜有彼國書籍極多久漸聲教曉習華音其言天文歷數

有我中國昔賢所未及道者。一曰天包地外。地在天中。其體皆圓。皆以三百六十度算之。地經各有測法。從地窺天。其自地心測算。與自地面測算者。都有不同。二曰地面西北。其北極出地高低度分不等。其赤道所離天頂。亦因而異。以辨地方風氣寒暑之節。三曰各處地方。所見黃道。各有高低斜直之異。故其晝夜長短。亦各不同。所得日景。有表北景。表南景。亦有周圍圓景。四曰七政行度不同。各爲一重天。層層包裹。推算周經。各有其法。五曰列宿在天。另行度。以二萬七千餘歲一周。此古今中星所以不同之故。不當指列宿之天。爲晝夜一周之天。六曰五星之天。各有小輪。原俱平行。特爲小輪旋轉於大輪之上下。故人從地面測之。覺有順逆遲疾之異。七曰歲差分秒多寡。古今不同。蓋列宿天外。別有兩重之天。動運不同。其一東西差。出入二度二十四分。其一南北差。出入一十四分。各有定算。其差極微。從古不覺。八曰七政諸天之中心。各與地心不同。處所。春分至秋分多九日。秋分至春分少九日。此由太陽天心與地心不同。處所。人從地面望之。覺有盈縮之差。其本行初無盈縮。九曰太陰小輪。不但算得遲疾。又且測得高下遠近。大小之異。交食多寡。非此不確。十曰日月交食。隨其出地高低之度。看法不同。而人從所居地面南北望之。又皆不同。兼此二者。食分乃審。十一曰日月交食。人從地面望之。東方先見。西方後見。凡地面差三十度。則時差八刻二十分。而以南北相距三百五十里作一度。東西則視所離赤道。以爲減差。十二曰日食與合朔不同。日食在午前。則先食後合。在午後。則先合後食。凡出地入地之時。近於地平。其差多至八刻。漸近於午。則其差時漸少。十三曰日月食所在之宮。每次不同。皆有捷法定理。可以用器轉測。十四曰節氣當求太陽真度。如春秋分日。乃太陽正當黃赤二道相交之處。不當計日勻分。凡此十四事者。臣觀

前此天文歷志諸書皆未能及。或有依稀揣度。頗與相近。然亦初無一定之見。惟是諸臣能備論之。不徒論其度數而已。又能論其所以然之理。蓋緣彼國不以天文歷學爲禁。五千年來。通國之俊曹。聚而講究之。窺測既核。研究亦審。與中國數百年來始得一人。無師無友。自悟自是。此豈可以疏密較者哉。觀其所製窺天窺日之器。種種精絕。即使郭守敬諸人而在。未或測其皮膚。又况現在臺諫諸臣。刻漏塵封。星臺迹斷者。甯可與之同日而論也。昔年利瑪竇最稱博覽超悟。其學未傳。盡先朝露。士論至今惜之。今龐迪峩等鬢髮已白。年齡向衰。失今不圖。政恐後無人解。伏乞敕下禮部。亟開館局。首將陪臣龐迪我等所有歷法。照依原文。譯出成書。其於鼓吹休明。觀文成化。不無裨補也。

懷宗崇禎二年九月癸卯。開設歷局。命吏部左侍郎徐光啓督修歷法。先是五月乙酉朔。日食。時刻不驗。上切責欽天監官五官。夏官正戈豐年等奏言。大統歷乃國初監正元統所定。其實卽元太史郭守敬所造授時歷也。二百六十年來。歷官按法推步。一毫未嘗增損。非惟不敢。亦不能。若妄有竄易。則失之益遠矣。切詳歷始於唐堯。至今四千年。其法從粗入精。從疏入密。漢唐以來。有差至二日一日者。後有差一二時者。至於守敬授時之法。古今稱爲極密。然中閒刻數。依其本法。尙不能無差。此其立法固然。非職所能更改。豈惟職等。卽守敬以至元十八年成歷。越十八年。爲大德三年八月。已推當食而不食。大德六年六月。又食而失推。載在律歷志。可考也。是時守敬方以昭文殿大學士知太史院事。亦未能有所增改。良以心思技術已盡於此。不能復有進步矣。於是禮部覆言。歷法大典。唐虞以來。咸所隆重。故無百年不改之歷。我高皇帝神聖自天。深明象緯。而一時歷官如元統李德芳輩。才力有限。不能出守敬之上。因循至今。

後來專官修正。則有童軒、樂護、華湘等。著書考定。則有鄭世子載堉、副使邢雲路等。建議改正。則有俞正己、周濂、周相等。是皆明知守敬舊法本未盡善。抑亦年遠數贏。卽守敬而在。亦須重改。故也。况曆法一志。歷代以來。載之國史。若史記、漢書、晉唐書、宋元史。尤爲精備。後之作者。稟爲成式。因以增修。我國家事。度越前代。而獨此一事。略無更定。如萬歷閒纂修國史。擬將元史舊志。謄錄成書。豈所以昭聖朝之令典哉。已而光啓上歷法修正十事。其一議歲差。每歲東行。漸長漸短之數。以正古來百五十年六十六年多寡。互異之說。其二議歲實小餘。昔多今少。漸次改易。及日景長短。歲歲不同之因。以定冬至。以正氣朔。其三。每日測驗日行經度。以定盈縮加減真率。東西南北高下之差。以步日躔。其四。夜測月行經緯度數。以定交轉遲疾真率。東西南北高下之差。以步月離。其五。密測列宿經緯行度。以定七政盈縮遲疾順逆違離。遠近之數。其六。密測五星經緯行度。以定小輪行度。遲疾留逆伏見之數。東西南北高下之差。以推步凌犯。其七。推變黃赤道廣狹度數。密測三道距度。及月五星各道與黃道相距之度。以定交轉。其八。議日月去交遠近。及真會似會之因。以定距午時差之真率。以正交食。其九。測日行。考知二極出入地度數。以定周天緯度。以齊七政。因月食。考知東西相距地輪經度。以定交食時刻。其十。依唐元法。隨地測驗二極出入地度數。地輪經緯。以求晝夜晨昏永短。以正交食。有無先後多寡之數。因舉南京太僕寺少卿李之藻。西洋人龍華民、鄧玉函。同襄歷事。疏奏報可。故有是命。

三年夏五月。徵西洋陪臣湯若望。秋七月。徵西洋陪臣羅雅谷。供事歷局。

四年春正月。禮部尙書徐光啓進日躔歷指一卷。測天約說二卷。大測二卷。日躔表二卷。割圓八線表六

卷黃道升度七卷黃赤距度表一卷通率表一卷夏四月戊午夜望月食徐光啓豫定月食分秒時刻方位奏言日食隨地不同則用地緯度算其日分多少用地經度算其加時蚤晏月食分數寰宇皆同止用地經度推求先後時刻漢安帝元初三年三月二日日食史官不見遼東以聞五年八月朔日食史官不見張掖以聞蓋食在蚤獨見於遼東食在晚獨見於張掖當時京師不見食非史官之罪而不能言遼東張掖之見食則其法爲未密也唐書載北極出地自林邑十七度至蔚州四十度元人設四海測驗二十七所庶幾知詳求經緯之法矣臣特從輿地圖約略推步開載各省今食初虧度分蓋食分多少旣天下皆同則餘率可以類推不若日食之經緯各殊必須詳備也又月體一十五分則盡入闕虛亦十五分止耳而臣今推二十六分六十秒者蓋闕虛體大於月若食時去交稍遠卽月體不能全入闕虛止從月體論其分數是夕之食極近於二道之交故月入闕虛一十五分方爲食旣更進一十一分有奇乃得生光故爲二十六分有奇如同回回歷推十八分四十七秒略同此法也冬十月辛丑朔日食光啓復上測候四說其略曰日食有時差舊法用距午爲限中前宜加中後宜減以定加時蚤晚若食在正中則無時差不用加減故臺官相傳謂日食加時有差多在蚤晚日中必合獨今此食旣在日中而加時則舊術在後新術在前當差三刻以上所以然者七政運行皆依黃道不由赤道舊法所謂中乃赤道之午中而不知所謂中者黃道之正中也黃赤二道之中獨冬夏二至乃得同度餘日漸次相離今十月朔去冬至度數尙遠兩中之差二十三度有奇豈可仍因食限近午不加不減乎若食在二至又正午相值果可無差卽食於他時而不在日中卽差之原尙多亦復難辨適際此日又值此時足爲顯證是可驗時差之正術

一也。交食之法。既無差誤。及至臨期實候。其加時亦或少有後先。此則不因天度而因地度。地度者。地之經度也。本方之地。經度未得真率。則加時難定其法。必從交食時測驗數次。乃可較勘畫一。今此食依新術測候。其加時刻分。或前後未合。當取從前所記地經度分。斟酌改定。此可以求里差之真率。二也。時差一法。溺於所聞。但知中無加減。而不知中分黃赤。今一經目見。一經口授。人人知加時之因黃道。人人知黃道極之歲一周天。奈河以赤道之午正爲黃道之中限乎。臣今取黃道中限。隨時隨地算就立成。監官已經謄錄。臨時用之。無不簡便。其他諸術。亦多類此。足以明學習之甚易。三也。該監諸臣所最苦者。從來議歷之人。詆爲擅改。不知其斤斤墨守者。郭守敬之法。卽欲改不能也。守敬之法。加勝於前矣。而謂其至今無差。亦不能也。如時差等術。蓋非一人一世之聰明所能揣測。必因千百年之積候。而後智者會通立法。若前無緒業。卽守敬不能驟得之。况諸臣乎。此足以明疏失之非辜。四也。有此四者。卽分數甚少。亦宜詳加測候。以求顯驗。故敢冒昧上聞。

六年冬十月。以山東布政司右參政李天經督修歷法。時徐光啓以病辭歷務。踰月卒。所著崇禎歷書幾百卷。

七年春正月乙巳。督修歷法。山東右參政李天經疏言。七政之餘。依新法。則火土金三星。本年九月初旬。會於尾宿之天江左右。木星於是月前。犯鬼宿之積尸氣。一時五緯。已有其四。非必以數合天。卽天驗法之一據也。從來歷家於列宿借星。有經度無緯度。雖回回歷近之。猶然古法。故臣等所推經緯度數時刻。與監推各各不同。如本年八月秋分。大統歷算在八月三十日未正一刻。新法算在閏八月二日未初一。

刻一十分。相距兩日。臣於閏八月二日。同監局官生測太陽午正高五十度零六分。尙差一分入交。推變時刻。應在未初一刻一十分。脗合新歷。隨取輔臣徐光啓從前測景簿。數年俱合。春秋傳曰。分同道也。至相過也。二語可爲今日節變差訛之一證。蓋太陽行黃道中線。迨二分而黃道與赤道相交。此晝夜之所以平而分。應所由起也。迨二至。則過赤道內外各二十三度有奇。夫過赤道三十三度爲真至。則兩道相交於一線。詎不爲真分乎。太陽有平行。有實行。平則每日約行若干。而實則有多有寡。不獨秋分爲然。謹將諸曜會合凌犯行度。開具禮部委司官同監局官生詳議以聞。蒲城布衣魏文魁上言。今年甲戌二月十六日癸酉曉刻月食。今歷官所訂乃二月十五日壬申夜也。八月應乙卯月食。今乃以甲寅。遂令八月之擊爲晦。并白露秋分皆非其期。訛謬尙可言哉。奏上。命文魁入京測驗。秋七月甲辰。李天經上歷元二十七卷星屏一。冬十一月日晷星晷儀器告成。上命太監盧維甯魏征至局驗之。先是西儒羅雅谷湯若望在歷局造測儀六式。一曰象限懸儀。二曰平面懸儀。三曰象限立運儀。四曰象限座正儀。五曰像限大儀。六曰三直游儀。復有弩儀。弧矢儀。紀限儀。諸器不概錄。谷應泰曰。古今改歷者。無慮數十家。由黃帝訖秦。凡六改。由漢初訖漢末。凡五改。由曹魏訖隋。凡十三改。由唐訖周。凡十六改。由宋初訖宋末。凡十八改。由金熙宗訖元。凡三改。其間傑然名家者。漢大初以鐘律。唐大衍以蓍策。元授時以晷景。而晷景爲最密。明太祖吳元年。太史令劉基率其屬進戊申大統歷。已而欽天監博士元統請以洪武甲子歲冬至爲歷元。大約錫名雖殊。立成罔異。與授時都無增損。良以才非守敬。革故滋難也。自時厥後。建議改正。則有俞正己。鄭善夫。周濂。周相。諸人。專官修治。則有童軒。樂護。華

湘諸人著書考定。則有鄭世子載堉副使邢雲路諸人志切持籌事同築室言人人殊。旋復報罷。迄於萬歷。西儒來賓。繼軌迭至。一時象緯歷算之說。迥出尋常。默與天會。李之藻既推轂於定陵。徐光啓復連茹於懷廟。開局京圻。允稱甚盛。其法以二十四刻二十一分八十八秒六十四微爲平行。歲實小餘。而以均數加減之。則爲定冬至。由是太陽有平行實行。而三百六十五度之盈縮因之。太陰有自行次輪。又次輪而朔望之遲疾因之。交食有時差里差視差。而食時之刻數分秒方位因之。有所爲根數者。猶授時氣應也。引數者。猶授時盈縮歷遲疾限也。均數者。猶授時加減差也。黃道東行一分四十三秒餘者。猶授時歲差一分五十秒也。至如午中分黃赤之辨。分至有贏縮之殊。而隨動自動。疾動遲動不同。則交道之廣狹生焉。闡微析幽。思出象表。雖使揚子譚玄。洛下握算。無以及此。衆言淆亂。迄未通頒。適我皇南嚮之辰。詔司天西歷之布。法象維新。璣衡愈密。豈非宏制尙闕於垂成。而大典終歸於有待哉。唐乎盛矣。

卷七十四

宦侍誤國

熹宗天啓七年秋八月。懷宗踐祚。冬十月。魏忠賢伏誅。南京守備太監楊朝。浙直織造太監李實。承天守備太監李希哲。提督太和山太監馮玉。天壽山太監孟進。漕運太監李明道。崔文昇並免。上御日講畢。召閣臣入便殿。出薊遼督師王之臣疏示之。曰。王之臣自云贅員。又云虛拘。非內臣牽制之乎。其盡撤各邊內臣。十一月戊辰。諭曰。先朝於宣大薊遼東江諸地。分遣內臣協鎮。一柄兩操。甚無謂。矧宦官觀兵。古



來有戒。其概罷之。一切相度機宜。俱聽經督節制。無復委任不專。以藉其口。凡爾諸臣。宜體此意。先是自萬歷以來。礦稅既行。騷然苦之。既而魏忠賢擅權。敲骨剝髓。天下重足而立。上卽位。首罷之。朝野翕然望至治焉。

懷宗崇禎元年春正月。命內臣俱入直。非受命不許出禁門。二月。諭戒廷臣。結交近侍。

二年夏四月。以內官監太監曹化淳提督南京織造。秋七月。以司禮太監曹化淳提督東廠。冬十一月。我大清兵南下。始遣乾清宮太監王應朝監視行營。太監馮元昇覈軍訖。始下戶部發餉。又命太監呂直勞軍。十二月。以司禮監太監沈良佐內官太監呂直提督九門及皇城門。司禮太監李鳳翔總督忠勇營提督京營。

三年春二月。司禮太監曹化淳等各廕錦衣衛指揮僉事。

四年秋九月。命太監張彝憲總理戶工二部錢糧。唐文征提督京營戎政。王坤往宣府。劉文忠往大同。劉允中往山西。各監視兵餉。冬十月。命太監監軍王應朝往關寧。張國元往薊鎮東協。王之心中協。邵希韶西協。十一月。以太監李奇茂監視陝西茶馬。吳直監視登島兵餉。初。上旣罷諸內臣。外事俱委督撫。然上英察。輒以法隨其後。外臣多不稱任使者。崇禎二年。京師戒嚴。乃復以內臣視行營。自是銜憲四出。動以威倨。上官體加於庶司。羣相壅蔽矣。罷工部郎中孫肇興。肇興監督盔甲廠。以帑詘。疏劾張彝憲。上怒。落職。

五年春三月。工部右侍郎高宏圖上言。臣部有公署。中則尙書。旁列侍郎。禮也。內臣張彝憲奉總理兩部

之命。儼臨其上。不亦辱朝廷而褻國體乎。臣今日之爲侍郎也。武尙書。非武內臣。國家大體。臣固不容不  
慎。故僅延之川堂相賓主。而公座毋甯已之。雖大拂彜憲意。臣不顧也。且總理公署奉命別建。則在臣部  
者宜還之臣部。豈不名正言順。而內外平。上以軍興餉事重。應到部驗核。不聽。宏圖遂引疾求去。疏七上。  
竟削籍。秋七月。以司禮監太監曹化淳提督京營戎政。冬十二月。南京禮部主事周鑣上言。內臣用  
易而去難。此從來之通患。然不能遽去。猶冀有以裁抑之。今張彜憲用而高宏圖之骨鯁不可容矣。金鉉  
之撫慮雖幸免罪。以他事中之矣。王坤用而魏呈潤以救胡良機處矣。趙良曦以直糾扶同處矣。鄧希詔  
用而曹文衡以互結投間矣。王宏祖以禮數苛斥矣。若夫孫肇興。王宏祖之激直。李曰輔。熊開元之慷慨。  
無不罷斥。未能屈指。尤可嘆者。每讀邸報。半屬內侍之溫綸。從此以後。草菅臣子。委褻天言。祇徇中貴之  
心。將不知所極矣。上怒其切直。削籍。禮部員外郎袁繼咸疏救之。不聽。以司禮監右少監劉勞譽提督  
九門。令百官進馬。三品以上各貢一匹。餘合進。俱納於御馬監。實費金貲之本監也。否則雖駿驥亦卻之。  
六年春正月。大學士周延儒以宣府閱視太監王坤疏劾。乞罷。不允。左副都御史王志道上言。王坤不宜  
侵輔臣。上召廷臣於平臺。謂志道曰。遣用內臣。原非得已。朕言甚明。何議論之多也。昨王坤之疏。朕已責  
其誣妄。乃廷臣舉劾。莫不牽引內臣。豈處分各官皆爲內臣耶。對曰。王坤直劾輔臣。舉朝皇皇。爲紀綱法  
度之憂。臣爲法度惜。非爲諸臣地也。上曰。廷臣於國家大計。不之言。惟因內臣在鎮。不利奸弊。乃借王坤  
疏。要挾朝廷。誠巧佞也。因詰志道者。再。周延儒曰。志道非專論內臣。實責臣等溺職。上色稍霽。曰。職掌不  
修。沽名立論。何堪憲紀。立命志道退。延儒遂放歸。夏五月。命司禮監太監張其鑑等。赴各倉。同提督諸

臣盤驗收放。太監張應朝調南京與胡承詔協同守備。諭兵部流寇蔓延。各路兵將功罪應有監紀。特命太監陳大金、閻思印、謝文舉、孫茂霖爲內中軍。會各撫道分入曹文詔、左良玉諸營。尋復以閻思印同總兵張應昌合勦汾陽。知縣費甲、總兵以逼迫苦供億墜井死。六月命太監高起潛監視錦寧。張國元監視山西石塘等路。綜核兵餉。秋七月。敕內臣守萊州功。徐時得、翟升各廕錦衣衛正千戶。命湖廣守備太監魏相監視登島兵餉。

七年春二月。監視登島太監魏相以給事中莊鰲獻上太平十二策。內撤監視。因求罷。不允。貶鰲獻於外。總理太監張彝憲請入覲官投冊以隆體統。許之。山西提學僉事袁繼成上言。士有廉恥。然後有風俗。有氣節。然後有事功。如總理內臣有覲官賣冊之令。皇上從之。特在剔釐奸弊。非欲羣臣屈膝也。乃上命一出。靡然從風。藩臬守令參謁屏息。得免呵責爲幸。嗟乎。一人輯瑞。萬國朝宗。諸臣未覲天子之光。先拜內臣之座。士大夫尙得有廉恥乎。逆鑑方張。時義子乾兒昏夜拜伏。自以爲羞。今且白晝公庭。恬不知怪。國家自有覲典。二百餘年未聞有此。所爲太息也。上以越職言事責之。既張彝憲亦奏辨。謂覲官參謁乃尊朝廷。繼成復上言。尊朝廷莫大於典例。知府見藩臬行屬禮。典例也。見內臣行屬禮。亦典例乎。諸司至京。投冊吏部各官。典例也。先謁內臣。亦典例乎。事本典例。雖坐受猶以爲安。事創彝憲。卽長揖祇增其辱。高皇帝立法。內臣不得與外事。若必以內臣繩外臣。會典所不載。上仍切責之。夏五月。陝西按察司副使賀自鏡奏。監紀太監孫茂霖玩寇。宣府太監王坤奏。監軍紀功罪耳。追逐有將吏在。果如自鏡言。則地方官罪不在茂霖下矣。上不問。六月。敕禁旅功。廕太監曹化淳、世襲錦衣衛千戶袁禮、楊進朝、盧志德。

各百戶。賜衣幣。以擊盜屢捷也。罷各道監視太監。諭曰。朕御極之初。撤還內鎮。舉天下事悉以委之大。小臣工。比者多營私罔恤民艱。廉謹者又迂疏無通論。己巳之冬。京都被兵。宗社震恐。此士大夫負國家也。朕不得已用成祖監理之例。分遣各鎮監視。添設兩部總理。雖一時權宜。亦欲諸臣自引罪。今經制鑿立。兵餉稍清。諸臣應亦知省。其將總理監視等官盡行撤回。以信朕之初心。張彝憲俟漕竣即回。監供職。惟關甯密邇外境。高起潛兼監兩鎮。暨內臣提督如故。秋七月。發幣金蟒段給監軍太監高起潛賞功。九月。司禮監太監張從仁改內官監提督九門。冬十月。命兵部同內中軍張元亨。崔良用往西寧監視。及茶馬。御史易壯馬。總理戶工二部。司禮太監張彝憲改司禮監提督。十一月。侍讀倪元璐上言。邊臣之情歸命軍容。無事稟成爲恭。寇至推委百出。陽以號於人曰。吾不自由也。陛下何不信賞必罰。以持其後。而必使近習之人試之鋒鏑。又使藉口。迄用無成哉。始陛下曰。行之有績。即撤。今行之無績。益宜撤。不聽。十二月。以乾清宮太監馬雲程提督京營戎政。撤南京守備太監胡承詔。張應朝。以司禮太監梁洪泰。內官太監張應乾協同守備。八年夏四月。承運庫太監周禮言崇禎六年七年省直金花銀共逋八十九萬。命趣之。冬十一月。太監高起潛弟廕錦衣衛中所正千戶世襲。九年夏六月。命司禮太監曹化淳同法司錄囚。秋七月。我大清兵至居庸。遣內中軍李國輔守紫荆關。許進忠守倒馬關。張元亨守龍門關。崔良用守固關。勇衛營太監孫維武。劉元斌以六千五百人防馬水沿河。兵部尙書張鳳翼督援兵出師。以監視關寧。太監高起潛爲總監。南援霸州。遼東前鋒總兵祖大

壽爲提督。同山海總兵張時傑屬起潛。給起潛金三萬。賞功牌千。購賞格。以前司禮太監張雲漢、韓贊周爲副提督。巡城閱軍。司禮太監魏國徵守天壽山。尋以國徵總督宣府昌平。京營御馬太監鄧良輔爲分守。太監鄧希詔監視。中西二協太監杜勳分守。以張元佐爲兵部右侍郎。鎮守昌平。時內臣提督天壽山者皆卽日往。上語閣臣曰。內臣卽日就道。而侍郎三日未出。何怪朕之用內臣耶。以司禮太監盧維寧總督天津、通州、臨清、德州。內中軍太監孫茂霖分守。八月。命科道各官分地督運。從太監張彝憲之言也。召廷臣於平臺。及河南道御史金光宸。初。光宸參督師張鳳翼及鎮守通州兵部右侍郎仇維楨。首敍內臣功爲借援。又請罷內臣督兵。上勿善也。是日上怒甚。曰。仇維楨方至通州。爾卽借題沽名。欲重治之。適大雷雨。議譎。九月。我大清兵從建昌冷口還。守將崔秉德請率兵遏歸路。總監高起潛不敢進。揚言當半渡擊之。偵騎報師已盡行。四日起潛始進石門山。報斬三級。司禮監太監孫象賢調南京。同張彝憲守備。十月。工部侍郎劉宗周上言。人才之不競。非無才之患。而無君子之患。今天下卽乏才。亦何至盡出二三中官下。每當緩急之際。必依以大任。三協有遣。通津、臨德有遣。又重其體統。等於總督。中官總督。將置總督於何地。是以封疆嘗試也。且小人與中官每相引重。而君子獨岸然自異。故自古有用小人之君子。終無黨比。中官之君子。皇上誠欲進君子。退小人。而復用中官以參制之。此明示以左右袒也。不報。賜太監曹化淳等綵幣。時各進馬也。敍京師城守功。太監張國元、曹化淳廕指揮僉事。各世襲。賜金幣。初。化淳爲京營提督。收用降丁。及守昌平。俱散去。至有叩京師城下者。皆稱京營兵。莫能辨。十一月。敍禁旅功。太監劉元斌廕錦衣衛百戶。命御馬太監陳貴總督大同、山西。牛文炳分守。御馬太

監王夢弼分守宣府昌平。鄭良輔協理。召兵部左侍郎王業浩、司蘇太監曹化淳於平臺。十二月，曹化雨加後軍都督府左都督，世襲錦衣衛指揮僉事。

十年春正月，常熟張從儒訐錢謙益濫體仁修郟下之獄。謙益嘗爲王安作祠記。太監曹化淳者，故王安門下也。謙益得免。體仁尋致仕還。（詳東林黨議）以御馬太監李名臣提督京城巡捕，王之俊副之。司

禮太監曹化淳提督東廠。分守津通臨德總理太監楊顯名參前巡鹽御史張養高、欽舜各侵稅額。詔逮之時，養先卒。下撫按錄其家。夏四月，命南京守備太監孫象賢、張雲漢同兵部尙書范景文清覈兵

馬械杖。總監太監高起潛行部。永平道劉景耀關內道楊于國俱恥行屬禮。上疏求免。上謂總監原以總督體統行事，罷于國降景耀二級。以後監司皆莫敢爭。時監視之設，止多一扣餉之人。監視欲滿，則督

撫鎮道皆有所恃以飭功掩過。故邊吏皆樂有監視。而上方倚任中官不察也。秋七月，工部員外郎方璽謫外。璽上言：皇上親擒魏忠賢而手刃之，豈溺情閹豎者。不過以外廷諸臣無一可用，而借才及之。况

人臣感激聖恩，苟知報答，何論內外。每見廷臣處地懸絕，不若宮庭。誓御效忠，倍易。凡此內臣，徼茲曠典，孰不欲棄捐頂踵以酬我皇上者。不必總總過計也。刑科給事中何楷駁其通內呈身。吏部請削其籍。上

手改降三級謫外。冬十一月，以司禮太監曹化淳、杜勳等提督京營。孫茂霖分守薊鎮中西三協。鄭良輔總理京城巡捕。

十一年春正月，任邱、清苑、涑水、遷安、大城、定興、通州各有司不法。上內訪逮入。責撫按不先劾爲溺職。近畿如此，遠地可知。命部院申飭。三月丙申，城蘆溝名拱極城。太監督役掠塗人受工。民力爲憊。冬十

月以御馬太監邊永清分守薊鎮西協。

十二年春正月。敕緝奸功。東廠太監王之心。曹化淳。蔭錦衣衛百戶。二月。以司禮太監崔琳清理兩浙鹽課賦稅。秋七月。以司禮太監張榮提督九門。王裕民總督京營。戒午門端門諸內臣。延接朝士。九月。以內官監太監杜秩亨提督九門。

十三年春三月。詔撤各鎮內監還京。夏六月。大學士薛國觀免。先是。上召國觀語及朝士貪婪。對曰。使廠衛得人。朝士何敢如是。東廠太監王化民在側。汗浹沾背。於是專偵其陰事。而國觀亦徧伎。坐通賄敗。

（詳東林黨議）

十四年夏四月。召大學士周延儒入朝。秋八月辛酉。上幸太學。以重修告成也。正一真人張應京請扈

從臨雍。先期。司禮監太監王德化奉命率羣臣習儀於太學。時比之唐魚朝恩講經。元李邦甯釋奠事。

九月。改東廠提督京營者亦稱總督。冬十一月。禁朝臣私探內閣。通內侍。於是待漏俱露立。毋敢入直舍。十二月。諭停內操。敕內臣神宮等監及各司局庫等毋干外政。并申戒廷臣毋交通近侍。

十五年春正月。罷提督京營內臣。御史楊伯願上言。臣讀敕諭申結交內侍之律。因稽高皇帝初無所謂緝事之令。臣工不法。止於明糾。無陰訐也。臣待罪南城。所見詞訟。多假番役。妄稱東廠。甚者誘人作奸。挾仇首告矣。夫餌人以陷禍。擇人而肆喙。惟恐其不為惡。又惟恐其不即罹於法。揆之皇上泣罪解網之仁。豈不傷哉。伏願先寬東廠條例。東廠寬而刑罰可以漸省。抑臣復有請焉。如臣子獲罪。但敕撫按檻車送詣闕下。未為不可。若緹騎一遣。有資者家門破散。無資者地方斂餽。為害匪淺。上是之。諭東廠所緝止。

於謀逆亂倫。其作奸犯科。自有司存。戒錦衣校尉奉使需擾。秋七月。以司禮太監齊本正提督東廠。王承恩提督勇衛營。冬十月。誅司禮太監劉元斌。初。元斌監軍河南。羣盜在陝洛。元斌留歸德。不敢進。縱諸軍大掠。殺樵汲者。論功。及論辟。未得旨。卽奏辨。上怒。并誅太監王裕民。

十六年夏五月。以內官監太監王之俊提督京城巡捕練兵。秋七月。戒廷臣私謁內侍。果有事朝房商之。八月。以司禮太監王承恩督察京營戎政。韓贊周守備南京。冬十二月。前大學士周延儒有罪。賜死。延儒當中外交訐。竟無能爲上畫一策。其罷內監。撤廠衛。內臣日夜文致之。故延儒始終皆以璫敗。初。延儒受主眷深。諸璫稍稍乘閒媒孽。上俱不信。延儒益忽之。不爲慮。迨視師行邊。上意稍移。而諸璫乃盡發其蒙蔽狀。上信之。吳昌時事發。聖怒遂不可回矣。

十七年春二月。李自成自山西趨真定保定。命太監高起潛等分據要害。三月。李自成陷宣府。太監杜勳迎降。入居庸關。太監杜之秩迎降。以司禮太監王承恩提督內外京城。召前太監曹化淳等分守諸

門。丙午。賊騎薄彰義門。太監杜勳縋城上。入見大內。張皇賊勢。語守璫輩曰。吾黨富貴自在也。是夕。太監曹化淳開門降。上死社稷。內臣從死者惟王承恩一人。

谷應泰曰。嘗聞宦者四星。在皇位之側。而腐身薰子。動相銜達。金貂左璫。口含天憲者。所由來漸矣。然秦以趙高敗。漢唐以宦侍亡。太祖鑒之。凡內豎不令讀書。取備掖庭。給灑掃而已。及乎中葉。寵用刑餘。英憲武熹亂者四世。比至懷宗。冲齡踐祚。睿謀天縱。手翦凶璫。雖李閏有伺安之功。曹騰參建桓之策。而卒之張達坐收。甘露無變。不動色而去。大奸斯已奇矣。然其初年。江南織造。卽便撤還。塞北監軍。悉皆免罷。仍



諭內臣受命始出禁門。廷臣在官，勿交近侍。於時嘖笑不假，狐鼠無竊，宮中府中肅清極矣。詎意渭水陳兵，甘泉舉火，而問錢穀則大僚不對，咨廟算則肉食寡謀。秦旣無人，王真孤立，乃始參任貂璫，往來給使，勞軍轉餉，偵刺行閒。蓋亦有不得已也。自後曹化淳等以錦衣蒙廕，而張彝憲總理戶工，唐文征親督京營，高起潛監視錦甯，張其鑑盤驗收放，內外各司，必兼貂貴。緣邊諸鎮復設中涓，語云西頭勢重，南衙樞機，權過宰相，良不誣矣。其後高宏圖、熊開元次第投劾，倪元璐、袁繼咸先後上章，侯覽用事，而朱穆發疽，朝恩卽席，而魯公爭坐，國體旣傷，宜士大夫之所鄙也。然而英主在御，太阿未落，非有王振土木之罪，汪直西廠之酷，劉瑾不軌之謀，魏忠賢閹奸之狀，而潛窺意旨，馴致敗亡者，無他，陽授以國柄者，猶摘龍之珠，而陰寄以耳目者，直竊叢之神也。總之懷宗怒在門戶，故必用甫節以伺膺滂，而懷宗疑在蒙蔽，又必用宏石以發楊賈，卒之中常子弟，悉合黃巾。涼州議郎責輸貨賄，而天下事不可爲矣。以予論之，崇禎初造人望太平，假令推誠置腹，則煬燾可除，任賢去邪，則羣小可渙，與其訶之於閹人，孰若信之於正士，回天獨坐，固無事此曹也。獨奈何輔國就誅，元振更用，左宦旣殺，張讓復然，眉睫之喻，乃爲識者所悼，惜哉。



萬有文庫

第一集一千種

王雲五主編

明史紀事本末

(二十)

谷應泰著

商務印書館發行

萬有文庫

第一集一千種



商務印書館發行

明史紀事本末

(二十)

谷應泰著



國學基本叢書



星3421—12

# 明史紀事本末

## 卷七十五

### 中原羣盜

崇禎元年延安饑十一月府谷民王嘉允倡亂饑民附之百水盜王二等復合徒衆劫掠蒲城韓城閒時承平久猝被兵人無固志巡撫陝西都御史胡廷宴庸而耄惡聞盜杖各縣報者曰此饑氓徐自定耳於是是有司不以聞盜偵知之益恣劫宜君縣獄北合嘉允五六千人聚延慶之黃龍山二年正月壬戌撫治鄖陽都御史梁應澤以漢南盜告急請兵撫標止步兵三百人陝西巡撫胡廷宴延綏巡撫岳和聲各報洛川淳化三水略陽清水成縣韓城宜君中部石泉宜川綏德葭耀靜甯潼關陽平關金鎖關等處流賊恣掠給事中薛國觀上言賊之熾也由喬應甲撫秦置盜劫不問實釀其禍今弭盜之方在整飭吏治有先事提防之法有臨事翦滅之法有後事懲戒之法上是之己巳固原逃兵掠涇陽富平執游擊李英二月陝西兵備商洛道劉應遇率毛兵入漢中合川兵敗賊略陽守備黃元極擊賊馬蹶被殺猶手刃賊不置賊走漢陰應遇遣兵追斬五百餘誅渠魁數十人餘走蜀其匿漢陰中山者並自殺漢南盜平三月丙子流盜掠真甯甯州安化三水四月甲午固原賊犯耀州督糧參政洪承疇合官兵鄉勇萬餘人圍賊於雲陽幾覆之賊乘夜雷雨潰圍走淳化入神道嶺劉應遇以千人偪漢中賊於五丁峽甯羌知州陳元瓚失防盜遁巡按陝西御史吳煥言秦寇慘掠古所罕有撫臣胡廷宴

狃於積弛。束手無措。則舉而委之邊兵。至延綏撫臣岳和聲諱言邊兵爲盜。又委之內地。總之兩撫欺飾。釀患致奸。民悍卒相煽不已。而西安延安諸邑皆被盜矣。盜發於白水之七月。則邊賊少而土賊多。今年報盜皆騎銳。動至七八千人。則兩撫之推諉隱諱實釀之也。十一月。京師戒嚴。山西巡撫都御史耿如杞以兵入衛。譁於涿大掠良鄉。如杞逮論死。西兵皆沿邊勁卒。潰而失次竄走。剽掠山東。大盜混天王等掠延川米脂青澗等縣。起前總兵杜文煥勦之。

三年正月。陝西邊盜王子順苗美連逃兵掠綏德。衆三四千。南圍韓城。總督楊鶴巡撫劉廣生提兵赴援。斬首三千級。賊遁。復犯清澗。官兵追逐之。賊走西川。官兵追擊。降三百餘人。餘大奔。苗美叔苗登霧嘯聚於安定。總兵杜文煥擊敗之。先是萬曆時。朝廷念西軍勞苦。預給三月糧以爲常。崇禎二年。秦大旱。粟騰貴。軍餉告匱。延綏巡撫楊鶴甘肅巡撫梅之煥分道勤王。兩年復以稽餉而譁。其潰卒畏捕誅。亡命山谷。閒倡饑民爲亂。時東事益急。廷議核兵餉各邊鎮咸釐汰裁餉至數十萬。乘障兵咸譟而下。又以給事中劉懋請裁定驛站。卽給郵乘。傳有額毋濫用。縣官錢歲省費無算。謂蘇民力也。而河北游民向藉食驛糶。用是益無賴。歲不登。無所得食。所在潰兵煽之。而全陝無甯土矣。命洪承疇以都御史巡撫延綏。王嘉允陷府谷。他賊入山西。犯襄陵。吉洲。太平。曲沃。四月。賊王子順苗美陷蒲縣。山西自河曲至蒲津千五百里。俱鄰陝。河最狹。賊自神木渡河。陷蒲。已分三部。東犯趙城。洪洞。汾霍。西掠石樓。永和。吉隰。賊首自號橫天一字王。五月。賊破金鎖關。殺都司王廉。六月。王嘉允陷黃甫川。清水二營。遂據府谷。洪承疇與杜文煥圍之。賊夜劫營。官兵擊敗之。延安知府張輦。都司艾穆。蹙賊於延川。賊求撫。王子順張述聖。



姬三兒等俱降。王嘉允等掠延安、慶陽。城堡多陷。總督楊鶴主撫，不以聞。與陝撫劉廣生遣官持牌四出招賊。賊魁黃虎、小紅狼、一丈青、龍江水、掠地虎、郝小泉等俱給牒免死。安置延綏河西，但不焚殺，其淫掠如故。民罹毒益甚，有司莫敢告，而寇患成於此矣。兵科給事中劉懋上言：秦之流賊，非流自他省，卽延慶之兵丁，十賊也。邊賊倚土寇爲鄉導，土寇倚邊賊爲羽翼。六七年來，韓蒲被掠，其數不多。至近年荒旱頻仍，愚民影附，流劫涇原、富耀之間，賊勢始大。當事以不練之兵勦之，不克。又議撫之，其勦也，所斬獲皆饑民也。而真賊飽掠以去矣。其撫也，非不稱降，聚衆無食，仍出劫掠。名降而實非降也。且今年麥苗盡枯，斗粟金三錢，營卒乏食三十餘月，卽慈母不能保其子，彼官且奈兵民何哉！且邇來貪酷成風，民有三金不能供納賦之一金，至於捕一盜而破十數人家，完一贖而傾人百金之產，奈何民不驅爲盜乎？若營兵曠伍半役於司道，半折於武弁，所餘老弱，既不堪戰，又不練習，當責督撫清汰操練，以備實用也。山西流賊破蒲州，潞安官兵敗沒。七月，御史黃道直言盜起於饑，請發餉銀易米，一從保德州河路，一從洛宜陸路，賑饑民庶，收拾人心，解散黨附，不報。八月，王嘉允勾西人入犯，佯乞降，仍奪路走黃甫川，復引西人入掠。洪承疇、杜文煥從孤山進擊，大破之，賊奔潰。十月，王嘉允陷清水營，殺游擊李顯宗，復陷府谷。大盜李老柴於廊雒間糾三千餘人攻合水，甯夏總兵賀虎臣擊賊於盤谷，斬六百餘級，又敗之。甯州。十一月，山西總兵王國樑追賊於河曲，發西洋礮，礮炸兵自亂，賊乘之大潰，遂陷河曲。十二月乙巳，盜神一元破甯塞，據之，殺參將陳三槐，圍靖邊。副使李右梓固守，賊勾西人四千騎益圍靖邊。三日夜，遂陷柳樹澗、保安等城。

四年正月。神一元陷保安。副總兵張應昌擊敗之。神一元死。弟一魁領其衆。癸未。山西賊犯平陽。庚寅。王嘉允渡河。掠棗園溝。副總兵曹文詔擊卻之。己亥。命御史吳牲贖金賑陝西饑荒。招撫流盜。諭曰。陝西屢報饑荒。小民失業。甚者迫而從賊。自擢鋒刃。誰非赤子。顛連若斯。今特發十萬金。命御史前去酌彼災處。次第賑給。仍曉諭愚民。卽或脅從。僅入賊黨。若肯歸正。卽爲良民。嘉與維新一體收恤。上召輔臣九卿科道及各省監司於文華殿。上問山西按察使杜喬林流寇之事。對曰。寇在平陽。或在河曲。近聞漸已渡河。河曲尙阻。須大創之。但兵寡餉乏耳。上曰。前言寇平。何尙阻也。對曰。山陝隔河。倏去倏來。故河曲獨被困。問河曲之陷。曰。賊未嘗攻。大抵饑民爲之內應。今不早圖。有誤國事。上問陝西參政劉嘉遇。以流寇對曰。流寇因兵餉不足。故難勦耳。且寇見官兵卽散退。復嘯聚。上曰。寇亦吾赤子也。宜招撫之。又問近寇所在。對曰。一在延安。一在宜川。上凝思久之。命退。甯武總兵孫顯祖言。聞喜稷山賊二十餘萬。日勦日益。官兵不過二千。奔逐不支。乞發京營。或調邊騎夾勦。命下。所督便宜專制。總督張宗衡以兵餉並乏。竟不行。二月壬子。總兵賀虎臣。杜文煥合軍圍保安。神一魁勾西人千餘騎突圍出。復糾賊數萬劫甯夏。都指揮王英兵潰。諸道將棄城南奔。戊午。一魁至慶陽。破東關。游擊伍維藩擊斬五百餘人。戊辰。賊圍慶陽。總督楊鶴在邠乾。不卽援。宜君賊趙和尚等南犯涇陽。三原。韓城。澄城。各賊分犯。不知其數。壬申。神一魁陷合水。三月丁丑。張應昌等援慶陽。賊圍解。時議招一魁散其黨。癸未。賊帥孫繼業。茹成名等六十餘人來降。總督楊鶴受之。設御厓於固原城樓上。賊跪拜呼萬歲。因宣聖諭。令設誓各解散。或歸伍。或歸農。自此羣盜視總督如兒戲矣。甲午。陝盜劉五。可天飛。據鐵角城。混天飛。獨行狼等聚蘆

保嶺衆各萬餘。分犯平涼。固原。耀州。涇陽。三原。盜混天猴。薄甯州。分犯環縣。賊陷武安。走平涼。詐稱官兵。襲陷華亭。時大盜王老虎圍莊浪。曹文詔王性善西勦。諸賊乘虛四犯。楊鶴給降人牒。令各還鄉。簡其豪千餘人。以參將吳宏器領之。駐甯塞。而宜君。雒川盜又蠶起矣。副總兵曹文詔擊賊於栗園。大敗之。四月己未。神一魁降於楊鶴。鶴責數其罪。俱伏謝。一魁有戰騎五千。鶴侈其事。上言乞賜一二萬金賑濟。又止巡撫練國事北征。宜雒賊亦求撫於國事。從之。其脅從饑民各給牒回籍。首領置軍中。省臣劾宜大總督魏雲中。陝西總督楊鶴。恇怯玩寇。上切責雲中等。平盜自贖。時言官交論鶴。鶴疏引咎。曹文詔等克河曲。斬賊一千五百餘級。獲兵械馬贏數千。丁卯。延綏巡撫洪承疇令守備賀人龍勞降者。酒降者入謝。伏兵斬三百二十人。庚午。賊陷始興。御史吳甡西行至延長。寇聚城下。諭以禍福。委同知趙鶴年分賑。賊各解散。游賊聞之。皆回受賑。撫賊七千有奇。降盜不沾泥。擁衆脅糧。賞復攻米脂。總餘王承恩。侯拱極率三千人至葭州。洪承疇張應昌亦至。賊分兩營以待。連戰。賊始遁。追至西川。斬三百餘級。賊溺死無算。官兵屯西川雙湖峪。其閒窰寨六十有四。皆險絕。盡爲賊藪。承疇乃令在在設防堵截。不沾泥懼。卒百騎逃關山嶺。都司馬科等追之。盡殲其騎。不沾泥乃降。手殺賊目雙翅虎。縛獻柴金龍。以自贖。五月乙亥。王承恩擊宜川賊。敗之。賊闖王虎。金翅鵬乞降。金翅鵬卽王子順姪。成功也。餘賊走宜君。其衆二萬。陝西都司曹變蛟追甯塞。遺賊於唐毛山。賊大潰。四戰皆捷。先後斬一千四百餘級。而甯塞之逸賊稍殺矣。御史吳甡至榆林鎮。以晉兵遏糴。斗米銀六錢。草根木皮俱盡。人至相食。甡因奏榆林爲西北雄鎮。宿將勁兵出焉。非他鎮比。雜販牟利。商民欣赴。初無損於晉。若以防河爲民而絕秦人之

命。恐謀國不在此也。延安賊趙四兒以萬餘人掠韓城、邵陽、靈州。參將張全昌以五百人戰三日，斬三百餘級。賊走鄜州，復進擊，斬六百餘級。時榆林連旱四年，延安饑民甚衆，西安大旱，巡撫練國事更請發帑賑濟，不報。趙四兒尋降。初，洪承疇撫盜王子順等駐榆林，巡按御史李應期誅之，上謂賊勢蹙甚，招撫爲非，殺之良是，命吳牲覈奏。丁酉，延綏榆林大雨，始有禾。庚子，盜滿天星降於楊鶴，鶴選其驍勇置營中，散其黨萬一千人，卽命其魁分勒回籍，未數月皆畔去。壬寅，賊萬人自合水保安逃出，攻中部，降丁內應城陷。六月癸卯，曹文詔擊斬王嘉允於陽城，其黨復推王自用爲首，號曰紫金梁，其黨自相名目，有老回回、八金剛、闖王、闖將、八大王、埽地王、闖場天、被甲錐、邢紅狼、亂世王、混天王、顯道神、鄉里人、活地草等，分爲三十六營。辛酉，鄜州賊混天猴、張孟金謀襲靖邊，張應昌邀之於真水川，敗之，追斬四百餘級。癸亥，混天猴、獨行狼等萬餘人自甘泉犯合水，洪承疇率兵追擊，敗之，甘泉山中混天猴等乞降。七月，賊首上天龍、馬老虎、獨行狼復掠鄜州，列三營於太平原，楊鶴、王承恩擊破之，上天龍等以二千人降。給事中孟國祥、曹履泰各奏撫賊欺飾之弊。癸未，逮總督陝西三邊都御史楊鶴，下刑部獄，論戍之。丁亥，曹文詔等諸將擊賊，連敗之，賊奔東北，是役也。合督撫四鎮之兵窮追半月，先後數十戰，賊敗，潛遁山谷，延安慶陽千里內暫安焉。甲午，賊趙四兒六千餘人東渡，山西總督洪承疇等兵從之，賊入沁水縣，縣東北有寶莊，故張忠烈公銓里居也。先是銓父尙書五典，謂海內將亂，築牆爲堡甚堅，至是賊犯寶莊，五典已沒，銓子道濬、道澤俱官京師，惟銓妻霍氏守舍，衆議棄堡去，霍氏語其少子道澄曰：「避賊而出，家不保，出而遇賊，身更不免，等死耳，死於家，不猶愈死於野乎？」且我守堅，賊必不得志，躬率僮僕爲

守禦。賊至環攻之。堡中矢石並發。賊傷甚衆。越四日乃退。其避山谷者多遇賊淫殺。惟張氏宗族得全。冀北兵備王肇生表其堡曰夫人城。辛丑陝西賊陷中部。王承恩擊斬千七百級。八月癸卯。總兵賀虎臣擊斬慶陽賊劉六。斬其餘黨五百餘人。西路漸平。先是巡按陝西御史李應期言。秦賊旋撫。旋叛。上命御史吳牲確查報聞。牲上言。延慶地互數千里。十瘠民窮。連歲旱荒。盜賊蠭起。西路則神一元破甯塞。安邊攻保安。一元死。第一魁繼之。又破合水。圍慶陽。總督楊鶴招撫四千有奇。餘黨郝臨菴。劉六等衆不下數萬。掠環縣。真甯。開。此保安合水之流孽也。延安四載奇荒。邊軍始亂。出掠米脂。綏德。青澗。脅從甚衆。幾於無民。流劫延南。點燈子衆號數萬。自山西回黃龍山。西安北界數州縣被毒甚慘。此延北邊賊流毒西安者也。近官軍南勦。賊望風潛逃。相繼招安。滿天星等降於榆林。餘賊遂徙而北。其降賊雖散原籍。仍復劫掠。於是有官賊之謠。而人致恨於招撫之失事矣。點燈子衆五六千在青澗。旋撫旋叛。慶陽郝臨菴。劉六等亦曾受撫。今攻陷中部者皆其衆也。又降賊獨頭虎見大兵之來。已出韓城。潼關道臣胡其俊猶追贖錢九十萬。賊復橫索。一一給之。惟謹。要挾重資之說有自來矣。爲今之計。集兵合勦。殲其渠而餘衆自破。明賞罰而士氣自鼓。秦事猶可爲也。山西賊陷隰州。蒲州。命許鼎臣巡撫山西。洪承疇駐慶陽。報乏餉。已承疇兵大退。趙四兒於山西桑落鎮。九月。山西賊入河北。犯濟原。神一魁復叛。據甯塞。劫守將吳宏器。范禮。官兵攻圍之。其黨黃友才斬一魁以獻。盜獨頭虎。滿天星。一丈青。上天猴等五部恣掠宜維。副總兵趙大允在韓城。去賊營二十里。不敢出戰。士人強之出。報斬五十級。驗之。則率婦女首也。給事中魏呈潤劾大允落職。壬辰。命洪承疇總督陝西三邊。張福臻巡撫延綏。黃友才復叛而遁。追

斬千一百級。洪承疇擊賊趙四兒擒之。卽點燈子也。起青澗。綏德奔突延西閒。往來秦晉。沿河郡縣多苦之。至是伏誅。平陽稍安。其黨黑殺神起。又有過天星。蝎子塊與紫金梁等共數十部。自賊據中部。官軍攻圍兩月不下。冬十月。曹文詔及張福臻兵俱至。克之。陝西賊陷宜川。十一月丙子。陝賊譚雄陷安塞。襲掠一空。仍乞撫。閏十一月。王承恩誘譚雄等五人斬之。癸丑。陝賊不沾泥。張存孟等陷安定。甲子。王承恩克安塞。斬五百餘級。卽進勦安定。賊潛走綏德。降丁混天猴勾盜陷甘泉。劫餉銀十萬八千兩。殺知縣郭永圖。備兵河西。張允登戰死。洪承疇聞之。遣王承恩分勦。以甘泉。鄜延。咽喉。而自以四百人赴之。賊勢日熾。承疇日不暇給矣。甯武總兵孫顯祖敗賊蝎子塊於萬泉。十二月。甘泉賊陷宜君。又陷葭州。備兵僉事郭景嵩死之。己丑。諸降盜復叛。攻綏德。上憂延綏賊蔓。以山陝督撫請餉疏。切責戶兵二部。兵部尙書熊明遇請措二十萬金接濟秦中。甲午。孫顯祖於河津。聞喜等處與賊六戰俱捷。五年正月。延綏賊僞爲米商入宜君。遂陷之。復陷保安。合水流入山西者陷蒲州。永甯大掠四出。山西巡按御史羅世錦歸咎於秦。謂於隣爲壑。給事中裴君賜晉人也。上言責成秦之撫鎮。驅之回秦。而後再議勦撫。蓋當事之無定見如此。洪承疇請留陝西餉銀二十萬資勦費。并以勸農從之。先是甯塞逸賊合環慶諸寇屯鎮原之蒲河。欲犯平涼。走鳳翔。漢中。陝撫練國事檄固原備兵王振奇同副總兵王性善等截守各隘口。檄平涼兵備徐如翰同副總兵董志義守涇州各要害。又檄總兵楊嘉謨等緝奸。殺賊塘馬。斷其耳目。賊遂不敢出。又食乏。互相猜疑。洪承疇從鄜川閒道疾至慶陽。曹文詔以臨洮兵至。賀虎臣兵亦至。會於西澳。各夾擊賊。大小十餘戰。追奔數十里。斬首千餘級。傷墜無算。而甯塞之寇盡矣。惟渾天

猴等尙據襄樂。練國事遂移鎮甯州。時以西澳之捷爲用兵來第一。戊午，洪承疇等擊敗賊於槐安堡。賊雖奔竄，尙破華亭，擾莊浪，而官兵追捕皆破膽潛匿。先是，延西諸寇承疇偕文詔先後清蕩，而鐵角城乃邊盜藪，郝臨菴可天飛爲官軍所敗，獨行狼跳入其伍，耕牧鐵角城爲持久計。聞他盜盡平，甚懼。承疇文詔擊破之，斬可天飛。其二賊亦生得就誅。自西澳捷後，軍聲大振，曹文詔忠勇善戰，承疇與下同甘苦，得士卒心，轉戰四載，斬級三萬。西人稍稍休息，然亦憊甚矣。甲子，陝西原任通政使馬鳴世奏曰：三秦爲海內上游，延安、慶陽爲關中藩屏，榆林又爲延慶藩籬。無榆林，必無延慶；無延慶，必無關中矣。乃自盜發以來，破城屠野，四載於茲。良以盜衆我寡，盜飽我饑，內鮮及時之餉，外乏應手之援，揆厥所由，緣廟堂之上，以延慶視延慶，未嘗以全秦視延慶；以秦視秦，未嘗以天下安危視秦。而且誤視此流盜爲饑民，勢燄燎原，莫可撲滅。若非亟增大兵，措大餉，爲一勞永逸之計，恐官軍驚於東，賊馳於西，師老財匱，揭竿莫禦。天下事尙忍言哉！乞敕所司亟措餉二十萬，給民牛種，爲兵士犒賞，急圖安戢，庶全秦安而各鎮安矣。

張應昌等擊黃友才斬之。二月，甯塞逋寇復熾。庚寅，盜夜入鄜州，備兵僉事郭應響死之。三月，壬戌，陝西賊陷華亭，知縣徐兆麟赴任七日，城陷，逮至，竟坐棄市，人皆冤之。四月，湖廣流盜自興國入江西，泰和、吉安等處。七月，山西賊陷大甯。八月，曹文詔擊賊甘泉，敗之。洪承疇令脅從者免殺，降四千餘人，散者亦數千人。餘賊散匿山谷。山西巡撫宋統殷擊賊於長子，賊奔沁水。庚辰，賊首紫金梁、老回回、八金剛以三萬衆圍寶莊。時張道濬得罪家居，率其族禦之，賊多死。聞秦師且至，懼，欲乞撫。紫金梁呼於壁下，道濬登陴見之，紫金梁免胄前曰：我王自用也，誤從王嘉允，故至此。此來乞降耳。俄老回回亦

至道濬諭之曰。急還所俘。散若徒衆。吾爲請於撫軍。貸爾死。賊乃還所掠。拔營而西。入陽城界。道濬以賊情告於統殷。曰。賊狡未可信。因遣使往覘賊。諸賊成就約。惟八大王闖場。天五營不受命。紫金梁歸款未決。諸軍乘賊不備。輕騎襲賊營。賊怒。南犯濟源。陷溫縣。九月。山西賊破臨縣。賊魁豹五等據其城。又陷修武。殺知縣劉鳳翔。焚掠武陟。暉縣。遂圍懷慶。上以藩封重地。切責河南巡撫樊尙燝。殺賊自贖。賊旣盡。嚮河北。山西巡撫宋統殷備兵冀北。王肇生率軍次陵川。掘賊北歸。賊北走。遇官軍。賊死鬪。互相勝負。會夜與賊爭險。對營兩山頭。賊緣窮谷而登。大譟。官軍亂。統殷肇生皆走。與諸軍相失。宣大總督張宗衡將兵至高平。統殷肇生以師畢會。大破賊於桑子鎮。賊復入沁水。十月。詔副總兵左良玉將兵二千五百人援懷慶。癸未。王承恩敗安塞遺賊於西川胡堡。賊目喬六自斬其魁。以黨降。餘遁。延綏稍甯。十一月。罷山西巡撫宋統殷。以許鼎臣代之。十二月。張宗衡許鼎臣同逐賊臨縣。賊轉入盤磨山。山方六百里。賊閻正虎據交城。文水。以窺太原。邢滿川。上天龍。據吳城。向陽。以窺汾州。紫金梁以秦豫毛兵俱集澤潞東南。遂乘虛從沁州而北。入榆次。又入壽陽。距太原不五十里。許鼎臣撤師北歸。時賊首亂世王與紫金梁爭一掠婦。搆小隙。遣其弟混天王來歸。廷議方督進討。諸將諱言受降。權辭謝之。約得紫金梁頭。始爲請於朝。混天王唯唯。泣涕而去。亂世王與破甲錐合謀圖紫金梁。賊分爲三。陷霍垣。曲長子諸縣。壬辰。陷遼州。是日除夕也。是月。趙和尚等賊斬其魁霍維端以降。諸將分領入營。還宜君。六年正月丁酉。賊闖入畿南西山。距順德百里。時大隊在山西。分爲二。一北向。西犯平縣。窺固關。一南向。河北懷衛之間。盡遭蹂躪矣。丁未。左良玉敗賊於涉縣西。斬其渠。賊望其旗幟皆靡然。賊勢尙熾。謀渡



河南犯。癸丑。進曹文詔都督同知。文詔連敗賊於忻代間。斬首千五百級。二月。許鼎臣。曹文詔屯平定。張應昌屯汾州。駐太原東西以禦寇。賊踞林縣山中。饑民相望而起。左良玉敗績於武安。河南兵七千先後死亡殆盡。賊益熾。左良玉勢孤。乃請鄧玘兵相援。備兵井陘。副使寇從化檄守備李定。王國璽逐賊畿輔。陷賊伏中。兵敗。死亡略盡。賊長驅保定。備兵副使盧象昇禦卻之。曹文詔敗賊於榆杜。時文詔屢捷。張應昌逗留不進。紫金梁老回回從榆次敗北奔。三月。蜀賊寇百丈關。官軍敗沒。詔總兵鄧玘將川兵二千。益以石砭。十司馬鳳儀兵馳赴河南。未幾。馬鳳儀敗沒。丙午。山西兵擊賊於陽城北。張道濬設伏於三纏回。賊至。伏起。擊之。斬其魁。生擒賊首滿天星闖王。賊大奔。巡撫鼎臣獻俘闕下。奏道濬功第一。四月丙寅。山西賊犯平順。乙酉。曹文詔敗賊於陽城。斬千餘級。河南西路賊自輝縣入清化鎮。所在守將敗沒。部臣以河南不塞太行之險。揖賊使入。撫臣不得無罪。五月癸巳。山西巡撫鼎臣以流寇恣掠。請蠲積逋。并豫免數年額賦。不許。己酉。上以勦賊諸將一時功罪勤惰。應有監紀。特命內監陳大金。閻思印。謝文舉。孫茂霖分監曹文詔。張應昌。左良玉。鄧玘軍。紀功過。催糧餉。仍發內帑四萬金。素紅蟒段四百匹。紅素千匹。軍前給賞。庚申。曹文詔夜襲賊於偏店。賊亡走。墜山谷者亡算。盡南奔。諸將會兵逐之沙河。奪馬贏數千。賊自邯鄲南走。河北賊陷涉縣。六月乙丑。川兵潰於林縣。毛兵殺傷甚衆。潞王告急。乞濟師。丙寅。河北賊圍湯陰。林輝涉安諸邑。別賊自陽城垣曲來。合於濟源。山西賊陷和順。辛巳。左良玉破賊於懷慶。賊盡奔太行山。上念中州寇盜蔓延。命總兵倪寵。王樸分將京營兵監。以內監楊進朝。盧九德賜二帥弓矢千五百。戰馬三百。健丁三百。馳赴中州夾勦。七月乙未。賊屯彭

德汾州張應昌進勦汾陽知縣費甲鑣以逼迫苦供億投井死。丙申山西賊陷樂平。河北賊攻彰德。右良玉禦卻之。辛丑山西賊陷永和旋陷沁水賊自秦入晉五犯沁水至是陷之。八月丁亥陝西賊攻隆德殺知縣費彥芳分守固原參政陸夢龍戰於綏德城下死之。九月己亥張應昌敗賊於平山獲賊首張有義卽一盞燈也。十月丁卯山西河北諸賊二十四營乘冰渡河而南犯闕鄉陷澠池分入河南湖廣漢中興平。畿內賊至甯晉掠南宮甚慘尋走五臺山山周數百里賊據顯通寺其中薪儲皆具險阻足守官軍不敢擊。十二月己未河南賊陷伊陽庚申陷盧氏徧掠汝州浙川內鄉光化均州戊寅犯南陽。庚辰湖廣賊假進香客陷鄖西。癸未湖廣賊陷上津丙戌陝賊陷鎮安。時秦賊旣盡入晉流突畿輔河南至數十萬而延綏賊首鑽天哨開山斧獨據永甯關前阻山險下臨黃河負固數年不下延綏巡撫陳奇瑜謀取之乃陽傳總制檄發兵簡衆七千人抵延川潛師疾走入山賊不虞大兵至倉皇潰佚焚其巢縱擊斬首千六百級二賊死分兵擊賊首一座城斬之延水盜悉平奇瑜威名著關陝。是年陝西山西大饑。

七年正月壬辰降盜王剛王之臣通天柱等至太原挾賞巡撫戴君恩設宴誘剛等斬之共斬四百二十九人王之臣卽豹五通天柱孝義土賊也而嵐岢大盜高加計號顯道神尤橫會大旱饑民投賊者愈衆畿輔兵漸集賊西竄。河南賊自鄖陽渡江薄殺城掠光化新野而襄陽賊六路俱集郡兵不能支又賊四五千入郢界圍均州往荆門西北夷陵。辛丑陝賊陷洵陽逼興安西鄉土寇乘之漢中震動興安賊連陷紫陽平利白河道臣王在臺固守興安洪承疇赴援城得全時練國事移兵商維賊南破鳳縣。

入四川。癸丑，陷遷安。乙卯，楚賊陷房縣、保康。南京兵部尚書呂維祺奏言：南都鳳泗承天陵寢所在，宜以宿壽襄葉爲咽喉，淮徐則京師咽喉也。乞敕淮撫楊一鵬急宜預備，防賊東犯。二月壬戌，蜀賊陷興山。壬申，入瞿塘，陷夔州一宿去。賊旣蔓延秦晉楚豫之郊，流突無定，廷議以爲各鎮撫事權不一，互相觀望，宜以重臣開督府統攝諸道兵討賊。制曰可。僉擬洪承疇因陝西三邊所恃，未可輕易，詔進延綏巡撫陳奇瑜兵部右侍郎總督陝西山西河南湖廣四川軍務，視賊所向，隨方勦撫。奇瑜檄諸將會兵於陝川。三月己丑，南京右都御史唐世濟上言：流寇有四，一亂民，一驛卒，一饑黎，一難氓，宜分別勦撫。上善之。下總督奇瑜。乙巳，川兵敗賊於巴州。山西自去秋八月至是不雨，大饑，人相食。四月丙辰，逮撫治鄖陽蔣允儀，以失陷鄖西諸邑也。川賊渡利州河，札陽平、白水等關，分四路，土人力拒之。賊走奉節。楚賊在房縣，婦倍於男，總兵張全昌連擊敗之。甲戌，發帑金五萬，命御史梁炳賑饑陝西。時山西永甯州民蘇倚哥殺父母炙而食之。川賊三萬人返屯鄖陽之黃龍灘，分三道：一均州趨河南，一鄖陽趨淞川，一趨商洛盧氏。張應昌兵敗於均州。丁丑，川賊復入陝，陷兩當。己卯，陷鳳縣。先是，三邊總督洪承疇因插漢犯甘肅，卽漢中北行至棧道青橋驛，聞川賊數萬營甯羌，乃返至沔州援之。賊由陽平關過河奔鞏昌。承疇追至成縣，見賊勢盛，須益邊兵，乃檄副將賀人龍、劉成功等兵三千赴藍田夾擊。及兩當、鳳縣連陷，賊分道一向邊方，一向漢中。知府斷棧道守雞頭岡，賊不得前，閉道犯城固、洋縣，官兵禦卻之。賊走石泉、漢陰。又別部賊二萬由鳳縣趨寶雞，濟陽求撫。承疇姑慰諭焉。時撫治鄖陽盧象昇、總督陳奇瑜以數省兵力萃於楚，楚賊盡西奔漢中，而川巴通江入西鄉者復三二千，凡名賊盡歸漢中，與平而接。

於商維。癸未，賊復謀入川，阻大江，入西安之終南。五月，陝別賊陷文縣，文縣去歲大旱，入秋早霜，冬無雪，今春不雨，斗米銀七錢，綏延西路數年不登，賊分部一略廊延，一掠延慶，官軍迫之，賊皆傍終南山竄入商維，羣盜畢集，深入大峪，承疇會師進逐之，遂東走網峪川，復入大山，遠竄。己亥，賊復出，再陷鳳縣，漢南招撫之賊一出棧道，西陷麟游，永壽東陷同安。庚子，賊走鳳翔，西趨汧陽，隴州。乙巳，洪承疇自漢中西援甘肅，巡撫陝西練國事，奏今日最難有五，曰缺兵，大盜起延綏，榆林兵不足，轉調甘肅，自甯夏、甘肅再喪師，今防插漢尚不足，能分以勦賊乎？榆林兵止五千，陳奇瑜率以勦賊，而防秋又當西還，則兵愈少，二曰缺餉，西安、鳳翔兵荒，所留新餉即使支盡，不抵三鎮之用，司府無可借，餉將安出？三曰缺官，荒盜頻仍，有參罰戴罪，有追賊客死，有失城就逮，道府且不樂就，何況有司？今官缺三十餘員，何以治民辦賊？故缺官宜急補，而參罰亦宜少減也。曰宗祿，秦俗囂悍，貧宗尤甚，垂涎賑金，漸不可長，曰驛地，秦晉驛遞例不全給，今募夫之苦更加千倍，故人人思遁，凡在衝路宜全給以安其心。洪承疇進師岐山，駐三原，賊十餘萬，承疇兵僅二千，張疑設伏，賊從耀州奔同州，時漢中兵三千四百有奇，總兵左光先等將之，臨鞏兵三千五百，總兵孫顯祖等將之，平涼兵千人，副總兵艾萬年將之，止可城守，總兵張全昌等兵六千，專視盜所向爲援勦。六月丙寅，總督奇瑜、鄖撫象昇勦竹山、竹谿各山寇，連戰斬一千七百餘級，奇瑜復敗賊於硤石，斬七百餘人，淹死五千餘人，墮崖死者二千餘人。七月，陝西降盜陷隴州。己丑，洪承疇奏言入陝猖獗之賊大抵可四十五萬，明知官軍一二萬不能四馳，恃其勢衆，旁伏遞進，則勦賊之難，賊多精騎，每跨雙馬，官軍馬三步七，則追逐之難，賊攻堡掠野，到處可資，官軍待餉轉運，則糧芻之難，賊

入山負嶠。官兵相持一日。卽坐誤一日。則時日之難。且謂鹽課銀三十萬。加曹變蛟秩鼓其敵愾。從之。辛卯。賊至鳳翔西關。藉口奉督撫檄安插城內。守臣知其詐。給以門不敢啓。須臾城上先登三十六人。盡殺之。總督陳奇瑜因借爲辭。劾地方官紳撓債撫局。以激上怒。命緹騎逮寶雞知縣李嘉彥及鳳翔鄉紳孫鵬等五十餘人下刑部獄。叛兵楊國棟擁三千騎。披雙鎧直抵西安城下。乞撫。巡按范復粹無計。登陴固守。巡撫練國事在鄠縣聞之。馳還登南城。檄賊至濠畔。語一日夜未決。度不受撫。必西走鄠。蓋屋密檄沿途官兵飭備。更設伏。蓋屋之夾水溝。時禾茂泥淖。騎不任馳。伏發。殲其半。國事遣官招之。諭殺渠自贖。予上賞。頃之一賊斬國棟以獻。賊人人自疑。互戕千餘人。餘仍入南山。乙未。洪承疇進次華州。各賊聞之。自朝邑折而北奔澄城。郃陽。賊混世王等從鳳翔東奔。云犯西安。洪承疇馳一日夜入西安。檄諸路兵赴西安合擊賊。賊颺至西安東境。官軍以力疲未能出。承疇恐賊東出潼關。先令張全昌。曹變蛟閒道走渭華。遏其前。而自率兵至潼關。紅鄉溝追賊。游擊李效祖。柏永鎮力戰。賊卻不能出關。因登山。承疇馳赴藍田。欲從山後閒道勦之。丙午。賊覘知官兵意。夜走商雒。初。老回回等萬餘先踞南雒山中。今又益盜萬餘。其地山谷險阻。承疇率諸將共兵三千人赴潼關大峪口截其出。仍備闕鄉。靈寶諸處。總兵尤世威兵潰於雒南。羣賊越盧氏奔永甯。先是守隘諸兵露宿。凡三月。皆致疫癘。不任戰。左良玉兵自內鄉赴援盧氏。慶陽賊南下。烽火徹三原。涇陽。耀州。富平。八月。上憂寇。詔發各鎮兵四萬五千並赴河南。時豫賊衝突禹許。長葛閒。凡十三營。大營在永甯。盧氏。約九月向東山誘官軍東出。謀襲汴梁。陝賊復陷隴州。屯州城。浹月。參將賀人龍等援隴州。賊圍之。羣賊到處烏合。簡精壯爲前驅。收婦女老弱。急則用。

之餌官軍。故諸臣動稱斬馘報捷。賊勢不減。總督奇瑜報降賊一萬三千有奇。斬渠十人。餘俱延安民。並令還鄉。先是賊爲洪承疇所逐。竄漢中。川兵掘巴西諸險。賊饑無所得食。故乞降於奇瑜。凡數萬人。奇瑜專事招撫。受其降。檄諸軍按甲無動。遣官監護降者。諸盜未大創。本無降意。徒以饑疲困於地險。不得逞。姑從款以紓我師。奇瑜檄所過郡邑。爲具糗糧傳送之。旣度棧道。已出險。數萬衆漸不受繩束。仍事殺掠。所至罷市。賊遂盡殺監護官五十員。攻陷麟游。永壽。勢不可遏矣。賊先鋒高傑降於賀人龍。人龍率以襲賊卻之。閏八月乙酉。陝賊陷靈臺。辛卯。陷崇信。白水。丙辰。陷涇州。河南大旱。壬寅。陳奇瑜至鳳縣。時賊益熾。北接慶陽。西至鞏昌。西北至邠州。長安。西南則蓋屋。寶雞。衆殆二十萬。始悔其見愚。分兵出禦。而兵已寡矣。九月。賊二十餘營。西至函谷關。東至河陽。連屯百餘里。別賊萬餘。連營雒南。閩鄉。癸亥。陝賊陷扶風。庚午。命吳甡巡撫山西。甲戌。豫賊東至於蘄水。大隊盡入黃州。廣濟。兵部檄河南兵入同華。湖廣兵入商雒。四川兵入漢中。興平。山西兵入韓城。蒲州。丁丑。陝賊分三部。一由鳳縣攻漢中。一出略陽。由陽平關入梓潼。劍州。犯蜀。一由甯羌犯廣元。辛巳。洪承疇遣副總兵左光先等援隴州。賀人龍圍始解。十月甲寅。陝西巡按傅永淳上言。漢南降盜陷城破邑。所在騷然。皆由奇瑜專主招降。謂盜已革心。不許道途訊詰。故郡邑不敢問。開門揖盜。勦撫兩妨。皆奇瑜之流毒也。山西巡撫吳甡言。招安流盜最宜慎重。彼狼子野心。勢難馴服。况邊地窮荒。蕪居無食。僅曰免死。遂甘心易慮乎哉。癸巳。河南盜埽地王等趨江北。自英霍分掠潛山。太湖。宿松。別部陷陳州。靈寶。己酉。楚賊自京山開道趨顯陵。明日遁入山中。時大寇仍聚秦中。老回回屯武功。辛亥。河南賊陷盧氏。上以秦寇猖獗。壬子。逮巡

撫練國事。命李喬巡撫陝西。官軍三敗賊於華陰。南原之間。斬首千二百級。十一月。總督奇瑜請各撫鎮分地責成。從之。時撫局大潰。賊氛日熾。故有是請。欲分委其過也。壬戌。江北賊陷英山。焚霍山。庚辰。削總督陳奇瑜職聽勘。十二月。進洪承疇兵部尚書。總督河南山西陝西湖廣保定真定等處軍務。其總督三邊如故。先是。西甯殺將領。承疇還軍定亂。賊遂分陷關隴。西甯既定。承疇自甘肅旋師東行。賊聞承疇將至。悉衆東奔。分道盡入河南。集宛雒閒。左良玉軍澠池。總兵陳永福合鄧紀軍南陽。頗有斬獲。而山西防河之戍多逃。自靈邱廣昌。徑走五臺。陝西鄠陽各處告警。賊游兵東下常德。八年正月丁巳。河南賊陷滎陽。屠汜水。又陷固始。時秦賊數十萬出關。分爲三。一自陝州上平陽入晉。一自武關嚮襄陽入楚。一自盧氏東向分犯河南北。河南北諸盜復分爲三。一走伊汝陷滎汜。焚掠無遺。東剽及鄭州。復分道犯商城。一自葉蔡南圍汝甯。一自懷慶東渡河掠歸德睢汝。陳許等州。其襄陽賊與汝甯合十五營衆數十萬。並入襄陽境。給事中常自裕上言。中原天下安危所係。今羣盜充斥。乃僅以左良玉一旅塞新淦。陳治邦等數營扼汝州。陳永福孤軍堵南陽。賊勢日衆。兵力日分。賊二三十萬。大小七十七營。蜂屯伊嵩宛雒之間。以數千官軍東西堵拒。賊何所畏而不長驅哉。乞更選邊兵。統以廉勇之將。特選重臣視師。庶腹心不致決裂也。河南逸賊復入漢中。陷甯羌。轉入臨鞏。庚申。江北賊陷霍邱。兵部議調西北邊兵及南兵共七萬二千。餉九十三萬六千。并發內庫銀二十萬。齊赴督臣軍前。更命尚書承疇統率大兵出關。節制諸路撫鎮。合力勦除。期以六月掃蕩廓清。立頒上賞。如仍留餘孽。督撫諸臣立寘重典。其進止一聽督臣。概不中制。承疇率軍赴河南。陝西賊陷靈臺。河南賊分三道。一趨六安。一

趨鳳陽。一趨潁濮。壬戌，陷潁州。知州尹夢鰲、通判趙士寬俱闔室死之。丙寅，賊陷鳳陽。鳳陽無城郭，賊大至，官軍無一人迎敵者，遂潰。賊焚皇陵樓殿爲燼，燔松三十萬株，殺守陵太監六十餘人。縱高牆罪宗百餘人，留守朱國巷戰，斬賊二十七人，力竭死。渠掃地王、太平王入府治，知府顏容暄囚服匿獄中，賊縱囚獲之。賊渠張蓋鼓吹坐堂上，杖容暄於堂下殺之。推官萬文英等六人，武官四十一人俱殺。士民被殺者數萬，剖孕婦，注嬰兒於槩。燔公私邸舍二萬二千六百五十餘間，光燭百里。賊渠列幟自稱古元真龍皇帝，恣掠三日。戊辰，太監盧九德、總兵楊御蕃以川兵三千救鳳陽，南京兵亦至。賊奔，以筵蓐卜於神祠，不利，刳神像而去。拔賊營南下，沿途殺掠無遺。趨廬州。丁卯，命洪承疇趣東馳勦寇。甲戌，鳳陽賊陷巢縣，已攻舒城。知縣章可試塞三門，開西門誘賊入，陷於坑，奔潰，死千人。因掠霍山、合肥諸縣。是日圍六合，聚穉子百十環木焚之，聽其哀號以爲笑樂。又裸婦人數千，置於城下，少有媿阻，卽磔之。攻三日而去。出帑金二十萬助勦餉，發太僕金十萬輸西安。其湖廣餉十九萬，資鎮筓等兵。鹽課十萬貯淮揚，以防寇逸。初，兵部會戶部調南北主客兵七萬，馬一萬五千，每兵日銀三分，米一升五合，馬日草一束，銀二分，豆三升，銀二分。計五閱月，約十一萬金云。戊寅，江北賊自舒城抵廬江，邑人具幣求免，僞許之。夜襲城，城陷。己卯，陷無爲州。洪承疇抵河南，河南諸盜知承疇至，又入潼關。承疇遣副總兵來允昌以千二百人往戍綏安，令總兵秦翼明游來朝，聞道向山東趨徐州，捍江北逸寇。庚辰，江北賊滿天星、張大受等攻相城不利，賊渠乘輿繞城呼降，守將射中其腰，夜走潛。太諸邑諸邑多山氓，習獵射虎豹，藥弩窩弓，甚設。所在結寨殺賊，賊遂西向麻城抵漢口。二月癸未，江北賊陷潛山。乙酉，陷羅田。命總兵曹文詔



勦寇陳許。時湖廣弼賊。賊仍走太湖。攻陷之。而河南賊迫於諸路兵。其在南陽者。過應隨。駐棗陽。在汝甯者。則入黃州。而鳳穎賊入英。霍。蘄。黃。一帶。擾殆遍。其在嵩。廬。靈。陝。諸寇。密邇潼關。雒南者。又折入秦中。約六七萬。綏安諸縣。並遭蹂躪。有四大營。北渡渭。突剽邠。耀。閒。其山西寇。則在平陽。汾州諸縣。並野掠。而土寇助之。癸未。巡按鳳陽御史吳振纓。始以阜陵之變。疏聞。是日。上當御經筵。持傳免。素服避殿。親祭告太廟。命百官修省。俱素服從事。逮巡撫鳳陽都御史楊一鵬。并振纓下獄。一鵬論死。棄西市。振纓遣戍。乙未。命侍郎朱大興。總督漕運巡撫鳳陽。同洪承疇協勦。承疇請四川撫鎮俱移夔門。達州進援襄漢。湖廣撫鎮分駐承天。襄陽。鄖撫移駐鄖襄。漕督移駐潁毫。進援汝甯。歸德。山東撫臣移鎮曹濮。進援江北。江。南。山西撫臣移蒲州。進援靈。陝。陝西撫臣移商州。調度興安。漢中。河南撫臣移汝南。南陽閒。保定撫鎮移駐邯鄲。瓷州。可南北策應。從之。三月癸丑。湖廣賊陷麻城。丙辰。省臣乞蠲陝西八年以上逋租。不許。庚申。蘄。黃。大盜。爬天王。擁衆八百餘人。村民擒之。身長八尺。自言天亡我。非我罪也。倡亂十二年。陷十州縣。其子曰啖。人心髮。雙目俱赤。先是。鳳陽賊奔蘄。黃。洪承疇次汝甯。慮其再入江北。令鄧玘掘之。令曹文詔邀之。應隨閒。又總兵賀人龍。劉成功率兵分駐信陽。泌陽。恐其入豫也。壬戌。漢中賊陷甯羌。丙子。總兵鄧玘爲叛卒殺於樊城。玘無紀律。所將蜀兵好淫掠。俄騎營畔。玘避樓墜火死。舉營北竄。惟步卒未動。洪承疇命副總兵賈一選。周繼元分領之。是月。給事中常自裕言。皇上赫然振怒。調兵七萬。其實不過五萬。且分之各處。未足遏賊。鳳陽焚劫四日。而馬。贛。至。歸德圍解三日。而鄧玘來。潁。毫。安。廬。之賊。返旆而北。尤世威等信向杳然。至賀人龍等各處淫掠。所謂賊梳而軍櫛也。唯皇上嚴飭之以伸軍法。

四月乙酉。承疇次汝州。以各寇之復入秦也。率諸將自汝入秦。檄曹文詔以師會。丙午。承疇次靈寶。文詔自南陽至。以商維爲賊藪。漢中興平其寄境也。令文詔出閩鄉直擣商維。自馳興安遏其奔軼。五月甲寅。曹文詔夜至五峪。寇伏險以誘。文詔擊敗之。張全昌自咸陽出興平之東。老回回等拒官兵營五十里。賀人龍南入子午谷。奪其南徑。劉成功及游擊王永祥往東南遏其北走。夜渡河走郿縣。承疇亦渡河追之。丙辰。至王渠鎮。寇方下南山恣掠。賀人龍遽擊走之。追至大泥峪。寇舍騎登山。丁巳。官兵至郿縣之秦王嶺。值寇張全昌擊敗之。自是商維之寇逃終南山中。餘寇西奔興平。蓋冬春之交。寇奔豫。奔楚。奔江北。其勢多而且散。至是寇又悉萃於秦矣。六月壬午。下河南巡撫元默於獄。丁酉。免陝西巡撫李喬官議罪。以庸懦玩寇也。以甘學闊巡撫陝西。乙酉。秦賊搖天動襲陷西和。丙午。總兵曹文詔至婆羅寨。寇大至。力竭自刎。文詔敢鬪。前後殺賊萬計。爲賊所畏。官軍聞之奪氣。秦賊在晉者巡撫吳甡會兵逐之。走河南。惟顯道神活地草。鄉里人三營留甡。甡方謀合兵勦滅。會西人入塞。斂兵防河。賊復熾。七月癸亥。秦賊陷澄城。八月壬午。陷咸陽。丁酉。商維寇復入河南。犯盧氏。癸亥。命湖廣巡撫盧象昇總理直隸。河南。山東。四川等處軍務。統關遼兵。賜尙方劍。便宜行事。專制中原。洪承疇勦寇西北。象昇勦寇東南。如寇入秦。象昇進兵合擊。十月壬辰。老回回襲陷陝州。乙巳。上下詔罪己。避居武英殿。減膳徹樂。除典禮外。惟以青衣從事。以示與行閒文武士卒甘苦相同之意。先是。賊翻山鶴降於承疇。賊首闖王退屯乾州。承疇令降賊翻山鶴說之。不聽。南走武功。承疇追擊敗之。闖王率大隊自盩厔。武功分道渡河。十一月辛酉。河南賊焚關廂而西。老回回犯南鄧。秦賊一字王等部衆二十萬。撞天王統十七萬自

潼關出犯闔鄉。靈寶大隊東行。塵埃漲天。闊四十里。絡繹百里。老弱居中。精騎居外。左良玉與總兵祖寬兩軍相隔東西七十里。遙望山頭。不敢邀擊。賊抄掠諸路。截燒糧草。諸軍乏食。秦賊屯於鄜州。緜亙百里。己未。祖寬破賊整齊王於九嵩。賊潰而爲二。東走偃鞏。南奔汝州。丙辰。羣賊大會於龍門白沙。連營六十里。祖寬分兵襲擊之。斬首千餘級。羣賊敗衄。東南奔光固。入霍邱。進逼鳳陽。淮督朱大典率兵馳壽州。十二月乙酉。賊闖王曹操數十萬圍光州。昇大礮二十座攻城。然二礮城拉然崩頽。城中頃刻火作。賊乘而入。官吏士民屠戮無遺。漢中羣賊會於漢南。戊戌。雅黎參將羅于萃連擊敗之。窮追賊於子午谷。奪其所掠子女二千口。賊奔饒風關。庚子。江北賊陷巢縣舍山。遂襲陷和州。九年正月丁未。總理盧象昇師次於鳳陽。諸道兵畢會。壬子。闖王闖場天。八大王。搖天動七賊。連營數十萬攻滁州。環山爲營。包絡原隰百餘里。行太僕寺卿李覺斯知州劉太鞏督率士民固守。賊雲梯衝。穴地填濠。百道環攻。城頭火輪巨礮相續發。旬轟毀諸山。出賊不意。縱將士奪其雲梯燔之。賊衄者衆。斂兵稍退。夜復進攻。掘爲支河洩濠以涸之。賊騎黑牛渡河。城上連礮擊之。賊死益衆。癸未。賊退掠村落。山谷婦女數百人裸而沓淫之。已盡斷其頭。孕者則刳其腹。環嚮堞植其跗而倒埋之。露其下私血穢淋漓。以厭諸礮。守城兵多奄面不忍視。賊噪呼向城。城上然礮。礮皆迸裂。或暗不鳴。城中惶懼。覺斯立命取民間圍牖亦數百枚。如其數懸堞外。嚮以厭勝之。然礮皆發。賊復大創。賊怒。攻益急。甲寅。盧象昇合諸道兵馳援滁州。祖寬以關遼勁卒爲前鋒。象昇以火攻三營爲後勁。躬率麾下三百騎居中督戰。昧爽。至城下。賊以雲梯魚麗肉薄攻城。已墮西北兩關。羊馬牆。賊多空營出掠。塵起。大兵至。賊不虞也。祖寬躍馬

而進。賊羣起接戰。諸將並至。戰於城東五里橋。官軍踴躍爭奮。賊大潰。象昇麾諸軍追之。逐北五十里。積屍相撐枕。獲其器械甚衆。斬級一千二百。朱大典遣副將楊世恩復截之於定遠。斬六百餘級。其東奔者劉良佐。扼之於廣武。賊遂西突池河。乙卯。賊自池河別道出東岡。守禦劉光輝等以五百人守東岡。賊萬衆並至。孤軍格鬪。光輝等力竭。赴水死。一軍皆沒。賊襲其甲裳。旂幟渡河。守者不覺也。既畢渡。賊乃奪路而走江浦。提督總兵杜宏域自浦口馳追之。不及。丙辰。滁州潰奔諸賊。西向鳳陽。犯園陵。漕撫朱大典。總兵楊御蕃列營陵牆。守甚嚴。賊不敢攻。遂西渡河。焚抄懷遠。丁巳。棗陽土賊寥三。袁世儒。李玉石以牛酒迎河南大賊張樂高。讎。連夥入營。癸亥。江北賊紫微星陷懷遠。甲子。朱大典兵至懷遠。賊焚廬舍。北渡。己丑。陷靈璧。進逼泗州。副將祖大樂敗賊於永城。斬賊首混天王。奪羸馬萬頭。鄆襄賊焚穀城。士民空城走。戊辰。江北賊陷蕭縣。己巳。陝西賊陷麟遊。滁陽敗北之賊祖大樂再破之於永城。精銳散亡大半。東奔宿州。突入沛縣。焚僂婦豎不遺。盡掠丁壯入營中。壬申。河南別賊陷闔鄉。給事中常自裕上言。流寇數十萬。最強無過闔王。彼多番漢。降丁堅甲鐵騎。洪承疇。盧象昇。卽日報斬獲。不過別營小隊耳。於闔勢曾無損也。今秦賊在宜君。鄜州不過闔將。當責成秦撫。豫賊在河南。汝州者止老回回數賊。當專責豫撫。而督理兩臣宜令專圖闔王。在承疇以王承思。孫顯祖等邊兵。川兵二萬出關。由汝魯疾趨光固。遏其後。在象昇以祖大樂。祖寬等關兵。篁兵二萬。由息潁奔英六。截其前。淮撫朱九典。提督楊御蕃等屯於廬霍。防其東突。應撫張國維以許自強等屯於潛太。防其入安慶。楚撫王夢尹以秦翼明等屯於麻黃。防其南衝唐鄧。隨棗之間。則責鄖撫宋祖舜。若獵獸合圍。則賊自無所逃。賊渠殲而餘賊自成。

破竹矣。闖王合掃地王、紫金梁等二十四營攻徐州，不克，遂西陷虞城，入河南。一字王、曹操、掃地王五營由歸德趨開封，至石家樓。辛未，祖大樂潛師歸德，截其前，分兵設伏，而以輕兵誘之。遇賊於雪園，既戰，官軍佯敗，賊爭先馳逐。大樂鳴鼓舉麾，東西兩翼突出攻賊，賊驚大亂。官兵三面奮擊，斬首一千四百餘級。鄆襄賊分爲二，一往均州，一入四川。乙亥，羣賊大會於蘭陽，盧象昇駐師壽春。二月丙子，賊陷潛山。己卯，陷太湖。鄆襄賊犯竹山，竹山自崇禎七年爲賊屠陷。八年十月，知縣黃應鵬僅棲草舍數椽，至是賊復至，應鵬棄城走，賊遂入據城，有徵糧六百石，盡爲賊有，食盡焚縣治而去，爲空城矣。山西饑，人相食。甘肅總兵柳紹宗敗賊過天星於西甯州，過天星合九條龍等八營西掠蘭河，南擾會甯，洪承疇檄左光先與紹宗合兵擊之，絕其西奔，賊復自萬安走鹽池，兩軍力戰破之，賊窮蹙請降。陝西巡撫甘學閻受其降，安插其部數萬人於延安，尋延河劫掠如故。三月丙午，山西賊陷和順。兵部奏賊在秦豫山中，聞其向來糧餉多由浙川水運，以通荆襄賈販，可艘而致之，宜遣將往浙川斷寇，報可。丁未，賊九條龍、張胖子從南漳柳池陷穀城，官山逼保康，二千里焚掠靡遺。庚戌，陷竹溪、房縣，如保康城空不入。總理盧象昇率諸將追賊至穀城，丁巳，賊走鄆州。官軍三道並進，大霧，賊迷道，不知兵至，倉猝接戰，奔山。官軍逐之，賊顛而墜者無算，殺賊將黑殺神、飛山虎，追奔數十里，屍填溝塹。時河南巡撫亦討內鄉，浙川餘寇，祖寬、李重鎮兵由荆門達荊州，防其奔軼。會秦翼明、楊世臣等搜山，祖大樂由光鄧夾擊，江北賊略盡。河南賊少，大寇俱遁。秦楚萬山之中，象昇言秦豫楚大山綿亙千里，賊出沒無端，若奮勦窮追，何地可歇。凡崇岡峻嶺，密箐深林，攀木懸崖，日行三四十里，馬不能進，人苦於登，此時折色銀無所用，本色糧無

從運車贏無所施。勢必以人負米二斗。隨兵來往。日食一升。一供兵。一自贍。十日而二斗之糧盡。毋論此。十日內遇賊勝負。而以千兵入。須千人肩運。萬兵入。須萬人肩運。卽賊不出。而俱歸於盡矣。唐王聿鍵奏南陽薦饑。有母烹其女者。癸亥。陝西巡撫甘學闕削籍聽勅。以孫傅庭代之。乙丑。賊闖王蝎子塊自興安入漢中。甲戌。撫治鄖陽宋祖舜削籍。以追寇失利。亡其符印。四月。以苗胙士撫治鄖陽。免上津等十五州縣田租。辛丑。總理盧象昇會師次於洛陽。五月癸丑。下詔大赦山陝脅從羣盜。令地方多方安插。以消反側。違者重治之。是月。陝賊過天星復叛於延安。謀渡河入山西。李自成。老回回。混十萬等數部。自楚豫入商南。雒南大嶺。總兵秦翼明擊賊南漳山中。敗之。總兵俞冲霄擊賊安定。恃捷輕進。敗沒。命職方員外郎包鳳起。賈詔。招撫羣盜。六月乙酉。洪承疇上言。秦中兵今實數共騎步一萬三千有奇。見選川兵五千有奇。俱步卒。專藍田。商雒等處堵勦。秦豫接界之寇。先是闖將李自成衆約三四萬。混天王衆約二萬。過天星滿天星衆約二三萬。歷次勦散。混天王逃延綏定邊。勢孤。復合闖將過天星。滿天星等。今奔延綏等處。猶可督責收拾。闖場天。闖王蝎子塊俱出鄖襄。已奔興安。漢中進則入三秦。退可犯楚豫。亟宜合兵湊餉。力圖協勦。七月癸丑。陝西賊陷成縣。壬戌。巡撫陝西孫傅庭擊賊於盩厔。大破之。擒賊首闖王高迎祥及劉哲等。獻俘闕下。磔於市。蝎子塊走河西。八月庚辰。老回回焚開封西關。時羣盜出沒豫楚間。屢衄。散而復合。九月。京師戒嚴。命總理盧象昇總督各鎮兵入援。癸亥。改象昇總督宣大山。山西軍務。初。象昇方追賊至鄖西。聞警。以師入衛。遂有改督之命。時闖王已誅。蝎子塊已爲象昇追逐入秦。河南少甯。自羣盜擾河南北者三年。夾河千里。雞犬無聲。關市盡空。荒村深谷。殘黎

多夜伏豐草深林中。採野穗以食。田壟閒亂木枒槎。皆成拱矣。虎狼千百成羣。杳非人境。賊旣無可掠。而象昇合大軍於中原。羅而蹙之。羣盜盡入楚疆。悉銳以相持。及是。象昇旣以關遼之兵北去。老回回等盤踞鄖襄閒。休糧息馬。秋高足食。乃以全軍合曹操。闖場天。諸賊共二十萬沿江長驅而下。蘄黃六合懷甯。望江江浦所在告警。烽火及於儀揚矣。壬戌。寇至尉氏。甲子。至登封。至汝南。於是寇復入河南矣。己巳。以兵部侍郎王家貞巡撫河南。總理直隸川湖山陝軍務。十月甲申。河南賊陷襄城。漢南賊陷褒城。十二月。以鄖襄賊逞。罷撫治都御史苗胙士。以陳良訓代之。

十年正月丙午。老回回等趨桐城。丁未。總兵秦翼明逐賊於麻城。黃岡閒。敗之。老回回所部整齊王。八大王。九營潰而爲四。一支走羅田。一支走團風鎮。一支向蘄水。一支趨岐亭。闖場天等諸賊分兩路至江北。一自桐城犯廬江。舒城。一由光固踰霍山。六合東行。各分爲數十股。分擾江北。戊午。淮撫朱大典馳赴之時。諸賊混天星。侵軼商洛。李自成縱橫西安。過天星盤踞汧隴。獨行狼在漢南。蝎子塊在河西。與西番合謀。其餘楚賊盡在江北。而豫賊亦自光固而南會之。應天巡撫張國維駐師京口。沿江戒嚴。甲子。別賊自穎毫趨滁州。營火夜燭數十里。羣賊會之。至池河。禮醮於大山寺。薦拔亡者。遂分屯大江。小江。皇甫常山。諸山。儀真。六合。人民俱倚擔而立。二月。左良玉大破賊於舒城。六安。連戰三捷。秦翼明敗闖場天於細石嶺。擒賊首一條。葱新來虎。賊至英山。分營山險。伐竹爲筏。謀渡江。潛竄大山中。張國維檄左良玉入山。搜捕。良玉新立功。驕蹇不奉調發。憚入山險。屯於舒城。逾月。擁降丁萬人。軍中婦豎數千。爲營環數十里。所至焚劫。壯丁衣緋橫行。邨集爲虛。國維三檄之。始自舒城進發。賊已飽掠出境。山西總兵王忠以兵

援河南。稱病數月不進。一軍噪而西歸。給事中凌義渠劾之。詔逮王忠入都。革良玉職。殺賊自贖。乙酉。命陝西巡撫孫傅庭兼總理河南。閏四月壬寅。以熊文燦爲兵部尙書兼副都御史。總理直隸山陝川湖軍務。督勦流寇。時文燦新平閩寇。有威望。故有是命。大旱。羣盜盤踞江北。老回回等八營謀避暑六安。乃散入潛山。太湖諸嶺。蔭林樾以息馬。時出抄掠。因分屯醉石嶺諸路。離安慶四十里而軍。河南巡撫陳必謙罷。以常道立代之。廷議大發兵。計臣苦於無餉。兵部尙書楊嗣昌建議。因改糧爲均輸。以濟軍食。因加賦二萬兩。下詔有暫累吾民一年。除此腹心大患等語。五月。鄆襄賊犯荊州。焚荆王墳園。七月。以史可法爲右僉都御史。巡撫安廬池泰等處軍務。時以寇患。故創設。丁亥。江北賊陷六合。遂圍天長。八月戊申。賊突入鳳陽。掠械器而出。渡河分往河南泗州。十月。陝賊過天星。同李自成入蜀。混天王。蝎子塊隨之。川兵大敗混。蝎二賊於廣元。斬首千級。十一月庚寅。兵部尙書楊嗣昌請限勦寇之期。令秦撫斷商南。雒南。鄆撫斷鄆西。楚撫斷常德。黃州。安慶。撫斷英。六。鳳。撫斷潁。亳。應。撫截潛山。太和。江西。撫截黃梅。廣濟。東。撫截徐。宿。晉。撫截陝州。靈寶。保定。撫掘渡。延津。一帶。總理熊文燦提邊兵。太監劉元斌提禁旅。豫撫率左良玉。陳永福等兵合勦中原。從之。癸巳。江北賊陷靈璧。十二月。禁軍大集於襄陽。賊盡走。鄆西。乙巳。以戴東旻爲都御史。撫治鄆陽。命洪承疇合孫傅庭并勦河南寇。十一年正月。總兵左良玉。陳洪範大破賊於鄆西。二月。巡按河南御史張任學改都督僉事。總兵官鎮守河南。任學欲薦故丹徒縣知縣張放。極詆諸總兵不足恃。盛稱文吏原有奇才。可以禦寇。故有是命。三月。戶部主事張縉彥言。臣任清澗知縣。於兵情賊勢。親見有素。蓋賊之得勢在流。而賊之失勢在止。賊



之長技在分。而賊之窮技在合。賊之乘時在秋夏。而賊之失時在冬春。昔大賊王嘉允破河曲。據其城。曹文詔等奪門砍殺。而嘉允殲。李老柴破中都。據其城。巡撫練國事督兵攻圍。而老柴擒。神一元破甯塞。據其城。左光先等與戰。而一元死。譚雄破安塞。據其城。王承恩等攻圍。而譚雄誅。此皆守而不去之賊。故速死也。過天星老回回。混十萬等所破城邑無算。官軍未至。旋即奔逸。此皆流而不居之賊。故緩死也。賊入晉豫。分頭成部。自秦及汝。雜以至江北。無處不被賊。豈賊真有數十百萬。蓋分股以披其黨。牽掣我兵。故見多也。前總督陳奇瑜驅天下之賊盡入漢中。出棧道關。正可一鼓而滅。乃以招安致敗。不可復收。古人以八日而平賊數萬者。利其合也。夏秋之間。芻糧盡在場圃。足供士馬之資。冬春非破城攻堡。不能得食。官兵促之則尤易。故時有利有不利也。今若欲破賊。惟在亂其所長。而使之短。破其所得。而使之失。直截以攻之。分番兩軍。一追一駐。賊當之必破矣。賊黨雖衆。大都觀望。其先倡者不過一二支。故盡一股則論賞。不必事平彙敍。縱一股則論罰。不許報級。塞責。賊不望風而靡。未之有也。上是之。四月丙申。奪總督洪承疇尚書爵。仍以侍郎總督。總兵左光先。曹變蛟並奪五級。限五月盡賊。六月。逮湖廣巡撫余應桂。以方孔炤代之。八月。總督洪承疇報陝西賊勦降略盡。命出關向河南。湖廣。癸卯。江北賊陷睢甯。曹操會羣盜過天星。託天王。十反王。整齊王。小秦王。混世王。整十萬。革里眼於陝州。遂南走內鄉。浙川。犯襄陽。九月庚申。熊文燦次於襄陽。甲子。遣副將龍在田邀擊革里眼。射場天於雙溝。大破之。老回回等俱東奔棗陽。諸軍追逐數十里。斬首六千級。奪其牛馬羸萬頭。羣盜披靡四逸。曹操獨留內浙山中。勢孤守險自保。文燦檄良玉。洪範進兵浙川。招安羣賊。十月。京師戒嚴。召孫傅庭於陝西。召洪承疇於三邊。

於是承疇。傅庭率諸將合兵五萬先後出潼關入援。曹操聞之。謂爲勦己也。率九營從鄆陽。潯渚亂流而涉。突走均州。叩太和山提督太監李維政乞撫。維政爲言於文燦。文燦乃檄止諸軍。曹操九營俱就撫。文燦上言請貸其罪。令諸將宴曹操於迎恩官署。授操爲游擊將軍。供億甚備。曹操名羅汝才。庚戌以丁啓睿爲都御史巡撫陝西。羅汝才旣撫。分屯羣賊於房竹。保障四邑。自言不願受署爲官。并不願食餉。願爲百姓耕田。此中而已。文燦一切爲羈縻。檄汝才解散脅從諸衆。簡驍壯從征立功。汝才不聽。因與鄆均諸邑居民分地錯壤而居。時張獻忠亦就撫。屯穀城。汝才遙與爲聲援。撫治鄆陽。戴東旻奏曰。曹操過天星十數大寇。近以理臣襄陽之捷。回革東逸。曹操就撫。分插其衆於鄆。均諸邑。不從解散之令。且曰。願爲百姓耕田。此目前盜鈴之說耳。張獻忠入據穀城。屢檄不前。將俟民間田熟。分其夏秋之糧。稍不遂意。干戈遂起。荆襄重地。今數省大寇環聚二三百里。羽翼已成。將有不可言者。然各賊盡聚鄆地。四面合圍。有釜魚穿獸之勢。以理臣各鎮現在兵馬。再令督臣發秦兵由興安馳赴協同。埽蕩渠魁。授首脅從。盡散。此實蕩平之機也。十二月。改洪承疇薊遼總督。孫傅庭保定總督。傅庭以失聰辭。上不許。尋逮傅庭繫獄。

十二年正月癸未。巡撫河南常道立削籍。以縱寇渡河也。以李仙風代之。二月。左良玉大破河南賊。飛虎劉國能於許州。國能降。老回回旣東奔。請降於監軍孔貞會。未決。革裏眼射場天等東走。合於混。十萬分掠信陽。光山。三月。羣盜集於固始。東北阻河。河上之兵嚴守。不得渡。羣盜乃趨六安。息馬茶山。以避夏。庚午。逮河南總兵張任學。左良玉大敗河南賊於內鄉。上聞其步兵淫掠。責之。四月戊子。撫

治鄖陽戴東旻免。以王鰲永代之。辛卯。左良玉再破射場天。老回回改世王於河南之鎮城。射場天乞撫。連營百里。奪民二麥以自給。良玉遣人諭止之。不聽。戊申。良玉率副將陳永福。金聲桓會兵壓賊壘。賊倉卒接戰。諸大軍擊之。斬首二千七百。賊退保山險。良玉遣降將劉國能招之。庚戌。射場天。李萬慶率其衆四千解甲詣內鄉城下。降於良玉。良玉言於文燦。文燦署國能爲守備。其黨散去七千餘人。賊渡淮走光山。或走黃州境。革裏眼走商城。六月。張獻忠復叛於穀城。羅汝才九營並起應之。七月。二賊合於房縣。左良玉追及之。大敗而還。良玉失其符印。事聞。革文燦任。仍視事。降良玉職。戴罪殺賊。安慶巡撫史可法以憂歸。初。文燦與大學士楊嗣昌深相結納。嗣昌冀文燦成功以結上知。文燦既僨。嗣昌內不自安。請督師南討。上甚慰勞之。八月。壬戌。命大學士嗣昌以兵部尙書督師討賊。賜尙方劍。并督師輔臣銀印。給帑金四萬。賞功牌千五百。蟒紵。緋絹各五百。九月。丁卯。嗣昌陛辭。上宴於平臺後殿。上手觴嗣昌三爵。賜詩。勒詩於各文廟。嗣昌南征。會兵十萬。本折色銀二百餘萬兩。十月。嗣昌至襄陽。入熊文燦軍中。詔逮文燦入京。論死。棄市西。丙子。拜左良玉爲平賊將軍。良玉所部多降將。嗣昌謂可倚以辦賊。爲請於上。故有是命。老回回。革裏眼。左金王。南營。四股合二萬人。分屯英。霍。潛。太。諸山寨。突犯安慶。桐城諸路。遼將黃得功。川將杜先春屢戰卻賊。賊每避兩軍。賊多購蘄黃人爲閒。或攜藥囊。蓄蔡爲醫。卜。或談青烏。姑布星家言。或緇流黃冠。或爲乞丐戲術。分布江皖諸境。覘虛實。時時突出焚掠。相持逾年。毒流四境。是年兩京。河南。山東。山西旱饑。

十三年正月乙丑。逮湖廣巡撫方孔炤。命宋一鶴代之。閏正月。督師嗣昌奏辟永州推官萬元吉爲軍

前監紀從之。二月甲子，給楊嗣昌萬金，賜斗牛服，又賜海驢馬一，棗驢馬一，金鞍二。嗣昌駐襄陽，調兵會勦，以陝西興安一路失期，斬其監軍殷太白。辛未，羅汝才掠信陽，尋陷光州。三月丙申，嗣昌次荆門，立大勦營，以新募湖南殺手二千人隸之，更以戲下騎兵爲上將營，新撫降丁皆隸焉，以副將猛如虎將之。四月，罷鄖撫王鰲永，以袁繼咸代之。五月，羅汝才過天星七股，盡入蜀，監軍萬元吉掘夔門。癸未，賊陷大昌，犯夔州石砬，女帥秦良玉發兵援夔州，萬元吉與合兵，以舟師由巫山上三峽，賊十三哨過夔門，魚貫而進，羅汝才爲殿，官軍遙望不敢擊，賊循河而行，欲渡川西。元吉、左良玉、川撫邵捷春俱會於夔州，副將賀人龍所將陝兵驍勇善戰，而多擁降丁，思得總兵號名以統轄之，捷春爲請於嗣昌，初，嗣昌以良玉兵強，足破賊，表佩平賊將軍印，良玉進止多不從節度，嗣昌乃密疏於朝，請以人龍易之，後不果。人龍始怨，羅過諸賊，自夔州山後抄掠，官軍分掘諸隘，賊掠無所得，副將羅于莘擊過天星於鄭家寨，敗之，過天星以百騎走，羣盜旣困，謀奪尖山西走，四川總兵鄭嘉棟、湖廣副將張應元、汪雲鳳會陝西副將賀人龍、李國奇之師赴之，賊以奇兵攻尖山寨，人龍等諸軍奮呼齊進入賊陣，斷賊爲二，賊皆騎，陷泥淖，不得馳，川兵跳澗谷，類猿猱，賊潰，自相騰踐，斬首七百餘，生擒自來虎等七十一人，奪甲仗馬贏無算，賊退屯羊橋，四出抄掠，石砬兵邀之於馬家寨，復斬首七百，又追破之，留馬壩，斬賊首東山虎。庚子，賊屯譚家坪，南北兩山，山頭張幕，魚鱗相掩，疊諸軍分道並進，南山賊拔寨起先走，北山賊馳而下，逆擊官軍，諸軍薄之，賊不能當，退守山巔不動，官軍仍分兵疾走，繞山後，前後齊登，賊披靡，竄走澗谷，諸將皆下馬，人曳草履一量，緣山逐賊，自龍溪追奔四十里，斬首千一百餘級，賊走營仙寺嶺。癸卯，諸將會秦楚

蜀兵擊賊於嶺上。諸軍雲合。賊營大亂。斬首千級。秦兵奪羅汝才大旗。擒其老管隊副塌天。賊突圍遁走。七箐坎入於乾溪。丙午。羅過諸賊犯夔州下關城。羅汝才老而滑。多機詐。過天星多擁徒衆。二賊以智力相倚。至是屢戰不利。謀歸楚。以瞿塘水漲不得渡。反走下關城。巡撫捷春檄總兵嘉棟。副將應元。雲鳳。以楚兵自夔州出雲陽。邀其前。監軍元吉督人龍等將秦師。閒道疾走尖山以截之。夔府山溪險隘。七賊連營數萬。林樾不能勝營帳。酷暑炎歎毒人。馬矢熏達數十里。蚊蚋嚼草閒。人馬俱病。羅過分道西行。汝才率小秦王。上天王。混世王。一連鸞。五營走雲陽尖山壩。過天星。關索二營走雲陽水碓口。期同會於開寧。戊申。人龍等追賊至七箐坎。賊簡其銳爲殿。以挑官軍。潛以老營先走。人龍擊破殿後兵。長驅擣其中。堅。賊逾山。人龍亦逾山。夜抵馬溺溪。壓城壘而軍。是月。江北賊陷羅田。黃梅貢士吳卿上言。流賊肆毒。奸宄出沒。尤善偵走。如官軍在汝。穎。襄。德。彼奪鳳陽。臨淮。一日一夜兼程行數百里。光州固始爲吳楚往來之要地。宜設一道臣於此。此亦扼吭之計也。然賊分則寡。合則衆。晝則賊騎相顧。夜則賊營遠哨。且賊日馳二百里。酗酒酖色。渴睡不醒。若將卒勇敢。銜枚夜襲。賊不能覺也。今兵不殺賊。反以仇民窮鄉男婦匿林逃難。割首獻功。以愚主將。主將以愚監紀。監紀不知。遂奏其功。此弊踵行久矣。所當痛懲者也。六月辛亥。昧爽。賀人龍等諸將薄賊營。賊奔已疲。秦師三道俱進。大噪。騰而上。賊驚潰。秦蜀軍爭逐之。斬首千二百。俘六百人。赦其俘一桿槍。自來虎。伍林三人。隸爲軍鋒。壬子。秦軍躡賊而前。度賊必設伏以邀我。遣都司李仲興。高光榮。勒輕騎先往。人龍。國奇潛以大兵繼之。二將已入隘。賊伏起。兩山閒圍之數重。二將戰方酣。人龍。國奇麾兵並進。噪而揚塵。聲動山谷。圍中奮呼以應之。賊圍開四潰。斬首五百餘級。生

擒賊渠掠山虎十六人。羅汝才精騎二千餘。二日之內俘其部曲四十人。斬馘無算。精銳殆盡。狼籍東走。與四營合。保其婦豎共萬人。走大甯之小嶺。諸將扼之於夔東。己卯。過天星關。索走開縣。屯南壩。知羅汝才東竄。而楚蜀兵漸逼。因北走。丁巳。鄭嘉棟率諸將連營躡賊。及之於觀音山。逐北二十里。至於臨江。斬首三百餘。張應元窮追至寶山。遇賊百餘騎。擊殺二十騎。餘騎皆大呼釋甲。渠託天王。常國安請降。應元止兵。裂帛作書。令國安所部抓地虎馳諭過天星。過天星曰。必託天王身至爲信。乃降也。抓地虎反命。庚申。賊首高守達率麾下二百騎來奔。過天星逐之。邀止百餘騎。來者七十五騎。皆關西健兒。常爲楚師軍鋒。辛酉。過天星西走。諸軍拔營逐之。至新甯西關外。賊騎三千不戰而走。高守達率其健兒當先陷陣。賊陣亂。馬竄禾中泥。驚蹠相騰踐。官軍傲而射之。追奔二十里。血流稻畦。泥徧赤。酷日炎赫。刀甲皆生烟。諸軍以泥滑不得馳。斂兵壁於風烈鋪。諸軍共獲首千七百餘級。擒賊首流金錘。金狗兒。奪馬羸三百。過關。二賊東奔達州。張應元等進逼之。丁卯。常國安前驅。遇賊。川楚兵並進。斬首二百餘。奪其營。賊奔袁壩驛。設伏溝澗中。營火出林間如星者二十里。明日。應元等前驅博戰。令常國安。高守達繞谷中擣其脅。賊伏發。戰方接。國安突出四圍奮呼。賊驚墜山澗。共斬首九百。獲甲仗弓矢無算。生擒滾地狼等一十七人。降其管隊可天虎等四十人。庚午。賊自袁壩東奔開縣。至高城。諸將分營出戰。嘉棟將中軍。副將羅子莘將左軍。降將楊旭一隻虎將右軍。戰於城下。賊敗走大昌。七月。羅汝才小秦王。上天王。混世王。一連鸞連營踞大甯。監軍元吉在夔。遣守備劉正國及羅營降丁伍林入其營招之。汝才疑以香油坪之役殺我楊羅二將。或不赦。攜正國東走。聲言詣夷陵乞撫於督帥。先是。汝才與金翅鵬不相能。金翅鵬常懼爲所并。

至是。小秦王金翅鵬相率降於嗣昌。汝才殺伍林。劉國正東走巫山。左良玉兵分屯興房二竹間。汝才屢敗。黨羽多降。勢益孤。而張獻忠時在巴巫。與良玉相持。謀西走。汝才遂合於獻忠。謀渡川西走。過天星素與獻忠有郟。前在新甯。諸將招之。過天星對常安國曰。作賊非本懷。諸將驟攻之。狼狽東走。聞羅張既合。益懷不並立之勢。決計歸命。左良玉乘勝移師擊之。過天星惠登相乞降。嗣昌令良玉撫其衆七千人。簡其精銳隸良玉軍中。安其老弱於鄖西。以降將埽地王李靖王隸監軍元吉登相清澗人。八月癸丑。元吉遣降丁入羅汝才營。嗣昌復命降將金翅鵬所部飛上天入其營招之。汝才逡巡未決。時張羅新合。獻忠懼汝才之再降也。日說汝才毋爲官軍所獲。且曰。閣部已俘過天星闕下矣。元吉請檄左良玉攜惠登相至陳前招汝才。汝才必聽。嗣昌不從。汝才降意遂絕。饑民復相煽爲盜。嘯聚太行山。所在蠶起。應之。江北賊革裏眼左金王突霍太閒。上命太監劉元斌監禁軍六千馳赴河南江北。合皖豫兵討之。禁軍擊破賊於霍山。賊竄走。尋陷麻城黃梅。是月發倉賑河東帑金三萬賑真定山東河南饑民。給事中戴明說上言荒極盜起。蠢動疊告。畿輔淮陽陝西中州所在不一。皆緣撫按有司素不休養。饑荒不卹。招徠無策。迨盜起議勦。死於鋒鏑者此百姓也。用兵加餉。死於追呼者此百姓也。今乞責成撫按諸臣。以卹荒弭盜爲第一事。上是之。九月上諭河南巡撫誅勦以平賊爲功。不必屢報捷級。無裨埽蕩。丁亥。河南郟縣盜李際遇申請。邦任辰張鼎衆至五萬。總兵王繼禹遣游擊高謙擊之。一日三捷。斬二千餘級。追至尉氏。己丑。嗣昌屯巫山。先是關索敗伏深箐中。聞過天星降。益懼。嗣昌遣人招之。索關見諸降將。效力軍前。遂來歸。與其黨王光恩謁嗣昌於巫山舟次。率其副楊光甫等數人頓首涕泣。請死罪。嗣昌撫

慰之。給以銀幣。光恩延安人。光甫鄖陽人。所部六千。殺傷散亡已去其半。存者三千。乃簡其精銳。赴軍前。殺賊羅汝才之入川也。凡九股。整十萬。埽地王。小秦王。金翅鵬。託天王。過天星。關索。惟汝才合於獻忠。其八相繼俱降矣。嗣昌飛章以聞。敍賚文武將吏有差。回左。革諸賊走英霍。逼鳳陽。是月。秦師大破賊於函谷。斬首數千。誅蝎子塊。餘賊分竄延安。慶陽。十月。嗣昌在夔州。令楚將王允成。楊文富。自巴巫趨當陽東勦。回革趨楚。撫軍宋一鶴赴蘄黃協勦。命諸將分屯襄鄖。承天諸扼要。降將埽地王。張一川。擊賊於梓潼。陷陳。被擒。賊曷之。監軍元吉命卹其妻子於夷陵。十一月。陞陝撫丁啓睿總督陝西。三邊山西河南軍務。河南巡撫李仙風率諸將高謙。李建武擊河北賊於棗園。斬首一千三百餘級。十二月。楚豫皖兵大集。回革懼而乞招撫。丙辰。監軍員外郎楊卓然入二賊營議之。是冬。闖賊困於嶠函。蝎子塊既死。羣賊滿天星。張妙子。邢家米。及闖賊部將大天王。鎮天王。一條龍。小紅狼。九梁星相繼請降。闖賊潰圍而出。是年兩京山東河南山西陝西浙江大旱蝗。至冬大饑。人相食。草木俱盡。道殣相望。河南土寇並起。自真定至河上道路梗塞。開州人袁時中聚衆數萬。破開州。時壽州賊有袁老山一營。時中自號小袁營。以別之。諸賊各有衆數萬。惟時中最桀黠。羣賊相繼敗死。時中走河南。十四年正月甲辰。山東土賊李廷實。李鼎鉉陷高唐州。時山東盜起。東平。東阿。張秋。肥城所在皆賊。兗州二十州縣一時嘯聚響應。惟濟甯滋陽無盜。京畿道梗。省直餉銀數百萬俱阻於兗州。東平州吏胥倡亂。迎賊入城據之。巡撫王國賓發六道官兵防兗州。檄總兵劉澤清擊破東平賊。復其城。河南土賊艾一侯。二侯。四嘯聚數千人。封邱知縣蘇茂柏擊破之。二月丁卯。河南土賊陷新野。張獻忠。羅汝才俱自



川入楚。惟搖天動。留川東萬元吉。留秦蜀兵千八百屯白帝。神女之閒絕。其入楚路。戊午。河南土寇瓦罐子。一斗穀諸盜盡歸於李自成。合攻開封。山東土賊留東阿。汶上。時東寇益熾。徐德數千里白骨縱橫。又旱荒大饑。民父子相食。行人斷絕。革左諸賊因張羅遠竄。豫皖之兵四集。急而歸款。楊卓然議插之潛。太閒。二盜實無降意。借款以緩師。而公行肆掠。卓然每左右之以塞人責。及闖獻陷襄。維革左遂承機復熾。倚山剽攻。詔朱大典進總督。節制諸路。鎮撫兵進英霍以討之。己丑。魯王捐金數萬募兵於山東以防盜。丙寅。河南土賊孟三陷河陰。據之。游擊高謙攻圍七晝夜拔之。斬孟三。三月。革山東巡撫王國賓職。命楊御蕃。劉澤清會兵剿曹濮賊。是春。招安內邱山西餘寇。革左賊五營聞獻忠東來。走麻城以勾之。湖廣巡撫宋一鶴聞之。渡江進兵屯蘄州。擒賊諜。焚舟斷渡。五月。設徐臨通津四鎮以護漕。以東寇熾故也。河南土寇袁時中聚衆至二十萬。入江北。窺鳳泗。自宿亳入蒙城土礦。羣盜蟻附之。丁丑。朱大典率諸軍擊敗之。率衆保險。潛棄牲畜宵遁。丁酉。總兵劉良佐簡驍騎自義門追擊五十里。賊竄逸深林。良佐分輕兵追捕。明日及賊大隊。賊方掘險拒守。官軍以火礮奮擊之。賊大奔。自義門至界捕二百里。尸撐交橫。棄仗滿阡陌。賊或自經林閒。或自刎。餘或降或逸去。二十萬衆鳥獸散。時中以數百騎宵遁。北渡河走入河南。所獲仗甲弓矢山積。泰安土寇十餘萬掠寧陽曲阜。兗州。所至燔屋廬。掠婦女。賊蒙婦女以甲冑。執刀仗。僞爲男子守營。賊則四出焚掠。聞青州兵至。遂走邳州。焚其南郭。至沙溝屠僂嬰穉不遺。庚子。犯徐州北關。焚之。抄劫至揚州南沙河店。燬漕船十六艘。復東北行入東平州。豐縣土寇十餘萬圍縣城。徐州城合之。攻城愈急。平東賊首李青山屯於梁山。六月。兩京山東河南浙江旱蝗。

多饑盜。庚戌革左諸賊陷宿松英山。朱大典駐師壽州。造長槍三千。長丈二尺。烏銃三千。大閱諸軍數萬人。刻期入山搜剿。賊方分掠諸縣。聞之。盡合營屯潛山。七月庚辰。革左陷潛山。遂圍麻城。督師丁啓容大破賊於麻城。斬千二百級。賊解圍去。九月。羅汝才自南陽趨鄧。浙以合於闖賊。時獻忠大敗於南陽。其衆散盡。闖賊踞河維。有衆五十萬。故汝才往附之。張獻忠敗。奔命於回。革左諸軍同入霍山。掘險拒守。十月。太監劉元斌。盧九德率京營兵與總兵周遇吉。黃得功。合追賊於鳳陽。及之。元斌留四十日。不進。城門晝閉。縱諸軍大掠。殺樵汲者以冒功。已而欲攻城。索賂乃免。張獻忠糾合回。革左諸賊自霍太北行。會闖賊於河南。十一月。襄城守將李萬慶沒於賊。萬慶乃降將射場天也。累功至副將。至是闖賊陷襄城。殺之。詔贈都督同知榮祿大夫。立祠襄城。十二月。傳制朱大典受命督賊。專辦五營。縱賊流毒。全無一效。其革職聽勘。以高斗光提督鳳陽兼督皖楚豫會勦。十五年正月丙子。山東盜平。擒李青山入京。青山本屠人。乘饑嘯聚數萬人。屢寇兗州。給事范淑泰。魯府左相俞起蛟拒之。俘青山。辛巳。左革陷潛山。壬午。陷巢縣。二月。左革陷全椒。三月丙子。革左老回回五股合步騎數萬趨壽州。復以兵合獻忠攻六安。袁時中亦會之。時中旋合於闖。五月丙子。革賊陷無爲州。士民投河自沈者亡算。潁州參將李栩大破左金王於壽州。癸巳。左金王合回。革連營趨潁州。以報壽州之役也。李栩偵知之。分布步兵伏城東南二十里。栩以騎兵迎擊。戰於城南樊家店。伏兵繞其後奮擊敗之。斬首千餘。六月。革左諸賊復入六安。英霍諸山中倚林樾度夏。秋爽復出。歲以爲常。安廬州縣殘破者半。官吏咸攜印篆。艤舟理事。城中荆榛塞路。人煙久斷。革裏眼入舒城。屯於板山。癸丑。詔

逮安廬巡撫鄭二陽。鳳陽總督高斗光入京。馬士英提督鳳陽軍務。七月甲戌。革賊毀廬州城。八月。回革左連營光山羅山一軍掠信陽。一軍出麻城。仍與獻忠合軍。保鎮游擊趙崇新與賊袁時中講撫於夏邑。爲賊所給。被殺。時中復佯就撫。詔許其投誠自新。時中出不備。突入蕭縣。執知縣以去。九月。老回回分兵犯蕪湖。掠桐安。革左犯潁州。旋北合於闖賊。十月戊午。誅監軍太監劉元斌。以征勦縱軍焚掠也。十一月。袁時中會合於闖賊。閏十一月。李自成令其渠賀一龍趨德安。以窺黃麻。一龍至黃阪。阻水不前。止收左良玉殘兵八百人而回。先見羅汝才。自成大恨之。始忌汝才。河南土寇蜂起。大者李好孫。學禮。李際遇。衆各數萬。小者亦數千。十二月。袁時中東犯鳳皖。十六年正月。左良玉率衆二十萬避賊東下。沿江縱掠。江南北流。土寇降將叛兵白貴。小秦王。托塔王。劉公子。混江龍。管泰山等所在蜂擁。俱冒左兵攻剽。南都留守諸軍盡列於沿江兩岸。不問爲兵爲賊。進兵擊之。斬千人。良玉列狀上兵部。自白兵稍戢。羣寇始盡散。二月。湖廣土寇陷澧州。常德。又陷武岡州。殺岷王。時湖南諸蠻獠皆伺隙。土寇勾引攻掠。盡歸於闖賊。三月癸卯。闖賊襲殺革裏眼。左金王并其衆。時羣賊俱歸闖賊。聽約束。無敢異同。惟革裏眼恃其衆。意不相下。闖賊置酒宴左。革殺之。席上。革裏眼名賀一龍。闖賊屯襄陽。命羅汝才攻鄖陽。久不下。多死。汝才所部怨闖賊。四月甲子朔。闖賊數十騎突入汝才營。汝才臥未起。入帳中。斬其頭。汝才一軍皆譁。闖賊以大隊兵脅之。七日始定。所部多散亡。降於秦督孫傳庭。汝才延安人。賊中號爲曹操。以其多智而狡也。初隸賊首高迎祥。後合獻忠。又合自成。折節下之。每破城。自成取六。汝才取四。汝才戰士四五萬。戰馬萬餘騎。馬騶斷養。不下四五十萬。闖

兵長於攻。羅兵長於戰。相倚爲用。汝才老而猾。嗜聲色。每破城邑。擇子女之美者數十人。後房數百。女樂數部。所至華侈。珍食山積。酣燕歌舞。闖賊每曠之曰。酒色之徒也。以山東人元珪爲謀主。每事取決焉。闖賊并殺珪。五月。闖賊攻袁時中。殺之初。時中困於陳蔡間。闖賊過而招之。許配以女。遂爲闖前鋒。時中畏闖之強。非心服也。時中叛而他徙。有衆數萬。擾潁亳。時通款於巡按蘇京。然終無降意也。扶溝諸生以闖賊命招時中。時中執送於京。斬之。復擒闖賊遊騎送於京。闖賊大怒。以兵二萬攻時中。殺之。小袁營遂滅。於是秦中蠭起之兵大半降於官軍。其強者俱爲闖賊所併。至是而盡。惟老回回遂爲闖賊所部。老回回名馬守應。自後止闖獻兩大賊。陸沈中原矣。

谷應泰曰。天禍人國。延安盜起。揭竿響應。所在縱橫。亦猶樊崇弄兵於莒。而逢安徐宣引衆相附。韓拔陵聚黨於沃野。而二夏幽涼叛者。蠭發此。雖同惡相濟。實繁有徒。良亦挺而走險。短於撫御也。方饑民王嘉允之倡亂也。自成輩從之。而白水王二邊盜苗美等。往往合潰兵以應。假令汲黯發河內之粟。秀實定郭曖之軍。解甲則歸農。賣刀買犢。匪異人任也。柰何應變乖方。蔓延莫制。嘉允擒斬之後。分顯道神。活地草等爲三十六營。而混天星。侵軼商維。過天星。盤據汧隴。獨行狼屠。毒漢南。蝎子塊。焚掠河西。中原版圖。蹂躪盡矣。比之苞蘖不翦。流爲臃腫。疥癬不治。結爲大疽。以至匠石輟斧。而躊躇。扁鵲望色而卻走。嗟乎。豈不晚哉。乃羣盜之最可恨者。窮則乞降。勝卽狂逞。此則投誠。彼卽負固。以故羅汝才之入巴蜀也。八部投戈。李自成之困嶠函也。九軍歸命。及乎孫傅庭。蓋屋之戰。擒闖王以獻。俘劉良佐。左良玉。義門之戰。破賊兵二十餘萬。此何異李固之入荊州。度尙之臨艾縣。而乃摧陷雖多。廓清難奏者。則以分闖之事。權不一。

前門拒虎。而後門進狼。行閒之款附非真。豺聲已成。而鷹眼不化也。至於十五年之後。袁時中既滅。老回回并營。而弱者半降於官軍。强者悉隸於闖部。究至公私塗炭。宗社淪胥。論者咸謂自成之罪。上通於天。而予未嘗不嘆息痛恨於羣盜也。譬猶蠹木焉。獻忠啄之。自成殊之。實羣盜攢穴之。譬猶逐鹿焉。獻忠拊之。自成攫之。實羣盜聚蹄之。蓋自成者。鷓張之孽。而羣盜者。蟻附之妖。自成者。肘腋之憂。而羣盜者。腹心之疾矣。若夫懷宗減膳撤懸。則奉天之德音也。常自裕合圍獵獸。則楊侃之奇策也。柰軍士曾無激勸。韜鞞絕不奉行。卒之周鼎既遷。庭堅不祀。豈罪己之詔聽者充耳。而決勝之條談者掛壁歟。嗚呼。秦祚之亡。關外俱爲賊藪。隋國之末。山東悉屬寇壤。懷宗志在蕩平。而禍同瓦裂。以彼羣狐聚溷。蠱蠱有毒也。悲夫。

## 卷七十六

鄭芝龍受撫

熹宗天啓七年六月。海寇鄭芝龍等犯閩山。銅山中左等處。芝龍泉州南安縣石井巡司人也。芝龍父紹祖爲泉州庫吏。蔡善繼爲泉州太守。府治後衙與庫隔一街相望。芝龍時十歲。戲投石子。誤中善繼額。善繼擒治之。見其姿容秀麗。笑曰。法當貴而封。遂釋之。不數年。芝龍與其弟芝虎流入海島。顏振泉黨中。爲盜。後振泉死。衆盜無所統。欲推擇一人爲長。不能定。因共禱於天。貯米一斛。以劍插米中。使各當劍拜。拜而劍躍動者。天所授也。次至芝龍。再拜。劍躍出於地。衆咸異之。推爲魁。縱橫海上。官兵莫能抗。始議招撫。以蔡善繼嘗有恩於芝龍。因量移泉州道。以書招之。芝龍感恩。爲約降。及善繼受降之日。坐戟門。令芝龍

兄弟囚首自縛請命。芝龍素德善繼，屈意下之。而芝虎一軍皆譁，竟叛去。六年春，遂據海島，截商粟。閩中薦饑，望海米不至。於是求食者多往投之。七月，劫商民船，勢浸大。其黨謀攻廣東海豐嵌頭村，以爲穴。芝龍乃入閩，泊於漳浦之白鎮。時六年十二月也。巡撫朱一馮遣都司洪先春率舟師擊之，而以把總許心素、陳文廉爲策應。鏖戰一日，勝負未決。會海潮夜生，心素、文廉船漂泊失道。賊暗度上山，詐爲鄉兵出先春後。先春腹背受敵，遂大敗，身被數刃。然芝龍故有求撫之意，欲微達於我兵，乃舍先春不追，獲盧游擊不殺。又自舊鎮進至中左所，督帥俞咨皋戰敗，縱之走。中左人開城門求不殺。芝龍約束麾下，竟不侵擾。警報至泉州，知府王猷知其詳，乃曰：「芝龍之勢如此，而不追不殺不焚掠，似有歸罪之萌。今勦難猝滅，撫或可行，不若遣人往諭退舟海外，仍許立功贖罪，有功之日優以爵秩。」興泉道鄧良知從之，遣人諭意。懷宗崇禎元年春正月，工科給事顏繼祖劾福建總兵俞咨皋下獄。初，巡撫朱欽相招撫海寇楊六、楊七等。鄭芝龍求返內地，楊六給其金，不爲通。遂流劫海上。繼祖上言：「海盜鄭芝龍生長於泉，聚徒數萬，劫富施貧，民不畏官而畏盜。總兵俞咨皋招撫之議，實飽賊囊。舊撫朱欽相聽其收海盜楊六、楊七以爲用，夫撫寇之後，必散於原籍，而咨皋招之海，卽置之海。今日受撫，明日爲寇。昨歲中左所之變，楊六、楊七杳然無蹤，咨皋始縮舌無辭，故閩帥不可不去也。」疏入，逮咨皋下於理。三月，禁漳泉人販海。芝龍縱掠福建、浙江海上。六月，兵部議招海盜鄭芝龍。九月，鄭芝龍降於巡撫熊文燦。工科給事顏繼祖言：「芝龍旣降，當責其報效，從之。」

二年春二月，海盜李魁奇伏誅。魁奇本鄭芝龍同黨，芝龍忌之，擊斬粵中。夏四月，廣東副總兵陳廷對

約鄭芝龍勦盜。芝龍戰不利歸閩。不數日寇大至。犯中左所。近港芝龍又敗。寇夜薄中左所。四年春正月上。召廷臣及各省監司於平臺。問福建布政使吳暘。陸之祺。海寇備禦若何。暘曰。海寇與陸寇不同。故權撫之。但官兵狃撫爲安。賊又因撫益恣。致數年未息。上曰。前撫李魁奇。何又殺之。暘曰。魁奇非鄭芝龍比。卽撫終不爲我用。今鍾斌雖撫。亦反側不可保也。上問實計安在。祺曰。海上官兵肯出死力。有司團練鄉兵。多設火器以守爲戰。勦之不難。上問巡撫熊文燦。暘曰。文燦才膽俱優。但視賊太易。故前有吉了之敗。祺曰。鍾斌與鄭芝龍勢不兩立。七月間斌擾福州。撫臣計誘往泉州。前聞撫臣同芝龍討賊。僂其兄賊遁去。問廣東布政使陸問禮。對曰。廣東海寇俱自福建至。舟大而多火器。兵船難近。但守海門。勿令登陸。則不爲害。

五年冬十一月。海盜劉香老犯福建小城。游擊鄭芝龍擊走之。

六年夏六月。海盜劉香老犯長樂。

七年夏四月。海盜劉香老犯海豐。十二月。總督兩廣熊文燦奏道將信賊自陷。時文燦令守道洪雲蒸。巡道康承祖。參將夏之本。張一傑往謝道山。招劉香老。被執。上以賊渠受撫。自當聽其輸誠。豈有登舟往撫之理。弛備長寇。尙稱未知。督臣節制何事。命巡按御史確覈以聞。已。令文燦戴罪自效。八年夏四月。福游建擊鄭芝龍。合粵兵擊劉香老於田尾。遠洋。香老脅兵備道洪雲蒸出船。止兵。雲蒸大呼曰。我矢死報國。亟擊勿失。遂遇害。香老勢蹙。自焚溺死。康承祖。夏之本。張一傑脫歸。八月。香老家屬六十餘人。部屬千餘人。至黃華。降於溫處參軍。

十三年秋八月。加福建參將鄭芝龍署總兵。芝龍既俘劉香老。海氛頗息。又以海利交通朝貴。寢以大顯。十六年冬十一月。設南贛兵三千。以副總兵鄭鴻逵統之。

十七年春正月。前兵科都給事中曾應遴薦副總兵鄭鴻逵。緩急可用。詔益南贛兵二千。命鴻逵鎮守。踰年。鴻逵以舟師守鎮江。我大清兵南下。潰歸。鄭芝龍降。

谷應泰曰。海上亡賴奸民多相聚爲盜。自擅不討之日久矣。蓋以魚鹽蜃蛤商舶往來剽掠。其閒者累千金。利則乘潮上下。不利則嘯聚島中。儼然以夜郎扶餘自大。東南邊徼益騷然苦之矣。泉州人鄭芝龍。筦庫之子也。年未弱冠。爲海寇顏振泉所掠。振泉愛芝龍狀貌。因有寵。泉死。衆推爲魁。然而龍特饒智數。桀黠喜持兩端。其他無絕殊者。方其侵暴外洋也。輸金於楊六。緩追於洪先春。黃巾未破於曹公。赤眉約降於光武。其持兩端者一也。及其受撫內地也。私鬪則勇於魁奇。公戰則怯於廷對。殺陳餘於泚水。縱匡術於石頭。其持兩端者二也。又若擁兵閩越。援立外藩。定策功高。闔門橫玉。而乃陰懷首鼠。百計沮軍。滹沱既未合兵。東吳豈能遽下。居異人爲奇貨。以澶淵爲孤注。其持兩端者三也。又若關門既下。釋甲入臣。居第京師。招搖海上。曾無麟閣之功。但比遼東之豕。隗囂侍子而身反於外。延之在臺。而子更舉兵。其持兩端者四也。夫奉先之失。在於去就輕脫。故依建陽。則背建陽。依董卓。則背董卓。牢之之敗。在於天性反覆。故附道子。則反道子。附元顯。則反元顯。今芝龍以盜賊之雄。挾遨遊之智。而鷹眼不化。狼心已成。身在樊籠之中。志存江湖之上。一旦緩急。可得信乎。然予又怪崇禎之初。芝龍既撫。銳意行金。織皮丹珀。來自賈胡。明珠文犀。至皆兼兩。是以薦剡頻上。爵秩屢賜。坐論海王。奄有數郡。人但知元龜象齒。都自淮來。而不



知寶玉大弓原從魯竊。若能卻盜泉之水，則不至奪君子之器矣。說在孔子之對康子也。

## 卷七十七

### 張獻忠之亂

崇禎元年，延安饑，府谷民王嘉允作亂。延安人張獻忠從之。獻忠陰謀多智，賊中號八大王。其部最強，旁掠延安諸郡邑。

四年，張獻忠率衆二千人，就撫於三邊總督洪承疇。

五年，獻忠復叛，隨賊首高迎祥、紫金梁等轉寇山西諸郡縣。

七年，羣賊轉寇河南。張獻忠犯信陽、鄧州，遁入應山。洪承疇率諸將逐賊於河南。獻忠西奔商雒，遁蓋鄆間，與延安賊李自成陷澄城，寇平涼、邠州，旋與羣賊出潼關，寇嵩汝。

八年正月，諸賊盡集宛、雒。張獻忠東走，掠廬鳳安慶。二月，與老回回西走商州，復至秦川。十一月，獻忠與羣賊自潼關出，犯闕鄉、靈寶，東行。庚申，總兵祖寬大破獻忠於姑家廟。十二月，獻忠合諸賊圍廬州。

分道陷巢縣、含山，遂陷和州，沿江下犯江浦。

九年正月，張獻忠合羣賊圍滁州。總理盧象昇大敗之，賊竄河南。

十年，羣盜久擾河南，無可掠，悉入楚。寇蘄、黃、閒，官軍敗獻忠於黃岡。獻忠復入江北，東掠至儀真，揚州告急。獻忠尋西走入楚。

十一年正月。總兵左良玉。陳洪範大破賊於鄖西。張獻忠請降。初。獻忠自良涿噪而爲盜。洪範捕獲獻忠。異其貌而釋之。以是懷舊恩。乞降於洪範。請率所部殺賊自效。總理熊文燦承制撫之。獻忠請置家口於鄖西。文燦爲請於朝。詔貸其罪。立功自贖。獻忠乃率部曲數千居白沙界山。獻忠狡而多計。羣盜每以爲的。其降也。自言能制鄖襄荆。承數百里內外無一賊。文燦每曲徇其請。益驕不奉法。屢檄從征不應。獻忠又求襄陽一郡以屯其軍。文燦議餉二萬人。獻忠乞餉十萬人。文燦遷延不能應。十月。獻忠聲言寄家口於穀城。入據守之。分屯羣盜於四郊。十一月。羅汝才亦就撫。文燦安其衆於房竹間。與民錯壤而處。遙與獻忠爲聲援。奪民禾而食。不奉縣官法。鄖楚偏沅諸撫咸以爲憂。文燦剛而復。又新有功而驕。皆不聽。鄖襄人喘喘恐禍至無日矣。

十二年五月。張獻忠叛於穀城。初。賊首高迎祥旣誅。李自成困川西。羣盜失勢。獻忠連敗。精銳俱盡。始乞撫以緩誅。初無降意。及據穀城。潛勾諸賊爲犄角。遂復思叛去。舉人王秉貞爲之謀主。至是。遂殺穀城知縣阮之鈿以叛。羅汝才九營並起。應之。獻忠脅御史林鳴球上書求封於襄陽。鳴球不從。遂殺之。七月。熊文燦檄諸將進兵穀城。獻忠焚穀城西走。與羅汝才合。左良玉追賊於房縣西。賊設伏羅睺山。良玉兵度隘入伏中。賊四合圍之。突圍戰。敗績。一軍盡沒。良玉失其符印。僅收殘兵數百。走回房縣。事聞。文燦良玉俱革職。殺賊自贖。九月。太學士楊嗣昌督師討賊。十月。至襄陽。逮熊文燦論死。十三年二月。平賊將軍左良玉大破張獻忠於太平縣之瑪瑙山。斬首萬級。獻忠精銳俱盡。止驍騎千餘。自隨。遁走興歸山中。尋自鹽井竄興房界上。左良玉屯興安。平利諸山。連營百里。諸軍憚山險。圍而不攻。

賊伏深箐中。重賄山氓。市鹽芻米。酪山中人安之。反爲賊耳目。陰輸兵情於賊。獻忠得以休夏。收散亡。養夷傷。羣盜往往歸之。兵復振。時羅汝才過天星七股。賊盡入蜀。六月。獻忠自興房走白羊山。入巫山隘。聞川兵躡之。益入深谷中。掩息旗鼓。轉入而西。不知所往。都司曹進功率兵入山偵賊。不見一人而還。七月。獻忠旣西。羅汝才屢爲官軍所敗。勢孤。率黨走合於獻忠。共謀度川西。諸將賀人龍。李國奇。張應元。汪雲鳳。張奏凱等會師擊之。應元。雲鳳營於夔之土地嶺。待賀人龍兵。三檄不至。初。督師嗣昌以左良玉跋扈難制。而人龍屢破賊有功。請以人龍代良玉佩將印。旣而以良玉瑪瑙山捷。度未可動。復奏留良玉佩印如故。別加人龍總鎮銜。須後命。人龍初聞大將之拜。踴躍動三軍。旣報寢。乃鞅鞅。良玉知其故意。亦恨。當獻忠之遁。伏輿歸也。千餘殘寇可盡。乃良玉以奪印懷慚。人龍復以歸印。舐望。遂逡巡不復深入。致獻忠復熾。皆嗣昌失兩帥之心。玩寇故也。人龍屯開縣。每以餉乏爲辭。頓兵不進。癸亥。人龍兵噪而西歸。己巳。官軍敗績於土地嶺。時張應元。汪雲鳳所將楚兵五千皆新募。未經行陣。待人龍兵久不至。獻忠知官軍無後繼。悉銳來攻。應元。雲鳳簡銳千人搏戰。晨至日中未決。賊分兵繞後山而下。突入營中。守營新兵皆譁。賊乘之前後合圍。二將連兵死戰。應元中流矢。奮擊突圍出。賊方渡巴霧河。應元馳赴河上。然礮擊殺一賊帥。衣緋者。賊不得渡。雲鳳苦戰久得脫。渴飲水斗餘。臥血凝臆而卒。兵多潰亡。九月。獻忠。汝才陷大昌。庚寅。屯夔城山背。賊行營輜重。婦女甚衆。而諸軍多觀望不前。但尾賊後。所至關隘。防兵多遠遁。賊長驅直過。二賊合兵趨達州。謀西渡。丙午。賊渡河。遂入巴西。督師嗣昌命監軍萬元吉。監諸軍西行。尾擊賊。十月壬戌。獻忠。汝才陷劍州。甲子。過劍閣。趨廣元。直走陽平關。從閒道別出百丈山。將入漢

中總兵趙光遠守陽平甚嚴。賀人龍、李國奇復整兵而東。賊乃踰昭化走西川。丙寅，川兵追賊於劍州。敗績。賊擒四將以去。官軍轉戰於綿州，逐北至城下。賊渡縣河而西。十一月庚辰，督師監軍元吉大饗將士於保甯，以諸軍進止不一，立大帥以統之。以總兵猛如虎爲正總統，張應元爲副總統。癸未，發保甯趨綿州。諸將分屯要害。元吉督諸軍自閒道趨射洪，掘蓬溪以待之。癸卯，賊屯安岳。知大兵且至，宵遁走內江。乙巳，猛如虎至安岳，選驍騎逐賊。元吉與應元屯於安岳城下，以遏賊歸路。十二月己酉，賊走瀘州。賀人龍等以兵躡之。辛亥，賊陷瀘州。瀘州三隅皆陡絕，臨江止立石站，一路可北走。賊旣走絕地，元吉謀以大兵自南擣其老營，伏兵旁塞險要，蹙賊北竄永州，逆而擊之，可以盡殲也。乙卯，元吉兵至立石站。賊營先移渡南溪，官軍隔水追之不及。癸亥，賊越成都走漢川，德陽復至縣河。十四年正月丁丑，獻忠汝才入巴州。己卯，走達州。甲申，賊渡違河而東，往新開，焚燬驛道。人煙斷絕者七百里。初，賊南竄，元吉欲從閒道出梓潼，掘歸路以待賊。嗣昌檄諸軍躡賊，急追，不得距賊遠，令他逸。諸將皆盡向瀘州，賊折而東返，歸路盡空，不可復遏。賀人龍頓兵廣元不進。己丑，猛如虎率諸將及賊於開縣。日暮雨作，諸將咸以人馬乏，請詰朝戰。參將劉士傑曰：「自瀘州逐賊，馳騫四旬，僅而及之，惟敵是求。今遇賊不戰，縱敵失賊，誰執其咎乎？請爲諸君先揮戈而進。」如虎亦率親兵從之。士傑奮勇前搏賊陣，連勝之。獻忠憑高而望，見後軍無繼，左軍皆前却不進，因以精銳繞谷中出，官軍後馳而下。左軍先潰，士傑及遊擊郭關如虎子猛先捷皆戰死。前軍已覆，如虎突戰潰圍出，馬仗軍符盡失。賊東走巫山大昌。監軍元吉赴開縣收召殘兵，祭陣亡諸將，哀動三軍。嗣昌在雲陽聞開縣失利，始悔不用諸將掘歸路之謀矣。初，賊

之西渡遠河也。嗣昌策其必入秦，令左良玉自興歸，趨漢中及賊東走。嗣昌復檄良玉自夷夔進，勦使者憚行。中道返命曰：「平賊已入漢中矣。」既慮其言不售也，更使人給良玉曰：「賊向漢中矣。」良玉不至。嗣昌之使十九返。良玉曰：「向依督帥令，瑪瑙山安得功乎？遂撤興房兵趨漢中，賊下夔門，無一人攔截者。賊既度巫山，晝夜疾走興房山中。」二月，獻忠汝才走當陽，鄖撫袁繼咸悉兵掘賊於房竹，賊走宜城。偵襄陽無備，簡二十騎持符偽爲官兵。己酉夜，至城下，守者驗符信啓關。賊既入，卽揮刀大呼，殺門者。城中先伏賊百餘，俱起應之。縱火光燭天，賊大隊疾馳至，城中大亂，門洞開。庚戌味爽，賊盡入城。知府王承曾突圍走，兵備副使張克儉推官酈曰廣死之。賊焚襄王府，執襄王，獻忠據坐王宮，坐王堂下，勸之以卮酒，曰：「吾欲斷楊嗣昌頭，而嗣昌遠在蜀，今當借王頭。」使嗣昌以陷藩伏法。王其努力盡此一杯酒，因縛王殺之，投屍火中。福清王常澄逃免，潛遣人索王屍，已燼，僅拾顱骨數寸以歸。賊殺宮眷并貴陽王常法，盡掠宮女，發銀十五萬以賑飢民。襄陽守兵數千，軍資器械山積，盡爲賊有。初，左良玉屢破賊，掠其輜重，盡畜之許州，爲獻忠襲取。良玉在鄖，屠家口，貲蓄於襄陽。至是復盡爲獻忠有。良玉聞之，同鄖撫袁繼咸發兵馳援，已不及。癸丑，賊渡江破樊城。己未，陷當陽、郟縣。乙丑，陷光州、新野。三月丙子，督師大學士楊嗣昌自縊於軍。時李自成已陷河南，福王遇害。嗣昌以連失二郡，喪兩親藩，度不免，遂自盡。監軍元吉部署行營，命猛如虎駐蘄黃，防獻忠東逞。上以襄陽失陷，左良玉違制避賊，削職戴罪。平賊，逮鄖撫袁繼咸入京。四月，獻忠焚掠襄陽既空，聞左兵漸逼，以兵三萬犯應山。知縣章日輝擊卻之。北至隨州，掠汝甯縣，難民逸歸。見獻忠面帶刀瘢，二箭創一，方令羣盜備乾糲爲半月糧，往攻固始，陷光州，漸逼麻城。革左諸賊在皖

桐聞獻忠東來。自潛太至麻城。勾合之。將謀渡江。巡撫宋一鶴擒賊謀。焚其舟。庚午。獻忠。汝才合兵陷隨州。知州徐世淳死之。合戶被殺。吏民屠慘不遺。血流成溝澮。六月。左良玉敗獻忠於南陽之西山。獻忠西走。與汝才合兵攻南陽。晝夜穴城。知府顏日愉力拒之。賊去。陷信陽。獲左兵旗幟。令羣盜襲以入泌陽。陷之。癸亥。走隨州。七月丁丑。獻忠圍鄖陽。鄖兵禦之。多殺傷。己卯。獻忠宵遁。總兵黃得功戲下兵。叛西走。投獻忠。獻忠陷鄖西。羅汝才忤於獻忠。北走。合自成。左良玉敗之於鄧州。再敗之於浙川。辛卯。鄖兵與獻忠戰。敗績。獻忠以所擒鄖兵人斷一手。縱歸。以辱官軍。督師丁啓睿與左良玉俱屯南陽。頓兵不進。獻忠既拔鄖西。馬羸器甲搶獲甚盛。羣盜蟻附之。衆至數十萬。獻忠屢勝而驕。八月。東掠信陽。左良玉營多降將。家在鄖襄。多被獻忠殺掠。人思致死於賊。良玉乃自南陽引兵逆擊獻忠於信陽。斬其首將沙賊。大破之。奪其馬萬餘。降衆數萬。獻忠負重創。易服夜遁。竄入山中。良玉軍聲大振。降附日衆。遣諸將分道窮搜獻忠。戊午。獻忠收餘衆數千。反走向鄖陽。驟遇官軍。不戰而潰。棄馬羸二千。尙有衆二千。趨南陽。負創不能馳。保其婦。豎日行三十里。部曲日逃十六七。僅隨數百人。辛未。良玉自鄖北發。獻忠已過南陽。追之不及。監軍御史汪承詔劾將士觀望縱賊。羅汝才既北。合李自成。自成踞河維。有衆五十萬。獻忠衆散。且盡。九月。因汝才以奔自成。初。獻忠與自成並起。延西。以狡詐相雄長。自陷襄陽。嗣昌縊死。自以威名遠出。自成右。及敗來歸。僅從數百騎。自成方強。欲屈之。獻忠不爲下。自成怒。欲殺之。汝才知之。陰選良馬五百騎。資獻忠。令他徙。獻忠乃盡夜東馳。與回革諸賊合入霍山。掘險拒守。督師啓濬以兵赴商城。旋北行討李賊。獻忠得逸山中。十月。張獻忠合六營賊。復出攻舒城。

十五年二月乙卯。張獻忠陷亳州。亳州官吏先已棄城走。賊按兵入城。三月。獻忠合同革諸賊復攻舒城。四月壬寅。舒城陷。時舒城無令。參將孔廷訓以兵千人同編修胡守恆率民共守。七閱月。廷訓降於賊。句賊攻城。守恆倡舒人死守。賊以洞車穴城。穿者數處。守恆督軍民補塞之。賊射書脅降。守恆燔其書於城上。越三日。城陷。賊執守恆。刃其腹。被數十創以死。獻忠屯舒城。改曰得勝州。令降將孔廷訓攻霍山。河南賊袁時中以兵會獻忠。乙巳。獻忠合諸賊陷六安。五月甲戌。張獻忠襲破廬州。先是。獻忠遣英霍遊民陽爲貿易者潛入廬州城。適督學御史以較士至郡。獻忠遣賊數百負書卷。衣青衿。雜諸生應試者。旅寓城中。甲戌夜。漏三下。獻忠捲甲疾馳入郡城中。賊縱火應之。城陷。學使者及備兵副使蔡如蘅俱走。知府鄭履祥死之。廬州城池高深。賊屢攻不能克。至是一夕而陷。獻忠斂兵退屯巢湖。略含山。巢縣。六月辛亥。獻忠襲陷廬江。焚僂一空。還兵舒城。八月辛丑。獻忠分三軍。一軍上六安。一軍趨廬州。一軍往廬江三河。掠雙橋巨舟二百艘。復大治舟艦於巢湖。習水師。因大會羣賊。合水陸五十六營。集於皖口。壬子。獻忠復陷六安。將州民盡斷一臂。男左女右。總兵黃得功。劉良佐兵救六安。營於夾山嶺。再戰敗績。得功歸定遠。獻忠再陷六安。挫得功。良佐兵謀渡江入南京。遂潛號改元。刻僞寶。選自宮男子。僞署總兵以下官。九月。黃得功復以大兵逐之。己卯。賊悉走潛山。命賊將一堵牆爲殿。營於山上。步騎九十哨分營爲四。前阻大溝。後枕山險。爲持久計。得功。良佐捲甲疾趨。夜半緣山後譟而升。賊驚起失措。且前阻大溝。不能成列。官軍奮擊。賊踰崖跳澗。四潰。追奔六十里。斬首萬餘。獻忠潰圍走。一堵牆伏林中。焚殺之。填屍溢溪壑。臭達百里。奪馬贏數萬。賊腹心謀士婦豎俱盡。十月丙午。劉良佐再破獻忠於安慶。奪馬

贏五千。救回難民萬餘。獻忠引兵西走蘄水。十一月。獻忠西入楚。劉良佐旋師淮安。黃得功旋師定遠。十二月。獻忠復東去。陷桐城。屠之初。獻忠西遁。諸軍俱勦。袁時中於潁。故獻忠乘虛突出。丙戌。陷無爲州。遂陷黃梅。壬辰。陷太湖。

十六年正月辛酉。張獻忠以二百人夜襲陷蘄州。明日。令薦紳孝廉文學各冠帶自東門入。西門出。盡斬之。遂屠蘄州。留婦女。毀城。稍不力。卽被殺。執守道仁和許文岐。獻忠曾販杭州。識文岐。頗禮之。文岐陰謀圖賊。乃被殺。時楚兵盡隨良玉東下。蘄黃一帶。惟土兵三百人守蘄水。獻忠乘虛充斥。三月丁酉。陷蘄水。屠之。甲寅。左良玉引兵自池口西上。屯安慶。丙辰。獻忠自蘄水疾馳至黃州。乘大霧攻城。黎明。城陷。執副使樊維城。欲降之。罵賊不屈。賊刺之。洞胸死。獻忠據府。自稱西王。麻城諸生周文江倡亂。迎降獻忠。獻忠大喜。僞授文江知州。賊尋陷羅田。五月。總兵方國安率兵七千。扼蘄州。獻忠西向武昌。武昌武備積弛。闖獻交窺。江漢時。議募兵守城。而庫藏空。詘楚王有積金百萬。三司長史貸金數十萬。以贍軍。王不應。大學士賀逢聖家居。倡義。損貲募兵。僉謂宜募士著。適承天。德安。潰兵俱下。楚王盡募之。爲軍鋒。以長史徐學顏領之。號楚府兵。獻忠沿江而上。悉師破漢陽。臨江。欲渡。武昌大震。議撤江上兵。嬰城守。參將崔文榮曰。守城不如守江。守江不如守漢。磨盤煤炭。諸洲淺。不過馬腹。縱之飛渡。而嬰城坐困。非策也。議者不從。賊果從煤炭洲而渡。直逼城下。文榮禦之。小有斬獲。賊攻武勝門。文榮率諸軍拒之。多殺傷。壬戌。楚府新募兵。爲賊內應。開門迎賊。文榮躍馬持矛大呼。殺賊三人。賊攢矛刺之。洞腋死。大學士賀逢聖與文榮俱守武勝門。城陷。歸家。衣冠北向再拜。以巨舟載其家出。墩子湖。至中流。鑿舟。全家溺者十二人。逢



聖屍沈百七十日不壞。十一月壬子始出葬。長史徐學顏與賊格鬪。斷左臂。右手持刀不仆。賊支解之。楚宗多從賊者。賊執楚王。盡取宮中積金百餘萬。輦載數百車。不盡。楚人以是咸憾王之愚也。賊以篋輿籠王。沈之西湖。屠僇士民數萬。投屍於江。尚餘數萬人。縱之出城。以鐵騎圍而蹙之。江中浮屍蔽江而下。武昌魚幾不可食。其遺民數百多。別斷手足。鑿毀目鼻。無一全形者。獻忠遂據楚王府。僭稱武昌曰京城。僞設六部五府。鑄西王之寶。開科取士。殿試取三十人爲進士。授郡縣官。初。李自成兵臨漢陽不克。聞獻忠取之。自成怒。榜示遠近曰。有能擒獻忠以獻者。賞千金。及聞取武昌。復遣人賀之曰。老回回已降。曹革。左皆被殺。將行及汝矣。獻忠得書而懼。多贖金寶報使於自成。自成留其使。獻忠恨之。六月丙戌。諭平賊將軍左良玉專勦張獻忠。毋老師糜餉。七月辛亥。方國安合左營副將徐德懋。馬士秀等步騎二萬。從蘄州而上。夜擊賊於大治。斬首千級。前鋒旣勝。左鎮諸將並進。獻忠聞之。戊午。以四賊帥守武昌。爲浮橋於金口。悉衆西渡。屯舟師於湖中。謀向岳。八月丙寅。方國安等進兵黃州。斬僞知府。癸亥。諸將進次陽邏堡。距武昌三舍。監紀知縣吳敏師聯絡蘄黃四十八寨義勇數萬人。與師會。總兵常安國以舟師先進。轉戰金沙州。奪賊舟百艘。賊騎反走。焚城下諸舟。嬰城自保。安國等退屯漢口。丙寅。諸軍齊壓武昌。而軍賊出戰大敗。退入官軍逐之。遂入城。賊開門西走。諸將縱兵屠僇萬計。遂復漢陽。并諸屬縣。張獻忠陷咸甯。蒲圻。距岳州二百里。沅撫李乾德總兵孔希貴以兵二萬守城陵磯。盡移岳州居民他避。令軍士詐爲居民。開門迎賊。賊入城。伏發。賊盡殲。留四賊。賊割一耳。貫箭縱回。以辱賊。獻忠怒。益兵進攻。乾德虛立營壘道傍。林中植旗幟。伏大礮。積薪其上。賊以火攻之。延燒積薪。礮大發。殺賊數百。賊益怒。水陸並

進。乾德飭戰艦中流向賊營，度矢石可及，卽止不進。賊連弩射良久，乾德度賊矢礮且盡，水陸奮擊，大敗之。三戰三捷，獻忠乃悉衆二十萬圍岳州。百道俱攻，力屈城陷。乾德希貴俱走長沙。戊辰，賊前鋒至湘陰，湘陰民俱空城走。獻忠分軍爲二：一軍上長沙，一軍下荊州。獻忠欲北渡，卜於洞庭湖神，不吉。三卜，神終不許。庚辰，獻忠斂舟湘潭，數千艘將北渡。忽大風起，覆舟百餘，溺死數千人。因復還岳州，盡殺所掠婦女，投屍江中，焚其舟，火延四十里。江水夜明如晝，遂陸行向長沙。甲申，至城下。長沙人民先已走，李德乾奉吉王、惠王走衡州。丙戌，長沙陷。總兵尹先民、何一德降賊。巡撫王聚奎單騎走江夏，推官蔡道憲死之。先是武昌陷，聚奎南奔長沙。道憲請還屯岳州，謂岳與長沙唇齒也，併力守岳，則沙長可保。而衡永無虞，聚奎屯岳數日，仍南徙，驅萬人入長沙。所過如洗，慘甚於賊。尋遁入湘潭，及賊至城下，呼推官曰：「吾軍中皆知爾名，可速降，毋自苦也。」道憲挽強弩射之，獻忠怒，攻三日夜而城陷。執道憲，百計誘降，不屈，磔之。健卒林國俊等九人追侍道憲不去。賊勸道憲降時，國俊曰：「如吾主可降，亦去矣。不至今日，賊云爾主不降，爾亦不得生。」國俊曰：「若我輩願生，亦去矣。不至今日，賊并殺之。內四卒奮然曰：「願且延旦夕，葬主骸而受後刃，賊義而許之。於是四卒解衣裹骸，葬之南郭。畢，四卒自經死。獻忠旣陷長沙，設立僞官，大書僞榜，馳檄遠近，降賊將先民一德願效前驅，進取江西。獻忠悅，僞封世襲伯。庚寅，賊襲陷衡州，桂王及吉、惠二王走永州。九月，獻忠拆桂王府殿材，至長沙，構造宮殿，遣兵南追三王至永州。巡按湖南御史劉熙祚督水師禦之，遣兵護三王南行入廣西，而自入永州死守。奸人內應，開門迎賊。熙祚被賊執，賊欲脅降之，不屈，囚之永陽驛中，閉目絕食，題絕命詞於壁。賊再三諭降之，臨以白刃。熙祚大罵不已，遂遇害。於是全楚皆

陷。戊戌，官軍入岳州。初，獻忠陷岳州，置僞官守之，悉率羣賊南略地。官軍進復之，僞官俱伏誅。獻忠屯衡州，復分軍爲三：一軍往永州，一軍入廣西全州，一軍犯江西袁州。獻忠歸長沙，開科取士。丙辰，賊前鋒至袁州，獻忠至萍鄉，知縣棄城走。萍鄉士民牛酒遠迎，賊路相屬。戊子，賊陷萍鄉，盡焚公廨，屋廬空。其城獻忠歸長沙，分兵徇攸縣、分宜。十月甲子，賊陷萬載，於是瑞安、臨江、新喻、分宜之人俱空。獻忠遣別將趨連州，南贛兵備副使王孫蘭駐韶州，兵不滿百，聞之，遽自經。知府踰城遁，韶民盡逃。袁州迎降於賊，賊陷袁州。左良玉以副總兵吳學禮援袁州，次於分宜。甲戌，進圍袁州，僞將邱仰寰拒守。都司高山奮身先登，斬賊二千四百，奪馬六百，擒斬邱仰寰，遂復袁州。時江西袁州、吉安、臨江人民多徙山谷，官兵淫殺獻俘，三郡民所在屯結以拒官軍。江西巡撫郭都賢檄撤兵回九江，招士著戍三郡，官兵旣撤，賊自長沙突至吉安。丁丑，兵備副使岳虞巒方閱軍於郊，俄報賊至，皆潰。虞巒走。戊寅，吉安陷，諸縣同日而陷。賊設僞官，改吉安爲親安府，廬陵爲順民縣。賊將張其在發僞檄馳下袁州，兵民皆傾城先竄。賊復入袁州。獻忠在長沙增兵爲九營，四營皆老卒，五營皆新附。左良玉令馬進忠諸將馳兵赴袁州，馬士秀以步兵上臨湘岳州，命惠登相規復襄陽，劉洪起規復南陽。乙酉，獻忠遣賊將馬賜下臨湘取米及釜，方國安遣兵進阨於蒲圻。十一月壬辰，江督呂大器兵復吉安。癸巳，獻忠遣四賊將下岳州，沿江設伏，藏輕舟於汶港，以巨艦載輜重順流下。副將王世泰、楊文富以兵三千邀擊之，賊逆流陽走，以誘官軍。官軍爭利，泝流上，盡奪其資入舟，舟重不能速行，賊輕舟四出圍之，夾岸賊兵邀擊，官軍殺溺無算。方國安等諸將合兵救之，僅奪回文富、世泰、喪師二千，舟二百艘。岳州軍民空城走，賊疾趨復陷之。壬寅，

詔承天太監何志孔勞良玉軍。以恢楚有功。加良玉少師。蔭一子。吏士各陞秩。大賚各軍。詔良玉移鎮武昌。良玉令馬士秀趨長沙。擣賊後。令馬進忠等趨袁。吉迎擊其前。甲寅。馬士秀等復臨湘。賊奔岳州。諸將追至岳州。賊將混天龍步騎數千拒南岸。以輕舟數十順流下。邀官軍。士秀三分其軍。以殿後者交射南岸。賊乘風直上。繞賊舟後反擊之。賊大敗。盡奪其舟。南岸賊疾入城。士秀麾諸軍登岸。四面乘城。鱗次入。賊突門復走長沙。斬首四千餘級。遂復岳州。乙卯。馬進忠等進兵分宜。賊盡竄袁州。丙辰。進趨袁州。賊開門西走。諸軍逐之三十里。復袁州。盡誅諸僞官。斬首三千級。奪賊馬五百。弓矢數萬。十二月。張獻忠遣兵陷建昌。又陷撫州。南豐。獻忠遣人通好於老回回。時老回回爲李自成據荊州。獻忠與修舊好。合兵。李自成既入關。獻忠益橫荊岳閒。丁亥。獻忠前鋒艾四轉戰至蒲圻。馬進忠禦之。再戰敗績。十七年正月。張獻忠自岳陽渡江。虛設僞官於江南。大隊俱往江北。遂棄長沙。造浮橋於三江口。以一軍過荊州。盡棄舟楫。步騎數十萬入夔州。二月。方國安。馬進忠復長沙。左良玉遣兵追賊於沙陽。六月。張獻忠陷涪州。瀘州。蜀王告急。請濟師於南都。左良玉兵屯德安。獻忠順流陷佛圖關。遂圍重慶。悉力拒守。四日而陷。瑞王闔宮被難。舊撫陳士奇死之。賊屠重慶。取丁壯萬餘。刳耳鼻。斷一手。驅徇各州縣。兵至不下。以此爲令。但能殺王府官吏。封府庫以待。則秋毫無犯。由是所至官民自亂。無不破竹下者。八月。張獻忠進陷成都。蜀王闔宮被難。巡撫龍文光暨道府各官皆死之。獻忠大索全蜀紳士。至成都。皆殺之。既而懸榜試士。諸生遠近爭赴。獻忠以兵圍之。擊殺數千人。咸挾筆握策以死。蜀中士類俱盡。復大殺蜀民。全蜀數千里。蕭條絕無人跡。時中原多故。諸將無暇西顧。獻忠遂奄有兩川。李自成敗。益發兵攻漢中。

陷之。獻忠逡巡自守，不敢出。未幾，獻忠以病死於蜀中。

谷應泰曰：昔者周書越人閔不畏死，三輔縱橫持斧而出，以至鄭苦萑苻之警，楚定僕區之法，草竊奸宄，自古患之矣。然未有自秦寇晉豫，由豫入楚蜀，轉掠江右，旋犯粵西，二十餘年之間，取肝益膳，流血成渠，里落蕭條，宗社顛覆。若張獻忠之甚者也。考獻忠與李自成，因饑煽亂，並起延安。孫恩甫叛，盧循卽興。仙芝旣起，黃巢來附，同惡相濟，若連矢然。天禍人國，以有此孽耳。其時掩捕渠魁，賑卹餘黨，用張京兆之鳴鼓，兼汲長孺之發粟，平定安集，一長吏事也。奈何燎原莫撲，滋蔓難圖，嘯聚爲羣，旁抄郡邑。楊大作而湖湘悉陷，黃巾起而山左不平，使天子有西顧之憂，蒼生有喋血之患者，揆厥亂源，誰執其咎哉！然而獻忠無他技巧，止以陰謀多智，暴豪嗜殺，可乘之敝，正自不少耳。方夫賊師屢挫，其弱可擒，賊氣方張，其驕可掩，賊黨內攜，其釁可閒也。假令良玉太平之捷，精銳俱盡，得功潛山之捷，屍填溝壑，便當棄勝追奔，不令逸去。卽子儀克新店而收東京，懷光克河陽而滅朝義，故曰其弱可擒也。又若襄陽初陷，獻忠橫恣，六安再下，獻忠改元，若能轉敗爲功，出彼不意，卽元濟氣盛而李愬夜襲淮蔡，潁川甫陷而長源規取范陽，故曰其驕可掩也。又若南陽之敗，自成蓄謀以圖漢陽之取，自成懸金以購，若能用諜出奇，兩虎自鬪，卽呂布交疏於袁術，慶緒授首於思明，故曰其釁可閒也。乃諸臣計不出此，而天與不取，地險坐失，遠棄漢川，近防江夏，纒屯石站，已渡南溪，以至萬元吉才同崔浩，不竟其用，李乾德、孔希貴、智瑋、淮陰，勢屈而走，賀逢聖、蔡道憲、忠比、睢陽，力盡而死，比至歲月遷延，四分五裂，師老財匱，而天下之大勢去矣。然予以元和討賊，全倚裴度，建興恢復，獨任武侯，而楊嗣昌者，白面書生，不嫻將略，寇氛剽銳，卽非鄙曇之移疾，大藩

蹂躪。便同孟昶之仰藥。雖復引義自裁。亦云無媿。而應元。士傑尙昧發縱。如虎。人龍終乖駕馭。譬之次律。陳濤之敗。中軍石頭之衄。爲法受惡。亦所不得辭也。論者又以獻猶據蜀。闖則犯關。按法行誅。薄乎減等。而不知獻亂以來。材賦詘於吳楚。士馬斃於荆襄。民命塗於中野。夫是以瓦解士崩。一蹶而壞。譬猶人之死也。獻紮其手。而後闖刺其心。獻堪其胸。而後闖扼其吭。則獻之與闖。厥罪惟均也。窮奇擣杙。又可以九品差次乎哉。

卷七十八

李自成之亂

懷宗崇禎元年。延安大饑。不沾泥。楊六郎。王嘉允等率衆掠富家粟。有司捕之急。遂揭竿爲盜。米脂人李自成性狡黠善走。能騎射。家貧爲驛書。往投焉。已而參政洪承疇擊賊破之。不沾泥等相次俘獲。自成走匿山澤間得免。

二年冬十月。都城警。詔天下勤王。山西巡撫耿如杞入援。兵潰在涿鹿。叛走秦晉閒山谷。李自成出與之合。旬日間衆至萬餘。推高迎祥爲首。稱闖王。轉寇山西。河南。賊中稱自成爲闖將。已而官軍擊迎祥斬之。羣盜推自成爲主。

七年。總督洪承疇率總兵曹文詔等先後勦諸賊。斬獲甚衆。羣賊悉奔入商維。興平大山中。衆潰散。李自成與張獻忠奔整鄂閒。六月。總督陳奇瑜圍李自成於漢中車廂峽。會連雨四十日。賊馬乏芻。死者過

半。弓矢俱脫。賊大窘。自成乃自縛乞降。奇瑜許之。各給免死票回籍。自是復縱橫不可制矣。秋七月。李自成陷澄城。圍郟陽。開洪承疇兵至。解圍去。轉寇平涼。邠州。八月。李自成陷真甯。殺知縣趙躋昌。洪承疇兵至。賊棄金帛。餌官兵。竟西遁。屯乾州。招之不聽。十月。總兵左光先擊李自成於高陵。富平間。斬首四百餘級。自成佯求撫於監軍道劉三顧。真甯知縣王家永遽信之。出城招諭。失其印。三顧逆其詐。卽入堡自守。賊走涇原。

八年。羣賊盡集宛雒。李自成獨留秦平。其衆七八萬。總督洪承疇邀擊。連敗之。秦中郡縣俱堅壁清野。賊饑疲。東西分竄。退屯興平。武功。諸梁計窮。乞撫以緩兵。陰遣諸賊攻掠山谷堡寨。搜掘巨室。窖藏芻糧。盡爲賊有。賊旣得食。復連營走漢中。爲西兵所挫。東走邠甯。環慶。其衆漸散。會承疇以甯夏兵變。旋師邊鎮。自成得收餘燼。復振突出潼關。守將艾萬年等兵俱潰。

九年春正月。李自成出河南攻固始。左良玉遇自成於關鄉。相持六日。總兵陳永福援之。敗之於朱仙鎮。自成走登封。密縣。三月。李自成誘別部賊入河南。當官兵。而自帥麾下奔漢南。循南山險。掘遵商。雜而行。復出陝西。官軍敗績於羅家山。死亡士馬無算。自成自鄜州至延綏。夏四月。李自成欲往綏德。渡河入山西定邊。副將張天機力戰卻之。賊沿河犯朝邑。將圍綏德。延綏總兵俞翀霄引兵逐賊。陷賊伏中。翀霄被執。延綏精卒盡覆。賊分陷米脂。延安。綏德。賊本延安人。至是再入延安。衣錦繡。晝遊街。其親戚故從亂者益衆。

十年春正月。官軍敗績於寶雞。李自成寇涇陽。三原。西原大震。賊勢益熾。冬十月丁酉。李自成同過天

星九股陷甯羌分三道入西川自成自七盤關度朝天閣戊戌至廣元壬寅陷昭化癸卯過劍閣甲辰陷劍州乙巳陷梓潼黎雅參將羅尙文大敗賊於廣元斬首千級賊自梓潼分爲三一走潼川一趨緜州一入江油遂陷青川彰明盤亭諸縣圍緜州庚戌賊漸逼成都土寇蟻附之巡撫王維章次保甯畏賊不敢出丙辰賊焚郫縣詔革維章職以傅宗龍巡撫四川

十一年二月李自成陷瀘溪陝寇盡聚川西總督洪承疇檄川中諸道兵嚴守要害賊因乏食承疇以川師誘之陝兵設伏於梓潼自成率羣賊逐川兵川兵走伏發賊大敗斬首千餘幾殲之自成率殘衆數千走溪南子身入楚依張獻忠不許至竹溪獻忠謀殺之自成獨乘羸日行六百里走商維至浙川老回回營臥疾半年餘老回回授以數百人仍出剽掠其同自成入川諸賊仍出階文向陝西

十二年九月秦兵大破李自成於函谷自成衆散略盡其部下相繼俱降自成竄漢南秦兵蹙之於北左良玉阨武關以南自成窮蹙不得他逸食且盡自經者數四養子李雙喜救之自成因令軍中盡殺所掠婦女以五十騎衝圍而南初諸將困自成嶠函諸山中斷其要害合圍甚密將坐斃之督師大學士楊嗣昌曰圍師必缺不若空武關一路設伏商維均以待之可一擊而盡也自成乘隙突走諸將不能禦遂自武關逃入鄖陽息馬深山中時河南大饑飢民所在爲盜自成乃自鄖均走伊維飢民從者數萬勢復大振十二月自成圍永甯雲梯肉薄攻城陷之焚殺一空殺萬安王采鑿連破四十八寨土賊一斗穀等羣盜響應遂陷宜陽衆至數十萬杞縣諸生李巖爲之謀主賊每以剽掠所獲散濟飢民故所至咸歸附之其勢益盛



十四年春正月。李自成圍河南府。福王募死士逆戰。斬獲頗多。賊引退。賊以大礮環攻城。城守嚴不動。及昏而退。總兵王紹禹兵有馳而呼於城上者。外亦呼而應之。紹禹兵卽執副使王允昌於城上。紹禹馳解之。諸軍曰。賊已在城下。卽總鎮其如我何。揮刀殺守陴者數人。守陴者皆驚墜堞。賊緣堞而上。叛兵迎之。賊遂入。賊焚福王府。福王及世子俱縋城走。士民被殺數十萬。執副使王允昌以下各官皆不死。惟一典史不屈見殺。河南方大饑。通判白尙文墜城死。其屍爲飢民所食。頃刻盡。自成發藩邸及巨室米數萬石。金錢數十萬賑飢民。先是自成聞福藩最富。爲謀已久。適陝西叛兵數百。逃至河南。巡撫招至城中禦寇。事聞。詔逮其首惡數人。解京正法。叛兵大懼。乃陰伺自成襲河南爲內應。故一夕而陷。丁酉。自成跡福王所在。執之。并執前兵部尙書呂維祺。維祺遇王於西關。謂王曰。名義甚重。毋自辱。王見自成恐怖。泥首乞命。自成責數其失。遂遇害。賊置酒大會。以王爲俎。雜鹿肉食之。號福祿酒。維祺罵賊不屈死。世子逸走。遇亂兵劫之。裸而奔於懷慶。是時羣盜輻輳。自成自稱闖王。雄諸賊。變聞上震怒。逮總兵王紹禹磔之。籍其家。二月。李自成搜掘河南富室窖藏。席捲子女玉帛。捆載入山。以書辦邵時昌爲總理官。令守河南府。巡撫李仙風偵賊已去。引兵至城下。時昌閉門拒守。尋開門迎官軍。仙風收時昌斬之。戊午。自成合羣盜圍開封。開封城爲宋汴京。金完顏亮益加增築。土堅厚五丈。賊以洞車數百障壯士。多具犂鋤斧鑿。環傅城鑿而穴之。七晝夜不息。鑿之深者四丈有奇。巡撫高名衡率司道官嬰城固守。賊兵礮及城中。殺傷相繼。軍餉告匱。周王恭枋出庫金五十萬買米麥。日夜炊飯屑麥餉守陴者。復懸金募死士能擊死一賊者予五十金。兵民踴躍。共擊賊。斃者甚衆。賊懼退數舍。李仙風督諸將高謙等馳至開封。陳永福背

城而戰。一日三捷。賊退。開封解嚴。仙風與高名衡互相訐奏。詔逮仙風。仙風聞之自縊。遂以高名衡巡撫河南。壬辰。李自成陷歸德。四月甲子。進陝。督丁啓睿兵部尚書代楊嗣昌督師討賊。時嗣昌討賊無功。飲藥死。啓睿督秦師至潼關。左良玉自襄陽進擊李自成。至南陽。自成北出屯於盧氏。永甯寶封舉人牛金星向有罪當戍邊。降於賊。自成以其女爲妻。金星薦卜者宋獻策善河洛數。獻策長不滿三尺。見自成獻圖讖云。十八孩兒當主神器。自成大喜。拜軍師。五月乙亥。賀人龍破李自成於靈峽山中。高名衡屯開封。保定總督楊文岳屯禹州。左良玉屯南陽。張獻忠羅汝才漸北向。思合於自成。猛如虎進。隄德安黃州疽發背。退屯承天。癸巳。赦兵部尚書傅宗龍出之獄。以右侍郎都御史督陝西兵討賊。羅汝才不合於張獻忠。七月。自內鄉浙川走鄧州。與自成合營。時自成有衆五十萬。復得汝才軍。衆益熾。九月。張獻忠衆散於南陽。以數百騎奔自成。自成將殺之。汝才以五百騎資獻忠。獻忠東奔。合同革。丁丑。陝督傅宗龍率兵四萬次新蔡。與保督楊文岳之兵會。賀人龍李國奇將秦兵。虎大威將保定兵。共結浮橋渡河。合兵趨項城。戊寅。兩軍畢渡。走龍口。是日自成汝才亦結浮橋於上流。將趨汝甯。覘官軍至。盡伏精銳松林中。陽驅詭賊自浮橋西渡。人龍使候騎覘賊。還報曰。賊渡河向汝矣。己卯。宗龍文岳兩軍並進。次孟家莊。諸將以士馬俱疲。請詰朝戰。諸軍遂弛馬甲。散行墟落。以求芻牧。賊覘之。突起林中。搏軍官。人龍斂兵不戰。國奇迎戰不勝。兩軍俱潰。人龍大威北奔。國奇從之。賊以步兵攻二督營。以火礮擊卻之。日暮。賊引去。保定兵宵潰。文岳夜奔項城。宗龍獨立營當賊壘。壬午。飛檄人龍。國奇以兵還救。二帥不應。以兵走陳州。宗龍穿塹築壕以拒賊。賊亦穿壕二重以困之。宗龍兵食盡。乃殺馬羸以享軍。馬羸復盡。殺賊取

其屍分噉之。辛卯，營中火器弓矢俱盡。宗龍簡卒尙有六千，夜漏二下，潛勒軍突賊營，潰圍出，諸軍星散。宗龍徒步率散卒且戰且走。壬辰，至項城，賊追之，被執至城下，賊呼於門曰：我秦督官軍也，請啓門納秦督。宗龍大呼曰：我秦督也，不幸墮賊手，左右皆賊耳，毋爲所紿。賊唾宗龍，宗龍罵曰：我大臣也，殺則殺耳，豈能爲賊詐城以緩死？賊抽刃擊宗龍，中腦而仆，復厲聲罵，賊斲其耳鼻，死城下。人龍、國奇俱歸陝，賊獲衣甲器械無算，遂陷項城，屠之。分兵屠商水，扶溝所在，十寇譁起，騷動。詔復宗龍兵部尙書、太子太保。戊戌，督師丁啓睿自商城北發檄，左良玉兵共擊李自成，楊文岳招集散亡於陳州，兵稍集。自成、汝才合兵陷葉縣，殺守將劉國能。初，國能與自成、汝才同爲賊，結兄弟。十二年，左良玉大敗國能於陳州，國能率衆萬人降。汝才恨之，誓殺國能。至是，聞國能在葉，乘勝拔其城，執國能，責其負約，殺之。詔贈國能左都督。賊移兵陷泌陽。十月，張獻忠糾回革、左諸賊，自霍太北行會李自成，河南諸土寇以兵畢赴。自成衆逾百萬。左良玉兵至臨潁，臨潁爲賊守，良玉攻破屠之，盡獲賊所掠。自成怒，合兵攻良玉。良玉退保郟城，自成、汝才圍之。良玉悉兵拒守，賊陷襄城。十一月，陝西巡撫汪喬年率馬步三萬，總兵鄭家棟、牛成虎、賀人龍將之，趨河南。先是，喬年於陝西發李自成先冢，得小蛇，卽斬蛇以徇，誓師兼程進兵，以輕騎萬餘抵郟縣。時襄城新破，喬年遲疑不敢進，襄城貢士張永祺率邑人出迎，官軍屯於城下。自成聞之，解郟城之圍來迎戰。喬年安營未定，有二將先逃，官軍大潰，賊乘之一軍盡覆。喬年以數百人入城，居守五日，襄城復陷。喬年自刎未殊，被執見殺。自成深恨諸生，遂劓刖百九十人。又購永祺，永祺匿免，屠其族人九家。殺守將李萬慶。萬慶乃降將射塌天也。自成再破秦師，獲馬二萬，降秦兵數萬，威鎮河雒，乘勝圍南陽，數

日城陷。總兵猛如虎死之。唐王遇害。楊文兵屯杞縣。丁啓睿屯汝甯。太監劉元斌率京軍救河南。聞南陽陷。乃擁婦女北去。俄上命御史清軍。元斌倉皇悉沈之於河。十二月。李自成連陷洧川。許州。長葛。鄢陵。鄢陵知縣劉振之力詘。衣冠北向再拜自剄死。自成汝才合兵陷禹州。徽王遇害。復圍開封。巡撫高名衡。總兵陳永福等竭力守禦。周王貯庫金於城頭。禽一賊者予百金。斬一首者五十金。戰歿者卹其家五十金。傷者以輕重爲差。殺賊甚衆。永福射中自成左目。自成屯朱仙鎮。內鄉。鎮平。唐縣。新野俱降於賊。鄧州知州劉振世死焉。

十五年春正月。李自成攻開封益急。洞車附城鑿城。搏土而空之。廣數尺。實以火藥。然之一。烘而裂。曰。小放。窟城縱橫數丈。實火藥。然之一。發震天。曰。大放。癸未。賊以精騎數千布圍於外。執汴人畚土。穴城爲大窟十餘。輦火藥數萬斤。百炬齊然。賊擐甲持矛望城崩。將擁入。賊穴城畚其土礫於外。累累成阜。火藥一發崩天。甄缶皆飛。鳴外嚮。賊之布圍於外者。人馬成血糜。城之未穿者。堅如石。猶尋丈。賊駭。解圍去。南陷西華。起孫傅庭兵部侍郎總督陝西兵勦寇。三月庚午。李自成羅汝才合羣盜八十萬圍陳州。兵備副使關永傑率士民死守。賊周圍四十里。更番進攻。永傑力竭。城陷。戰死城上。鄉紳崔必之。舉人王受爵等咸手刃數賊。被執。罵賊死。賊怒。屠陳州。辛卯。陷睢州。陷大康。遂圍歸德府。歸德無兵。民自爲守。乙未。賊鱗次穴城。城陷。賊乘勝陷甯陵。考城。夏四月。孫傅庭檄召諸將於西安。聽令。固原總兵鄭家棟。臨洮總兵牛成虎。援勦總兵賀人龍。各以兵來會。傅庭大集諸將。縛賀人龍坐之旗下。而數之曰。爾奉命入川討寇。開縣譟歸。猛帥以孤軍失利。獻賊出柙。職爾之由。爾爲大帥。遇寇先潰。致秦督秦撫委命賊手。一死不足

塞責也。因命斬之。諸將莫不動色。因以人龍兵分隸諸將。刻期進討。人龍米脂人。初以諸生效用。佐督撫討賊。屢殺賊有功。總全陝兵。叛將劇賊多歸之。人龍推誠以待。往往得其死力。襄城之役。朝廷疑人龍與賊通。密敕傅庭殺之。賊聞人龍死。酌酒相慶。曰。賀風子死。取關中如拾芥矣。癸亥。李自成。羅汝才合羣。賊復攻開封。先是。賊再攻不克。士馬多殺傷。羣賊畏憊。日逃亡數千。賊乃申約圍而不攻。以坐困之。五月。李自成。分兵陷開毫。六月。命侯恂以兵部侍郎總督。援勦官兵討賊。與孫傅庭協力。援開封。七月。賊圍開封久。守臣告急。詔援勦總兵許定國。以山西兵渡河。援之。定國兵潰於覃懷。己巳。督師援勦諸軍潰於河上。時督師丁啓睿。保督楊文岳。合左良玉。虎大威。楊德政。方國安諸軍。次於開封。朱仙鎮。與賊壘相望。啓睿督諸軍進戰。良玉曰。賊鋒方銳。未可擊也。啓睿曰。汴圍已急。豈能持久。必擊之。諸將咸懼。請詰朝戰。良玉以其兵南走襄陽。諸軍相次而走。督師營亂。啓睿。文岳聯騎奔汝甯。賊渡河逐之。追奔四百里。喪馬羸七千。兵數萬俱降賊。啓睿敕書印劍俱失。事聞。詔逮啓睿下獄。文岳革職聽勦。八月。開封久困。食盡。人相食。周王先後捐庫金一百二十餘萬。復損歲祿萬石以養兵。國廩空虛。宮人咸有飢色。詔山東總兵劉澤清。援開封。澤清以朱家寨距城八里。提兵五千渡河爲營。列水環之。達於大堤。築甬道以運糧。則救援可濟。遂往立營。賊攻之三日。諸兵不至。澤清引兵去。時羅汝才營亦食盡。謀他徙。自成乃分糧以餽之。約破開封。以東隅屬之。汝才。汝才乃留不去。開封城北十里枕黃河。巡撫高名衡。推官黃澍等城守。且不支。恃引河水環濠以自固。更決隄灌賊。可潰也。李自成遣兵攻陷歸德。推官王世琰死之。九月。河決開封。賊先營高處。然移營不及。亦沈其卒萬人。河流直衝入城。勢如山岳。自北門入。穿東南門出。流入渦水。水驟長。

二丈。士民溺死數十萬。巡撫高名衡、陳永福咸乘小舟至城頭。周王府第已沒。從後山逸出西城樓。率宮眷及諸王露棲城上。雨中七日。督師侯恂以舟迎王。庚寅。總兵卜從善以水師至。開封城上推官黃澍從。王乘城夜渡。達隄口。諸軍列營朱家寨。賊乘高據筏。以矢石擊汴人之北渡者。城中遺民尚餘數萬。賊浮舟入城。盡掠以去。河北諸軍以大礮擊沈其前鋒。奪回子女五千人。舊河故道清淺不盈尺。歸德隔斷在北。河邳毫以下皆被其災。汴梁佳麗甲中州。大堤之上絃管紛咽。羣盜心豔之。前後三攻汴。士馬死者無算。賊積恨。矢必拔。久懷灌城之謀。顧以子女珍寶山積。不忍棄之。水族憤其城久不下。河大決。百姓生齒盡屬波臣。斷垣蠹水上。數堞隱見而已。黃澍以守禦功。詔授御史。回革。左諸賊北合於李自成。孫傅庭率兵至南陽。李自成羅汝才西行逆之。傅庭設三伏以待。牛成虎將前軍。左勦將左。鄭家棟將右。高傑將中軍。成虎陽北以誘賊。賊奔逐入伏中。成虎還兵而鬪。高傑、董學禮突起翼之。左勦、鄭家棟左右橫擊。斬首千餘級。賊潰東走。追之。賊盡棄甲仗軍資於地。官軍爭取之。無復步伍。賊覘官軍囂。反兵乘之。左軍先潰。諸軍繼之。喪材官將校七十有八人。賊倍獲其所喪焉。冬十月。李自成復陷南陽。屠之。回兵屯開封北。孫傅庭以兵敗。上書自劾。詔傅庭圖功自贖。自成汝才合兵趨汝甯。十一月。孫傅庭治兵於登封。收斬逃帥。進兵汝甯。賊游兵窺懷慶。欲北渡。劉澤清禦卻之。閏十一月己酉。李自成合諸賊圍汝甯。監軍孔貞會以川兵屯城東。楊文岳以保定兵屯西城。賊兵進攻。相拒一晝夜。川兵潰。保定兵不支。庚戌。賊四面環攻。戴扉以障矢石。雲梯如牆而立。城上矢石俱下。賊死傷衆。而攻不休。一鼓百道並登。執文岳及分巡僉事王世琮於城頭。文岳、世琮厲聲罵賊。賊怒。縛文岳等以大礮擊之。洞胸糜骨以死。世琮初授河

南推官屢卻賊射矢貫耳不動號王鐵耳賊屠士民數萬燔燒邸舍無遺丁巳拔營走確山向襄陽掠崇王由積及世子諸王妃嬪以行左良玉自朱仙鎮南潰久屯襄陽諸降卒附之有衆二十萬其餽於官者僅二萬五千餘俱因糧村落襄人不聊生十二月李自成羅汝才合兵四十萬由唐縣而西良玉結營襄陽近郊大造戰艦於樊將避賊入郢襄人怨其淫掠縱火焚之良玉怒掠荆襄巨估舟載軍資婦女其中而身率諸軍營樊城高阜賊勢旣盛襄民咸焚香牛酒以迎戊辰賊以數萬騎至樊城良玉乘高飛礮擊殺賊千餘騎賊從閒道至白馬渡臨江欲渡良玉移營拒之賊不得渡良玉拔營而南賊亦不敢逼自成切齒於良玉每戰必力良玉懼不敢復與爭鋒故恆避之鄖撫王永祚跳城走己巳襄陽陷賊分兵陷夷陵宜城荆門向荆州良玉全師出漢口遂下武昌次於金沙洲賊逼荆州甲戌偏沅巡撫陳睿謨棄荆州奉惠王走湘潭自成遣賊將馬守應據夷陵以犯豐賀一龍趨德安窺黃麻辛巳自成至荆州士民開門迎之賊入荆州荆州諸縣士寇蠡起

十六年春正月李自成圍承天知府開門迎賊巡撫宋一鶴時守城下城巷戰將士勸之走一鶴不聽揮刃擊殺賊數人死鍾祥知縣蕭漢有賢聲賊戒其部曰殺賢令者死無赦乃幽之寺中戒諸僧曰令若死當屠爾寺僧謹視之漢曰吾盡吾道不礙民法遂自經賊改承天府曰揚武州遂犯顯陵巡撫李振聲守陵迎降賊賊列之上班振聲自以與賊同姓肩輿出入營中揚揚自得自成坐陵殿大會羣賊欽天監博士楊永裕亦降於自成自稱天文禮樂兵法地理俱該治請賊發顯陵忽大聲起山谷若雷震賊懼而止分兵陷潛江京山諸縣遺賊將攻德安乙巳陷雲夢丙午陷孝感丁未自成汝才至黃陂知縣懷印走賊

設僞令。黃陂士民殺僞官。賊怒。反兵攻黃陂。屠之。夷城垣爲平地。戊申。陷景陵。賊別將陷德安。自成馳檄黃州。指斥乘輿。僞託仁義。以誘遠近。黃州守將王允成棄城順流東下。掠江上客舟。大擾江南北。方國安諸將退屯漢口。賊大隊逼漢陽。左良玉自金沙渚東下九江。遂至於蕪湖。初。自成流劫秦晉楚豫。攻剽半天下。然志樂狗盜。所至焚蕩屠夷。旣而連陷荆襄鄢郢。席捲河南。有衆百萬。始侈然以爲天下莫與爭。思據有城邑。擅名號矣。羣賊俱奉其號令。推自成爲奉天倡義文武大元帥。號汝才曰代天撫民德威大將軍。自成據襄陽。號曰襄京。其餘所陷郡縣俱改易名號。修襄王宮殿。設官分職。武官有權將軍等九品。文官有太師六政府諸品。封崇王。由櫝爲襄陽伯。邵陵王。在城。保甯王。紹圮。肅甯王。術授俱降賊。改封伯。僞吏政府侍郎。喻上猷。薦列荊州紳士。賊下檄徵之。江陵舉人陳萬策。李開先。在所薦中。僞檄下。萬策自經。開先觸牆死。楊永裕又勸進。牛金星不可。乃止。二月庚午。李自成遣賊陷麻城。城空無人。賊回屯德安。自成分兵爲四。老回回守承天。羅汝才守襄陽。革裏眼往黃州。自將其一。癸未。自成攻邾縣。知縣李貞率士民堅守。一晝夜。殺傷甚衆。賊百道環攻。一鼓而拔。縱兵大殺。李貞大聲叱賊曰。驅百姓死守者。知縣耳。妄殺何爲。罵賊不已。自成怒。褫其衣。倒懸於樹。貞大呼曰。皇高帝有靈。我必訴之上帝。以殺賊。賊斷其舌。副之母喬氏及妻俱死。三月乙未。澧州士賊句李自成陷常德。常德富強甲湖南。生齒百萬。積粟支十年。巡撫陳睿謨遇賊於郊。先奔。士民無固志。賊遂陷之。自是辰岳諸府相繼俱陷。而雲貴路梗矣。丁酉。命大學士吳牲出督師。給五萬金旌功。以大理評事萬元吉爲職方員外郎。仍充督師軍前贊畫。兵部尙書張國維請隨輔臣躬率六軍討賊。優詔答之。癸卯。李自成襲殺革裏眼。左金王并其衆。甲寅。左



良玉引兵自池口西上屯安慶傳制襄承失守明法具在左良玉憫其久勞行閒責令圖功自贖方國安陳可立革職充爲事官殺賊夏四月李自成殺羅汝才并其衆降將惠登相王光恩在鄖陽陰使人招汝才所部多奔降之自成怒攻鄖陽登相光恩屢敗之自成遂築長圍以困鄖丁酉陷保康知縣石惟壇死之辛丑自成遣賊將以兵十萬至禹州守將楊芬張朗先期具禮迎賊賊設僞官之任甲申下詔厲將士討賊告諭天下五月河南所在擒斬僞官李自成在襄陽所造宮殿皆傾塌遂屯移鄧州益兵攻鄖陽王光恩禦之賊屢戰不利孫傅庭復遣高傑以兵援鄖陽擊賊敗之賊退屯襄陽拘鐵工晝夜造鐵鈎釘各萬餘謀向潼關踰越山險戊申上諭輔臣牲奉命督師討賊自當星馳受事乃三月以來遷延不進將出都門籌畫不固若在行閒何以制勝還宜在閣佐理不必督師詔趨孫傅庭作速勦寇丙辰李自成攻袁時中殺之并其衆巡撫河南秦所式上言中州大勢闖曹蹂躪五郡八十餘城盡爲瓦礫及革左諸賊由宛汝跨江漢旬日陷數名郡此流寇之大略也自永城以至靈闔自宛汝以抵河岸方千里之內皆土賊大者數萬小者數千棲山結寨日事焚掠此土賊之大略也辦賊必須兵舊撫餘兵不及二千陳永福餘兵不及四千合卜從善三千人亦不滿萬此主兵之大略也用兵必裕餉河南五郡淪沒河北強半蒿萊額賦五十萬去年完不及二十萬撫鎮闕餉五月有餘此糧餉之大略也轉餉必須民自經寇十餘載人烟幾斷守城修河轉運至於稚子荷旗老婦鳴柝此民生之大略也撫民必須官按除目則有人稽地方則無官或年餘不赴或土團寄命此官吏之大略也敗壞已極惟願皇上速發內帑極練精銳佐以土寨開荒選牧庶有濟乎時上召保定巡撫徐標入對標曰臣自江淮來數千里見城陷處

固蕩然一空。卽有完城。僅餘四壁。蓬蒿滿路。雞犬無音。曾未遇一耕者。土地人民如今有幾。皇上亦何以致治乎。上歔歔泣下。標又上言屯田及車戰諸策。上善之。是月。給事中吳甘來上言。諸撫臣借名護藩。實棄城走。乞敕諭各藩。并覈王永祚等棄城之罪。上不問。六月丁丑。立賞格。購李自成萬金。爵通侯。購張獻忠五千金。官極品。世襲錦衣指揮。餘各有差。進孫傅庭兵部尙書總制。應鳳江皖豫楚川黔勦寇軍務。仍總制三邊。鑄督師七省之印。李自成大造戰艦於荆襄。遣老回回攻常德。自成謀自王於荆。其親信大帥二十九人分守所陷郡邑。自成自隨騎兵五營。營精騎二千。步兵十四哨。哨精卒三千。劉宗敏總步。白旺總騎。每屯以騎兵一營。外圍巡徼。晝夜更番。餘營以次休息。警候嚴密。人不得逃逸。逸者追獲。必磔之。營兵不許多攜輜重。兵各攜妻孥。生子棄之。不令舉。男子十五以上四十以下。咸掠爲養子。爲奴隸。故每破一邑。衆輒增數萬。每一精兵則蓄役人二十餘。其馱載馬羸不與焉。衆實五六萬。且百萬也。雖拔城邑。不聽屋居。寢處布幕。彌望若窮廬。其甲縫絛帛數十重。有至百者。輕而韌。矢鏃鉛丸不能入。每戰一騎兵必二三馬。數易騎。終日馳驟。而馬不疲。嚴寒則掠茵薦布地。以籍馬足。或刳人腹爲馬槽。實以芻椒飼之。飲馬則牽人貫耳流血。雜水中。馬習見之。遇人則嘶鳴。思飲噉焉。行兵倏忽。雖左右不知所往。雞再鳴並起。蓐食鞞馬以俟。百萬之衆。惟自成馬首是瞻。席卷而趨。遇大川則囊土壅上流。雖淮泗諸水亂流而渡。百萬合營。不攜糧。隨掠而食。飽則棄餘。有斷食斷鹽數月者。臨陣鐵騎三重。反顧則殺之。戰不勝。馬兵陽北。官軍乘之。步兵拒戰。馬兵繞而合圍。無不勝矣。以牛金星爲謀主。日講經一章。史一通。每有謀畫。集衆計之。自成不言可否。陰用其長者。人多不測也。其攻城分晝夜爲三番。以鐵騎布圍。步兵肉薄向

城人戴鐵冑蒙鐵衣攜椎斧鑿城得一甃甃卽還易人以進穴城可容一人則一人匿之畚土以出以次相繼遂穿空旁側迤四五步留一立柱巨繩繫之去城十百丈牽繩倒柱而城崩矣望風降者不焚殺守一二日殺十三四或五六日不下則必屠矣殺人數萬聚屍爲燎名曰打亮城將陷以兵周布濠外縋城者殺之故城陷必無噍類掠馬贏爲上功次軍仗次幣帛衣服次珍寶其金銀恆散棄之或以代鉛置礮中屠城則夷其城垣令後莫與爲守立投順牌四凡破城四向負牌至村落降者卽負牌過別村否則加兵牌所至日蹙千里性慘酷斷耳剔目截指折足剖心鑿體日以爲常談笑對之其兄從秦軍來自成獲而殺之性又澹泊食無兼味一妻一妾皆老嫗不蓄奴僕無子以李雙喜爲養子嗜殺更酷於自成自成在襄陽以構殿鑄錢皆不成斬一謀士令術士問紫姑卜之不吉因立李雙喜爲太子改名洪基以厭之鑄洪基年爲錢又不成七月聞秦督兵將至留毛賊守襄陽家口自成率精銳往河南庚子督師孫傅庭發兵潼關分道進討以總兵牛成虎副將盧光祖爲前鋒會河南總兵卜從善陳永福合兵洛陽之下池塞檄左良玉以兵自九江赴汝甯夾擊賊大營移宛向維詔薊遼總兵白廣恩四川總兵秦翼明八衛土漢官兵陝西三鎮兵俱隨督師進討傅庭以副總兵高傑將降丁爲中軍命秦翼明出商維爲犄角總兵王定官撫民率綏夏二鎮兵爲後勁八月辛未傅庭師次闕鄉自成盡發荆襄諸賊俱會於河南步賊沿河列守自汜水至滎澤伐竹木結筏人佩三葫蘆將渡河先驅千餘賊北渡總兵劉宏起以兵逐之復渡南岸丁丑牛成虎率諸將前驅遇賊於洛陽擊破之再敗之河岸追奔至汝州成虎以孤軍無繼退屯澗池九月己亥傅庭次汝州僞都尉四天王李養純率所部來降知賊并兵守寶豐傅庭進軍寶豐合圍

賊堅守不下。壬寅，自成以輕兵來援，戰於城東。白廣恩、高傑、盧光祖分兵逆戰，卻之。癸卯，復以精騎數千直攻官軍，諸將復擊走之。傅庭曰：「寶豐不卽下，而賊救大至，則腹背受敵矣。」親督諸軍悉力攻城，拔之。斬僞州牧陳可新等數千級，遂以大兵擣唐縣。時賊家口盡在唐縣，賊發精騎來援，官軍已入城，盡殺賊家口。賊滿營痛哭，誓殺官兵。壬寅，傅庭自朱仙鎮而南，大雨六日，糧車日行三十里，又道淖未至，士馬俱飢。或勸傅庭旋師就運，傅庭曰：「軍已行，卽還亦飢。」奚濟乎？要當破一縣就食耳。甲辰，傅庭復郟縣，縣俱窮民，集羸羊二百餘，頃刻分爨，食盡不足給。己酉，命河北、山西就近餉傅庭軍。自成將步騎萬餘逆戰，官軍前鋒擊斷自成坐纛，進逐之。賊披靡，賊營逃亡者相屬。時傅庭前鋒盡收革，左故部皆致死於賊，而高傑統諸降賊備悉賊中曲折。自成遣其弟一隻虎逆戰，三戰三北。自成奔襄城，諸軍進逼之。自成屢敗而懼，挑士築牆自守，已食價，賊有飢色。初，自成在河南，以河維荆襄四戰之地，且荒蕪，赤地千里，關中其故鄉也。士馬強甲天下，據之可以霸，乃謀西向，憚潼關天險，將從浙川閒道入陝。如不能，則從楚豫下淮安、金陵，可襲而有也。旣至陝州，屢敗，盡發河上屯守諸賊以迎官軍，驅所掠難民爲前鋒，以誘敵。官軍屢勝，輕敵，日馳逐數百里，河南所在皆荒，諸軍旣深入，饋餉不繼。丙子，自成書巨牌行至官軍，刻期會戰。時襄洛豪傑並起，各保寨以逐賊，大者萬人，少者數千。若毛顯文、劉宏起、沈萬登皆起布衣爲將領。潛山宋正奇集鄉兵數萬，扼險隘，賊不敢下。承天方國安以兵復承天，老回回屯夷陵，官軍擊敗之。諸縣多恢復。大雨連旬，傅庭軍乏餉。壬子，兵譟於汝州，降盜李際遇陰通賊。癸丑，賊率精騎大至，傅庭問計於諸將。高傑請戰，白廣恩曰：「我師困，宜駐師分據要害，步步爲營，以薄賊，易耳。」傅庭恐賊遁，曰：「將軍何怯？獨不如高將。」

軍耶。廣恩不憚引所部八千人先去。賊前鋒名三堵牆一紅一白一黑各七千二百人來薄。官軍接戰。陷賊伏中。賊乘之。官軍大敗。陷泥淖。死者數千人。高傑立嶺上望曰。不可支矣。麾衆退。諸軍盡西走。賊驅大隊疾追。一日馳走四百里。至於孟津。官軍死亡四萬餘人。盡喪其軍資數萬。傅庭與傑收散亡數千騎。渡垣曲走河北。初。賊驅難民誘官兵。斬獲皆良民也。傅庭不知其詐。奏賊聞臣名皆驚潰。臣誓肅清楚豫。不以一賊遺君父。識者憂之。至是果敗。賊別將克汝州。殺僂過當。成午自成向潼關。白廣恩擊破之。孫傅庭亦回軍潼關。衆尙四萬。十月辛酉朔。副總兵沈萬登復汝甯。萬登汝甯大俠也。聚鄉勇萬餘人。李自成僞授威武大將軍不受。鳳督馬士英承制授副總兵。是日僞將軍馬尙志蒞任。萬登潛遣謀入城。因擁衆入誅尙志并諸僞官。壬戌。一隻虎陷闕鄉。卽自成弟李過也。疾走至潼關。獲督師大纛。丙寅。賊以纛給守關者。乘閒突入。潼關陷。李自成閒道緣山崖出潼關。後來攻。官軍大潰。賊旣入關。西行。一隻虎陷華陰。傅庭及白廣恩退屯渭南。賊合衆數十萬陷渭南。傅庭沒於陣。知縣楊暄被執不屈死。賊屠渭南。陷華州。戊辰。陷商州。商維道黃世清不屈死之。賊屠商州。乙丑。陷臨潼。關中人心所在瓦解。陝西巡撫馮師孔知寇棘。急入西安收保。俄賊至。辛未。師孔督兵出戰。陣陷被執。不屈死之。西安陷。按察使黃炯自盡。長安知縣吳從義。指揮崔爾達俱投井死。秦府長史章世炯自經死。紳士死者甚衆。右都御史三原焦源溥罵賊磔死。磁州道副使祝萬齡至學宮拜先聖。從容自經死。禮部主事南居業罵賊死。宣撫焦源清。參政田時震俱不受僞職死。御史王道純大罵賊。不屈死。解元席增光。舉人朱誼泉俱投井死。山東監軍僉事王徵七日不食死。都司吏邱從周罵賊死。餘吏民皆相率降於賊。總兵白廣恩逃而追獲降之。初。自成剽掠十

餘年。既席捲楚豫。始有大志。然地四通皆戰場。所得郡縣官軍旋復之。至是。既入秦。百二山河遂不可制。自成據秦王府。僞授秦王存樞權將軍。世子妃劉氏曰。國破家亡。願求一死。自成遣歸外家。秦藩富甲天下。擁資千萬。賊之犯秦也。戶部尙書倪元璐奏曰。天下諸藩無如秦。晉山險用武國也。宜諭兩藩能任殺賊。不妨假之以大將之權。如不知兵。宜悉輸所有。與其齎盜。何如享軍。賊平之後。益封兩藩各一子。如親王。亦足以報之。兩王獨不驟。十一宗之禍乎。賢王忠而熟於計。必知所處矣。書上不報。至西安陷。秦藩府庫盡爲賊有。賊分兵徇諸縣。皆陷。蒲城知縣朱一統抱印投井死。初。自成在楚。議所向。牛金星請先取河北。直擣京師。楊承裕欲先據留都。斷漕運。獨顧君恩曰。否否。先據留京。勢居下流。難濟大事。其策失之緩。直擣京師。萬一不勝。退無所歸。其策失之急。不如先取關中。爲元帥桑梓之邦。且秦都百二山河。已得天下三分之二。建國立業。然後旁略三邊。資其兵力。攻取山西。後向京師。進退有餘。方爲全策。賊從其計。先是。賊好殺掠。牛金星勸以不殺。遂嚴戢其下。民間稍安堵。輒相誑惑。人無鬪志。自成遂改西安府爲長安。擄掠巨室助餉。辛未。進白廣恩。盪寇將軍勦賊。時。上信廣恩。尙未知其降賊也。李自成分兵略廊延。中牟知縣華堞知城小不支。先令妻妾自縊。一妾年少遣之。其妾亦垂泣投繯。華堞遂經死。官兵進勦汝甯。一路僞官士寇俱盡。河南稍甯。庚寅。上始聞潼關失守。以兵部侍郎余應桂總督陝西三邊。收拾邊兵。相機勦寇。應桂聞命。飲泣。陛辭曰。不益兵餉。雖去何濟。上默然。發帑金五萬給軍。應桂遷延河上。不進。十一月。總兵王定。高傑自渭南敗。各帥所部奔延安。自成命賊將田斌守西安。自往塞上。甲午。高傑聞賊至。以兵渡河而東。入山西。王定奔榆林。自成陷延安。大會羣賊。戎馬萬匹。旌旗數十里。於米脂祭墓。

以五百騎按行鳳翔。守將誘而殲之。自成怒。親攻鳳翔。陷之。屠其賊。壬寅。李自成發金數萬招榆林諸將。以大寇繼之。備兵副使都任及故總兵王世顯。侯世祿。侯拱極。尤世威。惠顯等。斂各堡精銳入鎮城。大集將士。問之曰。若等守乎。降乎。各言效死無二。遂推世威爲長。主號令。繕甲兵。賊遣僞官說三日不聽。賊怒。乙未。賊四面環攻。賊上強弩疊射。賊死屍山積。更發大礮擊之。賊稍卻。丙午。賊攻甯夏。鎮兵逆戰。三勝之。殺賊精銳數千。自成歸西安。益發賊往甯夏。關中諸賊聞甯夏之敗。數萬東奔商雒。出潼關。復散入河南。壬子。自成復往攻甯夏。丁巳。李成自陷榆林。榆林被圍。諸將力戰殺賊。賊死者萬人。賊攻益力。逾旬不克。賊以衝車環城穴之。城崩將十丈。賊擁入。城遂陷。副使都任闔室自經死。總兵尤世威縱火焚其家百口。揮刀突戰死。諸將各率所部巷戰。殺賊千計。賊大至。殺傷殆盡。無一降者。闔城婦女俱自盡。諸將死事者數百人。榆林爲天下勁兵處。頻年餉絕。軍士飢困。而殫義殉城。志不少挫。闔城男子婦女無一人屈節辱身者。榆林旣屠。賊擣甯夏。甯夏總兵官撫民迎降。三邊俱沒。賊無後顧。長驅而東矣。自成攻慶陽。城中堅守四日。力不支。城陷。備兵副使段復興。董琬。鄉紳太常少卿麻禧死之。屠慶陽。執韓王。時賊遣僞王往關東。靈園諸路大張僞榜。移檄河南郡縣。河南西境賊皆設僞官。官兵守懷慶府。十二月。李自成遣賊入漢中。不克。高傑在絳州。聞李自成將東渡。分道東走。戊辰。至蒲州。李自成前鋒度河入山西。巡撫蔡懋德先屯平陽。至是以歲暮還太原。庚辰。賊至河津。陷平陽。知府張麟然走太原。吏民皆降。賊殺西河王等三百人。高傑聞平陽陷。擁兵東下澤州。山西郡縣聞賊至。望風迎款。賊遣僞牌徧行山西。其辭甚悖。李自成遣賊陷甘州。先是鳳翔蘭州開門迎賊。賊渡河。莊浪。涼州二衛俱降。遂圍甘州。乘夜雪登城。巡撫甘肅

林日瑞總兵郭天吉同知藍臺等並死之。殺甘民四萬七千餘人。西甯衛尙堅守不下。至明年二月詐降。殺僞官賀錦等。

十七年春正月。李自成稱王於西安。僭國號大順。改元永昌。自成久覬尊號。懼張獻忠老回回相結爲患。旣入秦。通好獻忠。獻忠厚幣遜詞以報之。自成喜。遂僭號。牛金星爲相。相更定六政府尙書等僞官。三月乙巳。李自成自山西抵京師。環攻九門。丁未。京城陷。帝后崩。丙辰。遼東總兵平西伯吳三桂聞京師陷。帝后殉難。遂縞素發哀。乞師於我大清討賊。薄山海關。傳檄遠近。李自成聞之大驚。脅三桂父襄作書招三桂。令舊將唐通遣三桂書勸降。且言東宮無恙。三桂不答。上書其父。略曰。父旣不能爲忠臣。桂亦安能爲孝子。桂與父訣。請自今日。雖眞父鼎俎。旁以誘三桂。不顧也。書至。自成益懼。三桂頓兵山海關。以忠義激將吏。規取京師。唐通不能禦。三桂殺賊騎殆盡。初三桂諭其下曰。吾不忠不孝。何顏立天地間。欲自刎。其下俱曰。將軍何至此。吾輩當死戰。遂大破賊。己巳。京城外徧張吳三桂檄。共約士民縞素復仇。一時都人皆密製素幘。庚午。李自成率兵六萬東行。劉宗敏。李過等從之。挾太子永王。定王。吳襄自隨。太子二王元幘綠衣。各一兵抱之上馬。都人擁觀多隕涕。甲戌。李自成向永平。丁丑。吳三桂大破賊於關門。賊初破京師。精銳不過萬數。所至虛聲脅下。未常經大敵。旣飽掠。思歸。聞邊兵勁。無不寒心。自成知成敗決於一戰。益驅賊連營並進。三桂悉銳出戰。無不一當百。奮擊殺賊數千人。賊亦賈勇疊進。自成挾太子登高岡立馬觀戰。賊衆三面圍三桂兵。三桂兵東西馳突。賊散而復合。我大清兵至。繞出三桂右。所向披靡。莫當。自成策馬走。諸賊遂大潰。自蹂踐死者數萬人。諸軍分道乘之。殺其大帥五人。奪輜重無算。自成以訖。



千騎急走永平。戊寅，自成遣使赴軍中議和。三桂曰：歸我太子二王，速離京城，使鐘簾如故而後罷兵。自成請旋師如三桂言，求和三桂許之。自成拔營而西。己卯，三桂追賊於永平，又破之。賊奔竄還京師，毀京城外民居數萬間，并夷牛馬牆，稍遲者殺之。凡數萬人。三桂兵壓城，自成合兵一十八營以拒戰。三桂進攻之，連拔其八營，斬首二萬。自成殺吳襄首，以高竿懸城上，盡殺襄家三十八口。三桂披髮墜鞍，哭於地。三軍感憤，怒拔刀砍地，誓殺賊。丙戌，李自成自稱帝，卽位於武英殿，僞盜侯劉宗敏扶創出，平立不拜。曰：爾故我等夷也，僞官皆拜，宗敏不得已再拜而退。丁亥，昧爽，李自成出齊化門西走，先運薪木積宮內，縱火發礮擊毀諸宮殿，又燒九門雉樓，火光燭天。先是三桂知賊將西走，設疑兵於西山，密取酒罌數千，實以石灰，夜埋齊化門道上。上覆浮土，賊萬馬並馳而出，踐罌皆穿，馬足驚踣。後騎相壓奔，石灰迷目，不可視。疑兵遠譟以驚之，賊陣大亂。三桂望城中火作，知賊走，繞城而西，追奔三十里，賊馬羸俱重載，日行數十里，追兵至，盡棄其輜重，婦女自蘆溝至固安，百里盜甲衣服盈路，賊兵散去者又數萬。三桂徐收所棄，已逾數百萬。賊旣得脫，西走。三桂復率大兵追賊至保定，賊還兵而鬪，奮擊破之。又追破之於定州北，奪其婦女二千，獲輜重無算。招降潰賊萬餘人。自成屯真定，旣屢敗，憤極，復勒精騎擊三桂。三桂兵張兩翼以進擊，斬其大將三人，首萬級。自成大敗，還真定，益發兵攻三桂。三桂接戰，自晨至晡未決。三桂分兵疊戰，自成漸引卻。自成中流矢墜馬，掖而騎，馳還營，卽拔營西走，度故關入山西。三桂以兵逐之，及關而止。遂還軍京師。李自成自井陘西行至平陽，分兵守山西諸隘，益發關中兵西攻漢中，陷之。李自成復遣兵出潼關，攻掠河南，又遣降賊叛將馬科至四川，略保甯一路。吳三桂追賊入山西，時西部復攻。

臨洮甘肅以牽之。自成數戰不勝，遂棄山西走西安。我大清兵西伐，李自成合賊數十萬，悉銳迎戰。鐵騎衝堅而入，賊披靡，斬首數萬。劉宗敏、田見秀等俱死。賊衆大潰，棄西安走商維。丙子，自成棄陝，以兵出潼關，分軍爲八營，三道俱下，南略地至襄郟。我大清兵既定三秦，下河南入楚，取荆襄。李自成南奔辰州，將合張獻忠。獻忠已入蜀，遂留屯黔陽。部賊亡大半，然尙擁衆十餘萬，乏食，遣賊將四出抄掠。黔陽四竟，雞犬皆盡。川湖何騰蛟進攻之，自成營於羅公山，倚險築塹爲久屯計。勢彌蹙，食盡，逃者益衆。自成自將輕騎抄掠，何騰蛟伏兵邀之，大敗，殺傷幾盡。自成以數十騎突走村落中求食，邨民皆築堡自守，合圍伐鼓共擊之，自成麾左右格鬪，皆陷於淖。衆擊之，人馬俱斃。村民不知爲自成也，截其首獻。騰蛟驗之，左臚傷鏃，始知爲自成。李過聞自成死，勒兵隨赴，僅奪其屍，滅一村而還。結草爲首，以袞冕葬之。羅公山下，賊諸將奉李過爲首，改名李繡，渡湖入險山中，後改名李赤心，羣盜俱散亡。

谷應泰曰：國以民爲本，民以食爲天，故曰積貯者天下之大命也。史稱關中大祲，而三輔寇盜縱橫，周官荒政十二，而興大役以業貧民。至若青徐歲饑，樊崇以起，長垣歲凶，仙芝作亂，蓋揭竿之變，往往由於縣罄之匱也。况乃汰郵驛，減冗卒，使亡賴奸人無所得衣食，則益煽而爲亂，走死地如鶩耳。崇禎之初，銳意恭儉，東南織文，西北游徼，並行裁罷，而李自成以驛胥失職，值飢民不沾泥等倡亂延安，因往從之。又與耿如杞潰兵相合，旬月之間，衆至萬餘，推爲闖將，蓋潰兵得飢民，則嚮道旣精，飢民得潰兵，則壁壘益厚。又况延綏地連邊鎮，俗嫻弓馬，民多犷悍，秦長西陲，雄制列國，唐起靈武，終復兩京，揆之自成起事，雖屬毛賊，實則勁旅也。此時明察之官，剽銳之將，便當厚集衆師，一鼓擒滅，比之唐周上書，馬元車裂，宋賢謀

亂。鷹揚捕斬。斯爲得之。而乃養癰坐大。馴致蔓延。此豈非計之失耶。雖然自成之起。延安也。自秦入豫。由蜀躡楚。轉寇關東。僭號襄鄧。十餘年之間。曹文詔敗之於商維。陳奇瑜敗之於漢中。左光先敗之於富平。左良玉掘之於武關。賀人龍破之於靈陝。孫傅庭敗之於襄城。亦未嘗不自縛乞降。投引纒決。而究至狼奔豕突。死灰復燃者。則以號令乖方。韜鈴不飭。中朝無良平之謀。而行閒無李郭之將也。乃者車廂峽之困。自成解甲矣。而更給票免死。興平武功之捷。自成計阻矣。而乃援兵待撫。嶠函合圍之舉。自成坐斃矣。而云圍師必缺。又且得臣之猛。按劍行誅。節度之師。同日奔潰。以至嗣昌仰藥於前。傅庭陣亡於後。而天下事不可爲矣。自成乃更北攻甯夏。略定三邊。東擣居庸。長驅京邑。洎乎祿山陷都。惟事聲色。黃巢入篋。大掠資財。突令言於宜春。坐朱泚於北闕。遂使銅駝榛莽。鐘簾灰銷。自古潢池之禍。未有若斯之酷者也。嗟乎。彼自成者。非有殊才絕力。不過狡黠善騎射耳。而謀主牛金星。顧君恩輩。則井窺之智也。孽黨劉宗敏。白旺等。則瘳犬之猛也。奈何千丈之隄。潰於蟻穴。天府之險。踣於困獸哉。以予論之。假令貨賄屏絕。則將必盡材。文法便宜。則權不中制。而又有武侯以興復自任。晉公以討賊自效者。卽寇雖鴟張。不難一舉而撲滅之也。然則顛覆之禍。固當責之廟算歟。

## 卷七十九

### 甲申之變

懷宗崇禎十七年春正月朔。大風霾。占曰。風從乾起。主暴兵城破。鳳陽地震。李自成稱王於西安。僭國

號曰順。改元永昌。賊掠河東、河津、稷山、滎河、絳州一路俱陷。自成僞牒兵部約戰。言三月十日至。兵部執牒者。則京師人。自涿州還。值逆旅客。予十金代投。以爲詐。斬之。上憂寇臨朝而歎曰。卿等能無分憂哉。大學士李建泰進曰。主憂如此。臣敢不竭力。臣晉人。頗知寇中事。臣願以家財佐軍。可資數月之糧。臣請提兵西行。又曰。進士石隆願單騎走陝北。連甘肅甯夏之兵。外連羌部。召募忠勇。勸輸義餉。剿寇立功。否亦內守西河。掘亢延安。使賊不得東渡。上悅曰。卿若行。朕當傲古推轂。上欲用石隆。建泰曰。俟臣西行酌而用之。癸丑夜。星入月中。占云。星入月中。國破君亡。乙卯。上命大學士李建泰出師。行遣將禮。命駙馬都尉萬煒以特牲告太廟。上臨軒廷授建泰節劍。備法駕警蹕。御正陽門。賜宴餞之。命五府掌印侯伯內閣六部都察院掌印官及京營總協侍坐。鴻臚贊禮。御史糾儀。大漢將軍侍衛設宴作樂。上親賜卮酒曰。先生之去。如朕親行。建泰頓首起行。上目送之。良久返駕。是日大風揚沙。占曰。不利行師。建泰御肩輿。不數武。杆折。識者憂之。授進士凌駟職方司主事。隨輔臣監軍。赦李政修罪。隨輔臣軍前效用。以郭中杰爲副總兵。充督輔中軍旗鼓。西洋人湯若望隨行。修火攻水利。進士程源私於監軍凌駟曰。此行也。兼程抵太原。收拾二晉。猶可濟也。若三晉失守。無能爲矣。建泰出都。道聞山西烽火甚急。建泰家且破。因遲行。日三十里。師次涿州。營兵逃歸者三千人。行至廣宗。紳衿城守不納。攻三日破之。殺鄉紳王佐。笞知縣張宏基。是日卽移兵出城。初。建泰承上寵命。恃有家財。可佐軍需。已聞家破。進退失措。逡巡畿內而已。二月朔。上平旦視朝。忽得僞封。啓之。其詞甚悖。末云。限三月望日。至順天會同館暫繳。一時相顧失色。朝罷。遂不復問。李自成陷蒲州及汾州。懷慶不守。福王出奔。與太妃相失。遂至衛輝。依潞王。自成至太原。太原無重

兵爲守。山西巡撫蔡懋德遣牙下驍將牛勇。朱孔訓出戰。孔訓傷於礮。牛勇陷陣死。一軍皆歿。城中奪氣。賊移檄遠近。有云君非甚暗。孤立而煬蔽恆多。臣盡行私。比黨而公忠絕少。甚至賄通宮府。朝廷之威福日移。利入戚紳。閭閻之脂膏盡竭。又云公侯皆食肉執袴。而倚爲腹心。宦官皆齧糠犬豚。而借其耳目。獄囚累累。士無報禮之心。征斂重重。民有偕亡之恨。人讀之多爲扼腕。蔡懋德知事必不支。寫遺表令監紀賈士璋閒道奏京師。中軍盛應時見之。退歸。先殺其妻子。誓將死敵。初八日。風沙大起。賊乘風夜登城。懋德應時策馬赴敵死。趙布政。毛副使及府縣各官四十六員咸死之。賊屍之於城。李自成至黎城。他將陷臨晉。上下罪己。詔曰。朕嗣守鴻緒。十有七年。深念上帝陟降之威。祖宗付託之重。宵旦兢惕。罔敢怠荒。乃者災害頻仍。流氛日熾。忘累世之豢養。肆卅載之凶殘。赦之益驕。撫而輒叛。甚至有受其煽惑。頓忘敵愾者。朕爲民父母。不得而卵翼之。民爲朕赤子。不得而懷保之。坐令秦豫邱墟。江楚腥穢。罪非朕躬。誰任其責。所以使民罹鋒鏑。蹈水火。殫量以壑。積骸成邱者。皆朕之過也。使民輸芻輓粟。居送行齎。加賦多無藝之征。預徵有稱貸之苦者。又朕之過也。使民室如懸磬。田卒汙萊。望煙火而無門。號冷風而絕命者。又朕之過也。使民日月告凶。旱潦薦至。師旅所處。疫癘爲殃。上干天地之和。下叢室家之怨者。又朕之過也。至於任大臣而不法。用小臣而不廉。言官首鼠而議不清。武將驕懦而功不奏。皆由朕撫馭失道。誠感未孚。中夜以思。跼蹐無地。朕自今痛加創艾。深省夙愆。要在惜人才以培元氣。守舊制以息煩囂。行不忍之政以收人心。蠲額外之科以養民力。至於罪廢諸臣。有公忠正直。廉潔幹才。尙堪用者。不拘文武。吏兵二部確核推用。草澤豪傑之士。有恢復一郡一邑者。分官世襲。功等開疆。卽陷沒。務從之。流能舍逆反正。率

衆來歸。許赦罪立功。能擒斬闖。獻仍予通侯之賞。於戲。忠君愛國。人有同心。雪恥除凶。誰無公憤。尙懷祖宗之厚澤。助成底定之大功。思克厥愆。歷告朕意。詔下。賊前鋒已至大安驛。議京師城守。賊至忻州。官民迎降。遂攻代州。五臺官吏迎降。總兵周遇吉守代州。出奇奮擊。連戰十餘日。殺賊萬餘。賊合諸路賊進攻。遇吉兵少食盡。退守甯武關。賊陷懷慶。抵固關。分趨真定。保定。督輔李建泰兵過東光不戢。士民閉城拒守。建泰怒。留攻三日。破之。上至是始聞山西全陷。命跡訪諸王。遣內官監制各鎮。太監高起潛監甯前鎮。盧惟甯監天津。通德臨津。方正化監真定。保定。杜勳監宣府。王夢弼監順德。彰德。閻思印監大名。廣平。牛文柄監衛輝。懷慶。楊茂林監大同。李宗允監薊鎮。中協。張潭民監西協。兵部言各處物力不繼。而事權紛拏。反使督撫藉口。上不聽。真定兵叛降賊。知府邱茂華聞倣。先遣家人出城。總督徐標執茂華下獄。標摩下中軍伺標登城。晝守禦。劫標城外殺之。出茂華。茂華遂檄屬縣叛待寇。賊數騎入城。收帑籍。近京三百里寂然無言者。進魏藻德禮部尙書。文淵閣大學士。總督河道屯練往天津。進方岳貢戶部尙書。兼兵部尙書。文淵閣大學士。總督漕運屯練往濟甯。魏藻德辭新銜。允之。有言各官不可令出。出卽潛遁。遂止。藻德等不遣。詔徵天下兵勤王。命府部大臣各條戰守事宜。上候於文華殿。都察院左都御史李邦華。少詹事項煜。右庶子李明睿各言南遷及東宮監撫南京。上驟覽之。怒甚。曰。諸臣平日所言若何。今國家至此。無一忠臣義士爲朝廷分憂。而謀乃若此。夫國君死社稷。乃古今之正。朕志已定。毋復多言。吏科都給事中吳麟徵請棄山海關外甯遠前屯二城。徙吳三桂入關屯宿近郊以衛京師。廷臣皆以棄地非策。不敢主其議。前總督陝西余應桂奏賊衆號百萬。非天下全力泮之不可。天下鎮將河南左良玉。關

東吳三桂。并高傑。唐通。周遇吉。黃得功。曹友義。馬科。張天祿。馬岱。劉澤清。士國寶。劉良佑。葛汝芝。及將副邱磊。惠登相。王光恩。孔希賢。金守亮等。合之調赴軍前。會師真保之間。督撫之外。加一督師。如史可法。王永吉其人。賜以尙方。懸公侯之賞。以鼓勵之。庶賊可滅也。大學士陳演乞休。許之。賜金幣。始上憂。秦寇演謂無足慮。至是不自安。求去。寇薄甯武關。傳檄五日不下。且屠。總兵周遇吉悉力拒守。大戰擊賊萬餘人。會火藥盡。或言賊勢重可款也。遇吉曰。戰三日。殺賊且萬。若輩何怯耶。能勝之一軍。盡爲忠義。萬一不支。縛我以獻。若輩可無恙。於是開門奮擊。殺賊數千人。賊懼欲退。或爲賊策曰。我衆彼寡。但使主客分別。以十擊一。蔑不勝矣。請去帽爲識。見戴帽者擊之。遞出戰。不二日可殲也。賊引兵復進。迭戰。脫帽以自別。我兵大敗。遇吉闔室自焚。揮短刀力鬪。被流矢。牙兵且盡。見執。罵賊。賊於市磔焉。遂屠甯武。嬰稚不遺。李自成既殺遇吉。嘆曰。使守將盡周將軍者。吾安得至此。寇犯大同。兵民皆欲降。命城守不應。總兵朱三樂自刎。巡撫衛景瑗。督理糧儲部戶郎中徐有聲。朱家仕俱死之。文學李若葵闔家九人自縊。先題曰一門完節。李自成入大同。六日。殺代府宗室殆盡。留僞將張天琳守之。天琳殺僞凶暴。閱兩月。陽和軍民約鎮城軍民內應。殺天琳。二月己丑。命部院廠衛司捕各官。譏察奸宄。申嚴保甲。卷設邏卒。禁夜行。巡視倉庫草場。魏藻德請自出京議餉。不許。召兵部尙書張國維。庶吉士史可程。進士朱長治。陳川。諸生張鑾於中左門。鑾言三策。首請太子監國。南京擇耆臣輔之。宣府告急。命鎮朔將軍王承允偵寇所向。庚寅。召文武大臣科道於中極殿。問今日方略。奏對可三十餘人。有言守門乏員。當今之急。無如考選科道。餘皆練兵加餉。習聞也。是日。命內監分守九門。稽出入。京城武備積弛。禁兵皆南征。太倉久罄。至是。命襄

城伯李國楨提督城守。守西直門。各門勳臣一。卿亞二。諭文武各官輸助。初議僉民兵。魏藻德曰。民畏賊。如一人走。大事去矣。上然之。禁民上城。辛卯。督師大學士李建泰上書請駕南遷。願奉太子先行。壬辰。上召對平臺。諭閣臣曰。李建泰有疏勸朕南遷。國君死社稷。朕將何往。大學士范景文。左都御史李邦華。少詹事項煜。請先奉太子撫軍江南。兵科給事中光時亨大聲曰。奉太子往南。諸臣意欲何爲。將欲爲唐肅宗靈武故事乎。景文等遂不敢言。上復問戰守之策。衆臣默然。上嘆曰。朕非亡國之君。諸臣盡亡國之臣。爾遂拂袖起。欽天監奏帝星下移。詔封總兵吳三桂。平西伯左良玉。甯南伯唐通。定西伯黃得功。靖南伯給敕印。劉澤清。實陞一級。劉良佐。周遇吉。高傑。馬岳。馬科。姜宣。孔希貴。黃蜚。葛汝芝。高第。許定國。王承允。劉芳名。李棲鳳。曹有義。杜允登。趙光遠。卜從吉。楊御蕃。各陞署一級。督撫馬士英。王永吉。黎玉田。李希沆。分別應加實署。始棄甯遠。徵吳三桂。王永吉率兵入衛。又召唐通。劉澤清率兵入衛。澤清前命移鎮彰德。因縱掠臨清南奔。惟唐通以八千人入衛。已同太監杜之秩守居庸。賊犯保定。大學士李建泰已病。中軍郭中傑縋城降賊。兵潰。賊入保定。建泰被執。御史金毓峒守西門。賊執之。入三皇廟。見賊帥毓峒奮拳毆賊帥仆之。躍入井中死。妻王氏自經。毓峒從子振孫以武舉效力行間。登城射賊。多應弦而斃。城陷。衆解戎衣自匿。振孫手褊襠大呼曰。我御史金毓峒姪也。賊支解之。毓峒子嬰。婦陳氏。年十八。與其祖母張。母楊。嫂常。一時盡投於井。張抱孫於懷。同下。侍婢四人亦從下。乙未。命太監馬思理馳赴大同督兵援勦。李自成宿陽和。遂長驅向宣府。宣府叛將白廣恩。貽總兵姜瓖書約降。監視太監杜勳。緋袍八。鷲郊迎三十里。軍民聚謀籍籍。巡撫朱之馮懸賞勞軍守城。無一應者。三命之。咸叩頭曰。願中丞聽軍民。



納款之馮獨行巡城。見大礮。曰：汝曹試發之。可殺數百人。賊雖殺我無恨矣。衆又不應之。馮不得已乃自起。然火。兵民競挽其手。之馮乃奪士卒刀自刎。宣府軍民俱迎降於賊。鄉紳張羅彥自殺。上按籍勦戚。大璫徵其助餉。遣太監徐高諭嘉定伯周奎爲倡。奎謝無有。高泣諭再三。奎漫詞以對。高拂然起曰：外戚如此。國事去矣。多金何益。奎奏捐萬金。上少之。勒其二萬。奎密書皇后求助。后勉應以五千金。令奎以私蓄足其額。奎匿中宮所畀二千金。僅輸三千金。太監王永祚、曹化淳助至三萬五萬。王之心最富。上面諭之。僅獻萬金。諸內官各大書於門曰：此房急賣。復雜出雕鏤玩好諸物陳於市以求售。後賊拷王之心。追十五萬。他金銀器玩稱是。周奎抄見銀五十二萬。珍幣復數十萬。魏藻德首輸百金。陳演旣放未行。召入。訴清苦。百官共議捐助。勉諭至再。最後每省限額。浙江六千。山東四千。先後共二十萬。特諭上等三萬金。皆無應。惟太康伯張國紀輸二萬餘。不及也。又議前三門巨室各輸糧給軍。且贍其妻孥。使無內顧。諸巨室多不樂而止。或謂從逆官吏多非其心。請赦河南北所俘僞官以攜賊黨。丙申。大風霾。晝晦。命司禮太監王承恩提督內外京城。總督薊遼王永吉節制各鎮。俱聽便宜行事。賊警益逼。有勸上南遷者。上怒曰：卿等平日專營門戶。今日死守。夫復何言。諭兵部曰：都城守備有餘。援兵四集。何難刻期滅寇。敢有訛言惑衆。及私發家眷出城者。擒治。庚子。上召對。惟問兵餉。以舉朝無人常泣下。廷臣長策惟閉門止出入。餘無一籌。議增兵外城則內闕。增兵內城則外闕。襄城伯李國禎在事。亦不敢抗。王承恩辛丑。分營都門。設大礮。上又召對羣臣。問禦寇方略。諸臣皆矍眙不能對。廷臣舉兵部職方司員外萬元吉知兵。算任司馬。給九門守者人百錢。召前太監曹化淳同守城。南京孝陵夜哭。癸卯。風晦。寇自柳溝抵居。

庸關柳溝天塹百人可守。竟不設備。總兵唐通、太監杜之秩迎降。撫臣何謙僞死私遁。總巡馬岱自殺。其妻子疾走山海關。時京師以西諸郡縣望風瓦解。將吏或降或遁。僞權將軍移檄至京師。云十八日至幽州。會同館暫繳京師大震。詔三大營屯齊化門外。甲辰賊陷昌平州。諸軍皆降。總兵李守鐔罵賊不屈。手格殺數人。人不能執。諸賊圍之。守鐔拔刀自刎。賊焚十二陵享殿。傳倣至京師。先是上知寇倣益急。下吳麟徵請徙甯遠疏。飛檄趣三桂入關。三桂徙五十萬衆。日行數十里。是日始及關。賊騎已過昌平矣。太監高起潛棄關走西山。賊分兵掠通州糧儲。上方御殿召考選諸臣問裕餉安人。滋陽知縣黃國琦對中旨授給事中。餘以次對未及半。祕封入。上覽之色變。卽起入。諸臣立候移刻。命俱退。始知爲昌平失守也。是夜賊自沙河而進。直犯平則門。竟夜焚掠。火光燭天。京師內外城堞凡十五萬四千有奇。京營兵疫。其精銳又太監選去。登陴羸弱五六萬人。內閣數千人。守陴不充。無炊具。市飯爲餐。餉久闕。僅人給百錢。無不解體。而賊自破中原。旋收秦晉。久窺畿輔。空虛潛遣其黨輦金錢。氈罽飾爲大賈。列肆於都門。更遣奸黨挾資充衙門掾史。專刺陰事。纖悉必知。都中日遣撥馬探之。賊黨卽指示告賊。賊掠之入營。厚賄結之。撥馬多降賊。無一騎還者。有數百騎至齊化門。迤平則門而西。營兵屯近郊者詰之。曰陽和兵之勤王者。實皆賊候騎也。時人心洶洶。皆言天子南狩。有內官數十騎擁護出得勝門矣。守門皆內官爲政。卿貳勳戚不得上。乙巳昧爽。開西直門納避難者。內官坐城上。以令箭上門立啓。無敢問詰。勳戚大臣惟坐視而已。上蚤朝。召對諸臣而泣。俛首書御案十二字。以示司禮監王之心。尋拭去。漏下巳刻。急足叩城下曰。遠塵衝天。寇深矣。守城內臣使騎探之。報曰哨騎也不爲意。日且午。有五六十騎彎弓貫矢大呼開門。守

卒亟發礮斃二十騎。難民死數十人。門始閉。須臾賊大至。方報過蘆溝橋。俄攻平則。彰義等門矣。城外三大營皆潰降。火車巨礮。蒺藜鹿角皆爲賊有。賊反礮攻城。轟聲震地。京軍五月無餉。一時驅守率多不至。每堵一人多不及。諸臣方侍班。襄城伯李國禎匹馬馳闕下。汗浹露衣。內侍呵止之。國禎曰。此何時也。君臣卽求相見。不可多得矣。內臣叩之曰。守軍不用命。鞭一人起。一人復臥如故。上召入。因命內臣俱守城。譁曰。諸文武何爲。且言官止內操。我甲械俱無奈何。或曰。我輩月食五十萬。效死固當。乃請如己巳歲所派數。俱乘城。凡數千人。上括中外庫金二十萬犒軍。是日細民有痛哭輸金者。或三百金。或四百金。各授錦衣衛千戶。丙午。寇攻城。礮聲不絕。流矢雨集。仰語守兵曰。亟開門。否且屠矣。守者懼。空礮向外。不實鉛子。徒以硝燄鳴之。猶揮手示賊。賊稍退。礮乃發。賊驅居民負木石填濠。急攻我發萬人敵大礮。誤傷數十人。守者驚潰。盡傳城陷。闔城號哭奔竄。賊駕飛梯攻西直。平則德化三門。勢甚危急。太常少卿吳麟徵累土填西直門。因單騎馳入西安門。吏部侍郎沈惟炳守門曰。內有宦寺守。官百不得入。奈何。麟徵排門而入。太監王德化語麟徵曰。守城人少。奈何。請增益之。麟徵至午門。遇大學士魏藻德。止之曰。兵部調度兵餉已足。公何事。張臯耶。藻德且出閣。上方休。公安從入。麟徵流涕固請。得以非時見。藻德挽之出。是日封劉澤清。東平伯。時左諭德楊士聰。衛允文入直。語閣臣。左良玉。吳三桂俱封。而遣劉澤清。且臨清地近。可虞也。閣揭上。得封。都察院左都御史李邦華至正陽。欲登城。中貴拒之。李自成對彰義門設座。晉王代王左右席地坐。太監杜勳侍其下。城呼上人莫射。我杜勳也。可縋下一人以語。守者曰。留一人下爲質。請公上勳曰。我杜勳無所畏。何質爲。提督太監王承恩縋之上。同入見大內。盛稱賊勢重。皇上可自爲計。守陵

太監申芝秀自昌平降賊。亦縋上入見。備述賊犯上不道語。請遜位。上怒叱之。諸內臣請留勳。勳曰。有秦。晉二王爲質。不反則二王不免矣。乃縱之出。仍縋下。勳語守璫王則堯。緒憲章輩曰。吾黨富貴自在也。初。聞勳殉難。贈司禮監太監。廕錦衣衛指揮僉事。立祠。至是。方知勳固從賊爲逆也。兵部尙書張縉彥奏曰。時勢如此危急。臣屢至城闕。欲覘城上守禦。輒爲監視抑沮。今聞曹化淳。王化。成縋賊。杜勳上城。未知何意。恐有奸宄不測。章上上手書。遣縉彥上城。按之。至城內。監沮之如故。示以上傳。始登。問杜勳安在。云。昨暮上。今晨下之。已上聞。無容致詰。又曰。尙有秦。晉二王在城下。亦欲通語。縉彥曰。秦。晉二王旣降寇。如何可上。化淳拂衣去。因闔城上守卒寥寥。兵部侍郎王家彥痛哭云。賊勢如此。監視將營兵調去。李襄城處尙有十之四。家彥所守兩堵。僅一卒。語未竟。城下坎牆聲急。太監王承恩礮擊之。連斃數人。化淳。化成飲酒自若。縉彥馳至內閣。約同奏。至宮門。傳止之。上下詔親征。召駙馬都尉鞏永固。謀以家丁護太子南行。對曰。臣等安敢私蓄家丁。卽有之。何足當賊。乃罷。已。召王承恩。亟飭內員備親征。申刻。彰義門啓。蓋太監曹化淳獻城開門也。賊恣殺掠。前大學士蔣德璟宿會館。被創。上亟召閣臣入。曰。卿等知外城破乎。曰。不知。上曰。事亟矣。今出何策。俱曰。陛下之福自當亡。慮如其不利。臣等巷戰。誓不負國。命退。是夕。上不能寢。內城陷。一闕奔告。上曰。大營兵安在。李國禎何往。答曰。大營兵散矣。皇上急宜走。其人卽出。呼之不應。上卽同王承恩幸南宮。登萬歲山。望烽火燭天。徘徊踰時。回乾清宮。硃書諭內閣。命成國公朱純。臣提督內外諸軍事。來輔東宮。內臣持至閣。因命進酒。連沃數觥。嘆曰。苦我民爾。以太子永王。定王分送外戚周。田二氏。語皇后曰。大事去矣。各泣下。宮人環泣。上揮去。令各爲計。皇后頓首曰。妾事陛下十有八年。卒不聽

一語至有今日。皇后拊太子二王，慟甚。遣之出，后自經。上召公主至，年十五，歎曰：爾何生我家！左袖掩面，右揮刀斷左臂，未殊死，手慄而止。命袁貴妃自經，繫絕久之，蘇。上拔劍刃其肩，又刃所御妃嬪數人。召王承恩對飲，少頃，易靴出中南門，手持三眼槍，雜內豎數十人，皆騎而持斧，出東華門，內監守城疑有內變，施矢石相向。時成國公朱純臣守齊化門，因至其第，閹人辭焉。上太息而去，走安定門，門堅不可啓。天且曙矣，帝御前殿，鳴鐘集百官，無一至者，遂仍回南宮，登萬歲山之壽皇亭自經。亭新成，所閱內操處也。太監王承恩對縊，上披髮，御藍衣，跌左足，右朱履，衣前書曰：朕自登極十七年，逆賊直逼京師，雖朕薄德，匪躬上干天咎，然皆諸臣之誤朕也。朕死無面目見祖宗於地下，去朕冠冕，以髮覆面，任賊分裂朕屍，勿傷百姓一人。又書一行百官俱赴東宮行在，猶謂閣臣已得殊諭也。不知內臣持殊諭至閣，閣臣已散，置几上而反，文武羣臣無一人知者。丁未昧爽，天忽雨，俄微雪，須臾城陷。賊先入東直門，殺守門御史王章，守卒蟻墜。兵部侍郎張伯鯨走匿民舍，賊騎塞巷，大呼民間速獻羸馬。騎經象房橋，羣象哀鳴，淚下如雨。內臣前導，兵部侍郎王家彥自經於民舍。大學士魏藻德等未聞變，猶傳單醪金。方岳貢、范景文、方傳導至西長安門，亟還。賊千騎入正陽門，投矢令人持歸閉門得免死。於是俱門書順民。太子走詣周奎第，奎臥未起，叩門不得入，因走匿內官外舍。上之出至南宮也，使人詣懿安皇后所，勸后自裁。倉卒不得達，兩宮已自盡。宮人號泣出走，宮中大亂。懿安皇后青衣蒙頭徒步走入成國公第，尚衣監何新入宮，見長公主斷肩仆地，與宮人救之而甦。公主曰：父皇賜我死，我何敢偷生！何新曰：賊已將入，恐公主遭其辱，且至國丈府中避之。乃負之出。午刻，李自成羶笠縹衣乘烏駿馬，僞丞相牛金星、尚書宋企郊等五騎從之。時

宮中大亂。諸賊帥率其騎皆擐甲執兵先入清宮。諸宮人逸出。遇賊復入。宮人魏氏大呼曰。賊入大內。我輩必遭所污。有志者蚤爲計。遂躍入御河死。頃閒從死者積一二百人。自成自西長安門入。彎弓仰天大笑。手發一矢中坊之南偏。至承天門。自成顧盼自得。復彎弓指門榜語諸賊曰。我一矢中其中字。必一統射之不中。中天字下。自成愕然。牛金星趨而進曰。中其下。當中分天下。自成喜。投弓而笑。司禮視印太監王德化以內員三百人先迎德勝門。令仍舊任。各監局印官迎亦如之。因集選百餘人。餘皆散去。自成入宮。問帝所在。大索宮中不得。僞尙璽卿黎某進曰。此必匿民間。非重賞嚴誅不可得。今日大事不可忽也。乃下令獻帝者賞萬金。封伯爵。匿者夷族。自成登皇極殿。據黼座。牛金星檄召百官。期二十一日。俱集於朝。禁民間諱自成等字。自成同僞都督劉宗敏等數十騎入大內。太監杜之秩。曹化淳等前導。自成責其背主當斬。秩等叩首曰。識天命。故至此。自成叱去之。賊分宮嬪各三十人。牛金星軍師宋獻策等亦各數人。宮人費氏年十六。投簪井。賊鉤出之。見其姿容。爭相奪。費氏給曰。我長公主也。若不得無禮。必告汝主。羣賊擁之。見自成。自成命內官審之。非是。賞部校羅賊。羅攜出。費氏復給曰。我實天潢之胤。義難苟合。惟將軍擇吉成禮。死生惟命。賊喜。置酒極歡。費氏懷利刃。俟賊醉。斷其喉。立死。因自刎。自成大驚。令收葬之。內臣獻太子。自成留之西宮。封爲宋王。太子不爲屈。辛亥。改殯先帝。后出梓宮二。以丹漆殯先帝。黝漆殯先后。加帝翼善冠。袞玉滲金鞞。后袍帶亦如之。谷應泰曰。粵稽懷宗以戊辰卽位。而李自成諸賊卽是以歲起延安。禍本相尋。若與俱始焉。自茲以後。懷宗未明求衣。徵兵檄餉。日以討賊爲事。而自成輩蹶而復振。有同鳥獸之散。忽若鳶鳥之聚。遂使民勞板

蕩將靈妖氛。蓋至十七年之久。而黃巢直逼關門。赤眉大入內地。雖有智者。又安所謀禦敵哉。乃若正旦風霾。孝陵夜哭。恆星入月。帝曜下移。則天變見矣。又若僭號咸陽。略據太原。突入居庸。驟窺畿輔。則地險失矣。更若勤王之檄。徵者未赴。罪己之詔。聞者不感。飾賈吏於輦下。而機務盡輸。誘撥馬於營中。而偵刺鮮實。則人事去矣。當此之時。苟且以自救。忍恥以圖存者。止三策耳。余應桂請會師真保。吳麟徵請徙帥入衛。范景文。李邦華請遷國南都。此其可行者也。然而發言盈庭。是用不集者。智絀於晚圖。而事乖於窮步也。卒之北門鎖鑰。盡授貂闥。東閣鼎鑪。徒聞肉食。帑乏瓊林之聚。兵多祁父之呼。奪禁門而不啓。幸戚里而卻返。斯時虞淵日墜。空想揮戈。周鼎天移。誰能沒水。蓋至後宮賜盡。三王出奔。國破家亡。既血飛於繡襪。生人死別。又腸斷於桓山。豈非涉亂世而多艱。生皇家而不幸者乎。更可哀者。酌卮內殿。望火南宮。殺身取義。甯從青蓋之占。披髮投繯。不入景陽之井。然且朕屍可裂。民命毋殘。恨結幽泉。言存衣帶。語云。國君死社稷。又云。亡國正其終。宜乎虜虻之替御。誓欲前驅。而芟舍之大夫。相從地下也。然而致禍有由。因衰激極。彼周業衰於幽厲。不在愚狐。漢道替於桓靈。豈關蜀郡。故明不亡於武皇者。以孝宗之蘊澤厚。而明無救於懷帝者。以熹廟之留毒長也。乃論者又以善善惡惡。郭公致亂。知人則哲。帝堯所難。卽懷宗遺詔。亦以諸臣誤國。理或有然爾。

## 卷八十

### 甲申殉難

懷宗崇禎十七年三月十九日丁未。賊李自成陷京師。帝崩於煤山。大學士兼工部尚書范景文死之初。賊犯都城。景文知事不可爲。歎曰。身爲臣大。不能從疆場少樹功伐。雖死奚益。十八日召對。已不食三日矣。飲泣入告。聲不能續。翌日城陷。景文望闕再拜自經。家人解之。乃賦詩二首。潛赴龍泉巷古井死。其妾亦自經。

戶部尚書兼侍讀學士倪元璐聞難。曰。國家至此。臣死有餘責。乃衣冠向闕北謝天子。南謝母。索酒招二友爲別。酬漢壽亭侯像前。遂投繯。題几案云。南都尚可爲死。吾分也。慎勿棺衾。以志吾痛。因詔家人曰。若卽欲殮。必大行殮。方收吾屍。乃縊死。三日後賊突入見之。顏色如生。賊驚避他去。一門殉節共有十三人。左都御史李邦華聞難。歎曰。主辱臣死。臣之分也。夫復何辭。但得爲東官導一去路。死庶可無憾已矣。勢不可爲矣。乃題閣門曰。堂堂丈夫。聖賢爲徒。忠孝大節。矢死靡他。乃走文丞相祠再拜自經。祠中賊至。見其冠帶危坐。爭前執之。乃知其死。驚避去。

左副都御史施邦曜聞變。慟哭題詞於几曰。愧無半策匡時難。但有微軀報主恩。遂自縊。僕解之復蘇。邦曜叱曰。若知大義。毋久留我死。乃更飲藥而卒。

大理寺卿凌義渠聞難。以首觸柱。流血被面。盡焚其生平所著述及評騭諸書。服緋正笏。望闕拜。復南向拜訖。遺書上其父。有曰。盡忠卽所以盡孝。能死庶不辱父。乃繫帛奮身絕亢而死。

協理京營兵部右侍郎王家彥。賊犯都城。奉命守得勝門。城陷。家彥自投城下不死。折臂足。其僕掖入民舍。自縊死。賊燔民舍。焚其一臂。僕收其遺骸歸。



刑部右侍郎孟兆祥賊犯都城奉命守正陽門賊至死於門下妻何氏亦死其子進士章明收葬父屍亟歸別其妻王氏曰吾不忍大人獨死吾往從大人妻曰爾死吾亦死章明以頭搶地曰謝夫人然夫人須先死乃遣其家人盡出止留一婢在側章明視妻縊取筆作詩已復大書壁曰有悔吾夫婦屍者吾必爲厲鬼殺之妻氣絕取一扉置上加緋服又取一扉置妻左亦服緋自縊囑婢曰吾死亦置扉上遂死左諭德馬世奇是日方蚤食聞變曰當是死家人曰奈太夫人何世奇曰正恐辱太夫人耳遂作書別母侍妾朱氏李氏盛服前世奇曰若辭我去耶二妾言主人盡節吾二人亦欲盡節拜辭已並入室自縊世奇亦遂縊家人救之復蘇告曰聞聖駕已南幸矣可爲從亡計世奇不應睹二妾已死笑曰若年少遂能死乎乃朝服捧敕北面再拜取冠帶焚之於庭以司經局印置案上囑僕曰上如出幸以此上行存否則投之吏部復南向拜母端坐引帛力自縊死

左中允劉理順賊入城理順題於壁曰成仁取義孔孟所傳文信踐之吾何不然酌酒自盡其妻萬氏妾李氏及子孝廉并婢僕十八人闔門縊死賊多河南人至其居曰此吾鄉杞縣劉狀元也居鄉厚德吾軍奉李將軍令護衛公何遽死也數百人下拜泣涕而去時謂臣死君妻死夫子死父僕死主一家殉難者以劉狀元爲最

太常少卿吳麟徵奉命守西直門賊勢急同守者相繼避去麟徵遣友人書曰時事決裂一旦至此同官潛身遠害某惟致命遂志自矢而已丁未城陷徒步歸賊已據其邸因入道左三元祠時傳天子蒙塵有勸公南歸不應同官來招之降賊怒揮之戶外遂自經家人救之甦泣而請曰明日待祝孝廉至可一訣

麟徵許之。先是祝孝廉淵以奏保劉宗周被逮留京師。淵晨至。麟徵酌酒慷慨與別曰。自我登第時。夢見隱士劉宗周題文信國零丁洋詩二語於壁。數實爲之。今老矣。山河破碎。不死何爲。相對泣數行下。因作書訣家人曰。祖宗二百七十年宗社。一旦而失。身居諫垣。無所匡救。法應褫服。殮時用角巾青衫。覆以單衾。藉以布席足矣。茫茫泉路。咽咽寸心。所以瞑予目者。又不在于此也。罪臣吳麟徵絕筆。書畢投纆死之。淵爲視含殮乃去。

右庶子周鳳翔帝崩梓宮暴露東華門外。鳳翔赴哭慟絕。歸寓遺書訣父。有曰。男今日幸不虧辱此身。貽兩大人羞。吾事畢矣。罔極之恩。無以爲報。矢之來生。復作詩一首。有碧血九泉依聖主。白頭二老哭忠魂之句。向關再拜自縊。二妾從之俱死。

簡討汪偉先是聞賊漸近都城。遺書友人曰。京師單弱。不惟不能戰。亦不能守。一死外無他計也。及賊犯闕。偉恹恹累日不食。妻耿氏從容語曰。苟事不測。請從君共死。丁未城陷。偉趨吳給事甘來所約同殉難。歸與妻耿氏呼酒命酌。偉大書前人語於壁曰。志不可屈。身不可降。夫婦同死。節義成雙。爲兩纆於梁間。偉就右。耿氏就左。旣皆縊。耿氏復揮曰。止止。雖在顛沛。夫婦之秩不可失也。復解纆。正左右序而死。戶科給事中吳甘來賊薄京師。兄禮部員外泰來至寓。執甘來手泣曰。事勢至此。奈何。甘來曰。有死無二義也。城陷。傳聞聖駕南出。甘來曰。上明且決。必不輕出。乃疾趨皇城。不得入。返寓。家人進飲食。卻之。有勸甘來潛遁者。甘來曰。今不能調兵殺賊。顧欲苟全求活耶。遂作書以後事囑其兄弟。簡几上有疏草在。曰。留此恐彰君過。取火焚之。兄子家儀奔至。相與慟哭曰。我不死無以見志。汝父死無以終養。古者兄弟同

難必存其一。使皇上在。則土木袁彬。遜國程濟。皆可爲也。否則求真人於白水。起斟尋於有仍。是我雖死。猶生也。努力勉之。遂冠帶北向拜者五。南向拜者四。賦絕命詩一首。引佩帶自縊死。

監察御史王章。賊犯京師。章與給事中光時亨同巡城。至阜城門。賊緣堞而上。從人駭走。賊持刃問曰。降否。章叱之曰。不降。賊以刃築其膝。仆地。遂遇害。章子之棡。後亦死。難於閩。甚烈。與章同。

監察御史陳良謨。聞變。痛飲作詩。爲縋於梁。欲自盡。妾時氏有娠。良謨謂之曰。吾年踰五十。無子。汝幸有娠。儻生男。以延陳氏血食。汝必勉之。時氏曰。主人死。妾將誰依。與其爲賊辱。不如無子也。妾請先死。以絕君念。遂入投縋。良謨別作一縋。與之同盡。

監察御史陳純德。時提督北直學校。行部至易水。試士。未竟。聞都城賊警。卽戎裝入都。不數日。城陷。自縊死之。

四川道御史趙譔。巡視中城。捕賊諜。殺之。城陷。賊獲譔。譔瞑目大罵。賊怒。殺於白帽衚衕。太僕寺丞申佳允。聞城陷。投井死。

吏部員外郎許直。都城陷時。傳先帝從齊化門出。有客勸曰。天子南遷。公等宜扈蹕偕行。共圖光復。直唯之。旣而出門。一望曰。當此四面干戈。駕將焉往。比聞帝崩。號慟幾絕。有客從旁慰解。動以親老子幼。直曰。有兄在。吾無憂也。是夜爲書報其父。作詩六章。起拜闕已。復拜父。畢。自縊死之。一手持繩尾。一手上握神氣如生。

兵部郎中成德。賊報急。卽致書同年馬世奇曰。主憂臣辱。我等不能匡救。貽禍至此。惟有一死以報國耳。

君常忠孝夙稟諒有同心也。及帝崩，梓宮暴露東華門，德以雞酒哭奠梓宮前，賊怒，露刃脅視之，不爲動。歸寓，跪母張氏前慟哭，母曰：我知之矣。入室自縊死。妻張氏亦死。一子六歲，德撲殺之。然後自殺。兵部員外郎金鉉，賊攻城急，鉉跪母章氏前曰：兒世受國恩，職任車駕，城破義在必死，得一僻地可以藏母，幸速去。母曰：爾受國恩，我獨不受國恩耶？事急，廡下井，是吾死所。鉉慟哭，卽辭母往視事。丁未，歸至御河橋，聞城陷，鉉望寓再拜，卽投入御河，從人拯救，鉉嚙其臂，急赴深處，時河淺，俛首泥湍死之。家人報至，母章氏亦投井死。鉉妾王氏亦隨死。其弟諸生綜哭曰：母死，我必從死。然母未歸土，未敢死也。遂棺殮其母，旣葬三日，復投井而死。

光祿寺署丞于騰蛟，冠帶呼妻亦衣命服同縊死。

副兵馬使姚成，中書舍人宋天顯皆自盡。

中書舍人滕之所，阮文貴，經歷張應選，咸投御河死。儒士張世禧，二子懋賞，懋官父子俱自經死。又蔡蒲湯之瓊，見先帝梓宮過，慟哭觸石死。

襄城伯李國禎，賊李自成昇帝后梓宮於東華門外，設廠，百官過者莫進視。國禎泥首去幘，踉蹌奔赴，跪梓宮前大哭。賊執國禎，見自成，復大哭，以頭觸階，血流被面。賊衆持之，自成以好語誘國禎使降。國禎曰：有三事爾從我卽降。一，祖宗陵寢不可發。一，須葬先帝以天子禮。一，太子、二王不可害。自成悉諾之，扶出。賊以天子禮藁葬先帝於田貴妃墓，惟國禎一人斬衰徒步往葬。至陵，襄事畢，慟哭作詩數章，遂於帝后寢前自縊死之。

新樂侯劉文炳賊破外城。帝召文炳同駙馬鞏永固各率家丁二十餘人欲於崇文門突圍出。不得。乃回宮。文炳歎曰。身爲戚臣。義不受辱。不可不與國同難。其女弟適李年未三十而寡。文炳召之歸。城陷。與弟左都督文耀擇一大井。驅子孫男女及其妹十六人盡投其中。縱火焚賜第。火然。俱投火死。祖母瀛國太夫人卽帝外祖母也。年九十餘。亦投井死。

駙馬都督鞏永固從帝突圍出。不得。歸家。殺其愛馬。焚其弓刀鎧仗。大書於壁曰。世受國恩。身不可辱。時樂安公主先薨。以黃繩縛子女五人於柱。命外舉火。遂自剄從之。

太傅惠安伯張慶臻聞城陷。盡散財物與親戚。置酒一家聚飲。積薪四圍。全家燔死。

宣城伯衛時春聞變。合家赴井死。無一存者。

錦衣衛都指揮使王國興聞變。自縊死。

錦衣衛指揮同知李若珪守崇文門。城陷。作絕命詞云。死矣卽爲今日事。悲哉何必後人知。自縊死。

錦衣衛千戶高文采守宣武門。城陷。一家十七人皆自殺。屍狼籍於路。

順天府知事陳貞達自盡。

陽和衛經歷毛維張不屈死。

太監王承恩從帝於煤山。帝崩。承恩再拜慟哭。退而自縊於亭下。與大行相望。

百戶王某周鍾寓其家。百戶勸鍾死。鍾不應。出門欲降。百戶挽鍾帶至斷。鍾不聽。百戶自經。

長洲生員許琰聞京師之變。悲號欲絕。遍體書崇禎聖上四字。絕粒七日而死。

谷應泰曰。聞之君臣大義。有死無貳。忠孝大節。有死無隕。以故須漕碎體。宏演納肝。蕩陰被矢。侍中濺血。莫不氣激傾軔。志堅化碧。皜皜乎與秋日嚴霜比潔也。然而爲之君者。或智昏菽麥。恩同草芥。有若東昏在齊。屠肉沽酒。孫皓居吳。燒鋸截頂。而且軹道牽牲。冀存允喬。東堂索蜜。猶丐餘生。甚乃騎導劉聰之敗。身墜景陽之井。莫不義辱宗社。形污囚繫。然爲之臣者。猶尙奮臂不顧。蹈難如歸。辛賓之死。抱而不解。吉朗之亡。哭而彌訾。嗚呼。主辱臣死。無所逃也。况乎懷宗宵旰臨朝。唏噓畢命。公主搤胸。妃后並縊。引經死社稷。遺詔愛百姓。自古亡國正終。未有若斯之烈者。以故鼎湖弓墜。到處攀髯。望帝魂歸。自然啼血。雖穆滿之一軍皆化。田橫之五百從死。傳美殺身成仁。易稱致命遂志。蓋亦未爲過也。考其時闔門同死者。中允劉理順。新樂侯劉文炳。惠安伯張慶臻。宣城伯衛時春。駙馬鞏永固。金吾高文采是也。父與子俱死者。少司寇孟兆祥。儒生張世禧是也。母與妻子俱死者。樞部郎成德。金鉉是也。妻妾從死者。大學士范景文。左諭德馬世奇。簡討汪偉。御史陳良謨。勛丞于騰蛟是也。獨身效死者。大司農倪元璐。中丞施邦曜。廷尉凌義渠。少司馬王家彥。太常卿吳徵麟。庶子周鳳翔。給諫吳甘來。御史王章。陳純德。吏部郎許直。兵馬姚成。中書宋天顯。滕之所。阮文貴。百戶王某。知事陳貞達。經歷張應選。毛維張是也。聞難餓死者。長洲諸生許琰是也。凡此諸臣者。無論道術素殊。至性勃發。位列三階。榮邀一命。莫不椎心扼亢。追路相從。良以衣帶夙銘。馮生者固少。宮車晏駕。薨蟻者益多耳。若乃袁景倩之父子並殲。石頭江。萬里之夫妻同趨。止水甚者。一門伏劍。闔室自焚。雖祖宗豢養之恩。亦懷帝拊循之效也。論者又以生多誤國。死未酬君。夫文山開闔。宋室何功。張巡嚼齒。睢陽不守。而諸人乃以刀筆之深文。詆箕尾之毅魄。含血噴人。適以自污其口。

矣。又若李國禎斬衰送葬。絕命陵前。王承恩扶服煤山。雉經亭下。以至榮備湯之瓊。慟哭梓宮。觸石而死。抑何盡節之多也。嗚呼。石窳河西。盡有吾君之痛。風車雲馬。猶聞殺賊之聲。予蓋讀懷帝之君臣而歎其亡國之正也。雖與日月爭光可也。







編主五雲王  
庫文有萬

種千一集一第

末本事紀史明

冊二十

著泰應谷

路南河海上  
五雲王 人行發  
路南河海上  
館書印務商 所刷印  
埠各及海上  
館書印務商 所行發

版初月二十年二十二國民華中

究必印翻權作著有書此

The Complete Library

Edited by

Y. W. WONG

HISTORY OF MING DYNASTY

BY KU YING T'AI

PUBLISHED BY Y. W. WONG

THE COMMERCIAL PRESS, LTD.

Shanghai, China

1933

All Rights Reserved

Handwritten text in the top right corner, possibly a library or collection number.

